



আট-আমা-সংস্করণ-গ্রন্থমালার তৃতীয় গ্রন্থ


পল্লী-সমাজ



শ্রীশরৎচন্দ্র চট্টোপাধ্যায়



আবাদ, — ১৩২৬



ପଞ୍ଚମ ସଂସ୍କରଣ

[ସର୍ବସ୍ୱତ୍ୱ ସଂରକ୍ଷିତ]

ପ୍ରିଣ୍ଟର—ଶ୍ରୀମତୀ ସାମୁଏଲ୍ ଦାସ,
ନିଉଟେଲିନିଆ ଟ୍ରୋମ୍ପ
୨ ଗୋଲ୍ଡସାମି ଟ୍ରାଡି, କଳିକାତା।

পল্লী-সমাজ

১

বেণী ঘোষাল মুখ্যোদের অন্দরের প্রাঙ্গণে পা দিয়াই সম্মুখে এক প্রোটা রমণীকে পাইয়া প্রশ্ন করিলেন, “এই যে মাসি, রমা কই গা?” মাসী আহ্নিক করিতেছিলেন, ইঙ্গিতে রাম্মাঘর দেখাইয়া দিলেন। বেণী উঠিয়া আসিয়া রন্ধনশালার চোকাঠের বাহিরে দাঁড়াইয়া বলিলেন, “তা হ’লে রমা, কি করবে স্থির করলে?” জলন্ত উনান হইতে শস্যায়মান কড়াটা নামাইয়া রাখিয়া রমা মুখ তুলিয়া চাহিল,—“কিসের বড়দা?”

বেণী কহিলেন, “তারিণী খুন্সোর শ্রাদ্ধের কথাটা বোন। রমেশ ত কা’ল এসে হাজির হয়েছে। বাপের শ্রাদ্ধ খুব ঘটা ক’রেই করবে ব’লে বোধ হচ্ছে;—যাবে নাকি?”

রমা দুই চক্ষু বিস্ময়ে বিস্ফারিত করিয়া বলিল, “আমি যাব-তারিণী ঘোষালের বাড়ী?” বেণী ঈষৎ লজ্জিত হইয়া কহিল—“সে ত জানি দিদি! আর যেই যাক, তোরা কিছুতেই সেখানে যাবিনে। তবে, শুনুচি নাকি, ছোড়া সমস্ত বাড়ী-বাড়ী নিজে গিয়ে বলবে—বজ্জাতি বুদ্ধিতে সে তার বাপেরও ওপরে যায়—যদি আসে, তা হ’লে কি বলবে?” রমা সরোষে

জ্বাৰ দিল,—“আমি কিছুই বোল্‌বো না—বাইরে দরওয়ান তাঁর উত্তর দেবে—” পূজানিরতা মাসীর কর্ণরঞ্জে এই অত্যন্ত রুচিকর দলাদলির আলোচনা পৌছিবামাত্রই তিনি আত্মিক ফেলিয়া রাখিয়া উঠিয়া আসিলেন। বোন্‌বির কথা শেষ না হইতেই অত্যন্তপু থৈএর মত ছিট্‌কাইয়া উঠিয়া কহিলেন, “দরওয়ান কেন? আমি বলতে জানিনে? নচ্ছার ব্যাটাকে এমনি বলাই বলিব যে, বাছাধন জন্মে কখন আর মুখ্যো-বাড়ীতে মাথা গলাবে না। তারিণী ঘোষালের ব্যাটা ঢুকবে নেমতন্ন করতে আমার বাড়ীতে? আমি কিছুই ভুলিনি বেণীমাধব! তারিণী তার এই ছেলের সঙ্গেই আমার রমার বিষে দিতে চেয়েছিল। তখনও ত আর আমার যতীন জন্মায় নি—ভেবেছিল, যহ মুখ্যোর সমস্ত বিষয়টা তা হ’লে মুঠোর মধ্যে আসবে—বুঝলে না বাবা বেণি! তা যখন হ’ল না, তখন ঐ ভৈরব আচাধ্যিকে দিয়ে কি সব জপতপ তুকতাক করিয়ে মাঘের কপালে আমার এমন আগুন ধরিয়ে দিলে যে, ছ’মাস পেরুল না, বাছার হাতের নোয়া, মাথার সিঁদুর ঘুচে গেল! ছোট্ট জাত হ’য়ে চায় কি না যহ মুখ্যোর মেয়েকে বৌ করতে! তেমনি হারামজাদার মরণও হয়েছে—ব্যাটার হাতের আগুনটুকু পর্যন্ত পেলেন না! ছোট-জাতের মুখো আগুন!” বলিয়া মাসী ঘেন কুস্তি শেষ করিয়া হাঁপাইতে লাগিলেন। পুনঃ পুনঃ ছোট জাতের উল্লেখে বেণীর মুখ রান হইয়া গিয়াছিল, কারণ, তারিণী ঘোষাল তাহারই খুড়া।

রমা ইহা লক্ষ্য করিয়া মাসীকে তিরস্কারের কণ্ঠে কহিল, “কেন মাসি, তুমি মানুষের জাত নিয়ে কথা কও? জাত ত আর কারুর হাতেগড়া জিনিষ নয়? যে যেখানে জন্মেছে, সেই তার ভাল।” বেণী লজ্জিতভাবে একটুখানি হাসিয়া কহিল,—“না, রমা, মাসী ঠিক কথাই বলছেন। তুমি কত বড় কুলীনের মেয়ে, তোমাকে কি আমরা ঘরে আনতে পারি বোন! ছোট খুড়োর এ কথা মুখে আনাই বেয়াদপি। আর তুচ্ছতাকের কথা যদি বল, ত’ সে সত্যি। ছুনিয়ায় ছোট খুড়ো আর ঐ ব্যাটা ভৈরব আচার্য্যির অসাধ্য কাজ কিছু নেই। ঐ ভৈরব ত হয়েছে আজকাল রমেশের মুকব্বি।”

মাসী কহিলেন—“সে ত জানা কথা বেণি! ছোঁড়া দশ বারো বছর ত দেশে আসেনি—এতদিন ছিল কোথায়?” “কি ক’রে জানব মাসি? ছোট খুড়োর সঙ্গে তোমাদেরও যে ভাব, আমাদেরও তাই। শুন্চি, এতদিন নাকি বোম্বাই, না, কোথায় ছিল। কেউ বল্চে, ডাক্তারি পাশ ক’রে এসেচে, কেউ বল্চে, উকিল হ’য়ে এসেচে—কেউ বল্চে, সমস্তই ফাঁকি—ছোঁড়া নাকি পাঁড় মাতাল! যখন বাড়ী এসে পৌছল, তখন দুই চোখ ন্নাকি জবাফুলের মত রাঙা ছিল।” “বটে? তা হ’লে তাকে ত বাড়ী ঢুকতে দেওয়াই উচিত নয়!”—বেণী উৎসাহ ভরে মাথার একটা ঝাঁকানি দিয়া কহিল—“নয়ই ত! হাঁ রমা, তোমার রমেশকে মনে পড়ে?” নিজের হতভাগ্যের প্রসঙ্গ উঠিয়া পড়ায় রমা মনে মনে লজ্জা পাইয়াছিল। সলজ্জ মুখ হাসিয়া

কহিল,—“পড়ে বৈ কি । সে ত আমার চেয়ে বেশী বড় নয় । তা ছাড়া শীতলাতলার পাঠশালে দুজনেই পড়তাম যে । কিন্তু তার মায়ের মরণের কথা আমার খুব মনে পড়ে । খুড়ীমা আমাকে বড় ভালবাসতেন ।” মাসী আর একবার নাচিয়া উঠিয়া বলিলেন,—“তার ভালবাসার মুখে আগুন ! সে ভালবাসা কেবল নিজের কাজ হাঁসিল করবার জন্তে । তাদের মত-লবই ছিল, তোকে কোনমতে হাত-করা ।”

বেণী অত্যন্ত বিজ্ঞের মত সায় দিয়া কহিল, “তাতে আর সন্দেহ কি মাসি ! ছোট খুড়ীমাও যে,—” কিন্তু তাহার বক্তব্য শেষ না হইতেই রমা অপ্রসন্নভাবে মাসীকে বলিয়া উঠিল—“সে সব পুরণো কথায় দরকার কি মাসি ?”

রমেশের পিতার সহিত রমার যত বিবাদই থাক, তাহার জননীর সম্বন্ধে রমার কোথায় একটু যেন প্রচ্ছন্ন বেদনা ছিল । এতদিনেও তাহা সম্পূর্ণ তিরোহিত হয় নাই । বেণী তৎক্ষণাৎ সায় দিয়া বলিলেন,—“তা বটে, তা বটে । ছোটখুড়ী ভাল-মাহুষের মেয়ে ছিলেন । মা আজও তাঁর কথা উঠলে চোখের জল ফেলেন ।”

কি কথায় কি কথা আসিয়া পড়ে দেখিয়া বেণী তৎক্ষণাৎ এসকল প্রসঙ্গ চাপা দিয়া ফেলিলেন । বলিলেন, “তবে এই ত স্থির রইল দিদি, নড়চড় হবেনা ত ?” রমা হাসিল । কহিল, “বড়না, বাবা বলতেন, আগুনের শেষ, ঋণের শেষ, আর শত্রুর শেষ কখনো রাখিলেনে মা । তারিণী ঘোষাল জ্যাক্সে আমাদের কম

আলা দেয়নি—বাবাকে পর্য্যস্ত জেলে দিতে চেয়েছিল। আমি কিছুই ভুলিনি বড়দা,—যত দিন বেঁচে থাকুব, ভুলব না। রমেশ সেই শত্রুরই ছেলে ত! তা ছাড়া আমার ত কিছুতেই যাবার যো নেই। বাবা আমাদের দুই ভাইবোনকে বিষয় ভাগ ক'রে দিয়ে গেছেন বটে, কিন্তু সমস্ত বিষয় রক্ষা করবার ভার শুধু আমারই ওপর যে! আমরা ত নয়-ই, আমাদের সংস্রবে যারা আছে, তাদের পর্য্যস্ত যেতে দেব না।” একটু ভাবিয়া কহিল, “আচ্ছা বড়দা, এমন করতে পার না যে, কোনও ব্রাহ্মণ না তাদের বাড়ী যায়?” বেণী একটু সরিয়া আসিয়া গলা খাটো করিয়া বলিল, “সেই চেষ্টাই ত কর্চি বোন! তুই আমার সহায় থাকিস্, আর আমি কোন চিন্তে করিনে। রমেশকে এই কুঁয়াপুর থেকে না তাড়াতে পারি ত আমার নাম বেণী ঘোষাল নয়! তার পরে রইলাম আমি, আর ঐ শৈবরব আচাধ্য! আর তারিণী ঘোষাল নেই; দেখি এ ব্যাটাকে এখন কে রক্ষা করে।” রমা কহিল, “রক্ষে করবে রমেশ ঘোষাল। দেখো বড়দা, এই আমি ব'লে রাখলুম, শত্রুতা করতে এও কম করবে না।” বেণী আরও একটু অগ্রসর হইয়া একবার এদিক-ওদিক নিরীক্ষণ করিয়া লইয়া চৌকাঠের উপর উঁচু হইয়া বসিলেন। তার পরে কণ্ঠস্বর অত্যন্ত মৃদু করিয়া বলিলেন, “রমা, বাঁশ লুইয়ে ফেলতে চাও ত, এই বেলা। পেকে গেলে আর হবে না, তা নিশ্চয় ব'লে দিচ্ছি! বিষয়-সম্পত্তি কি ক'রে রক্ষে করতে হয়

শেখেনি—এর মধ্যে যদি না শত্রুকে নিশ্চূল করতে পারা যায়, ত ভবিষ্যতে আর যাবে না; এই কথাটা আমাদের দিবারাত্রি মনে রাখতে হবে যে, এ তারিণী ঘোষালেরই ছেলে—আর কেউ নয়।” “সে আমি বুঝি বড়দা!” “তুই না বুঝিস্ কি দিদি! ভগবান্ তোকে ছেলে গড়তে গড়তে মেয়ে গড়ে ছিলেন বৈ ত নয়। বুদ্ধিতে একটা পাকা জমিদারও তোর কাছে হটে যায়, এ কথা আমরা সবাই বলাবলি করি। আচ্ছা, কা’ল একবার আসব। আজ বেলা হ’ল যাই—” বলিয়া বেণী উঠিয়া পড়িলেন। রমা এই প্রশংসায় অত্যন্ত প্রীত হইয়া উঠিয়া দাঁড়াইয়া বিনয়-সহকারে কি একটু প্রতিবাদ করিতে গিয়াই তাহার বৃকের ভিতরে ছাঁৎ করিয়া উঠিল। প্রাঙ্গণের এক প্রান্ত হইতে অপরিচিত গম্ভীর-কণ্ঠের আহ্বান আসিল—“রাণী কই রে?” রমেশের মা এই নামে ছেলেবেলা তাহাকে ডাকিতেন। সে নিজেই এতদিন তাহা ভুলিয়া গিয়াছিল। বেণীর প্রতি চাহিয়া দেখিল, তাহার সমস্ত মুখ কালীবর্ণ হইয়া গিয়াছে। পরক্ষণেই রুদ্ধমাথা, খালি পা, উত্তরীয়টা মাথায় জড়ানো—রমেশ আসিয়া দাঁড়াইল। বেণীর প্রতি চোখ পড়িবামাত্র বলিয়া উঠিল, “এই যে বড়দা, এখানে? বেশ, চলুন, আপনি না হ’লে করবে কে? আমি সারা গাঁ আপনাকে খুঁজে বেড়াচ্ছি! কৈ, রাণী কোথায়?” বলিয়াই কবাটের স্মৃখে আসিয়া দাঁড়াইল। পলাইবার চেষ্টা নাহি, রমা ঘাড় হেঁট করিয়া রহিল। রমেশ মুহূর্ত-

মাত্র তাহার প্রতি দৃষ্টিপাত করিয়া মহা বিস্ময় প্রকাশ করিয়া বলিয়া উঠিল—“এই যে! আরে ইস্, কত বড় হয়েছিস্ রে? ভাল আছিস্?” রমা তেমনি অধোমুখে দাঁড়াইয়া রহিল। হঠাৎ কথা কহিতেই পারিল না। কিন্তু রমেশ একটুখানি হাসিয়া তৎক্ষণাৎ কহিল, “চিন্তে পাচ্ছিস্ ত রে? আমি তোদের রমেশ দা!” এখনও রমা মুখ তুলিয়া চাহিতে পারিল না। কিন্তু, মৃদু-কণ্ঠে প্রশ্ন করিল, “আপনি ভাল আছেন?”

“হাঁ ভাই, ভাল আছি। কিন্তু, আমাকে ‘আপনি’ কেন রমা?” বেণীর দিকে চাহিয়া একটুখানি মলিন হাসি হাসিয়া বলিল, “রমার সেই কথাটি আমি কোন দিন ভুলতে পারিনি বড়দা! যখন মা মারা গেলেন, ও তখন ত খুব ছোট। সেই বয়সেই আমার চোখ মুছিয়ে দিয়ে বলেছিল, ‘রমেশ দা, তুমি কেঁদ না, আমার মাকে আমরা দুজনে ভাগ ক’রে নেব।’ তোর সে কথা বোধ করি মনে পড়ে না রমা, না? আচ্ছা, আমার মাকে মনে পড়ে ত?” কথাটা শুনিয়া রমার ঘাড় যেন লজ্জায় আরও ঝুঁকিয়া পড়িল। সে একটিবারও ঘাড় নাড়িয়া জানাইতে পারিল না যে, খুড়ীমাকে তাহার খুব মনে পড়ে। রমেশ বিশেষ করিয়া রমাকে উদ্দেশ্য করিয়াই বলিতে লাগিল—“আর ত সম্মত নেই, মাঝে শুধু তিনটি দিন বাকী, যা কবুবার ক’রে দাও ভাই, যাকে বলে একান্ত নিরাশ্রয়, আমি তাই হয়েই তোমাদের দোরগোড়ায়

এসে দাঁড়িয়েচি। তোমরা না গেলে এতটুকু ব্যবস্থা পর্য্যন্তও
কবুতে পার্চি না।”

মাসী আসিয়া নিঃশব্দে রমেশের পিছনে দাঁড়াইলেন।
বেণী অথবা রমা কেহই যখন একটা কথাও জবাব দিল না,
তখন তিনি স্তম্ভের দিকে সরিয়া আসিয়া রমেশের মূখপানে
চাহিয়া বলিলেন, “তুমি বাপু, তারিণী ঘোষালের ছেলে না?”
রমেশ এই মাসীটিকে ইতিপূর্বে দেখেন নাই; কারণ, সে গ্রাম-
ত্যাগ করিয়া যাইবার পরে ইনি রমার জননীর অন্ত্রের উপ-
লক্ষ্যে সেই যে মুখুয্যে বাড়ী ঢুকিয়াছিলেন, আর বাহির হন-
নাই। রমেশ কিছু বিস্মিত হইয়াই তাঁহার দিকে চাহিয়া
রহিল। মাসী বলিলেন, “না হ’লে এমন বেহায়া পুরুষমানুষ
আর কে হবে? যেমন বাপ তেমনি ব্যাটা। বলা নেই, কথা
নেই, একটা গেরস্তর বাড়ীর ভেতর ঢুকে উৎপাত করতে সরম
হয় না তোমার?” রমেশ বুদ্ধিজ্ঞানের মত কাঁঠ হইয়া চাহিয়া
রহিল। “আমি চল্লুম” বলিয়া বেণী ব্যস্ত হইয়া সরিয়া পড়িলেন।
রমা ঘরের ভিতর হইতে বলিল, “কি বোক্চ মাসী, তুমি নিজের
কাছে যাও না—” মাসী মনে করিলেন, তিনি বোন্ঝির
প্রচ্ছন্ন ইঙ্গিতটা বুঝিলেন। তাই কণ্ঠস্বরে আরও একটু বিষ-
মিশাইয়া কহিলেন, “নে, রমা, বকিসনে। যে কাজ করতেই
হবে, তাতে আমার তোদের মত চক্কলজ্ঞা হয় না। বেণীর
অমন ভয়ে পালানোর কি দরকার ছিল? ব’লে গেলেই ভ
হ’ত, আমরা বাপু তোমার গমস্তাও নই, খাস্ তালুকের প্রজাও

নই যে, তোমার কৰ্ম্ববাড়ীতে জল তুলতে, ময়দা মাথতে যাব। তারিণী মরেচে, গাঁ শুদ্ধ লোকের হাড় জুড়িয়েচে ; এ কথা আমাদের ওপর বরাত দিয়ে না গিয়ে নিজে ওর মুখের ওপর ব'লে গেলেই ত পুরুষ-মানুষের মত কাজ হ'ত।" রমেশ তখনও নিষ্পন্দ অসাড়ের মত দাঁড়াইয়া রহিল। বস্তুতঃই এ সকল কথা তাহার একান্ত হৃৎস্বপ্নেরও অগোচর ছিল। ভিতর হইতে রান্নাঘরের কবাটের শিকলটা বান্ধন করিয়া নড়িয়া উঠিল। কিন্তু কেহই তাহাতে মনোযোগ করিল না। মাসী রমেশের নির্ঝাক ও অত্যন্ত পাংশুবর্ণ মুখের প্রতি চাহিয়া পুনরপি বলিলেন, "যাই হোক, বামুনের ছেলেকে আমি চাকর দরওয়ান দিয়ে অপমান করাতে চাইনে,—একটু হুঁস কোরে কাজ কর বাপু,—যাও। কচি খোকাটি নও যে, ভদ্রলোকের বাড়ীর ভেতর ঢুকে আবদার ক'রে বেড়াবে! তোমার বাড়ীতে আমার রমা কখন পা ধুতেও যেতে পারবে না, এই তোমাকে আমি ব'লে দিলুম।"

হঠাৎ রমেশ যেন নিম্নোখিতের মত জাগিয়া উঠিল, এবং পরক্ষণেই তাহার বিস্তৃত বক্ষের ভিতর হইতে এমনি গভীর একটা নিঃশ্বাস বাহির হইয়া আসিল যে, সে নিজেও সেই শব্দে সচকিত হইয়া উঠিল। ঘরের ভিতর কবাটের অন্তরালে দাঁড়াইয়া রমা মুখ তুলিয়া চাহিয়া দেখিল। রমেশ একবার বোধ করি ইতস্ততঃ করিল, তাহার পরে, রান্নাঘরের দিকে উদ্দেশ্য করিয়া কহিল, "যখন যাওয়া

হতেই পারে না, তখন তার উপায় কি ! কিন্তু, আমি ত এত কথা জান্তাম না—না জেনে যে উপদ্রব ক’রে গেলাম, সে আমাকে মাপ করো রাণি !” বলিয়া ধীরে ধীরে চলিয়া গেল। ঘরের ভিতর হইতে এতটুকু সাড়া আসিল না। যাহার কাছে ক্ষমা-ভিক্ষা করা হইল, সে যে অলক্ষ্যে নিঃশব্দে তাহার মুখের দিকে চাহিয়া রহিল, রমেশ তাহা জানিতেও পারিল না। বেগী তৎক্ষণাৎ ফিরিয়া আসিয়া দাঁড়াইল। সে পলায় নাই, বাহিরে লুকাইয়া অপেক্ষা করিতেছিল মাত্র। মাসীর সহিত চোখাচোখি হইতেই তাহার সমস্ত মুখ আহ্লাদে ও হাসিতে ভরিয়া গেল, সরিয়া আসিয়া কহিল, “হাঁ, শোনালে বটে মাসি ! আমাদের সাধ্যই ছিল না, অমন ক’রে বলা ! এ কি চাকর দরওয়ানের কাজ রমা ? আমি আড়ালে দাঁড়িয়ে দেখ্লাম কি না, ছোঁড়া মুখখানা যেন আঘাটের মেঘের মত ক’রে বা’র হয়ে গেল ! এই ত—ঠিক হ’ল ! মাসী ক্ষম্ম অভিমানের স্বরে বলিলেন, “খুব ত হ’ল জানি ; কিন্তু এই ছোটো মেয়েমাহুষের ওপর ভার না দিয়ে, না স’রে গিয়ে, নিজে ব’লে গেলেই ত আরও ভাল হ’ত ! আর নাই যদি বলতে পারতে আমি কি বল্লাম তাকে, দাঁড়িয়ে থেকে শুনে গেলে না কেন বাছা ? অমন স’রে পড়া উচিত কাজ হয়নি।” মাসীর কথার ঝাঁজে বেগীর মুখের হাসি মিলাইয়া গেল। সে যে এই অভিযোগের কি সাক্ষ্য দিবে, তাহা ভাবিয়া পাইল না। কিন্তু অধিকক্ষণ ভাবিতে হইল না, হঠাৎ রমা ভিতর

হইতে তাহার জবাব দিয়া বসিল ; এতক্ষণ সে একটি কথাও কহে নাই । কহিল, “তুমি যখন নিজে বলেছ মাসি, তখন সেই ত সকলের-চেয়ে ভাল হয়েছে । যে যতই বলুক না কেন, এত-খানি বিষ জিভ দিমে ছড়াতে তোমার মত কেউ ত পেয়ে উঠত না !” মাসী এবং বেণী উভয়েই যার-পর-নাই বিস্ময়াপন্ন হইয়া উঠিলেন । মাসী রান্নাঘরের দিকে ফিরিয়া কহিলেন, “কি বল্লি লা ?” “কিছু না । আস্থিক করতে বসে ত সাতবার উঠলে—যাও না, ওটা সেরে ফেল না, রান্নাবান্না কি হবে না ?” বলিতে বলিতে রমা নিজেও বাহির হইয়া আসিল এবং কাহাকেও কোন কথা না বলিয়া বারান্দা পার হইয়া ও দিকের ঘরে গিয়া প্রবেশ করিল । বেণী শুষ্কমুখে চুপি চুপি জিজ্ঞাসা করিল, “ব্যাপার কি মাসি ?” “কি ক’রে জানুব বাছা ? ও রাজ-রাণীর মেজাজ বোঝা কি আমাদের দাসীবাঁদীর কৰ্ম্ম ?” বলিয়া ক্রোধে, ক্ষোভে, তিনি মুখখানা কালীবর্ণ করিয়া তাঁহার পূজার আসনে গিয়া উপবেশন করিলেন, এবং বোধ করি ষা মনে মনে ভগবানের নাম করিতেই লাগিলেন । বেণী ধীরে ধীরে প্রস্থান করিলেন ।

২

এই কুঁয়াপুরের বিষয়টা অজ্ঞিত হইবার সম্বন্ধে একটু ইতিহাস আছে, তাহা এইখানে বলা আবশ্যক । প্রায় শতবর্ষ পূর্বে মহাকুলীন বলরাম মুখুয্যে, তাঁহার পিতা বলরাম

ঘোষালকে সঙ্গে করিয়া, বিক্রমপুর হইতে এদেশে আসেন। মুখ্যো শুধু কুলীন ছিলেন না, বুদ্ধিমানও ছিলেন। বিবাহ করিয়া বর্দ্ধমান রাজসরকারে চাকরি করিয়া, এবং আরও কি কি করিয়া, এই বিষয়টুকু হস্তগত করেন। ঘোষালও এই দিকেই বিবাহ করেন। কিন্তু পিতৃশ্রম শোধ করা ভিন্ন আর তাহার কোন ক্ষমতাই ছিল না; তাই, দুঃখে কটেই তাঁহার দিন কাটিতেছিল। এই বিবাহ উপলক্ষ্যেই নাকি দুই মিতায় মনো-মালিন্ত ঘটে। পরিশেষে তাহা এমন বিবাদে পরিণত হয় যে, এক গ্রামে বাস করিয়াও বিশ বৎসরের মধ্যে কেহ কাহারও মুখদর্শন করেন নাই। বলরাম মুখ্যো যে দিন মারা গেলেন, সে দিনেও ঘোষাল তাঁহার বাটীতে পা দিলেন না। কিন্তু তাঁহার মরণের পরদিন অতি আশ্চর্য্য কথা শুনা গেল। তিনি নিজের সমস্ত বিষয় চুল-চিরিয়া অর্দ্ধেক ভাগ করিয়া, নিজের পুত্র ও পিতার পুত্রগণকে দিয়া গিয়াছেন। সেই অবধি এই কুঁয়াপুরের বিষয় মুখ্যো ও ঘোষালবংশ ভোগদখল করিয়া আসিতেছে। ইহারা নিজেরাও জমিদার বলিয়া অভিমান করিতেন, গ্রামের লোকেও অস্বীকার করিত না। যখনকার কথা বলিতেছি, তখন ঘোষালবংশও ভাগ হইয়াছিল। সেই বংশের ছোট-তরফের তারিণী ঘোষাল মকদমা-উপলক্ষ্যে জেলায় গিয়া দিন ছয়েক পূর্বে হঠাৎ যে দিন, আদালতের ছোটবড় পাঁচসাতটা মূলভূমি মকদমার শেষকালের প্রতি আক্ষেপ না করিয়া, কোথাকার কোন অজানা আদালতের

মহামাত্ত শমন মাথায় করিয়া নিঃশব্দে প্রস্থান করিলেন, তখন তাঁহাদের কুঁয়াপুর গ্রামের ভিতরে ও বাহিরে একটা হলস্থল পড়িয়া গেল। বড়-তরফের কর্তা বেণী ঘোষাল খুড়ার স্বত্বতে গোপনে আরামের নিঃশ্বাস ফেলিয়া বাড়া ফিরিয়া আসিলেন, এবং আরও গোপনে দল পাকাইতে লাগিলেন, কি করিয়া খুড়ার আগামী আকের দিনটা পণ্ড করিয়া দিবেন। দশ বৎসর খুড়া-ভাইপোয় মুখ দেখাদেখি ছিল না। বহু বৎসর পূর্বে তারিণীর গৃহ শূণ্য হইয়াছিল। সেই অবধি পুত্র রমেশকে তাহার মামার বাড়ী পাঠাইয়া দিয়া তারিণী বাটীর ভিতরে দাসদাসী এবং বাহিরে মকদ্দমা লাইয়াই কাল কাটাইতেছিলেন। রমেশ রুড়কি-কলেজে এই দুঃসংবাদ পাইয়া পিতার শেষ-কর্তব্য সম্পন্ন করিতে স্তব্ধকাল পরে কাল' অপরাহ্নে তাহার শূণ্যগৃহে আসিয়া উপস্থিত হইয়াছিল।

কর্ম্বাড়া। মধ্যে শুধু দুটো দিন বাকী। বৃহস্পতি-বারে রমেশের পিতৃশ্রাদ্ধ। দুই একজন করিয়া ভিন্ন গ্রামের মুকব্বিরা উপস্থিত হইতেছেন। কিন্তু নিজেদের কুঁয়াপুরের কেন যে কেহ আসে না, রমেশ তাহা বুঝিয়াছিল,—হয় ত, শেষ পর্য্যন্ত কেহ আসিবেই না, তাহাও জানিত। শুধু ভৈরব আচার্য্য ও তাহার বাড়ীর লোকেরা আসিয়া কাজ-কর্ম্মে যোগ দিয়াছিল। স্বগ্রামস্থ ব্রাহ্মণদিগের পদধূলির আশা না থাকিলেও, উদ্যোগ-আয়োজন রমেশ বড়লোকের মতই

করিতেছিল। আজ অনেকক্ষণ পর্য্যন্ত রমেশ বাড়ীর ভিতরে কাজকর্মে ব্যস্ত ছিল। কি জন্তে বাহিরে আসিতেই দেখিল, ইতিমধ্যে জন-দুই প্রাচীন ভদ্রলোক আসিয়া, বৈঠকখানার বিছানায় সমাগত হইয়া ধূমপান করিতেছেন। সম্মুখে আসিয়া সবিনয়ে কিছু বলিবার পূর্বেই, পিছনে শব্দ শুনিয়া ফিরিয়া দেখিল, এক অতি বৃদ্ধ ৫৬টি ছেলেমেয়ে লইয়া কাসিতে কাসিতে বাড়ী ঢুকিলেন। তাঁহার কাঁধের উপর মলিন উত্তরীয়, নাকের উপর একঘোড়া ভাঁটার মত মস্ত চস্মা,—পিছনে দড়ি দিয়া বাঁধা শাদা চুল, শাদা গৌক—তামাকের ধূঁয়ায় তাম্রবর্ণ। অগ্রসর হইয়া আসিয়া তিনি সেই ভীষণ চস্মার ভিতর দিয়া রমেশের মুখের দিকে মুহূর্তকাল চাহিয়া বিন্দু-বাক্যব্যয়ে কাঁদিয়া ফেলিলেন। রমেশ চিনিলা না, ইনি কে, কিন্তু যেই হোন, ব্যস্ত হইয়া কাছে আসিয়া তাঁহার হাত ধরিতেই, তিনি ভাঙা-গলায় বলিয়া উঠিলেন,—“না বাবা রমেশ, তারিণী যে এমন ক’রে ফাঁকি দিয়ে পালাবে, তা স্বপ্নেও জানিনে, কিন্তু আমারও এমন চাটুঘো-বংশে জন্ম নয় যে, কারু ভয়ে মুখ দিয়ে মিথ্যে কথা বেরুবে। আসবার সময় তোমার বেণী ঘোষালের মুখের সামনে ব’লে এলুম, আমাদের রমেশ যেমন প্রাঙ্গের আয়োজন করুচে, এমন করাস্কুলোয় যাক, এ অঞ্চলে কেউ চোখেও দেখেনি।” একটু থামিয়া বলিলেন, “আমার নামে অনেক শালা অনেক রকম ক’রে তোমার কাছে লাগিয়ে যাবে বাবা’ কিন্তু এটা নিশ্চয়

জেনো, এই ধর্মদাস শুধু ধর্মেরই দাস, আর কারো নয়।” এই বলিয়া বৃদ্ধ সত্য-ভাষণের সমস্ত পৌরুষ আত্মসাৎ করিয়া লইয়া, গোবিন্দ গাঙ্গুলীর হাত হইতে হুকুটা ছিনিয়া লইয়া তাহাতে এক টান দিয়াই প্রবলবেগে কাসিয়া ফেলিলেন।

ধর্মদাস নিতান্ত অত্যুক্তি করে নাই। উদ্যোগ-আয়োজন ঘেরূপ হইতেছিল, এদিকে সেরূপ কেহ করে নাই। কলিকাতা হইতে ময়রা আসিয়াছিল, তাহারা প্রাঙ্গণের একধারে ভিঘান চড়াইয়াছিল। সেদিকে পাড়ার কতকগুলো ছেলেমেয়ে ভিড় করিয়া দাঁড়াইয়াছিল। কান্ধালীদের বস্ত্র দেওয়া হইবে। শ্রীমণ্ডলের ও-ধারের বারান্দায় অল্পগত ভৈরব আচার্য্য থান ফাড়িয়া পাট করিয়া, গাদা করিতেছিল—সে দিকেও জন-কয়েক লোক থাবা পাতিয়া বসিয়া এই অপব্যয়ের পরিমাণ হিসাব করিয়া, মনে মনে রমেশের নিক্কুজিতার জন্য তাহাকে গালি পাড়িতেছিল। গরীব-দুঃখী সংবাদ পাইয়া অনেক দূরের পথ হইতেও আসিয়া জুটিতেছিল। লোকজন, প্রজা-পাঠক বাড়ী পরিপূর্ণ করিয়া, কেহ কলহ করিতেছিল, কেহ বা মিছামিছি শুধু কোলাহল করিতেছিল। চারিদিকে চাহিয়া বায়রাহল্য দেখিয়া, ধর্মদাসের কাসি আরও বাড়িয়া গেল।

প্রত্যুত্তরে রমেশ সঙ্কুচিত হইয়া ‘না না’ বলিয়া আরও কি বলিতে যাইতেছিল; কিন্তু ধর্মদাস হাত নাড়িয়া থামাইয়া

দিয়া ঘড় ঘড় করিয়া কত কি বলিয়া ফেলিলেন ; কিন্তু কাসির ধমকে তাহার একটি বর্ণও বোঝা গেল না ।

গোবিন্দ গাজুলী সর্কাগ্রে আসিয়াছিলেন । সুতরাং ধর্মদাস যাহা বলিয়াছিল, তাহা বলিবার সুবিধা তাঁহারই সর্কাপেক্ষা অধিক থাকিয়াও নষ্ট হইয়াছে ভাবিয়া তাঁহার মনে মনে ভারি একটা ক্ষোভ জন্মিতেছিল । তিনি এ সুযোগ আর নষ্ট হইতে দিলেন না । ধর্মদাসকে উদ্দেশ্য করিয়া তাড়াতাড়ি বলিয়া উঠিলেন,—“কা’ল সকালে, বুঝ্লে ধর্মদাস দা, এখানে আসব ব’লে বেরিয়েও আসা হ’ল না—বেণীর ডাকাডাকি—‘গোবিন্দ খুড়ো, তামাক খেয়ে যাও ।’ একবার ভাবলুম, কাজ নেই—তার পরে মনে হ’ল, ভাবখানা বেকীস দেখেই যাই না । বেণী কি বললে, জান বাবা রমেশ ! বলে, খুড়ো, বলি তোমরা ত রমেশের মুকুবি হয়ে দাঁড়িয়েচ’ কিন্তু জিজ্ঞেস করি, লোকজন খাবে-টাবে ত ?

আমি বা ছাড়ি কেন ? তুমি বড়লোক আছ না আছ, আমার রমেশও কারো চেয়ে খাটো নয়—তোমার ঘরে ত এক মুঠো চি’ড়ের পিত্তোশ কারু নেই ।—বললুম, বেণীবাবু, এই ত পথ, একবার কান্ধালী বিদেয়টা দাঁড়িয়ে দেখো ।’ কালকের ছেলে রমেশ, কিন্তু বুকের পাটা ত বলি একে ! এতটা বয়স হ’ল, এমন আয়োজন কখনও চোখে দেখিনি ! কিন্তু, তাও বলি ধর্মদাস দা, আমাদের সাধ্যই বা কি ! যার কাজ তিনিই ওপর থেকে করাতেন । তারিশী-দা শাপল্লট দিকপাল ছিলেন

বৈ ত নয় !” ধর্মদাসের কিছুতেই কাসি থামে না, সে কাসি-তেই লাগিল, আর তাহার মুখের সাম্নে গাঙ্গুলী মশাই বেশ বেশ কথাগুলি এই অপরিপক্ব তরুণ জমিদারটিকে বলিয়া যাইতে লাগিলেন দেখিয়া, ধর্মদাস আরও ভাল বলিবার চেষ্টা যেন আকুল-বিকুল করিতে লাগিল।

গাঙ্গুলী বলিতে লাগিলেন, “তুমি ত আমার পর নও বাবা, —নিতান্ত আপনার। তোমার মা যে আমার একেবারে সাক্ষাৎ পিসুভূত বোনেব মামাত ভগিনী। রাধানগরের ঝাড়ুঘো-বাড়ী—সে সব তারিণী দা’ জানুতেন। তাই যে কোন কাজকর্ম—মামলা-মোকদ্দমা করতে, সাক্ষী দিতে—ডাক গোবিন্দকে।” ধর্মদাস প্রাণপণবলে কাসি থামাইয়া থিঁচাইয়া উঠিলেন; “কেন বাজে বকিস্ গোবিন্দ ? খক্—খক্—খক্—আমি আজকের নয়—না জানি কি ? সে বছর সাক্ষী দেবার কথায় বল্লি, ‘আমার জুতো নেই, খালি-পায়ে যাই কি ক’রে ? খক্—খক্—তারিণী অমনি আড়াই-টাকা দিয়ে একজোড়া জুতো কিনে দিলে। তুই সেই পায়ে দিয়ে বেণীর হয়ে সাক্ষী দিয়ে এলি ! খক্—খক্—খক্—খক্—” গোবিন্দ চক্ষু রক্তবর্ণ করিয়া কহিল, “এলুম ?”

“এলিনে ?”

“দূর মিথ্যাবাদী !”

“মিথ্যাবাদী তোর বাবা !”

গোবিন্দ তাহার ভাঙা-ছাতি হাতে করিয়া লাফাইয়া

উঠিল—“তবে রে শালা!”—ধর্মদাস তাহার বাঁশের লাঠি উচাইয়া ধরিয়া ছকার দিয়াই প্রচণ্ডভাবে কাসিয়া ফেলিল। রমেশ শশব্যস্তে উভয়ের মাঝখানে আসিয়া পড়িয়া স্তম্ভিত হইয়া গেল। ধর্মদাস লাঠি নামাইয়া কাসিতে কাসিতে বসিয়া পড়িয়া বলিল, “ও-শালার সম্পর্কে আমি বড়-ভাই হই কি না, তাই শালার আক্কেল দেখ—”

“ওঃ, শালা আমার বড় ভাই!” বলিয়া গোবিন্দ গাঙ্গুলীও ছাতি গুটাইয়া বসিয়া পড়িল।

সহরের ময়রারা ভিড়ান ছাড়িয়া চাহিয়া রহিল। চতুর্দিকে যাহারা কাজকর্মে নিযুক্ত ছিল, চোঁচামিচি শুনিয়া তাহারা তামাসা দেখিবার জন্য স্বমুখে ছুটিয়া আসিল; ছেলেমেয়েরা খেলা ফেলিয়া হাঁ করিয়া মজা দেখিতে লাগিল; এবং এই সমস্ত লোকের দৃষ্টির সম্মুখে রমেশ লজ্জায়, বিস্ময়ে, হতবুদ্ধির মত স্তব্ধ হইয়া দাঁড়াইয়া রহিল। তাহার মুখ দিয়া একটা কথাও বাহির হইল না। কি এ? উভয়েই প্রাচীন, ভদ্রলোক—ব্রাহ্মণ-সন্তান! এত সামান্য কারণে এমন ইতরের মত গালি-গালাজ করিতে পারে? বারান্দায় বসিয়া ভৈরব কাপড়ের থাক দিতে দিতে সমস্তই দেখিতেছিল, শুনিতেছিল। এখন উঠিয়া আসিয়া রমেশকে উদ্দেশ্য করিয়া কহিল, “প্রায় শ’- চারেক কাপড় ত হ’ল, আরও চাই কি?” রমেশের মুখ দিয়া হঠাৎ কথাই বাহির হইল না। ভৈরব রমেশের অভি-ভূতভাব লক্ষ্য করিয়া হাসিল। মুছ অল্পযোগের স্বরে কহিল, “ছিঃ

গাঙ্গুলী মশাই ! বাবু একেবারে অবাক্ হয়ে গেছেন । আপনি কিছু মনে করবেন না বাবু, এমন ঢের হয় । বৃহৎ কাজকর্মের বাড়ীতে কত ঠেঙা-ঠেঙি, রক্তারক্তি পর্য্যন্ত হ'য়ে যায়—আবার যে-কে সেই হয় । নিন্ উঠুন, চাটুষ্যে মশাই,—দেখুন দেখি, আরও থান ফাড়া কি না ?” ধর্মদাস জবাব দিবার পূর্বেই গোবিন্দ গাঙ্গুলী সোৎসাহে শিরশালনপূর্ব্বক খাড়া হইয়া উঠিয়া বলিলেন, “হয়ই ত ! হয়ই ত ! ঢের হয় ! নইলে বিরদ কর্ম বলেচে কেন ? শাস্তরে আছে, লক্ষ কথা না হলে বিয়েই হয় না যে ! সে বছর তোমার মনে আছে ভৈরব, যত্ন মুখুয্যে মশায়ের কন্তা রমার গাছ পিতিষ্ঠের দিনে সিধে নিয়ে রাঘব ভট্টচাষিতে, হারাণ চাটুষ্যেতে মাথা-ফাটাফাটি হ'য়ে গেল ! কিন্তু আমি বলি ভৈরব ভায়া, বাবাজীর এ কাজটা ভাল হচ্ছে না । ছোটলোকদের কাপড় দেওয়া, আর ভস্মে ঘি ঢালা এক কথা । তার চেয়ে বামুনদের একজোড়া, আর ছেলেদের একখানা ক'রে দিলে নাম হ'ত । আমি বলি বাবাজী সেই যুক্তিই করুন, কি বল ধর্মদাস-দা ?” ধর্মদাস ঘাড় নাড়িতে নাড়িতে বলিলেন, “গোবিন্দ মন্দ কথা বলেনি, বাবাজী । ও ব্যাটারদের হাজার দিলেও নাম হবার জো নেই । নইলে আর ওদের ছোটলোক বলেছে কেন ? বুঝলে না বাবা রমেশ ?” এখন পর্য্যন্ত রমেশ নিঃশব্দে ছিল । এই বঙ্ক-বিতরণের আলোচনায় সে একেবারে যেন মগ্ন হইয়া পড়িল । ইহার স্মৃতি-কুস্মৃতি

সম্বন্ধে নহে ; এখন এইটাই তাহার সর্বাপেক্ষা অধিক বাঞ্ছিত
যে, ইহারা যাহাদিগকে ছোটলোক বলিয়া ডাকে, তাহাদেরই
সহস্র চক্ষুর সম্মুখে এইমাত্র যে এত বড় একটা লজ্জাকর কাণ্ড
করিয়া বসিল, সে জ্ঞাত ইহাদের কাহারও মনে এতটুকু ক্ষোভ
বা লজ্জার কণামাত্রও নাই। ভৈরব মুখপানে চাহিয়া আছে
দেখিয়া, রমেশ সংক্ষেপে কহিল, “আরও দু’শ কাপড় ঠিক ক’রে
রাখুন।” “তা নইলে কি হয় ? ভৈরব ভায়া, চল, আমিও যাই—
তুমি একা আর কত পারবে বল ?” বলিয়া কাহারও সম্মতির
অপেক্ষা না করিয়া গোবিন্দ উঠিয়া বস্ত্ররাশির নিকট গিয়া
বসিল। রমেশ বাটীর ভিতরে যাইবার উপক্রম করিতেই
ধর্মদাস তাহাকে একপাশে ডাকিয়া লইয়া চুপিচুপি অনেক কথা
কহিল। রমেশ প্রত্যুত্তরে মাথা নাড়িয়া সম্মতি-জ্ঞাপন করিয়া
ভিতরে চলিয়া গেল। কাপড় গুছাইতে গুছাইতে গোবিন্দ
গান্ধুলী আড়তোথে সমস্ত দেখিল। “কৈ গো, বাবাজী কোথায়
গো ?” বলিয়া একটি শীর্ণকায় মুণ্ডিতশ্মশ্রু প্রাচীন ব্রাহ্মণ প্রবেশ
করিলেন। ইহার সঙ্গেও গুটিতিনেক ছেলে-মেয়ে। মেয়েটি
সকলের বড়। তাহারই পরণে শুধু একখানি অতি জীর্ণ ডুরে-
কাপড়। বালক দু’টি কোমরে এক-একগাছি ঘুনসি ব্যতীত
একেবারে দিগম্বর। উপস্থিত সকলেই মুখ তুলিয়া চাহিল।
গোবিন্দ অভ্যর্থনা করিল—“এস দীনুদা, বোসো। বড় ভাগিয়া
আমাদের যে, আজ তোমার পায়ের ধূলা পড়ল। ছেলেটা
একা সারা হয়ে যায়, তা’ তোমরা—” ধর্মদাস গোবিন্দের

প্রতি কটমট করিয়া চাহিল। সে ক্রক্ষেপমাত্র না করিয়া কহিল, “তা তোমরা ত কেউ এ দিক্ মাড়াবে না, দাদা,”—বলিয়া তাঁহার হাতে ছঁকাটা তুলিয়া দিল। দীন্না ভট্টাচার্য আসন গ্রহণ করিয়া দণ্ড ছঁকাটায় নিরর্থক গোটাছুই টান দিয়া বলিলেন, “আমি ত ছিলাম না ভায়া—তোমার বোঠাকুণকে আনুতে তাঁর বাপের বাড়ী গিয়েছিলুম। বাবাজী কোথায়? শুন্চি নাকি ভারি আয়োজন হচ্ছে? পথে আসতে ও-গাঁয়ের হাটে শুনে এলুম, থাইয়ে দাইয়ে ছেলে বুড়োর হাতে ষোলখানা ক’রে লুচি আর চার-জোড়া ক’রে সন্দেশ দেওয়া হবে।” গোবিন্দ গলা খাটো করিয়া কহিল, “তা’ ছাড়া হয় ত একখানা ক’রে কাপড়ও। এই যে রমেশ বাবাজী, তাই দীন্না-দা’কে বলছিলুম বাবাজী—তোমাদের পাঁচজনের বাপ-মায়ের আশীর্ব্বাদে ঘোগাড়-সোগাড় একরকম করা ত যাচ্ছে, কিন্তু বেণী একেবারে উঠে পড়ে লেগেছে। এই আমার কাছেই ছ’বার লোক পাঠিয়েছে। তা আমার কথা না হয় ছেড়েই দিলে, রমেশের সঙ্গে আমার যেন নাড়ীর টান রয়েছে; কিন্তু এই যে দীন্না-দা, ধর্ম্মদাস-দা, এঁরাই কি, বাবা তোমাকে ফেলতে পারবেন? দীন্না-দা ত পথ থেকে শুন্তে পেয়ে ছুটে আসছেন। ওরে ও বর্গীচরণ, তামাক দে না রে। বাবা রমেশ, একবার এদিকে এস দেখি, একটা কথা ব’লে নিই!” নিভৃতে ডাকিয়া লইয়া গোবিন্দ ফিস্ফিস করিয়া জিজ্ঞাসা করিল, “ভেতরে বুঝি ধর্ম্মদাস-গিন্নী এসেছে? খবরদার, খবরদার, অমন কাজটি

কোরো না বাবা ! বিটলে বামুন যতই ফোস্লাক, ধর্মদাস-গিন্নীর হাতে ভাঁড়ারের চাবিটা বি দিয়ে না বাবা, কিছুতে দিয়ে না—ঘি, ময়দা, তেল, হুন অর্ধেক সরিয়ে ফেলরে। তোমার ভাবনা কি বাবা ? আমি গিয়েই তোমার মামীকে পাঠিয়ে দেব। সে এসে ভাঁড়ারের ভার নেবে, তোমার একগাছি কুটো পর্যন্ত লোকসান্ হবে না।” রমেশ ঘাড় নাড়িয়া “যে আজ্ঞে” বলিয়া মৌন হইয়া রহিল। তাহার বিস্ময়ের অবধি নাই। ধর্মদাস যে তাঁহার গৃহিণীকে ভাঁড়ারের ভার লইবার জন্ত পাঠাইয়া দিবার কথা এত গোপনে কহিয়াছিল, গোবিন্দ ঠিক তাহাই আনন্দ করিল কিরূপে ?

উলঙ্গ শিশু-ছোটো ছুটিয়া আসিয়া দীলু-দা’র কাঁধের উপর লিয়া পড়িল, “বাবা, সন্দেশ খাব।” দীলু একবার রমেশের প্রতি, একবার গোবিন্দের প্রতি চাহিয়া কহিল, “সন্দেশ কোথায় পাব রে ?” “কেন, ঐ যে হচ্ছে” বলিয়া তাহারা ওদিকের ময়রাঘের দেখাইয়া দিল।

“আমরাও দাঁদা মশাই”—বলিয়া নাকে কাঁদিতে কাঁদিতে আরও তিন চারিটি ছেলে-মেয়ে ছুটিয়া আসিয়া বৃদ্ধ ধর্মদাসকে ঘিরিয়া ধরিল। “বেশ ত, বেশ ত” বলিয়া রমেশ ব্যস্ত হইয়া অগ্রসর হইয়া আসিল, “ও আচাঘি মশাই, বিকেলবেলায় ছেলেরা সব বাড়ী থেকে বেরিয়েছে, খেয়ে ত আসেনি ; ওহে ও কি নাম তোমার ? নিয়ে এসো ত ঐ খালটা এদিকে।” ময়রা সন্দেশের খালা লইয়া আসিবামাত্র ছেলেরা উপুড় হইয়া

পড়িল ; বাঁটিয়া দিবার অবকাশ দেয় না, এমনি ব্যস্ত করিয়া তুলিল। ছেলেদের খাওয়া দেখিতে দেখিতে দীননাথের শুকদৃষ্টি সজল ও তীব্র হইয়া উঠিল—“ওরে ও খেঁদি, খাচ্চিস্ ত, সন্দেশ হয়েছে কেমন বল্ দেখি ?” “বেশ বাবা।” বলিয়া খেঁদি চিবাইতে লাগিল। দীর্ঘ মুহূর্ৎ হাসিয়া ঘাড় নাড়িয়া বলিলেন, “হাঃ, তোদের আবার পছন্দ ? মিষ্টি হলেই হ’ল। হাঁ হে কারিকর, এ কড়াটা কেমন নামালে ? কি বল, গোবিন্দ ভায়া, এখনো একটু রোদ আছে ব’লে মনে হচ্ছে না ?”

ময়রা কোন দিকে না চাহিয়াই তৎক্ষণাৎ কহিল, “আজ্ঞে, আছে বৈ কি ! এখনো ঢের বেলা আছে, এখনো সন্ধ্যা আহ্নিকের—”

“তবে কৈ, দাও দেখি একটা গোবিন্দ ভায়াকে চেখে দেখুক, কেমন কল্‌কাতার কারিকর তোমরা ! না না, আমাকে আবার কেন ? তবে আধখানা—আধখানার বেশী নয়। ওরে ও ষষ্টিচরণ, একটু জল আন্ দিকি বাবা, হাতটা ধুয়ে ফেলি—” রমেশ ডাকিয়া বলিয়া দিল, “অম্নি বাড়ীর ভেতর থেকে গোটা-চারেক থালাও নিয়ে আসিস্ ষষ্টিচরণ।” প্রভুর আদেশমত ভিতর হইতে গোটাতিনেক রেকাবি ও জলের গেলাস আসিল এবং দেখিতে দেখিতে এই বৃহৎ থালার অর্ধেক মিষ্টান্ন এই তিনটি প্রাচীন ম্যালেরিয়াক্রিষ্ট, ক্লশ, সদ-ব্রাহ্মণের জলযোগে নিঃশেষিত হইয়া গেল। “হাঁ, কল্‌কাতার কারিকর বটে ! কি বল ধর্মদাস-দা ?” বলিয়া দীননাথ

কঙ্কনিঃশ্বাস ত্যাগ করিলেন। ধর্মদাস-দা'র তখনও শেষ হয় নাই, এবং যদিচ তাঁহার অব্যক্ত কণ্ঠস্বর সন্দেশের তাল ভেদ করিয়া সহজে মুখ দিয়া বাহির হইতে পারিল না, তথাপি বোঝা গেল, এ বিষয়ে তাঁহার মতভেদ নাই। “হাঁ, ওস্তাদি হাত বটে” বলিয়া গোবিন্দ সকলের শেষে হাত ধুইবার উপক্রম করিতেই ময়রা সবিনয়ে অনুরোধ করিল, “যদি কষ্টই করুলেন, ঠাকুর মশাই, তবে মিহিদানাটাও অমনি পরখ ক'রে দিন।” “মিহিদানা ? কৈ, আন দেখি বাপু ?” মিহিদানা আসিল এবং এতগুলি সন্দেশের পরে এই নূতন বস্ত্রটির সদ্যবহার দেখিয়া রমেশ নিঃশব্দে চাহিয়া রহিল। দীননাথ মেয়ের প্রতি হস্ত প্রসারিত করিয়া কহিলেন, “ওরে ও খেঁদি, ধরু দিকি মা, এই ছটো মিহিদানা।” “আমি আর খেতে পারুব না বাবা !” “পারবি, পারবি। এক ঢোক জল খেয়ে গলাটা ভিজিয়ে নে দিকি, মুখ মেয়ে গেছে বৈ ত নয় ! না পারিস্। আঁচলে একটা গেরো দিয়ে রাখ্, কা'ল সকালে খাস্। হাঁ বাপু, খাওয়ালে বটে ! যেন অমৃত ! তা' বেশ হয়েছে। মিষ্টি বুঝি হ'রকম করলে বাবাজী ?” রমেশকে বলিতে হইল না। ময়রা সোৎসাহে কহিল, “আজ্ঞে না, রসগোল্লা, ক্ষীরমোহন—”

“আঁ, ক্ষীরমোহন ? কৈ, সে ত বা'র করলে না বাপু ?” বিস্মিত রমেশের মুখের পানে চাহিয়া দীননাথ কহিল, “খেয়ে-ছিলুম বটে, রাধানগরের বোসেন্দে'র বাড়ীতে। আজও যেন মুখে লেগে রয়েছে। বল্লে বিশ্বাস করবে না বাবাজী, ক্ষীরমোহন

থেতে আমি বড় ভালবাসি।” রমেশ হাসিয়া একটুখানি ঘাড় নাড়িল। কথাটা বিশ্বাস করা তাহার কাছে অত্যন্ত কঠিন বলিয়া মনে হইল না। রাখাল কি কাজে বাহিরে যাইতেছিল। রমেশ তাহাকে ডাকিয়া কহিল, “ভেতরে বোধ করি আচাখ্যা মশাই আছেন; যা ত রাখাল, কিছু ক্ষীরমোহন তাঁকে আনতে ব’লে আয় দেখি।” সন্ধ্যা বোধ করি উত্তীর্ণ হইয়াছে। তথাপি ব্রাহ্মণেরা ক্ষীরমোহনের আশায় উৎসুক হইয়া বসিয়া আছেন। রাখাল ফিরিয়া আসিয়া বলিল, “আজ আর ভাঁড়ারের চাবি খোলা হবে না বাবু!” রমেশ মনে মনে বিরক্ত হইল। কহিল, “বল্ গে, আমি আনতে বলছি।”

গোবিন্দ গাঙ্গুলী রমেশের অসন্তোষ লক্ষ্য করিয়া চোক ঘুরাইয়া কহিল, “দখ্লে দীন্না দা ভৈরবের আকেল? এ যে দেখি, মায়ের চেয়ে মাসীর বেশী দরদ। সেইজন্তেই, আমি বলি—” তিনি কি বলেন, তাহা না শুনিয়াই রাখাল বলিয়া উঠিল—“আচাখ্যা মশাই কি করবেন? ও বাড়ী থেকে গিন্নীমা এসে ভাঁড়ার বন্ধ করেছেন যে।” ধর্মদাস এবং গোবিন্দ উভয়েই চমকিয়া উঠিল—“কে, বড়-গিন্নী?” রমেশ সবিস্ময়ে জিজ্ঞাসা করিল, “জ্যাঠাইমা এসেছেন?” “আজ্ঞে হাঁ, তিনি এসেই ছোট বড় দুই ভাঁড়ারই তালাবন্ধ ক’রে ফেলেছেন।” বিস্ময়ে, আনন্দে, রমেশ দ্বিতীয় কথাটি না বলিয়া দ্রুতপদে ভিতরে চলিয়া গেল।

৩

“জ্যাঠাইমা ?” ডাক শুনিয়া বিশ্বেশ্বরী তাঁড়ারঘর হইতে বাহিরে আসিলেন। বেগীর বয়সের সঙ্গে তুলনা করিলে তাহার জননীর বয়স পঞ্চাশের কম হওয়া উচিত নয়; কিন্তু দেখিলে কিছুতেই চল্লিশের বেশী বলিয়া মনে হয় না। রমেশ নির্নিমেষ-চক্ষে চাহিয়া রহিল। আজও সেই কাঁচাসোনার বর্ণ। একদিন যে রূপের খ্যাতি এ অঞ্চলে প্রসিদ্ধ ছিল, আজও সেই অনিন্দ্য-সৌন্দর্য্য তাঁহার নিটোল, পরিপূর্ণ দেহটিকে বর্জ্জন করিয়া দূরে যাইতে পারে নাই। মাথার চুলগুলি ছোট করিয়া ছাঁটা, স্তম্ভের দুই একগাছি কুঞ্চিত হইয়া কপালের উপর পড়িয়াছে। চিবুক, কপোল, গুষ্ঠাধর, ললাট, সবগুলি যেন কোন বড় শিল্পীর বহুবস্ত্রের, বহুসাধনার ফল। সব চেয়ে আশ্চর্য্য তাঁহার দুটি চক্ষুর দৃষ্টি। সেদিকে ক্ষণকাল চাহিয়া থাকিলে সমস্ত অন্তঃকরণ যেন মোহাবিষ্ট হইয়া আসিতে থাকে।

এই জ্যাঠাইমা রমেশকে এবং বিশেষ করিয়া তাহার পরলোকগতা জননীকে একসময় বড় ভালবাসিতেন। বধু-বয়সে যখন ছেলেরা হয় নাই—শাশুড়ী-ননদের যত্নগায় লুকাইয়া বসিয়া এই দুটি জায়ে যখন একযোগে চোখের জল ফেলিতেন—তখন এই স্নেহের প্রথম-গ্রন্থি-বন্ধন হয়। তার পরে, গৃহ-বিচ্ছেদ, মামলা-মকদ্দমা, পৃথক্-হওয়া, কত রকমের ঝড়ঝাপটা এই দুটি সংসারের উপর দিয়া বহিয়া গিয়াছে; বিবাদের

উত্তাপে বাঁধন শিথিল হইয়াছে ; কিন্তু, একেবারে বিচ্ছিন্ন হইতে পারে নাই। বহুবর্ষ পরে সেই ছোট বোয়ের ভাঁড়ারঘরে ঢুকিয়া, তাহারি হাতের সাজানো সেই সমস্ত বহু পুরাতন হাঁড়ি-কলসির পানে চাহিয়া, জ্যাঠাইমার চোখ দিয়া জল ঝরিয়া পড়িতেছিল। রমেশের আশ্রানে যখন তিনি চোখ মুছিয়া বাহির হইয়া আসিলেন, তখন সেই দুটি আরক্ত আর্দ্র চক্ষু-পল্লবের পানে চাহিয়া রমেশ ক্ষণকালের জন্য বিস্ময়াপন্ন হইয়া রহিল। জ্যাঠাইমা তাহা টের পাইলেন। তাহাতেই, বোধ করি, এই সন্ত-পিতৃহীন রমেশের প্রতি দৃষ্টিপাত করিতেই তাহার বুকের ভিতরটা ~~বেগে~~ ~~কঁদাকা~~ করিয়া উঠিল, তাহার লেশমাত্র তিনি বাহিরে প্রকাশ পাইতে দিলেন না। বরং একটুখানি হাসিয়া বলিলেন, “চিন্তে পারিস্, রমেশ ?” জবাব দিতে গিয়া রমেশের ঠোঁট কাঁপিয়া গেল। মা মারা গেলে, যতদিন না সে মামার বাড়ী গিয়াছিল, ততদিন, এই জ্যাঠাইমা তাহাকে বৃকে করিয়া রাখিয়াছিলেন এবং কিছুতে ছাড়িতে চাহেন নাই। সেও মনে পড়িল ; এবং এও মনে হইল, সেদিন ওবাড়ীতে গেলে জ্যাঠাইমা বাড়ী নাই বলিয়া দেখা পর্য্যন্ত করেন নাই। তার পর, রমাদের বাটীতে বেণীব সাক্ষাতে এবং অসাক্ষাতে তাহার মাসীর নিরতিশয় কঠিন তির-স্কারে সে নিশ্চয় বুঝিয়া আসিয়াছিল, এ গ্রামে আপনার বলিতে তাহার আর কেহ নাই। বিশ্বেশ্বরী রমেশের মুখের প্রতি মুহূর্তকাল চাহিয়া থাকিয়া বলিলেন, “ছি, বাবা, এ সময়ে শক্ত

হ'তে হয়।" তাঁহার কণ্ঠস্বরে কোমলতার আভাসমাত্র যেন ছিল না। রমেশ নিজেকে সামলাইয়া ফেলিল। সে বুঝিল, যেখানে অভিমানের কোন মর্যাদা নাই, সেখানে অভিমান প্রকাশ পাওয়ার মত বিড়ম্বনা সংসারে অল্পই আছে। কহিল, "শক্ত আমি হয়েছি, জ্যাঠাইমা! তাই যা পারতুম, নিজেই করতুম; কেন তুমি আবার এলে?" জ্যাঠাইমা হাসিলেন। কহিলেন, "তুই ত আমাকে ডেকে আনিস্নি, রমেশ, যে, তোকে তার কৈফিয়ৎ দেব? তা শোন বলি। কাজকর্ম হবার আগে আর আমি ভাঁড়ার থেকে খাবার-টাবার কোনো জিনিস বার হ'তে দেব না। যাবার সময় ~~খাবার-টাবার~~ চাবি তোরা হাতেই দিয়ে যাব, আবার কা'ল এসে ~~খাবার-টাবার~~ হাত থেকেই নেব। আর কারু হাতে দিস্নি যেন! হাঁ রে, সে দিন তোরা বড়দার সঙ্গে দেখা হয়েছিল?" প্রশ্ন শুনিয়া রমেশ দ্বিধায় পড়িল। সে ঠিক বুঝিতে পারিল না, তিনি পুত্রের ব্যবহার জানেন কি না। একটু ভাবিয়া কহিল, "বড়দা তখন ত বাড়ী ছিলেন না।" প্রশ্ন করিয়াই জ্যাঠাইমার মুখের উপর একটা উদ্বেগের ছায়া আসিয়া পড়িয়াছিল; রমেশ স্পষ্ট দেখিতে পাইল, তাহার এই কথায় সেই ভাবটা যেন কাটিয়া গিয়া মুখখানি প্রসন্ন হইয়া উঠিল। হাসিমুখে, স্নেহ-অনুযোগের কণ্ঠে বলিলেন, "আ আমার কপাল! এই বুঝি? হাঁ রে, দেখা হয়নি বলি আর যেতে নেই? আমি জানি রে, সে তোদের ওপর সন্দেহ নয়; কিন্তু, তোরা কাজ ত তোকে করা চাই! যা,

একবার ভাল ক’রে বল্গে যা, রমেশ ! সে বড় ভাই, তার কাছে হেঁট হতে তোর কোন লজ্জা নেই । তা’ ছাড়া এটা মাতৃস্নেহের এমনি দুঃসময় বাবা, যে, কোন লোকের হাতে পারে ধরে মিট্‌মাট ক’রে নিতেও লজ্জা নেই । লক্ষ্মী মাণিক আমার, যা একবার—এখন বোধ হয়, সে বাড়ীতেই আছে ।” রমেশ চুপ করিয়া রহিল । এই আগ্রহাতিশয্যের হেতুও তাহার কাছে স্পষ্ট হইল না, মন হইতে সংশয়ও ঘুচিল না । বিশ্বেশ্বরী আরও কাছে সরিয়া আসিয়া মৃদুস্বরে কহিলেন, “বাইরে যাঁরা ব’সে আছেন, তাঁদের আমি তোর চেয়ে জানি । তাঁদের কথা শুনিব্‌নে । আর আমার সঙ্গে তোর বড়দাদার কাছে একবার যাবি চল্ ।” রমেশ ঘাড় নাড়িয়া বলিল, “না জ্যাঠাইমা, সে হবে না । আর বাইরে যাঁরা ব’সে আছেন, তাঁরা যাই হোন, তাঁরাই আমার সকলের চেয়ে আপনাত ।” সে আরও কি কি বলিতে যাইতেছিল, কিন্তু হঠাৎ জ্যাঠাইমার মুখের প্রতি লক্ষ্য করিয়া সে মহাবিস্ময়ে চুপ করিল । তাহার মনে হইল, জ্যাঠাইমার মুখখানি যেন সহসা চারিদিকের সজ্জার চেয়েও বেশি মলিন হইয়া গিয়াছে । খানিক পরেই তিনি একটা নিঃশ্বাস ফেলিয়া বলিলেন, “আচ্ছা, তবে তাই । যখন তার কাছে যাওয়া হতেই পাব্‌বে না, তখন আর সে নিয়ে কথা কয়ে কি হবে । যা হোক, তুই কিছু ভাবিস্‌নে বাবা, কিছুই আটকাবে না । আমি আবার খুব ভোরেই আসব ।” বলিয়া বিশ্বেশ্বরী তাঁহার দাসীকে ডাকিয়া লইয়া খিড়কির দ্বার দিয়া

ধীরে ধীরে বাহির হইয়া গেলেন। বেণীর সহিত রমেশের ইতিমধ্যে দেখা হইয়া যে একটা কিছু হইয়া গিয়াছে, তাহা তিনি বুঝিলেন। তিনি যে পথে চলিয়া গেলেন, সেই দিকে চাহিয়া কিছুক্ষণ নিঃশব্দে দাঁড়াইয়া থাকিয়া, রমেশ স্নানমুখে বধন বাহিরে আসিল, তখন গোবিন্দ ব্যগ্র হইয়া জিজ্ঞাসা করিল, “বাবাজী, বড় গিন্নী এসেছিলেন না?” রমেশ ঘাড় নাড়িয়া বলিল, “হাঁ।” “শুনলুম, তাঁড়ার বন্ধ ক’রে চাবি নিয়ে গেলেন না।” রমেশ তেমনি মাথা নাড়িয়া জবাব দিল। কারণ, অবশেষে কি মনে করিয়া তিনি যাইবার সময় তাঁড়ারের চাবি নিজেই লইয়া গিয়াছিলেন। “দেখলে ধর্মদাস-দা, যা বলেচি তাই। বলি, মংলবটা বুঝলে বাবাজী?” রমেশ মনে মনে অত্যন্ত ক্রুদ্ধ হইল। কিন্তু নিজের নিরুপায় অবস্থা স্মরণ করিয়া সহ্য করিয়া চূপ করিয়া রহিল। দরিদ্র দীর্ঘ ভট্‌চায় তখনও যায় নাই। কারণ, তাহার বুদ্ধি-শুদ্ধি ছিল না। সে ছেলে-মেয়ে লইয়া যাহার দয়ায় পেট ভরিয়া সন্দেশ খাইতে পাইয়াছিল, তাহাকে আন্তরিক ছুটো আশীর্বাদ না করিয়া, সকলের সম্মুখে উচ্চকণ্ঠে তাহার সাতপুরুষের স্তব-স্ততি না করিয়া আর ঘরে ফিরিতে পারিতেছিল না। সে ব্রাহ্মণ নিরীহভাবে বলিয়া ফেলিল, “এ মংলব বোঝা আর শক্ত কি ভায়া? তালাবন্ধ ক’রে চাবি নিয়ে গেচেন, তার মানে তাঁড়ার আর কারো হাতে না পড়ে। তিনি সমস্তই ত জানেন।” গোবিন্দ বিরক্ত হইয়াছিল; নিকোঁধের কথায় জলিয়া

উঠিয়া তাহাকে একটা ধমক দিয়া কহিল, “বোঝো না, সোঝো না, তুমি কথা কও কেন বল ত। তুমি এ সব ব্যাপারের কি বোঝ, যে মানে করিতে এসেচ?” ধমক খাইয়া দীন্নার নির্বুদ্ধিতা আরও বাড়িয়া গেল। সেও উষ্ণ হইয়া জবাব দিল, “আরে, এতে বোঝাবুঝিটা আছে কোন্‌খানে? শুনচ না, গিন্নী-মা স্বয়ং এসে বন্ধ ক’রে চাবি নিয়ে গেছেন? এতে কথা কইবে আবার কে?” গোবিন্দ আগুন হইয়া কহিল, “ঘরে যাও না ভট্টাচার্য। যে জন্তে ছুটে এসেছিলে—গুপ্তিবর্গ মিলে খেলে, বাঁধলে, আর কেন, ক্ষীরমোহন পরশু খেয়ো, আজ আর হবে না। এখন যাও, আমাদের ঢের কাজ আছে।” দীন্না লজ্জিত ও সঙ্কুচিত হইয়া পড়িল। রমেশ ততোধিক কুণ্ঠিত ও ক্রুদ্ধ হইয়া উঠিল। গোবিন্দ আরও কি বলিতে যাইতেছিল, কিন্তু সহসা রমেশের শাস্ত অথচ কঠিন কঠোর থামিয়া গেল—“আপনার হ’ল কি গাঙুলি মশাই? যাকে-তাকে এমন খামকা অপমান করুচেন কেন?” গোবিন্দ ভৎসিত হইয়া প্রথমটা বিস্মিত হইল। কিন্তু পরক্ষণেই শুষ্ক-হাসি হাসিয়া বলিল, “অপমান আবার কাকে করলুম বাবাজী? ভাল, ওকেই জিজ্ঞাসা ক’রে দেখ না, ঠিক সত্যি কথাটি বলেচি কি না। ও ডালে-ডালে বেড়ায় ত আমি পাতায় পাতায় বেড়াই যে! দেখলে ধর্মদাস-দা, দীনে বামনার আশ্পর্ক? আচ্ছা—” ধর্মদাস-দা কি দেখিল, তাহা সেই জানে, কিন্তু রমেশ এই লোকটার নিলজ্জতা

ও স্পর্ধা দেখিয়া অবাক হইয়া গেল। তখন দীক্ষু রমেশের দিকে চাহিয়া নিজেই বলিল, “না বাবা, গোবিন্দ সত্য কথাই বলেছেন। আমি বড় গরীব, সে কথা সবাই জানে। ওঁদের মত আমার জমি-জমা চাষবাস কিছুই নেই। এক রকম চেয়েচিন্তে, ভিক্ষেশিক্ষে করেই আমাদের দিন চলে। ভালজিনিষ ছেলেপিলেদের কিনে খাওয়াবার ক্ষমতা ত ভগবান দেন নি—তাই, বড় ঘরে কাজকর্ম হ’লে ওরা খেয়ে বাঁচে। কিছু মনে কোরো না, বাবা, তারিণী দাদা বেঁচে থাকতে তিনি আমাদের খাওয়াতে বড় ভালবাসতেন। তাই, আমি তোমাকে নিশ্চয় বল্চি বাবা, আমরা যে আশ মিটিয়ে খেয়ে গেলুম, তিনি ওপর থেকে, দেখে খুসীই হয়েছেন।” হঠাৎ দীক্ষুর গভীর, শুষ্ক চোখদুটো জলে ভরিয়া উঠিয়া, টপ্‌টপ্‌ করিয়া দুফোটা সকলের স্মৃথেরে ঝরিয়া পড়িল। রমেশ মুখ ফিরাইয়া দাঁড়াইল। দীক্ষু তাহার মলিন ও শতচ্ছিন্ন উত্তরীয়প্রান্তে অশ্রু মুছিয়া ফেলিয়া বলিল, “শুধু আমিই নই বাবা! এদিকে আমার মত দুঃখী-গরীব যে যেখানে আছে, তারিণীদার কাছে, হাত পেতে কেউ কখনো অমনি ফেরেনি। সে কথা কে আর জানে বল? তাঁর ডান হাতের দান বাঁ হাতটাও টের পেত না যে। আর তোমাদের জালাতন করুব না। নে, মা, খেঁচি ওঠ, হরিধন, চল বাবা ঘরে যাই, আবার কাল সকালে আসব। আর কি বলব, বাবা রমেশ, বাপের মত হও, দীর্ঘজীবী হও।”

রমেশ তাঁহার সংজ্ঞা সঙ্গে পথে আসিয়া আদ্রিকণ্ঠে কহিল,
 “ভট্টাচার্য্য মশাই, এই ছুটো তিনটে দিন আমার ওপর দয়া
 রাখবেন। আর বলতে সঙ্কোচ হয়, কিন্তু এ বাড়ীতে হরি-
 ধনের মাঘের যদি পায়েয় ধুলো পড়ে ত বড় ভাগ্য ব’লে মনে
 করব।” ভট্টাচার্য্য মুশায় ব্যস্ত হইয়া নিজের দুই হাতের মধ্যে
 রমেশের দুই হাত চাপিয়া ধরিয়া কঁাদ-কঁাদ হইয়া বলিলেন,
 “আমি বড় দুঃখী, বাবা রমেশ, আমাকে এমন ক’রে বললে যে
 লজ্জায় ম’রে যাই।”

ছেলেমেয়ে সঙ্গে করিয়া বুদ্ধ ধীরে ধীরে চলিয়া গেল।
 রমেশ ফিরিয়া আসিয়া মুহূর্ত্তের জন্য নিজের রুঢ় কথা স্মরণ
 করিয়া গাঙুলী মশায়কে কিছু বলিবার চেষ্টা করিতেই, তিনি
 খামাইয়া দিয়া উদ্দীপ্ত হইয়া বলিয়া উঠিলেন, “এ যে আমার
 নিজের কাজ, রমেশ, তুমি না ভাকলেও যে আমাকে নিজে
 এসেই সমস্ত করতে হ’ত। তাই ত এসেছি ; ধর্ম্মদাস-দা’ আর
 আমি দুই ভায়ে ত তোমার ডাকবার অপেক্ষা রাখিনি, বাবা !”
 ধর্ম্মদাস এইমাত্র তামাক খাইয়া কাসিতেছিল। লাঠিতে ভর দিয়া
 কাঁড়াইয়া কাসির ধমকে চোখ-মুখ রাঙা করিয়া, হাত ঘুরাইয়া
 বলিল, “বলি শোন রমেশ, আমরা বেণী ঘোষাল নই। আমাদের
 জন্মের ঠিক আছে।” তাহার কুৎসিত কথায় রমেশ চমকাইয়া
 উঠিল। কিন্তু আর রাগ করিল না। এই অত্যন্ত সময়ের মধ্যেই
 সে বুঝিয়াছিল, ইহারা শিক্ষা ও অভ্যাসের দোষে অসঙ্কোচে
 কত বড় গর্হিত কথা যে উচ্চারণ করে, তাহা জানেও না।

জ্যাঠাইমার সঙ্গেই অহুরোধ এবং তাঁহার ব্যথিত মুখ মনে করিয়া রমেশ ভিতরে ভিতরে পীড়া অহুভব করিতেছিল। সকলে প্রস্থান করিলে সে বড়দা'র কাছে যাইবার জন্ত প্রস্তুত হইল। বেণীর চণ্ডীমণ্ডপের বাহিরে আসিয়া যখন উপস্থিত হইল, তখন রাত্রি আটটা। ভিতরে যেন একটা লড়াই চলিতেছে। গোবিন্দ গাঙ্গুলীর হাঁকা-হাঁকিটাই সব চেয়ে বেশী। বাহির হইতেই তাহার কানে গেল, গোবিন্দ বাজি রাখিয়া বলিতেছে, “এ যদি না দু’দিনে উচ্ছন্ন যায়, ত আমার গোবিন্দ গাঙ্গুলী নাম তোমরা বদলে রেখো, বেণী বাবু! নবাবি কাণ্ড-কারখানা শুন্লে ত? তারিণী ঘোষাল সিকি পয়সা রেখে মরেনি, তা’ জ্ঞানি, তবে এত কেন? হাতে থাকে কর, না থাকে, বিষয় বন্ধক দিয়ে কে কবে ঘটা ক’রে বাপের ছাদ্দ করে, তা ত কখনো শুনিনি, বাবা! আমি তোমাকে নিশ্চয় বল্চি, বেণীমাধব বাবু, এ ছোঁড়া নন্দীদের গদি থেকে অন্ততঃ তিনটি হাজার টাকা দেনা ক’রেচে।” বেণী উৎসাহিত হইয়া কহিল, “তা হ’লে কথাটা ত বার ক’রে নিতে হচ্ছে, গোবিন্দ খুড়ো?” গোবিন্দ স্বর মৃদু করিয়া বলিল, “সবুর কর না, বাবাজী! একবার ভাল ক’রে চুকতেই দাও না—তার পরে—বাইরে দাঁড়িয়ে কে ও? এ কি, রমেশ বাবাজী? আমরা থাকতে এত রাত্তিরে তুমি কেন, বাবা?” রমেশ সে কথার জবাব না দিয়া অগ্রসর হইয়া আসিয়া বলিল, “বড়দা, আপনার কাছেই এলুম।” বেণী ঋতমত খাইয়া জবাব দিতে পারিল না। গোবিন্দ তৎক্ষণাৎ

কহিল, “আসবে বই কি, বাবা, একশবার আসবে। এ তো তোমারই বাড়ী। আর বড়ভাই পিতৃতুল্য। তাই ত আমরা বেণী বাবুকে বলতে এসেছি, বেণী বাবু, তারিণীদার ওপর মনো-মালিন্য তাঁর সঙ্গেই থাক—আর কেন? তোমরা দু’ভাই এক হও, আমরা দেখে চোখ জুড়োই—কি বল, হালদার মামা? ও কি, দাঁড়িয়ে রইলে যে, বাবা,—কে আছি স্ রে, একখানা কস-লের আসন-টাসন পেতে দে না রে! না, বেণী বাবু, তুমি বড় ভাই—তুমিই সব। তুমি আলাদা হয়ে থাকলে চলবে না। তা’ ছাড়া বড়গিন্নী ঠাকুরণ যখন স্বয়ং গিয়ে উপস্থিত হয়েছেন, তখন—” বেণী চম্কাইয়া উঠিল—“মা গিয়ে ছিলেন?”

এই চমকটা লক্ষ্য করিয়া গোবিন্দ মনে মনে খুসি হইল। কিন্তু, বাহিরে সে ভাব গোপন করিয়া নিতান্ত ভাল মানুষের মত খবরটা ফলাও কবিয়া বলিতে লাগিল, “শুধু যাওয়া কেন, ভাঁড়ার-টাড়ার—করাকর্ম যা’ কিছু তিনিই ত করতেন। আর তিনি না করলে করবেই বা কে?” সকলেই চুপ করিয়া রহিল। গোবিন্দ একটা দীর্ঘনিঃশ্বাস ফেলিয়া বলিল, “নাঃ—গাঁয়ের মধ্যে বড়গিন্নী ঠাকুরণের মত মানুষ কি আর আছে? —না হবে? না, বেণীবাবু, সাম্নে বললে খোসামোদ করা হবে, কিন্তু, যে ঘাই বলুক, গাঁয়ে যদি লক্ষ্মী থাকেন, ত সে তোমার মা। এমন মা কি কার হই?” বলিয়া পুনশ্চ একটা দীর্ঘনিঃশ্বাস ত্যাগ করিয়া গম্ভীর হইয়া রহিল। বেণী অনেকক্ষণ

চুপ করিয়া থাকিয়া অশ্রুটে কহিল,—“আচ্ছা—” গোবিন্দ চাপিয়া ধরিল, “শুধু আচ্ছা নয়, বেণীবাবু! যেতে হবে, করতে হবে, সমস্ত ভার তোমার উপরে। ভাল কথা, সবাই আপনারা ত উপস্থিত আছেন. নেমস্তন্নটা কি রকম করা হবে, একটা ফর্দ ক’রে ফেলা হোক না কেন? কি বল, রমেশ বাবাজী? ঠিক কথা কি না, হালদার মামা! ধন্দাস-দা’ চুপ ক’রে রইলে কেন? কাকে বলতে হবে, কাকে বাদ দিতে হবে, জান ত সব।”

রমেশ উঠিয়া দাঁড়াইয়া সহজ-বিনীত-কণ্ঠে বলিল, “বড়দা,’ একবার পায়ে ধুলো যদি দিতে পারেন—” বেণী গম্ভীর হইয়া বলিল, “মা যখন গেছেন, তখন আমার যাওয়া না যাওয়া—কি বল, গোবিন্দ খুড়ো?” গোবিন্দ কথা কহিবার পূর্বেই রমেশ বলিল, “আপনাকে আমি পীড়াপীড়ি করতে চাইনে, বড়দা,’ যদি অন্ত্রবিধে না হয়, একবার দেখে শুনে আসবেন!”

বেণী চুপ করিয়া রহিল। গোবিন্দ কি একটা বলিবার চেষ্টা করিতেই রমেশ উঠিয়া চলিয়া গেল। তখন গোবিন্দ বাহিরের দিকে গলা বাড়াইয়া দেখিয়া ফিস্-ফিস্ করিয়া বলিল, “দেখ্লে, বেণীবাবু, কথার ভাবখানা?” বেণী অন্ত্রমনস্ক হইয়া কি ভাবিতেছিল, কথা কহিল না।

পথে চলিতে চলিতে গোবিন্দের কথাগুলি মনে করিয়া রমেশের সমস্ত মন স্থণায় পরিপূর্ণ হইয়া উঠিল। সে অন্ধক

পথ হইতে ফিরিয়া আসিয়া সেই রাত্রেই আবার বেণী ঘোষা-
লের বাড়ীর ভিতর প্রবেশ করিল। চণ্ডীমণ্ডপের মধ্যে তখন
তর্ক-কোলাহল উদ্দাম হইয়া উঠিয়াছিল; কিন্তু সে শুনিতেও
তাহার প্রবৃত্তি হইল না। সোজা ভিতরে প্রবেশ করিয়া
রমেশ ডাকিল, “জ্যাঠাইমা!”

জ্যাঠাইমা তাঁহার ঘরের স্বমুখের বারান্দায় অন্ধকারে
চুপ করিয়া বসিয়াছিলেন; এত রাত্রে রমেশের গলা শুনিয়া
বিস্ময়াপন্ন হইলেন। “রমেশ? কেন রে?” রমেশ উঠিয়া
আসিল। জ্যাঠাইমা ব্যস্ত হইয়া বলিলেন, “একটু দাঁড়া, বাবা,
একটা আলো আনতে ব’লে দি।” “আলোয় কাজ নেই জ্যাঠাই-
মা, তুমি উঠো না।” বলিয়া রমেশ অন্ধকারেই একপাশে
বসিয়া পড়িল। তখন জ্যাঠাইমা প্রসন্ন করিলেন, “এত
রাত্তিরে যে?”

রমেশ মৃদু কণ্ঠে কহিল, “এখনো ত নিমন্ত্রণ করা হয়নি,
জ্যাঠাইমা, তাই তোমাকে জিজ্ঞাসা করতে এলুম।” “তবেই
মুঙ্গিলে ফেল্‌লি, বাবা! এঁরা কি বলেন? গোবিন্দ গাঙ্গুলী,
চাটুষ্যে মশাই—” রমেশ বাধা দিয়া বলিয়া উঠিল, “জানিনে,
জ্যাঠাইমা, কি এঁরা বলেন। জানতেও চাইনে—তুমি যা’
বল্‌বে, তাই হবে।” অকস্মাৎ রমেশের কথার উত্তাপে বিস্মে-
ধরী মনে মনে বিস্মিত হইয়া ক্ষণকাল মৌন থাকিয়া বলিলেন,
“কিন্তু তখন যে বল্‌লি রমেশ, এরাই তোঁর সব চেয়ে আপন্যার!
তা’ যাই হোক, আমার মেয়েমানুষের কথায় কি হবে, বাবা?”

—এ গাঁয়ে যে আবার,—আর এ গাঁয়েই কেন বলি, সব গাঁয়েই
—এ ওর সঙ্গে খায় না, ও তার সঙ্গে কথা কয় না—একটা
কাজকর্ম পড়ে গেলে আর মানুষের দুর্ভাবনার অস্ত থাকে না।
কাকে বাদ দিয়ে কাকে রাখা যায়, এর চেয়ে শক্ত কাজ আর
গ্রামের মধ্যে নেই।” রমেশ বিশেষ আশ্চর্য্য হইল না। কারণ,
এই কয়দিনের মধ্যেই সে অনেক জ্ঞানলাভ করিয়াছিল। তথাপি
জিজ্ঞাসা করিল, “কেন, এ রকম হয়, জ্যাঠাইমা?” “সে অনেক
কথা, বাবা! যদি থাকিস্ এখানে, আপনিই সমস্ত জান্তে
পারুবি। কাকুর সত্যিকার দোষ-অপরাধ আছে, কাকুর মিথ্যা
অপবাদ আছে—তা’ ছাড়া মাগলা-মকদ্দমা, মিথ্যা সাক্ষী দেওয়া
নিষেধ মন্ত দলাদলি। আমি যদি তোর ওখানে দুদিন আগে
যেতুম, রমেশ, তা হ’লে এত উত্তোষ আয়োজন কিছুতে ক’রতে
দিতুম না। কি যে সেদিন হবে, তাই কেবল আমি ভাবচি।”
বলিয়া জ্যাঠাইমা একটা নিঃশ্বাস ফেলিলেন। সে নিঃশ্বাসে
যে কি ছিল, তাহার ঠিক মর্ম্মটি রমেশ পরিতে পারিল না,
এবং কাহারো সত্যিকার অপরাধই বা কি এবং কাহারও মিথ্যা
অপবাদই বা কি হইতে পারে, তাহাও ঠাহর করিতে পারিল
না। বরঞ্চ উত্তেজিত হইয়া কহিল,—“কিন্তু আমার সঙ্গে ত
তার কোন যোগ নেই। আমি একরকম বিদেশী
বল্লেই হয়—কারো সঙ্গে কোন শত্রুতা নেই। তাই
আমি বলি, জ্যাঠাইমা, আমি দলাদলির কোন বিচারই
করব না, সমস্ত ব্রাহ্মণ-শূদ্রই নিমজ্ঞ ক’রে আসব। কিন্তু,

তোমার হুকুম ছাড়া ত পারিনে; তুমি হুকুম দাও, জ্যাঠাইমা।” জ্যাঠাইমা কিছুক্ষণ চুপ করিয়া ভাবিয়া বলিলেন—“এ রকম হুকুম ত দিতে পারিনে রমেশ! তাতে ভারি গোলযোগ ঘটবে। তবে তোর কথাও যে সত্যি নয়, তাও আমি বলিনে। কিন্তু এ ঠিক সত্যি-মিথ্যের কথা নয়, বাবা! সমাজ যাকে শাস্তি দিয়ে আলাদা ক’রে রেখেচে, তাকে জবরদস্তি ক’রে ডেকে আনা যায় না। সমাজ যাই হোক, তাকে মান্য করিতেই হবে। নইলে তার ভাল করবার মন্দ করবার কোন শক্তিই থাকে না—এ রকম হ’লে ত কোন মতেই চলতে পারে না রমেশ!” ভাবিয়া দেখিলে রমেশ এ কথা যে অস্বীকার করিতে পারিত, তাহা নহে; কিন্তু এইমাত্র নাকি বাহিরে এই সমাজের শীর্ষস্থানীয়দের ষড়্‌যন্ত্র এবং নীচাশয়তা তাহার বুকের মধ্যে আগুনের শিখার মত জ্বলিতেছিল, তাই, সে তৎক্ষণাৎ ঘৃণাভরে বলিয়া উঠিল, “এ গাঁয়ের সমাজ বলতে ধর্মদাস, গোবিন্দ—এঁরা ত? এমন সমাজের একবিন্দু ক্ষমতাও না থাকে, সেই ত ঢের ভাল, জ্যাঠাইমা!” জ্যাঠাইমা রমেশের উষ্ণতা লক্ষ্য করিলেন; কিন্তু শাস্তকণ্ঠে বলিলেন, “শুধু এঁরা নয়, রমেশ, তোমার বড়দা’ বেগীও সমাজের একজন কর্তা।” রমেশ চুপ করিয়া রহিল। তিনি পুনরপি বলিলেন, “তাই আমি বলি, এঁদের মত নিয়ে কাজ কর গে, রমেশ। সবমাত্র বাড়ীতে না পা দিয়েই এঁদের বিরুদ্ধতা করা ভাল নয়।” বিশেষ-ধরী কতটা দূর চিন্তা করিয়া যে এইরূপ উপদেশ দিলেন, তীব্র

উত্তেজনার মুখে রমেশ তাহা ভাবিয়া দেখিল না; কহিল, “তুমি নিজে এইমাত্র বললে জ্যাঠাইমা, নানান কারণে এখানে দলাদলির সৃষ্টি হয়। বোধ করি, ব্যক্তিগত আক্রোশটাই সবচেয়ে বেশী। তা’ ছাড়া, আমি যখন সত্যিমিত্যে কারো কোন দোষ অপরাধের কথাই জানিনে, তখন, কোন লোককেই বাদ দিয়ে অপমান করা আমার পক্ষে অশ্রায়।” জ্যাঠাইমা একটুখানি হাসিয়া বলিলেন, “ওরে পাগ্‌লা, আমি যে তোমার গুরুজন—মায়ের মত। আমার কথাটা না শোনাও ত তোমার পক্ষে অশ্রায়।” “কি করুব, জ্যাঠাইমা, আমি স্থির করিচি, আমি সকলকেই নিমন্ত্রণ করুব।” তাহার দৃঢ়সঙ্কল্প দেখিয়া বিশ্বেশ্বরীর মুখ অপ্রসন্ন হইল; বোধ করি বা মনে মনে বিরক্তও হইলেন; বলিলেন, “তা হ’লে আমার হুকুম নিতে আসাটা তোমার শুধু একটা ছল মাত্র।” জ্যাঠাইমার বিরক্তি রমেশ লক্ষ্য করিল; কিন্তু বিচলিত হইল না। খানিক পরে আস্তে আস্তে বলিল, “আমি জান্তুম, জ্যাঠাইমা, যা অশ্রায় নয়, আমার সে কাজে তুমি প্রসন্নমনে আমাকে আশীর্বাদ করবে। আমার—” তাহার কথাটা শেষ হইবার পূর্বেই বিশ্বেশ্বরী বাধা দিয়া বলিয়া উঠিলেন, “কিন্তু এটাও ত তোমার জানা উচিত ছিল, রমেশ, যে, আমার সম্মানের বিরুদ্ধে আমি যেতে পারুব না?”

কথাটা রমেশকে আঘাত করিল। কারণ, মুখে সে যাই বলুক, কেমন করিয়া তাহার সমস্ত অন্তঃকরণ কা’ল হইতে

এই জ্যাঠাইমার কাছে সস্তানের দাবী করিতেছিল, এখন দেখিল, এ দাবীর অনেক উর্দ্ধে তাঁর আপন সস্তানের দাবী জায়গা জুড়িয়া বসিয়া আছে। সে ক্ষণকালমাত্র চুপ করিয়া থাকিয়া উঠিয়া দাঁড়াইয়া চাপা অভিমানের স্বরে বলিল,— “কা’ল পর্য্যন্ত তাই জান্তুম, জ্যাঠাইমা। তাই তোমাকে তখন বলেছিলুম, যা’ পারি, আমি একলা করি, তুমি এসো না, তোমাকে ডাকবার সাহসও আমার হয়নি।” এই ক্ষুণ্ণ অভিমান জ্যাঠাইমার অগোচর রহিল না। কিন্তু আর জবাব দিলেন না, অঙ্ককারে চুপ করিয়া বসিয়া রহিলেন। খানিকপরে রমেশ চা’লিয়া যাইবার উপক্রম করিতেই বলিলেন, “তবে একটু দাঁড়াও বাছা, তোমার ভাঁড়ার ঘরের চাবিটা এনে দিই” বলিয়া ঘরের ভিতর হইতে চাবি আনিয়া রমেশের পায়ের কাছে ফেলিয়া দিলেন। রমেশ কিছুক্ষণ স্তব্ধভাবে দাঁড়াইয়া থাকিয়া, অবশেষে গভীর একটা নিঃশ্বাস ফেলিয়া চাবিটা তুলিয়া লইয়া আস্তে আস্তে চলিয়া গেল। ঘণ্টাক্ষেপমাত্র পূর্বে সে মনে মনে বলিয়াছিল, ‘আর আমার ভয় কি, আমার জ্যাঠাইমা ‘আছেন।’ কিন্তু একটা রাত্রিও কাটিল না, তাহাকে আবার নিঃশ্বাস ফেলিয়া বলিতে হইল, “না, আমার কেউ নেই— জ্যাঠাইমাও আমাকে ত্যাগ করিয়াছেন।”

৪

বাহিরে এইমাত্র শ্রদ্ধ শেষ হইয়া গেছে। আসন হইতে উঠিয়া রমেশ অভাগতদিগের সহিত পরিচিত হইবার চেষ্টা করিতেছে—বাড়ীর ভিতরে আহারের জন্ত পাতা পাড়িবাব আয়োজন হইতেছে, এমন সময় একটা গোলমাল, হাঁকাহাঁকি শুনিয়া রমেশ ব্যস্ত হইয়া, ভিতরে আসিয়া উপস্থিত হইল। সঙ্গে সঙ্গে অনেকেই আসিল। ভিতরে রক্তনশালার কপাটের একপাশে একটি ২৫।২৬ বছরের বিধবা মেয়ে জড়সড় হইয়া, পিছন ফিরিয়া দাঁড়াইয়া আছে এবং আর একটি প্রোটা বমণী তাহাকে আগলাইয়া দাঁড়াইয়া ক্রোধে চোখমুখ রক্তবর্ণ করিয়া চীৎকারে অগ্নিস্ফুলিঙ্গ বাহির করিতেছে। বিবাদ বাধিয়াছে পরাণ হালদারের সহিত। রমেশকে দেখিবামাত্র প্রোটা চোঁচাইয়া প্রশ্ন করিল, “হাঁ বাবা, তুমিও ত গাঁয়ের একজন জমিদার। বলি, যত দোষ কি এই ক্লেস্তি বান্ধুনির মেয়ের ? মাথার ওপর আমাদের কেউ নেই ব’লে কি যতবাব খুঁসি শাস্তি দেবে ?” গোবিন্দকে দেখাইয়া কহিল, “ঐ ডান মুখুয়ো বাড়ীর গাছ-পাতিষ্ঠের সময় জরিমানা ব’লে ইস্কুলের নামে দশটাকা আমার কাছে আদায় করেননি কি ? গাঁয়ের মোলো-আনা শেতলা-পূজোর জন্তে ছজোড়া পাঁঠার দাম ধ’রে নেননি কি ? তবে, কতবার ঐ এক কথা নিয়ে ঘাঁটাঘাঁটি করিতে চান, শুনি ?” রমেশ ব্যাপারটা কি, কিছুই বুঝিতে

পারিল না। গোবিন্দ গাঙুলী বসিয়াছিল, মীমাংসা করিতে উঠিয়া দাঁড়াইল। একবার রমেশের দিকে, একবার প্রৌঢ়ার দিকে চাহিয়া গম্ভীর গলায় কহিল, “যদি আমার নামটাই করলে, ক্ষান্তমাসী, তবে সত্যি কথা বলি, বাছা! খাতিরে কথা কইবার লোক এই গোবিন্দ গাঙুলী নয়। সে দেশ শুদ্ধ লোক জানে। তোমার মেয়ের প্রাশ্চিত্যও হয়েছে, সামাজিক জরিমানাও আমরা করেছি—সব মানি। কিন্তু তাকে যজ্ঞিতে কাঠি দিতে ত আমরা হুকুম দিইনি। মরলে ওকে পোড়াতে আমরা কাঁদেব, কিন্তু—” ক্ষান্তমাসী চীৎকার করিয়া উঠিল, “ম’লে তোমার নিজের মেয়েকে কাঁধে ক’রে পুড়িয়ে এসো বাছা—আমার মেয়ের ভাবনা তোমাকে ভাবতে হবে না। বলি, হাঁ গোবিন্দ, নিজের গায়ে হাত দিয়ে কি কথা কও না? তোমার ছোট-ভাজ যে ঐ ভাঁড়ার ঘরে বসে পান সাজ্জে, সে আর বছর নামদেড়েক ধ’রৈ কোন্ কাশীবাস ক’রে, অমন হলুদে রোগা শল্যেটির মত হয়ে ফিরে এসেছিল, শুনি? সে বড়লোকের বড়কথা বুঝি? বেশী ঘেঁটিয়ো না, বাপু, আমি সব জারিজুরি ভেঙে দিতে পারি। আমরাও ছেলেমেয়ে পেটে ধরেচি, আমরা চিন্তে পারি। আমাদের চোখে ধুলো দেওয়া যায় না।” গোবিন্দ ক্ষাপার মত ঝাপাইয়া পড়িল— “তবে রে, হারামজাদা মাগী—” কিন্তু হারামজাদা মাগী একটুও ভয় পাইল না বরং এক পা আগাইয়া আসিয়া হাতমুখ ঘুরাইয়া কহিল, “মারুবি না কি রে? ক্ষেস্তিবাম্নিকেকে ঘাঁটালে ঠগ্

বাছতে গাঁ উজোড় হয়ে যাবে, তা' বলে দিচ্ছি। আমার মেয়ে
ত রান্নাঘরে ঢুকতে যায়নি; দোর-গোড়ায় আসতে না আসতে
হালদার ঠাকুরপো যে খামকা অপমান ক'রে বসল, বলি, তার
বেয়ানের তাঁতি-অপবাদ ছিল নাকি? আমি ত আর আজ-
কের নই গো, বলি, আরও বলব, না এতেই হবে?" রমেশ
কাঠ হইয়া দাড়াইয়া রহিল। ভৈরব আচার্য্য ব্যস্ত হইয়া,
কাস্তুর হাতটা প্রায় ধরিয়া ফেলিয়া সান্ননয়ে কহিল, "এতেই
হবে, মাসি, আর কাজ নেই। নে, স্কুমারী, ওঠ মা, চল
বাছা, আমার সঙ্গে ওঘরে গিয়ে বসবি চল।" পরাণ হালদার
চাদর কাঁধে লইয়া সোজা খাড়া হইয়া উঠিয়া বলিল, "এই
বেঞ্চে মাগীদের বাড়ী থেকে একেবারে তাড়িয়ে না দিলে
এখানে আমি জলগ্রহণ করব না, তা' বলে দিচ্ছি। গোবিন্দ!
কালীচরণ! তোমাদের মামাকে চাও, ত উঠে এসো বল্চি।
বেণী ঘোষাল যে তখন বলেছিল, 'মামা, যেয়ো না ওখানে।'।
এমন সব খান্‌কী-নটীর কাণ্ডকারখানা জান্‌লে কি জাত-জন্ম
থোয়াতে এ বাড়ীর চৌকাঠ মাড়াই? কালি! উঠে এসো।"
মাতুলের পুনঃ পুনঃ আহ্বানেও কিন্তু কালীচরণ ঘাড় হেঁট
করিয়া বসিয়া রহিল। সে পাটের ব্যবসা করে। বছরচারেক
পূর্বে কলিকাতাবাসী তাহার এক গণ্যমান্য খরিদার বন্ধু তাহার
বিধবা ছোটভগিনীটিকে লইয়া প্রস্থান করিয়াছিল। ঘটনাটি
গোপন ছিল না। হঠাৎ শব্দরবাটী যাওয়া এবং তথা হইতে
তীর্থযাত্রা ইত্যাদি প্রসঙ্গে কিছুদিন চাপা ছিল মাত্র। পাছে

সেই দুর্ঘটনার ইতিহাস এত লোকের সমক্ষে আবার উঠিয়া পড়ে, এই ভয়ে কালী মুখ তুলিতে পারিল না। কিন্তু গোবিন্দের গায়ের জ্বালা আদৌ কমে নাই। সে আবার উঠিয়া দাঁড়াইয়া জোর গলায় কহিল, “যে যাই বলুক না কেন, এ অঞ্চলের সমাজপতি হলেন বেণী ঘোষাল, পরাণ হালদার, আর বহু মুণ্ডুঘো মহাশয়ের কন্যা। তাঁদের আমরা ত কেউ ফেলতে পারুব না! রমেশ বাবাজী সমাজের অমতে এই ছোটো মাগীকে কেন বাড়ী ঢুকতে দিয়েছেন, তার জবাব না দিলে, কেউ আমরা এখানে জলটুকু পর্য্যন্ত মুখে দিতে পারুব না।” দেখিতে দেখিতে পাঁচসাত-দশজন চাদর কাঁধে ফেলিয়া একে একে উঠিয়া দাঁড়াইল। ইহারা পাড়াগাঁয়েরই লোক; সামাজিক ব্যাপারে কোথায় কোন্ চাল সর্ব্বাপেক্ষা লাভজনক, ইহা তাহাদের অবিদিত নহে।

নিমজ্জিত ব্রাহ্মণ-সজ্জনেরা যে যাহার খুসি বলিতে লাগিল। ভৈরব এবং দীক্ষু ভট্টচাষ কাঁদ-কাঁদ হইয়া একবার ক্ষান্তমাসী ও তাহার মেয়ের, একবার গাঙুলী ও হালদার মহাশয়ের হাতে-পায়ে ধরিবার উপক্রম করিতে লাগিল—চারিদিক্ হইতে সমস্ত অনুষ্ঠান ও ক্রিয়াকর্ম্ম যেন লগ্নভগ্ন হইবার সূচনা প্রকাশ করিল। কিন্তু রমেশ একটি কথাও কহিতে পারিল না; একে ক্ষুধায় তৃষ্ণায় নিতান্ত কাতর, তাহাতে অকস্মাৎ এই অভাবনীয় কাণ্ড। সে পাংশুমুখে কেমন যেন এক রকম হতবুদ্ধির মত শূন্য হইয়া চাহিয়া রহিল।

“রমেশ !” অকস্মাৎ এক মুহূর্ত্তে সমস্ত লোকের সচকিত দৃষ্টি এক হইয়া বিশেষরীর মুখের উপর গিয়া পড়িল। তিনি তাঁড়ার হইতে বাহির হইয়া কপাটের সম্মুখে আসিয়া দাঁড়াইয়াছিলেন। তাঁহার মাথার উপর আঁচল ছিল, কিন্তু মুখখানি অনাবৃত। রমেশ দেখিল, জ্যাঠাইমা আপনিই কখন আসিয়াছেন—তাহাকে ত্যাগ করেন নাই। বাহিরের লোক দেখিল, ইনিই বিশেষরী, ইনিই ঘোষাল বাড়ীর গিন্নী-মা !

পল্লীগ্রামে সহরের কড়াপদা নাই। তজ্জাচ বিশেষরী বড়-বাড়ীর বধু বলিয়াই হোক, কিংবা অল্প যে-কোন কারণেই হোক, যথেষ্ট বয়ঃপ্রাপ্তিসম্বন্ধেও সাধারণতঃ কাহারো সাক্ষাতে বাহির হইতেন না। সুতরাং, সকলেই বড় বিস্মিত হইল। যাহারা শুধু ভনিয়াছিল, কিন্তু ইতিপূর্বে কখনো চোখে দেখে নাই, তাহারা তাঁহার আশ্চর্য্য চোখ দুইটির পানে চাহিয়া একে-বারে অবাক হইয়া গেল। বোধ করি, তিনি হঠাৎ ক্রোধবশেই বাহির হইয়া পড়িয়াছিলেন। সকলে মুখ তুলিবামাত্রই তিনি তৎক্ষণাৎ থামের পার্শ্বে সরিয়া গেলেন। স্থম্পষ্ট, তীব্র আহ্বানে রমেশের বিহ্বলতা ঘুচিয়া গেল। সে সম্মুখে অগ্রসর হইয়া আসিল। জ্যাঠাইমা আড়াল হইতে তেমনি স্থম্পষ্ট, উচ্চকণ্ঠে বলিলেন, “গাড়ুল মশায়কে ভয় দেখাতে মানা ক’রে দে, রমেশ। আর হালদার মশায়কে আমার নাম ক’রে বল যে, আমি সবাইকে আদর ক’রে বাড়ীতে ডেকে এনেছি—সুকুমারীকে অপমান করবার তাঁর কোন প্রয়োজন ছিল

না। আমার কাজকর্মের বাড়ীতে হাঁকাহাঁকি, চোঁচাচোঁচি, গালিগালাজ করতে আমি নিষেধ করছি। যার অস্থবিধে হবে, তিনি আর কোথায় গিয়ে বসুন।” বড়গিন্নীর কড়া হুকুম সকলে নিজের কানেই শুনিতে পাইল। রমেশের মুখ ফুটিয়া বলিতে হইল না—হইলে সে পারিত না। ইহার ফল কি হইল, তাহা সে দাঁড়াইয়া দেখিতেও পারিল না। জ্যাঠাইমাকে সমস্ত দায়িত্ব নিজের মাথায় লইতে দেখিয়া, সে কোনমতে চোখের জল চাপিয়া দ্রুতপদে একটা ঘরে গিয়া ঢুকিল; তৎক্ষণাৎ তাহার দুই চোখ ছাপাইয়া দর-দর করিয়া জল গড়াইয়া পড়িতে লাগিল। আজ সারাদিন সে নিজের কাজে বড় ব্যস্ত ছিল, কে আসিল না আসিল, তাহার খোঁজ লইতে পারে নাই। কিন্তু আর যেই আশুক, জ্যাঠাইমা যে আসিতে পারেন, ইহা তাহার স্বদূর কল্পনারও অতীত ছিল। যাহারা উঠিয়া দাঁড়াইয়াছিল, তাহারা আস্তে আস্তে বসিয়া পড়িল। শুধু গোবিন্দ-গাঙ্গুলী ও পরাণ হালদার আড়ষ্ট হইয়া দাঁড়াইয়া রহিল। কে একজন তাহাদিগকে উদ্দেশ করিয়া ভিড়ের ভিতর হইতে অক্ষুটে কহিল, “বসে পড় না খুড়ো! যোলখানা লুচি, চারজোড়া সন্দেশ কে কোথায় খাইয়ে দাইয়ে সঙ্গে দেয়, বাবা।” পরাণ হালদার ধীরে ধীরে বাহির হইয়া গেল। কিন্তু আশ্চর্য্য, গোবিন্দ গাঙ্গুলী সত্যিই বসিয়া পড়িল। তবে মুখখানা সে বরাবর ভারী করিয়াই রাখিল এবং আহারের জন্য পাতা পড়িলে তদ্বাবধানের ছুতা করিয়া সকলের সঙ্গে পংক্তিভোজনে উপবেশন করিল না।

যাহারা তাহার এই ব্যবহার লক্ষ্য করিল, তাহার। সকলেই মনে মনে বুঝিল, গোবিন্দ সহজে কাহাকেও নিষ্কৃতি দিবে না। অতঃপর আর কোন গোলযোগ ঘটিল না। ব্রাহ্মণেরা যাহা ভোজন করিলেন, তাহা চোখে না দেখিলে প্রত্যয় করা শক্ত; এবং প্রত্যেকেই খুদি, পটল, গুড়া, বুড়ী প্রভৃতি বাটীর অল্পপস্থিত বালক-বালিকার নাম করিয়া যাহা বাঁধিয়া লইলেন, তাহাও যৎকিঞ্চিৎ নহে। সন্ধ্যার পর কাজকর্ম প্রায় সারা হইয়া গেছে, রমেশ সদর-দরজার বাহিরে একটা পেয়ারাগাছের তলায় অন্ত্রমনস্কের মত দাঁড়াইয়াছিল, মনটা তাহার ভাল ছিল না। দেখিল দীক্ষু ভট্টাচার্য্য ছেলেদের লইয়া, লুচি মণ্ডার গুরুভারে ঝুঁকিয়া পড়িয়া, একরূপ অলক্ষ্যে বাহির হইয়া যাইতেছে। সর্বপ্রথমে খেঁদির নজর পড়ায় সে অপরাধীর মত ধতমত থাইয়া দাঁড়াইয়া পড়িয়া গুরুকণ্ঠে কহিল, “বাবা, বাবু দাঁড়িয়ে—” সবাই যেন একটু জড়সড় হইয়া পড়িল। ছোট মেয়েটির এই একটি কথা হইতেই রমেশ সমস্ত ইতিহাসটা বুঝিতে পারিল; পলাইবার পথ থাকিলে সে নিজেই পলাইত। কিন্তু সে উপায় ছিল না বলিয়া, আগাইয়া আসিয়া সহাস্তে কহিল, “খেঁদি, এ সব কার জন্তে নিয়ে যাচ্ছিস্ রে?” তাহাদের ছোট বড় পুঁটুলিগুলির ঠিক সহস্রর খেঁদি দিতে পারিবে না আশঙ্কা করিয়া দীক্ষু নিজেই একটুখানি গুরুভাবে হাসিয়া বলিলেন, “পাড়ায় ছোটলোকদের ছেলেপিলেরা আছে ত বাবা, এঁটোকাঁটাগুলো নিয়ে গেলে তাদের দু’খানা

চারধানা দিতে পারব। সে যাই হোক, বাবা, কেন যে দেশ-
 স্তম্ভ লোক ওকে গিন্নী-মা ব'লে ডাকে, তা' আজ বুঝলুম।”
 রমেশ তাহার কোন উত্তর না করিয়া সঙ্গে সঙ্গে কটকের দ্বার
 পর্যন্ত আসিয়া হঠাৎ প্রশ্ন করিল, “আচ্ছা, ভট্টাচার্য্য মশাই,
 আপনি ত এদিকের সমস্তই জানেন, এ গাঁয়ে এত রেবারিষি
 কেন বলতে পারেন?” “দীর্ঘ মুখে একটা আওয়াজ করিয়া বার
 দুই ঘাড় নাড়িয়া কহিল, “হায় রে, বাবাজী, আমাদের কুঁয়াপুর
 ত পদে আছে। যে কাণ্ড এ ক'দিন ধরে খেঁদির মামার বাড়ীতে
 দেখে এলুম! বিশঘর বামুন-কায়েতের বাস নেই, গাঁয়ের মধ্যে
 কিন্তু চারটে দল! হরনাথ বিশ্বাস, দুটো বিলিতি আমড়া
 পেড়েছিল ব'লে তার আপনার ভাগ্যকে জ্বলে দিয়ে তবে
 ছাড়লে! সমস্ত গ্রামই, বাবা, এই রকম—তা' ছাড়া মামলায়-
 মামলায় একেবারে শতচ্ছিন্ন! খেঁদি, হরিধনের হাতটা একবার
 বদলে নে, মা।” রমেশ আবার জিজ্ঞাসা করিল, “এর কি
 কোন প্রতীকার নেই, ভট্টাচার্য্য মশাই?” “প্রতীকার আর
 কি ক'রে হবে, বাবা—এ যে বোর কলি!” ভট্টাচার্য্য একটা
 নিশ্বাস ফেলিয়া কহিল, “তবে একটা কথা ব'লতে পারি
 বাবাজী। আমি ভিক্ষেসিঙ্গে ক'রতে অনেক জায়গাতেই ত
 যাই—অনেকে অনুগ্রহও করেন। আমি বেশ দেখেছি, তোমা-
 দের ছেলেছোকরাদের দয়াধন্য আছে—নেই কেবল বুড়ো
 ব্যাটাদের। এরা একটু বাগে পেলে আর একজনের গলায়
 পা দিয়ে জিভ বার না ক'রে আর ছেড়ে দেয় না।” বলিয়া

দীহু যেমন ভঙ্গী করিয়া জিভ বাহির করিয়া দেখাইল, তাহাতে রমেশ হাসিয়া ফেলিল। দীহু কিন্তু হাসিতে যোগ দিল না—কহিল, “হাসির কথা নয় বাবাজী, অতি সত্য কথা। আমি নিজেও প্রাচীন হয়েছি—কিন্তু—তুমি যে অন্ধকারে অনেকদূর এগিয়ে এলে, বাবাজী!” “তা’ হোক, ভট্‌চাষি মশাই, আপনি বলুন।” “কি আর বলব, বাবা, পাড়ারগাঁ মাজ্রাই এই রকম। এই গোবিন্দ গাঙুলী—এ ব্যাটার বাপের কথা মুখে আনলে প্রায়শ্চিত্ত করতে হয়। ক্ষান্তবাম্নি ত আর মিথ্যে বলেনি—কিন্তু সবাই ওকে ভয় করে! জাল করতে, মিথ্যেসাক্ষী, মিথ্যে মোকদ্দমা সাজাতে ওর জুড়ি নেই। বেণীবাবু হাতধরা—কাজেই কেউ একটি কথা কইতে সাহস করে না, বরঞ্চ ওই-ই পাঁচজনের জাত-মেরে বেড়াচ্ছে!” রমেশ অনেকক্ষণ পর্যন্ত আর কোন প্রশ্ন না করিয়া, চুপ করিয়া সঙ্গে সঙ্গে চলিতে লাগিল। রাগে তাহার সর্কাজ জ্বালা করিতেছিল। দীহু নিজেই বলিতে লাগিল—“এই আমার কথা তুমি দেখে নিয়ো, বাবা, ক্ষান্তবাম্নি সহজে নিস্তার পাবে না। গোবিন্দ গাঙুলী, পরাণ হালদার, দু-দুটো ভীমরুলের চাকে খোঁচা দেওয়া কি সহজ কথা! কিন্তু যাই বল বাবা, মাগীর সাহস আছে। আর সাহস থাকবে নাই বা কেন? মুড়ী বেচে খায়, সব ঘণ্টা যাতায়াত করে, সকলের সব কথা টের পায়। ওকে ঘাঁটাতে কেলেঙ্কারির সীমা-পরিসীমা থাকবে না, তা ব’লে দিচ্ছি। অন্য-চার আর কোন ঘরে নেই বল? বেণীবাবুকেও—” রমেশ

সভয়ে বাধা দিয়া বলিল, “থাক্, বড়দার কথায় আর কাজ নেই”—দীন্না অপ্রতিভ হইয়া উঠিল। কহিল, “থাক্, বাবা, আমি ছুঃখী মানুষ, কারো কথায় আমার কাজ নেই। কেউ যদি বেণীবাবুর কানে তুলে দেয় ত আমার ঘরে আগুন”—রমেশ আবার বাধা দিয়া কহিল, ভট্‌চাষি মশায়, আপনার বাড়ী কি আরো দূরে?”

“না, বাবা, বেশী দূর নয়, এই বাঁধের পাশেই আমার কুঁড়ে—কোন দিন যদি—” “আস্ব বই কি, নিশ্চয় আস্ব”—বলিয়া রমেশ ফিরিতে উত্তত হইয়া কহিল, “আবার কা’ল সকালেই ত দেখা হবে—কিন্তু তার পরেও মাঝে মাঝে পায়ের ধুলো দেবেন।” বলিয়া রমেশ ফিরিয়া গেল। “দীর্ঘজীবী হও—বাপের মত হও!” বলিয়া দীন্না ভট্‌চাষি অন্তরের ভিতর হইতে আশীর্বাদন বাহির করিয়া ছেলেপুলে লইয়া চলিয়া গেল।

৫

এ পাড়ায় একমাত্র মধু পালের মুদির দোকান নদীর পথে গাটের একধারে। দশ বার দিন হইয়া গেল, অথচ সে বাকী দশ টাকা লইয়া যায় নাই বলিয়া, রমেশ কি মনে করিয়া নিজেই একদিন সকালবেলা দোকানের উদ্দেশে বাহির হইয়া পড়িল। মধু পাল মহাসমাদর করিয়া ছোটবাবুকে বারান্দার উপর মোড়া পাতিয়া বসাইল এবং ছোট বাবুর আসিবার হেতু শুনিয়া গভীর আশ্চর্য্যে অবাক্ হইয়া গেল। যে ধারে, সে

উপযাচক হইয়া ঘর বহিয়া ঋণশোধ করিতে আসে, তাহা মধু পাল এতটা বয়সে কখন চোখে ত দেখেই নাই, কানেও শোনে নাই। কথায় কথায় অনেক কথা হইল। মধু কহিল, “দোকান কেমন ক’রে চলবে, বাবু? হু’ আনা চার আনা একটাকা পাঁচসিকে ক’রে প্রায় পঞ্চাশ ষাট টাকা বাকী পড়ে গেছে। এই দিয়ে যাকি ব’লে দু মাসেও আদায় হবার ঘো’ নেই। এ কি—বাঁড়ুঘ্যে মশাই যে! কবে এলেন? প্রাতঃপেন্নাম হই।”

বাঁড়ুঘ্যে মশায়ের বাঁ হাতে একটা গাডু, পায়ের নখে, গোড়ালিতে কাদার দাগ, কানে পৈতা জড়ানো, ডানহাতে কচুপাতায় মোড়া চারিটি কুচোচিংড়ি। তিনি ফৌস করিয়া একটা নিশ্বাস ফেলিয়া বলিলেন, “ক’ল রাস্তারে এলুম; তামাক খা’ দিকি মধু!” বলিয়া গাডু রাখিয়া হাতের চিংড়ি মেলিয়া ধরিয়া বলিলেন, “সৈরুবি জেলেনীর আক্কেল দেখলি, মধু—খপ্ ক’রে হাতটা আমার ধ’রে ফেল্লে? কালেকালে কি হ’ল বল্ দেখি রে, এই কি এক পয়সার চিংড়ি? বামুনকে ঠকিয়ে ক’কাল খাবি মাগী, উচ্ছন্ন যেতে হবে না?” মধু বিস্ময় প্রকাশ করিয়া কহিল “হাত ধরে ফেল্লে আপনার?” ত্রুদ্ব বাঁড়ুঘ্যে মশাই একবার চারিদিকে দৃষ্টিপাত করিয়া উত্তেজিত হইয়া কহিলেন—“আড়াইটি পয়সা শুধু বাকী, তাই ব’লে খামকা হাটতুদ্ব লোকের সামনে হাত ধব্বে আমার? কে না দেখ্লে বল্। মাঠ থেকে ব’সে এসে, গাডুটি মেজে নদীতে

হাত-পা ধুয়ে মনে করলুম, হাটটা একবার ঘুরে যাই, মাগী এক চুবড়ি মাছ নিয়ে ব'সে,—আমাকে স্বচ্ছন্দে বললে কি না, কিছুই নেই ঠাকুর, যা' ছিল, সব উঠে গেছে। আরে, আমার চোখে ধুলো দিতে পারিস্ ? ডালাটা ফস্ ক'রে তুলে ফেলতেই, দেখি না—অমনি ফস্ ক'রে হাতটা চেপে ধ'রে ফেললে! তোর এই আড়াইটা—আর আজকার একটা—এই সাড়ে তিনটে পয়সা নিয়ে আমি গাঁ ছেড়ে পালাব ? কি বলিস্, মধু ?” মধু সায় দিয়া কহিল, “তাও কি হয় !” “তবে, তাই বল না ! গাঁয়ে কি শাসন আছে ? নইলে ষষ্ঠে জেলের ধোপা-নাপ্তে বন্ধ ক'রে, চাল কেটে তুলে দেওয়া যায় না।” হঠাৎ রমেশের প্রতি চাহিয়া প্রশ্ন করিলেন, “বাবুটি কে. মধু ?” মধু সগর্বে কহিল, “আমাদের ছোটবাবুর ছেলে যে ! সেদিনের দশ টাকা বাকী ছিল ব'লে, নিজে বাড়ী বয়ে দিতে এসেচেন।” বাঁড়ুয়ে মশাই কুচোচিংড়ির অভিযোগ ভুলিয়া, দুই চক্ষু বিস্ফারিত কবিয়া কহিলেন,—“হ্যাঁ, রমেশ বাবাজী ? বেঁচে থাক, বাবা—হ্যাঁ, এসে গুলুম, একটা কাজের মত কাজ করেচ বটে! এমন খাওয়া-দাওয়া এ অঞ্চলে কখনও হয় নি। কিন্তু বড় দুঃখ রইল, চোখে দেখতে পেলুম না। পাঁচ শালার ধান্নায় প'ড়ে কল্‌কাতায় চাকুরি করতে গিয়ে হাড়ীর হাল। আরে ছি, সেখানে মানুষ থাকতে পারে !” রমেশ এই লোকটার মুখের দিকে চূপ করিয়া চাহিয়া রহিল। কিন্তু দোকান-শুক সকলে তাঁহার কলিকাতা প্রবাসের ইতিহাস শুনিবার জ্ঞান মহাকৌতূহলী হইয়া উঠিল।

তামাক সাজিয়া মধু-দোকানি বাঁড়ুঘোর হাতে হুঁকাটা তুলিয়া দিয়া, প্রশ্ন করিল, “তোর পরে ? একটু চাকরি-বাকরি হয়েছিল ত ?” “হবে না ? এ কি ধান দিয়ে লেথাপড়া শেখা আমার ? —হ’লে হবে কি,—সেখানে কে থাকতে পারে বল ! যেমন ধুঁয়া —তেমনি কাদা । বাইরে বেরিয়ে গাড়ীঘোড়া চাপা না প’ড়ে যদি ঘরে ফিরতে পারিস, ত জান্‌বি, তোর বাপের পুণিয়া !” মধু কখনও কলিকাতায় যায় নাই । মেদিনীপুর সহরটা, এক-বার সাক্ষ্য দিতে গিয়া, দেখিয়া আসিয়াছিল মাত্র । সে ভারি আশ্চর্য্য হইয়া কহিল, “বলেন কি !” বাঁড়ুঘো ঈষৎ হাসিয়া কহিল—“তোর রমেশ বাবুকে জিজ্ঞাসা কর না, সত্যি না মিথ্যে । না মধু, খেতে না পাই, বুকে হাত দিয়ে ঘরে প’ড়ে ম’রে থাকব, সে ভাল, কিন্তু বিদেশ যাবার নামটি যেন কেউ আমার কাছে আর না করে । বল্‌লে বিশ্বাস করবিনে, সেখানে শুষ্ক-কলমি শাক, চালতা, আমড়া, খোড়-মোচা পর্য্যন্ত কিনে খেতে হয় ! পার্‌বি খেতে ? এই একটি মাস না খেয়ে-খেয়ে যেন রোগা ইঁহুরটি হয়ে গেচি ! দিবারাত্রি পেট ফুট-ফাট করে, বুকজ্বালা করে, প্রাণ আইটাই করে, পালিয়ে এসে তবে ইঁফ-ছেড়ে বাঁচি । না বাবা, নিজের গাঁয়ে ব’সে জোটে একবেলা, একসম্মো থাবো ; না জোটে, ছেলেমেয়ের হাত ধ’রে ভিক্ষে করব ; বামুনের ছেলের তাতে কিছু আর লজ্জাব কথা নেই, কিন্তু, মা লক্ষ্মী মাথায় থাকুন—বিদেশ কেউ যেন না যায় !” তাঁহার কাহিনী শুনিয়া সকলে যখন সভয়ে নির্বাক

হইয়া গেছে, তখন বাঁড়ুঘো উঠিয়া আসিয়া মধুর তেলের ভাঁড়ের ভিতর উখড়ি ডুবাইয়া একছটাক তেল বাঁ হাতের তেলোয় লইয়া অন্ধেকটা দুই নাক ও দুই কানের গর্তে ঢালিয়া দিয়া, বাকীটা মাথায় মাখিয়া ফেলিলেন ও কহিলেন, “বেলা হয়ে গেল, অমনি ডুবটা দিয়ে একেবারে ঘরে যাই ! এক পয়সার ভুণ দে দেখি, মধু, পয়সাটা বিকেলবেলা দিয়ে যাবো।” “আবার বিকেলবেলা !” বলিয়া মধু অগ্রসন্নমুখে ভুণ দিতে তাহার দোকানে উঠিল। বাঁড়ুঘো গলা বাড়াইয়া দেখিয়া, বিস্ময়-বিরক্তির স্বরে কহিয়া উঠিল, “তোরা সব হলি কি, মধু ? এ যে গালে চড় মেয়ে পয়সা নিস্, দেখি ?” বলিয়া আগাইয়া আসিয়া নিজেই এক খামচা ভুণ তুলিয়া ঠোঙায় দিয়া সেটা টানিয়া লইলেন। গাড়ু হাতে করিয়া রমেশের প্রতি চাহিয়া মুহূ হাসিয়া বলিলেন,—“ঐ ত একই পথ—চল না বাবাজী, গল্প ক’রতে ক’রতে যাই।” “চলুন”—বলিয়া রমেশ উঠিয়া দাঁড়াইল। মধু-দোকানি অনতিদূরে দাঁড়াইয়া ককণ-কণ্ঠে কহিল, “বাঁড়ুঘো মশাই, সেই ময়দার পয়সা পাঁচ আনা কি অমনি—”

বাঁড়ুঘো রাগিয়া উঠিল—“হা রে, মধু, হুবেলা চোখো-চোখি হবে—তোদের কি চোখের চামড়া পর্য্যন্ত নেই ? পাঁচ ব্যাটা বেটীর মতলবে কল্‌কাতায় যাওয়া-আসা ক’রতে পাঁচপাঁচটা টাকা আমার জলে গেল—আর এই তোদের তাগাদা করবার সময় হ’ল ! কারো সর্ব্বনাশ, কারো পোষ

মাস—দেখলে বাবা রমেশ, এদের ব্যাভারটা একবার দেখলে ?” মধু এতটুকু হইয়া গিয়া অক্ষুটে বলিতে গেল— “অনেক দিনের—” “হলই বা অনেক দিনের ? এমন ক’রে সবাই মিলে পিছনে লাগলে ত আর গাঁয়ে বাস করা যায় না ।” বলিয়া বাঁড়ুঘো একরকম রাগ করিয়াই নিজের জিনিস-পত্র লইয়া চলিয়া গেলেন ।

রমেশ ফিরিয়া আসিয়া বাড়ী ঢুকিতেই এক ভদ্রলোক শশব্যস্তে হাতের হুকটা একপাশে রাখিয়া দিয়া, এক-বারে পায়ের কাছে আসিয়া তাহাকে প্রণাম করিল । উঠিয়া কহিল, “আমি বনমালী পাড়ই—আপনাদের ইস্কুলের হেডমাষ্টার । দুদিন এসে সাক্ষাৎ পাইনি ; তাই বলি—” রমেশ সমাদর করিয়া পাড়ই মহাশয়কে চেয়ারে বসাইতে গেল ; কিন্তু, সে সসম্মানে দাঁড়াইয়া রহিল । কহিল, “আজ্ঞে, আমি যে আপনার ভৃত্য ।” লোকটা বয়সে প্রাচীন এবং আর-যেই-হোক একটা বিদ্যালয়ের শিক্ষক । তাহার এই অতি বিনীত, কুণ্ঠিত ব্যবহারে রমেশের মনের মধ্যে একটা অশ্রদ্ধার ভাব জাগিয়া উঠিল । সে কিছুতেই আসন-গ্রহণে স্বীকৃত হইল না, খাড়া দাঁড়াইয়া নিজের বক্তব্য কহিতে লাগিল । এদিকের মধ্যে এই একটা অতি ছোট রকমের ইস্কুল, মুখুঘো ও ঘোষালদের যত্নে প্রতিষ্ঠিত হইয়াছিল । প্রায় ৩০।৪০ জন ছাত্র পড়ে । দুই তিন কোশ দূর হইতেও কেহ কেহ আসে । যৎকিঞ্চিৎ গভর্ণমেন্ট-সাহায্যও আছে ।

তথাপি ইস্কুল আর চলিতে চাহিতেছে না। ছেলেবয়সে এই বিদ্যালয়ে রমেশও কিছুদিন পড়িয়াছিল, তাহার স্মরণ হইল। পাড়ুই মহাশয় জানাইল যে, চাল ছাওয়া না হইলে আগামী বর্ষায় বিদ্যালয়ের ভিতর আর কেহ বসিতে পারিবে না। কিন্তু সে না হয় পরে চিন্তা করিলে চলিবে; উপস্থিত প্রধান দুর্ভাবনা হইতেছে যে, তিনমাস হইতে শিক্ষকেরা কেহ মাহিনা পায় নাই—সুতরাং, ঘরের খাইয়া বস্ত্রমহিষ তাড়াইয়া বেড়াইতে আর কেহ পারিতেছে না।

ইস্কুলের কথায় রমেশ একেবারে সজাগ হইয়া উঠিল। হেড মাষ্টার মহাশয়কে বৈঠকখানায় লইয়া গিয়া একটি একটি করিয়া সমস্ত সংবাদ গ্রহণ করিতে লাগিল। মাষ্টারপণ্ডিত চারিজন; এবং তাঁহাদের হাড় ভাঙা খাটনিব কলে গড়ে দুই জন করিয়া ছাত্র প্রতিবৎসর মাইনার পরীক্ষা পাশ করিয়াছে। তাহাদের নাম-দাম বিবরণ পাড়ুই মহাশয় মুখস্তর মত আবৃত্তি করিয়া দিল। ছেলেদের নিকট হইতে যাহা আদায় হয়, তাহাতে নীচের দুজন শিক্ষকের কোন মতে, ও গভর্ণমেন্টের সাহায্যে আর একজনের সঙ্কলান হয়; শুধু একজনের মাহিনাটাই গ্রামের ভিতরে এবং বাহিরে চাঁদা তুলিয়া সংগ্রহ করিতে হয়। এই চাঁদা সাধিবার ভারও মাষ্টারদের উপরেই—তাঁহারা গত তিন চারি মাস কাল ক্রমাগত ঘুরিয়া ঘুরিয়া প্রত্যেক বাটীতে আট-দশবার করিয়া হাঁটা-হাঁটি করিয়াও সাতটাকা চার আনার বেশী আদায় করিতে পারেন নাই!

কথা শুনিয়া রমেশ স্তম্ভিত হইয়া রহিল। পাঁচছয়টা গ্রামের মধ্যে এই একটা বিদ্যালয়—এবং এই পাঁচছয়টা গ্রামময় তিনমাসকাল ক্রমাগত ঘুরিয়া মাত্র ৭০ আদায় হইয়াছে! রমেশ প্রশ্ন করিল, “আপনার মাহিনা কত?” মাষ্টার করিল, “রসিদ দিতে হয় ছাব্বিশ টাকার, পাই তেব টাকা পোনর আনা।” কথাটা রমেশ ঠিক বুঝিতে পারিল না—তাহার মুখপানে চাহিয়া রহিল। মাষ্টার তাহা বুঝিয়া বলিল, “আজ্ঞে গভর্ণমেন্টের হুকুম কি না, তাই ছাব্বিশ টাকার রসিদ লিখে দিয়ে সবইন্স্পেক্টর বাবুকে দেখাতে হয়—নইলে—সরকারী সাহায্য বন্ধ হ’য়ে যায়। সবাই জানে, আপনি কোন ছাত্রকে জিজ্ঞাসা করলেই জানতে পারবেন, আমি মিথ্যে বল্চিনে।” রমেশ অনেকক্ষণ চুপ করিয়া থাকিয়া জিজ্ঞাসা করিল, “এতে ছাত্রদের কাছে আপনার সম্মানহানি হয় না?” মাষ্টার লজ্জিত হইল। করিল, “কি করব, রমেশবাবু! বেগীবাবু এ কয়টি টাকা দিতেও নারাজ।”

“তিনিই কর্ত্তা বুঝি?”

মাষ্টার একবার একটুখানি দ্বিধা করিল; কিন্তু তাহার না বলিলেই নয়। তাই সে ধীরে ধীরে জানাইল যে, “তিনিই সেক্রেটারি বটে; তিনি একটি পয়সাও কখনো খরচ করেন না। যত মুখ্যে মহাশয়ের কথা—সতীলক্ষ্মী তিনি—তাঁর দয়া না থাকিলে ইস্কুল অনেকদিন উঠিয়া যাইত। এ বৎসর নিজের খরচে চাল ছাইয়া দিবেন, আশা দিয়াও হঠাৎ কেন

যে সমস্ত সাহায্য বন্ধ করিয়া দিয়াছেন, তাহার কারণ কেহই বলিতে পারে না।” রমেশ কৌতূহলী হইয়া রমার সম্বন্ধে আরও কয়েকটা প্রশ্ন করিয়া, শেষে জিজ্ঞাসা করিল, “তঁার একটি ভাই এ ইন্সকুলে পড়ে না?” মাষ্টার কহিল, “যতীন ত ? পড়ে বৈকি।” রমেশ বলিল, “আপনার ইন্সকুলের বেলা হয়ে যাচ্ছে ; আজ আপনি যান, কা’ল আমি আপনাদের ওখানে যাব।” “যে আজ্ঞে” বলিয়া হেডমাষ্টার আর একবার রমেশকে প্রণাম করিয়া, জোর করিয়া তাহার পায়ের ধূলা মাথায় লইয়া, বিদায় হইল।

৬

বিশ্বেশ্বরীর সেদিনের কথাটা সেইদিনেই দশখানা গ্রামে পরিব্যাপ্ত হইয়া গিয়াছিল। বেণী লোকটা নিজে কাহারও মুখের উপর ক্রূত কথা বলিতে পারিত না ; তাই সে গিয়া রমার মাসীকে ডাকিয়া আনিয়াছিল। সেকালে না কি তক্ষক দাঁত ফুটাইয়া এক বিরাট অশ্বখ জ্বালাইয়া ছাই করিয়া দিয়াছিল। এই মাসীটিও সেদিন সকালবেলায় ঘরে চড়িয়া যে বিষ উদ্‌গীর্ণ করিয়া গেলেন, তাহাতে বিশ্বেশ্বরীর রক্তমাংসের দেহটা, কাঠের নম্ব বলিয়াই হোক, কিংবা একাল সেকাল নম্ব বলিয়াই হোক, জ্বলিয়া ভস্মরূপে পরিণত হইয়া গেল না। সমস্ত অপমান

বিশেষরী নীরবে সহ্য করিলেন। কারণ, ইহা যে তাঁহার পুত্রের দ্বারাই সংঘটিত হইয়াছিল, সে কথা তাঁহার অগোচর ছিল না। পাছে রাগ করিয়া একটা কথার জবাব দিতে গেলেও এই স্ত্রীকোটার মুখ দিয়া সর্বাগ্রে তাঁহার নিজের ছেলের কথাই বাহিরে প্রকাশ হইয়া পড়ে এবং তাহা রমেশের কর্ণ-গোচর হয়, এই নিদাক্ষণ লজ্জার ভয়েই সমস্ত সময়টা তিনি কাঠ হইয়া বসিয়াছিলেন।

তবে, পাড়াগায়ে কিছুই ত চাপা থাকিবার জো নাই। রমেশও শুনিতে পাইল। জ্যাঠাইমার জন্ত তাহার প্রথম হইতেই বরাবর মনের ভিতরে উৎকণ্ঠা ছিল, এবং এই লইয়া মাতা-পুত্রে যে একটা কলহ হইবে, সে আশঙ্কাও করিয়া-ছিল। কিন্তু বেণী যে বাহিরের লোককে ঘরে ডাকিয়া আনিয়া নিজের মাকে এমন করিয়া অপমান ও নির্ধ্যাতন করিবে, এই কথাটা সহসা তাহার কাছে যেন একটা স্পষ্টছাড়া কাণ্ড বলিয়া মনে হইল, এবং পরমুহূর্তেই তাহার ক্রোধের বহিঃ যেন ব্রহ্মরন্ধ্র ভেদ করিয়া জলিয়া উঠিল। ভাবিল, ও বাড়ীতে ছুটিয়া গিয়া যা' মুখে আসে, তাই বলিয়া বেণীকে গালাগালি করিয়া আসে; কারণ, যে লোক মাকে এমন করিয়া অপমান করিতে পারে, তাহাকেও অপমান করা সম্বন্ধে কোনরূপ বাচ-বিচার করিবার আবশ্যকতা নাই। কিন্তু পরক্ষণেই মনে হইল, তাহা হয় না! কারণ, জ্যাঠাইমার অপমানের মাত্রা তাহাতে বাড়িবে বই কমিবে না। সে দিন

দীক্ষুর কাছে, এবং কা'ল মাষ্টারের মুখে শুনিয়া রমার প্রতি তাহার ভারি একটা শ্রদ্ধার ভাব জাগিয়াছিল। চতুর্দিকে পরিপূর্ণ মৃদুতা ও সহস্র প্রকার কদর্য ক্ষুদ্রতার ভিতরে একা জ্যাঠাইমার হৃদয়টুকু ছাড়া সমস্ত গ্রামটাই আঁধারে ডুবিয়া গিয়াছে বলিয়া, যখন তাহার নিশ্চয় বিশ্বাস হইয়াছিল, তখন এই মুখুষোবাটীর পানে চাহিয়া একটুখানি আলোর আভাষ— তাহা যত তুচ্ছ এবং ক্ষুদ্র হোক—তাহার মনের মধ্যে বড় আনন্দ দিয়াছিল। কিন্তু আজ আবার এই ঘটনায় রমার বিরুদ্ধে তাহার সমস্ত মন ঘুণায় ও বিতৃষ্ণায় ভরিয়া গেল। বেণীর সঙ্গে যোগ দিয়া, এই দুই মামী ও বোনঝিতে মিলিয়া, যে এই অন্যায় করিয়াছে, তাহাতে তাহার বিন্দুমাত্র সংশয় রহিল না। কিন্তু, এই দুইটা জ্বীলোকের বিরুদ্ধেই বা সে কি করিবে, এবং বেণীকেই বা কি করিয়া শাস্তি দিবে, তাহাও কোনমতে ভাবিয়া পাইল না।

এমন সময়ে একটা কাণ্ড ঘটিল। মুখুষো ও ঘোষালদেব কয়েকটা বিষয় এখন পর্য্যন্ত ভাগ হয় নাই। আচার্য্যদেব বাটীর পিছনে 'গড়' বলিয়া পুষ্করিণীটাও এইরূপ উভয়ের সাধারণ সম্পত্তি। একসময়ে ইহা বেশ বড়ই ছিল; ক্রমশঃ সংস্কার-অভাবে বুজিয়া গিয়া এখন সামান্য একটা ডোবায় পরিণত হইয়াছিল। ভাল মাছ ইহাতে ছাড়া হইত না, ছিলও না। কৈ, মাগুর প্রভৃতি যে সকল মাছ আপনি জন্মায়, তাহাই কিছু কিছু ছিল। তৈরব ইপাইতে ইপাইতে আসিয়া

উপস্থিত হইল। বাহিরে চণ্ডীমণ্ডপের পাশের ঘরে গোমস্তা গোপাল সরকার খাতা লিখিতেছিল, ভৈরব ব্যস্ত হইয়া কহিল, “সরকার মশাই, লোক পাঠাননি? গড় থেকে মাছ ধরানো হচ্ছে যে!” সরকার কলম কাগে জঁজিয়া মুখ তুলিয়া প্রশ্ন করিল, “কে ধরাচ্ছে?” “আবার কে? বেণীবাবুর চাকর দাঁড়িয়ে আছে, মুখুয়াদের খোঁটা দরওয়ানটাও আছে— দেখলুম; নেই কেবল আপনাদের লোক। শীগ্গীর পাঠান।” গোপাল কিছুমাত্র চাঞ্চল্য প্রকাশ করিল না; কহিল, “আমাদের বাবু মাছমাংস খান্ না।” ভৈরব কহিল, “নাই খেলেন; কিন্তু ভাগের ভাগ নেওয়া চাই ত।” গোপাল বলিল, “আমরা পাঁচজন ত চাই; বাবু বেঁচে থাকলে তিনিও তাই চাইতেন। কিন্তু, রমেশ বাবু একটু আলাদা ধরণের।” বলিয়া ভৈরবের মূখে বিস্ময়ের চিহ্ন দেখিয়া সহাস্যে একটুখানি শ্লেষ করিয়া কহিল, “এ তো তুচ্ছ হুটো সিঁড়ি মাগুর মাছ, আচার্য্য মশায়! সেদিন হাটের উত্তরদিকে সেই প্রকাণ্ড তেঁতুলগাছটা কাটিয়ে শ’বা দুঘরে ভাগ ক’রে নিলেন, আমাদের কাঠের একটা কঁচোও দিলেন না। আমি ছুটে এসে বাবুকে জানাতে, তিনি বই থেকে একবার একটু মুখ তুলে হেসে আবার পড়তে লাগলেন। জিজ্ঞেস করলুম, ‘কি করব বাবু?’ আমার রমেশ বাবু আর মুখটা একবার তোলবারও কুরসৎ পেলেন না। তার পর, পীড়াপীড়ি করতে বইখানা মুড়ে রেখে একটা হাই তুলে বললেন, ‘কাঠ? তা’ আর কি তেঁতুল গাছ নেই?’”

শোন কথা! বল্লুম ‘থাকবে না কেন? কিন্তু জায়া-অংশ ছেড়ে দেবই বা কেন, আর কে কোথায় এমন দেয়?’ রমেশ বাবু বইখানা আবার মেলে ধ’রে মিনিট পাঁচেক চুপ ক’রে থেকে বললেন, “সে ঠিক। কিন্তু দুখানা তুচ্ছ কাঠের জন্তে ত আর ঝগড়া করা যায় না।” ভৈরব অতিশয় বিস্ময়াপন্ন হইয়া কহিল—“বলেন কি!”

গোপাল সরকার মূহু হাসিয়া বারহুই মাথা নাড়িয়া কহিল, “বলি ভাল, আচাখ্যা মশাই, বলি ভাল! আমি সেই দিন থেকে বুঝেছি আর মিছে কেন! ছোট তরফের মা-লক্ষ্মী, তারিণী ঘোষালের সঙ্গেই অন্তর্দান হয়েচেন!” ভৈরব খানিকক্ষণ চুপ করিয়া থাকিয়া বলিল, “কিন্তু, পুকুরটা যে আমার বাড়ীর পিছনেই—আমায় একবার জানান চাই।”—গোপাল কহিল, “বেশ ত ঠাকুর, একবার জানিয়েই এসো না। দিবারাত্রি বই নিয়ে থাকলে, আর সরকারদের এত ভয় করলে, কি বিষয়-সম্পত্তি রক্ষে হয়? যহ মুখুর্ঘোর কল্যা—স্ত্রীলোক; সে পর্য্যন্ত শুনে হেসে কুটিপাটি! গোবিন্দ গাঙুলিকে ডেকে নাকি সেদিন তামাসা ক’রে বলেছিল, ‘রমেশবাবুকে বোলো একটা মাসহারা নিয়ে বিষয়টা আমার হাতে দিতে!’ এর চেয়ে লজ্জা আর আছে?” বলিয়া গোপাল রাগে হুঃখে মুখখানা বিকৃত করিয়া নিজের কাজে মন দিল।

বাটীতে স্ত্রীলোক নাই। সর্বত্রই অব্যবহৃত দ্বার। ভৈরব ভিতরে আসিয়া দেখিল, রমেশ সামনের বারান্দায় একখানা

ভাঙা ইঞ্জিনেরারের উপর পড়িয়া আছে । রমেশকে তাহার কর্তব্যকর্মে উত্তেজিত করিবার জন্ত, সে সম্পত্তি-রক্ষা-সম্বন্ধে সামান্য একটু ভূমিকা করিয়া কথাটা পাড়িবামাত্র রমেশ বন্দুকের গুলি খাইয়া ঘুমন্ত বাঘের মত গর্জিয়া উঠিয়া বলিল—
 “কি, রোজরোজ চালাকি না কি ! ভজুয়া ?” তাহার এই অভাবনীয় এবং সম্পূর্ণ অপ্রত্যাশিত উগ্রতায় ভৈরব দ্রুত হইয়া উঠিল ; এই চালাকিটা যে কাহার, তাহা সে ঠাহর করিতেই পারিল না । ভজুয়া রমেশের গোরখপুর জেলার চাকর । অত্যন্ত বলবান্ এবং বিশ্বাসী । লাঠালাঠি করিতে সে রমেশেরই শিষ্য ; নিজের হাত পাকাইবার জন্ত রমেশ নিজে শিখিয়া ইহাকে শিখাইয়াছিল । ভজুয়া উপস্থিত হইবামাত্র রমেশ তাহাকে খাড়া হুকুম করিয়া দিল—সমস্ত মাছ কাড়িয়া আনিতে এবং যদি কেহ বাধা দেয়, তাহার চুল ধরিয়া টানিয়া আনিতে যদি না আনা সম্ভব হয়, অন্ততঃ তাহার একপাটি দাঁত যেন ভাজিয়া দিয়া সে আসে । ভজুয়াত এই চায় । সে তাহার তেলেপাকানো লাঠি আনিতে নিঃশব্দে ঘরে গিয়া চুকিল । ব্যাপার দেখিয়া ভৈরব ভয়ে কাঁপিয়া উঠিল । সে বাঙলা দেশের তেলেজেলে মানুষ । হাঁকাহাঁকি, চোঁচাচোঁচিকে মোটে ভয় করে না ; কিন্তু ঐ যে অতি দৃঢ়কায়, বেঁটে হিন্দুস্থানীটা কথাটি কহিল না, শুধু ষাড়টা একবার হেলাইয়া চলিয়া গেল, ইহাতে ভৈরবের তালু পর্য্যন্ত ছুশ্চিন্তায় শুকাইয়া উঠিল । তাহার মনে পড়িল, যে কুকুর ডাকে না, সে ঠিক কামড়ায় ।

ভৈরব বাস্তবিক রমেশের শুভানুধ্যায়ী, তাই সে জানাইতে আসিয়াছিল, যদি সময়মত অকুস্থানে উপস্থিত হইয়া স'কার ব'কার চীৎকার করিয়া ছুটা কৈ-মাগুর ঘরে আনিতে পারা যায়। ভৈরব নিজেও ইহাতে সাহায্য করিবে মনে করিয়া আসিয়াছিল। কিন্তু কৈ, কিছুই ত তাহার হইল না। গালি-গালাজের ধার দিয়া কেহ গেল না। মনিব যদি বা একটা ছকার দিলেন, তৃত্যটা তাহার স্টোটটুকু পর্য্যন্ত নাড়িল না, লাঠি আনিতে গেল। ভৈরব গরীব লোক; ফোজদারীতে জড়াইবার মত তাহার সাহসও ছিল না, সঙ্কল্পও ছিল না। মুহূর্ত্তকাল পরেই সুদীর্ঘ বংশদণ্ড হাতে ভজুয়া ঘরের বাহির হইল এবং সেই লাঠি মাথায় ঠেকাইয়া দূর হইতে রমেশকে নমস্কার করিয়া প্রস্থানের উপক্রম করিতেই, ভৈরব অকস্মাৎ কঁাদিয়া উঠিয়া, রমেশের দুই হাত চাপিয়া ধরিল—“ওরে ভোজো, যালনে! বাবা রমেশ, রক্ষে কর বাবা, আমি গরীব মানুষ, একদণ্ডও বাঁচব না।” রমেশ বিরক্ত হইয়া হাত ছাড়াইয়া লইল। তাহার বিশ্বয়ের সীমা-পরিসীমা নাই। ভজুয়া অবাক হইয়া ফিরিয়া আসিয়া দাঁড়াইল। ভৈরব কঁাদকঁাদ স্বরে বলিতে লাগিল, “এ কথা ঢাকা থাকবে না, বাবা! বেণী বাবুর টোকাপে পড়ে তাহ'লে একটা দিনও বাঁচব না। আমার ঘরদোর পর্য্যন্ত জলে যাবে বাবা, ব্রহ্মা-বিষ্ণু এলেও রক্ষে করিতে পারবে না।” রমেশ ঘাড় হেঁট করিয়া স্তব্ধ হইয়া বসিয়া রহিল।

গোলমাল শুনিয়া গোপাল সরকার খাতা ফেলিয়া ভিতরে

আলিয়া দাঁড়াইয়াছিল। সে আশ্বে আশ্বে বলিল, “কথাটা ঠিক বাবু।” রমেশ তাহারও কোন জবাব দিল না, শুধু হাত নাড়িয়া ভজ্জ্বাকে তাহার নিজের কাজে যাইতে আদেশ করিয়া নিজেও নিঃশব্দে ঘরে চলিয়া গেল। তাহার হৃদয়ের মধ্যে যে কি ভীষণ ঝঞ্ঝার আকারেই এই ভৈরব আচার্য্যের অপরিণীম ভীতি ও কাতরোক্তি প্রবাহিত হইতে লাগিল, তাহা শুধু অন্তর্য্যামীই দেখিলেন।

৭

“হাঁরে যতীন, খেলা করছিস, ইস্কুলে যাবিনে?” “আমাদের যে আজকাল দু’দিন ছুটি দিদি!” মাসী শুনিতে পাইয়া কুংসিত মুখ আরও বিস্তী করিয়া বলিলেন, “মুখপোড়া ইস্কুলের মাসের মধ্যে পনরদিন ছুটি। তুই তাই ওর পেছনে টাকা খরচ করিস, আমি হ’লে আগুন ধরিয়ে দিতুম।” বলিয়া নিজের কাজে চলিয়া গেলেন। ষোল-আনা মিথ্যাবাদিনী বলিয়া যাহারা মাসীর অখ্যাতি প্রচার করিত, তাহারা ভুল করিত। এমনি এক-আধটা সত্যকথা বলিতেও তিনি পারিতেন, এবং আবশ্যক হইলে করিতেও পশ্চাৎপদ হইতেন না। রমা ছোট ভাইটিকে কাছে টানিয়া লইয়া, আশ্বে আশ্বে জিজ্ঞাসা করিল, “ছুটি কেন রে, যতীন?” যতীন দিদির কোল ঘেসিয়া দাঁড়াইয়া কহিল, “আমাদের ইস্কুলের চাল-ছাওয়া-হচ্ছে যে! তার পর চুণকাম হবে—কত বই এসেচে, চারপাঁচটা চেয়ার-টেবিল, একটা

আলমারী, একটা খুব বড় ঘড়ি—একদিন তুমি গিয়ে দেখে এসো না, দিদি!” রমা অত্যন্ত আশ্চর্য্য হইয়া কহিল, “বলিস্ কি রে!” হাঁ, দিদি সত্যি। রমেশবাবু এসেছেন না—তিনি সব ক’রে দিচ্ছেন।” বলিয়া বালক আরও কি কি বলিতে যাইতেছিল, কিন্তু স্তম্ভে মাসীকে আসিতে দেখিয়া রমা তাড়াতাড়ি তাহাকে লইয়া নিজের ঘরে চলিয়া গেল। আদর করিয়া কাছে বসাইয়া প্রশ্ন করিয়া করিয়া এই ছোট ভাইটির মুখ হইতে সে রমেশ ও স্কুল সম্বন্ধে অনেক তথ্য সংগ্রহ করিল। প্রত্যহ দুই এক ঘণ্টা করিয়া তিনি নিজে পড়াইয়া যান, তাহাও শুনি। হঠাৎ জিজ্ঞাসা করিল, “হাঁ, যতীন, তোকে তিনি চিন্তে পারেন?” বালক সগর্বে মাথা নাড়িয়া বলিল, “হাঁ—” “কি ব’লে তুই তাঁকে ডাকিস্?” এইবার যতীন একটু মুস্কলে পড়িল। কারণ, এতটা ঘনিষ্ঠতার সৌভাগ্য এবং সাহস আজও তাহার হয় নাই। তিনি উপস্থিত হইবামাত্র দোদ্দিওপ্রতাপ হেডমাষ্টার পর্য্যন্ত যেরূপ তটস্থ হইয়া পড়েন, তাহাতে ছাত্রমহলে ভয় এবং বিশ্বয়ের পরিসীমা থাকে না। ডাকা ত দূরের কথা—ভরসা করিয়া ইহারা কেহ তাঁহার মুখের দিকে চাহিতেই পারে না। কিন্তু দিদির কাছে স্বীকার করাও ত সহজ নহে। ছেলেরা মাষ্টারদিগকে ‘ছোটবাবু’ বলিয়া ডাকিতে শুনিয়াছিল। তাই, সে বুদ্ধিপরচ করিয়া কহিল, “আমরা ছোটবাবু বলি।” কিন্তু তাহার মুখের ভাব দেখিয়া রমার বুঝিতে কিছুই বাকী রহিল

না। সে ভাইকে আরও একটু বুকের কাছে টানিয়া লইয়া সহাস্ত্রে কহিল, “ছোটবাবু কি রে! তিনি যে তোর দাদা হ’ন। বেণীবাবুকে যেমন ‘বড়দা’ ব’লে ডাকিস্, এঁকে তেমনি ‘ছোটদা’ ব’লে ডাকতে পারিস্ নে?” বালক বিস্ময়ে আনন্দে চঞ্চল হইয়া উঠিল—“আমার দাদা হন তিনি? সত্যি বল্চ দিদি?” “তাই ত হয় রে”—বলিয়া রমা আবার একটু হাসিল। আর যতীনকে ধরিয়া রাখা শক্ত হইয়া উঠিল। খবরটা সঙ্গীদের মধ্যে এখন প্রচার করিয়া দিতে পারিলেই সে বাঁচে। কিন্তু ইস্কুল যে বন্ধ! এই দুটো দিন তাহাকে কোন-মতে ধৈর্য্য ধরিয়া থাকিতেই হইবে। তবে, যে সকল ছেলেরা কাছাকাছি থাকে, অন্ততঃ তাহাদিগকে না বলিয়াই বা সে থাকে কি করিয়া? সে আর একবার ছট্ফট্ করিয়া বলিল, “এখন যাব, দিদি?” “এত বেলা কোথায় যাবি রে?” বলিয়া রমা তাহাকে ধরিয়া রাখিল। যাইতে না পারিয়া যতীন খানিকক্ষণ অগ্রসন্নমুখে চুপ করিয়া থাকিয়া জিজ্ঞাসা করিল, “এত দিন তিনি কোথায় ছিলেন দিদি?” রমা স্নিগ্ধস্বরে কহিল, “এত দিন লেখাপড়া শিখতে বিদেশে ছিলেন। তুই বড় হ’লে তোকেও এমনি বিদেশে গিয়ে থাকতে হবে। আমাকে ছেড়ে পার্বি থাকতে, যতীন?” বলিয়া ভাইটিকে সে আর একবার বুকের কাছে আকর্ষণ করিল। বালক হইলেও সে তাহার দিদির কণ্ঠস্বরের কি রকম একটা পরিবর্তন অনুভব করিয়া বিস্মিতভাবে মুখপানে চাহিয়া রহিল। কারণ, রমা

তাহার এই ভাইটিকে প্রাণতুল্য ভালবাসিলেও তাহার কথায় এবং ব্যবহারে একরূপ আবেগ উচ্ছ্বাস কখন প্রকাশ পাইত না।

যতীন প্রশ্ন করিল, “ছোটদা’র সমস্ত পড়া শেষ হইবে গেছে, দিদি?” রমা তেমনি স্নেহকোমলকণ্ঠে জবাব দিল— “হাঁ ভাই, তাঁর সব পড়া শাক্ত হয়ে গেছে!” যতীন আবার জিজ্ঞাসা করিল, “কি ক’রে তুমি জানলে?” প্রত্যুত্তরে রমা শুধু একটা নিঃশ্বাস ফেলিয়া মাথা নাড়িল। বস্তুতঃ এ সম্বন্ধে সে, কিংবা গ্রামের আর কেহ, কিছুই জানিত না। তাহার অনুমান যে সত্য হইবেই, তাহাও নয়, কিন্তু কেমন করিয়া তাহার যেন নিশ্চয় বোধ হইয়াছিল, যে ব্যক্তি পরের ছেলের লেখাপড়ার জন্ত এই অত্যল্পকালের মধ্যেই একরূপ সচেতন হইয়া উঠিয়াছে, সে কিছুতেই নিজে মূর্থ নয়।

যতীন এ লইয়া আর জের করিল না। কারণ, ইতিমধ্যে ইঠাৎ তাহার মাথার মধ্যে আরও একটা প্রশ্নের আবির্ভাব হইতেই, চট্ করিয়া জিজ্ঞাসা করিয়া বসিল, “আচ্ছা, দিদি, ছোটদা, কেন আমাদের বাড়ী আসেন না? বড়দা তো রোজ আসেন।” প্রশ্নটা ঠিক যেন একটা আকস্মিক তীক্ষ্ণ বাথার মত রমার সর্ব্বাঙ্গে বিদ্যুৎবেগে প্রবাহিত হইয়া গেল। কিন্তু, তথাপি হাসিয়া কহিল, “তুই তাঁকে ডেকে আনতে পারিস্ নে?” “এখনি যাব দিদি?” বলিয়া তৎক্ষণাৎ যতীন উঠিয়া দাঁড়াইল। “ওরে কি পাগ্লা ছেলে রে তুই।” বলিয়া রমা চক্কর পলকে তাহার ভয়ব্যাকুল দুই বাহু বাড়াইয়া

তাহাকে জড়াইয়া ধরিল। “খপ্পদার, যতীন—কখনো এমন কাজ করিস্নে, ভাই, কখনো না।” বলিয়া ভাইটিকে সে যেন প্রাণপণ বলে বৃকের উপর চাপিয়া ধরিয়া রাখিল। তাহার অতি দ্রুত হৃৎস্পন্দন স্পষ্ট অনুভব করিয়া যতীন, বালক হইলেও, এবার বড় বিস্ময়ে মুখপানে চাহিয়া চূপ করিয়া রহিল। একে ত, এমন ধারা করিতে কখনও সে পূর্বে দেখে নাই, তা’ ছাড়া, ছোট বাবুকে ছোটদাদা বলিয়া জানিয়া যখন তাহার নিজের মনের গতি সম্পূর্ণ অন্ধ পথে গিয়াছে, তখন দিদি কেন যে তাঁহাকে এত ভয় করিতেছে, তাহা সে কোনমতেই ভাবিয়া পাইল না। এমন সময়ে মাসীর তীক্ষ্ণ আহ্বান কানে আসিতেই রমা, যতীনকে ছাড়িয়া দিয়া তাড়াতাড়ি উঠিয়া দাঁড়াইল। অনতিকাল পরে’ তিনি স্বয়ং আসিয়া দ্বারের সম্মুখে দাঁড়াইয়া বলিলেন, “আমি বলি, বুঝি রমা’ ঘাটে চান কর্তে গেছে। বলি, একাদশী ‘ব’লে কি এতটা বেলা পর্য্যন্ত মাথায় একটু তেলজলও দিতে হবে না? মুখ শুকিয়ে যে একেবারে কালীবর্ণ হয়ে গেছে।” রমা, জোর করিয়া একটুখানি হাসিয়া, বলিল, “তুমি যাও, মাসী, আমি এখনি যাচ্ছি।” “যাবি আর কখন? বেরিয়ে দেখ্গে যা, বেগীরা মাছ ভাগ কর্তে এসেচে।” মাছের নামে যতীন ছুটিয়া চলিয়া গেল। মাসীর অন্ত্যে রমা আঁচল দিয়া মুখখানা একবার জোর করিয়া মুছিয়া লইয়া, তাঁহার পিছনে পিছনে বাহিরে আসিয়া উপস্থিত

হইল। প্রাক্কণের উপর মহাকোলাহল। মাছ নিতান্ত কম ধরা পড়ে নাই—একটা বড় ঝুড়ির প্রায় একঝুড়ি। ভাগ করিবার জন্য বেণী নিজেই হাজির হইয়াছেন। পাড়ার ছেলে-মেয়েরা আর কোথাও নাই—সঙ্গে সঙ্গে আসিয়া ঘিরিয়া দাঁড়াইয়া গোলমাল করিতেছে।

কাসির শব্দ শোনা গেল। পরক্ষণেই, “কি মাছ পড়ল হে বেণী!” বলিয়া লাঠি হাতে ধর্মদাস প্রবেশ করিলেন। “তেমন আর কই পড়ল!” বলিয়া বেণী মুখখানা অগ্রসর করিল। জ্বেকে ডাকিয়া কহিল, “আর দেরি কবুচিস কেন রে? শীগগীর ক’রে দুভাগ ক’রে ফেল না।” জ্বেকে ভাগ করিতে প্রবৃত্ত হইল।

“কি হচ্ছে গো, রমা? অনেক দিন আসতে পারিনি; বলি, মাঘের আমার খবরটা একবার নিয়ে যাই”—বলিয়া গোবিন্দ গাঙুলী বাড়ী ঢুকিলেন। “আসুন”—বলিয়া রমা মুখ টিপিয়া একটুখানি হাসিল। “এত ভিড় কিসের গো?” বলিয়া গাঙুলী অগ্রসর হইয়া আসিয়া হঠাৎ খেন আশ্চর্য হইয়া গেলেন—“ইস! তাই ত গা—মাছ বড় মন্দ ধরা পড়েনি দেখ্‌চি। বড়পুকুরে জাল দেওয়া হ’ল বুঝি?” এ সকল প্রশ্নের উত্তর দেওয়া সকলেই বাহুল্য মনে করিয়া মৎস্ত-বিভাগের প্রতি ঝুঁকিয়া রহিল, এবং অলক্ষণের মধ্যেই তাহা সমাধা হইয়া গেল। বেণী নিজের অংশের প্রায় সমস্তটুকুই চাকুরের মাধ্যমে তুলিয়া দিয়া ধীবরের প্রতি একটা গোপন চোখের ইঙ্গিত করিয়া, গৃহে প্রত্য-

গমনের উত্তোগ করিলেন ; এবং মুখুষ্যদের প্রয়োজন অল্প বলিয়া রমার অংশ হইতে উপস্থিত সকলেই যোগ্যতা-অনুসারে কিছু-কিছু সংগ্রহ করিয়া ঘরে ফিরিবার উপক্রম করিতেছে, এমন সময় সকলেই আশ্চর্য্য হইয়া চাহিয়া দেখিল, রমেশ ঘোষালের সেই বেঁটে হিন্দুস্থানী চাকরটা তাহার মাথার সমান উঁচু বাঁশের লাঠি হাতে একেবারে উঠানের মাঝখানে আসিয়া দাঁড়াইয়াছে । এই লোকটার চেহারা এমনি দুঃখময়ের মত যে সকলের আগে সে চোখে পড়েই এবং একবার পড়িলেই মনে থাকে । গ্রামের ছেলে বুড়া সবাই তাহাকে চিনিয়া লইয়াছিল ; এমন কি, তাহাব সম্বন্ধে নানাবিধ আজগুবি গল্পও ধীরে ধীরে প্রচারিত এবং প্রতিষ্ঠিত হইতে আরম্ভ করিয়াছিল । লোকটা এত লোকের মাঝখানে রমাকেই যে কি করিয়া কতী বলিয়া চিনিল, তাহা সেই জানে, দূর হইতে মন্ত একটা সেলাম করিয়া, ‘মা-জী’ বলিয়া সম্বোধন করিল, এবং কাছে আসিয়া দাঁড়াইল । তাহার চেহারা যেমনই হোক, কণ্ঠস্বর সত্যই ভয়ানক ;—অত্যন্ত মোটা এবং ভাঙা । আর একটা সেলাম করিয়া হিন্দি-বাজালা-মেশানো ভাষায় সংক্ষেপে জানাইল, সে রমেশ বাবুর ভৃত্য, এবং মাছের তিন ভাগের এক ভাগ গ্রহণ করিতে আসিয়াছে । রমা বিস্ময়ের প্রভাবেই হোক বা তাহার সঙ্গত প্রার্থনার বিরুদ্ধে কথা খুঁজিয়া না পাওয়ার জন্তই হোক—সহসা উত্তর করিতে পারিল না । লোকটা চকিতে ঘাড় ফিরাইয়া বেণীর ভৃত্যকে উদ্দেশ্য করিয়া গম্ভীর গলায় বলিল, “এই ঘাও মাং” । চাকরটা

ভয়ে চার পা পিছাইয়া আসিয়া দাঁড়াইল। আধমিনিট পর্য্যন্ত কোথাও একটু শব্দ নাই; তখন বেণী সাহস করিলেন। যেখানে ছিলেন, সেইখান হইতে বলিলেন—“কিসের ভাগ?” ভজুয়া তৎক্ষণাৎ তাঁহাকে একটা সেলাম দিয়া সসম্মুখে কহিল, “বাবুজী, আপকো নাহি পুছা।” মাসী অনেক দূরে রকের উপর হইতে তীক্ষ্ণকণ্ঠে ঝন্ঝন্ করিয়া বলিলেন, “কি রে বাপু, মারবি না কি!” ভজুয়া একমুহূর্ত্ত তাঁহার প্রতি চাহিয়া রহিল; পরক্ষণেই তাহার ভাঙা গলার ভয়ঙ্কর হাসিতে বাড়ী ভরিয়া উঠিল। খানিক পরে হাসি থামাইয়া যেন একটু লজ্জিত হইয়াই পুনরায় রমার প্রতি চাহিয়া কহিল, ‘মা-জী?’ তাহার কথায় এবং ব্যবহারে অতিশয় সম্মুখের ভিতরে যেন অবজ্ঞা লুকান ছিল। রমা ইহাই কল্পনা করিয়া মনে মনে বিরক্ত হইয়া উঠিয়াছিল। এবার কথা কহিল। বলিল, “কি চায় তোর বাবু?” রমার বিরক্তি লক্ষ্য করিয়া ভজুয়া হঠাৎ যেন কুণ্ঠিত হইয়া পড়িল। তাই ঘটদূর সাধা, সেই কক্কশকণ্ঠ কোমল করিয়া তাহার প্রার্থনার পুনরাবৃত্তি করিল। কিন্তু করিলে কি হয়—মাছ ভাগ হইয়া যে বিলি হইয়া গেছে। এতগুলো লোকের সম্মুখে সে হীন হইতেও পারে না।—তাই কটুকণ্ঠে কহিল—“তোর বাবুর এতে কোন অংশ নেই। বল্ গে যা, যা’ পারে, তাই কক্কগ্ গে!” “বহুৎ আচ্ছা, মা-জী।” বলিয়া ভজুয়া তৎক্ষণাৎ একটা দীর্ঘ সেলাম করিয়া বেণীর ভৃত্যকে হাত নাড়িয়া যাইতে ইঙ্গিত করিয়া দিল, এবং দ্বিতীয় কথা না কহিয়া নিজেও প্রস্থান-

নের উপক্রম করিল। তাহার ব্যবহারে বাড়ীশুদ্ধ সকলেই যখন অত্যন্ত আশ্চর্য্য হইয়া গেছে, তখন হঠাৎ সে ফিরিয়া দাঁড়াইয়া রমার মুখের দিকে চাহিয়া, হিন্দি-বাক্যলায় মিশাইয়া নিজের কঠোর কণ্ঠস্বরের জন্ত কমা চাহিল, এবং কহিল, “মা-জী, লোকের কথা শুনিয়া পুকুর-ধার হইতে মাছ কাড়িয়া আনিবার জন্ত বাবু আমাকে ছকুম করিয়াছিলেন! বাবু-জী কিংবা আমি কেহই আমরা মাছ-মাংস ছুঁই না বটে, কিন্তু—বলিয়া সে নিজের প্রশস্ত বকের উপর করাঘাত করিয়া কহিল, “বাবুজীর ছকুমে এই জীউ হয় ত পুকুরধারেই আজ দিতে হইত। কিন্তু রামজী রক্ষা করিয়াছেন; বাবুজীর রাগ পড়িয়া গেল। আমাকে ডাকিয়া বলিলেন, ‘ভজুয়া, যা, মা-জীকে জিজ্ঞাসা ক’রে আয়, ও পুকুরে আমার ভাগ আছে কি না।’ বলিয়া সে অতি সম্মতের সহিত লাঠিশুদ্ধ চুই হাত রমার প্রান্ত উখিত করিয়া নিজের মাথায় ঠেকাইয়া নমস্কার করিয়া বলিল, “বাবুজী বলিয়া দিলেন—আর যে যাই বলুক, ভজুয়া, আমি নিশ্চয় জানি, মা-জীর জবান থেকে কখনও খুটাবাত বা’ব হবে না—সে কখনও পরের জিনিষ ছোঁবে না।” বলিয়া সে আন্তরিক সম্মতের সহিত বারংবার নমস্কার করিয়া বাহির হইয়া গেল।

যাইবামাত্রই বেণী মেঘেলি সরু গলায় আশ্ফালন করিয়া কহিল, “এমনি ক’রে উনি বিষয় বক্ষে করবেন! এই তোমাদের কাছে প্রতিজ্ঞে কর্ণি, আমি আজ থেকে গড়ের একটা শামুক-

শুগ্লিতেও ওকে হাত দিতে দেব না ; বুঝ্লে না রমা !” বলিয়া আহ্লাদে আঁটখানা হইয়া হিঃ—হিঃ—করিয়া টানিয়া টানিয়া হাসিতে লাগিল। রমার কানে কিন্তু ইহার একটা কথাও প্রবেশ করিল না। ‘মা-জীর মুখ হইতে কখনো বুটাবাত বাহির হইবে না’ ভজুয়ার এই বাক্যটা তখন তাহার দুই কানের ভিতর লক্ষ করতালির সমবেত ঝাঝঝম শব্দে যেন মাথাটা ছেঁচিয়া ফেলিতেছিল। তাহার গৌরবর্ণ মুখখানি পলকের জন্ত রাঙা হইয়াই এমনি শাদা হইয়া গিয়াছিল, যেন কোথাও একফোঁটা রক্তের চিহ্ন পর্য্যন্ত নাই। শুদ্ধ এই জ্ঞানটা তাহার ছিল, যেন এ মুখের চেহারাটা কাহারও চোখে না পড়ে। তাই সে মাথার আঁচলটা আর একটু টানিয়া দিয়া ক্রতপদে অদৃশ্য হইয়া গেল।

৮

“জ্যাঠাইমা !”

“কে, রমেশ ? আয়, বাবা ঘরে আয়।” বলিয়া আহ্বান করিয়া বিশেষরূপে তাড়া লাড়ি একখানি মাদুর পাতিয়া দিলেন। ঘরে পা দিয়াই রমেশ চমকিত হইয়া উঠিল। কারণ, জ্যাঠাইমার কাছে যে জীলোকটি বসিয়াছিল, তাহাব মুখ দেখিতে না পাইলেও বুঝিল—এ রমা। তাহার ভারি একটা চিত্তজ্বালার সহিত মনে হইল, ইহারা মাসীকে মাঝখানে রাখিয়া অপমান করিতেও ক্রটি করে না, আবার নিতান্ত

নির্লজ্জার মত নিভুতে কাছে আসিয়াও বসে ! এদিকে রমেশের আকস্মিক অভ্যাগমে রমারও অবস্থাসঙ্কট কম হয় নাই । কারণ, শুধু যে সে এ গ্রামের মেয়ে, তাই নয় ; রমেশের সহিত তাহার সম্বন্ধটাও এইরূপ যে, নিতান্ত অপরিচিতার মত ঘোমটা টানিয়া দিতেও তাহার লজ্জা করে, না দিয়াও সে স্বস্তি পায় না । তা ছাড়া সেদিন মাছ লইয়া একটা কাণ্ড ঘটিয়া গেল ! তাই সবদিক্ বাঁচাইয়া যতটা পারা যায়, সে আড় হইয়া বসিয়াছিল । রমেশ আর সে দিকে চাহিল না । ঘরে যে আর কেহ আছে, তাহা একেবারে অগ্রাহ করিয়া দিয়া, ধীরে স্বস্তে মাদুরের উপর উপবেশন করিয়া কহিল, “জ্যাঠাইমা ।” জ্যাঠাইমা বলিলেন, “হঠাৎ এমন দুপুরবেলা যে, রমেশ ?” রমেশ কহিল, “দুপুরবেলা না এসে তোমার কাছে যে একটু বসতে পাইনে । তোমার কাজ ত কম নয় !” জ্যাঠাইমা তাহার প্রতিবাদ না করিয়া শুধু একটুখানি হাসিলেন । রমেশ মুহূ হাসিয়া কহিল, “বহুকাল আগে ছেলেবেলায় একবার তোমার কাছে বিদায় নিয়ে গিয়েছিলুম । আবার আজ একবার নিতে এলুম । এই হয় ত শেষ নেওয়া, জ্যাঠাইমা !” তাহার মুখের হাসি সন্তোষে কণ্ঠস্বরে ভারাক্রান্ত হৃদয়ের এমনই একটা গভীর অবসাদ প্রকাশ পাইল যে, উভয় শ্রোতা বিস্মিত-ব্যথায় চমকিয়া উঠিলেন ।

“বালাই, ঘাট্ ! ও কি কথা, বাপ্ !” বলিয়া বিশ্বেশ্বরের চোখছুটি যেন ছলছল করিয়া উঠিল । রমেশ শুধু একটু হাসিল ।

বিশ্বেশ্বরী স্নেহাদ্রকণ্ঠে প্রশ্ন করিলেন, “শরীরটা কি এখানে ভাল থাক্চে না,—বাবা?” রমেশ নিজের সুদীর্ঘ এবং অত্যন্ত বলশালী দেহের পানে বার দুই দৃষ্টিপাত করিয়া বলিল, “এ যে খোট্টার দেশের ডালকুটির দেহ জ্যাঠাইমা, এ কি এত শীঘ্রই খারাপ হয়? তা’ নয়, শরীর আমার বেশ ভালই আছে, কিন্তু এখানে আমি আর একদণ্ডও টিক্তে পাচ্ছিনে, সমস্ত প্রাণটা যেন আমার থেকে-থেকে খাবি খেয়ে উঠ্চে।” শরীর খারাপ হয় নাই শুনিয়া, বিশ্বেশ্বরী নিশ্চিন্ত হইয়া হাসিমুখে জিজ্ঞাসা করিলেন, “এই তোমার জন্মস্থান—এখানে টিক্তে পারচিস্নে, কেন বল্ দেখি? রমেশ মাথা নাড়িয়া বলিল, “সে আমি বলতে চাইনে। আমি জানি, তুমি নিশ্চয়ই সমস্ত জানো।” বিশ্বেশ্বরী ক্ষণকাল মোন থাকিয়া, একটু গম্ভীর হইয়া বলিলেন, “সব না জান্লেও কতক জানি বটে। কিন্তু, সেই জন্তেই ত বল্চি, তোমার আর কোথাও গেলে চল্বে না, রমেশ?” রমেশ কহিল, “কেন চল্বে না, জ্যাঠাইমা? কেউ ত এখানে আমাকে চায় না?” জ্যাঠাইমা বলিলেন, “চায় না বলেই ত তাকে আর কোথাও পালিয়ে যেতে আমি দেব না। এই যে ডাল কুটি খাওয়া দেহের বড়াই কর্ছিলি রে, সে কি পালিয়ে যাবার জন্তে?” রমেশ চুপ করিয়া রহিল। আজ কেন যে তাহার সমস্ত চিন্তা জুড়িয়া গ্রামের বিপ্লবে বিদ্রোহের আগুন জলিয়া উঠিয়াছিল, তাহার একটু বিশেষ কারণ ছিল। গ্রামের যে পথটা বরাবর ষ্টেশনে গিয়া পৌছিয়াছিল, তাহার একটা

জায়গা আটদশ বৎসর পূর্বে বৃষ্টির জলশ্রোতে ভাঙ্গিয়া গিয়াছিল। সেই অবধি ভাঙনটা ক্রমাগত দীর্ঘতর এবং গভীরতর হইয়া উঠিয়াছে। প্রায়ই জল জামিয়া থাকে—স্থানটা উত্তীর্ণ হইতেই সকলকেই একটু দুর্ভাবনায় পড়িতে হয়। অল্প সময়ে কোনমতে পা টিপিয়া, কাপড় তুলিয়া, অতি সন্তর্পণে ইহারা পার হয়; কিন্তু বর্ষাকালে আর কষ্টের অবধি থাকে না। কোন বছর বা ছুটা বাঁশ ফেলিয়া দিয়া, কোন বছর বা একটা ভাঙা তালের ভোড়া উপুড় করিয়া দিয়া, কোনমতে তাহারি সাহায্যে ইহারা আছাড় খাইয়া, হাত পা ভাঙ্গিয়া, ওপারে গিয়া হাজির হয়। কিন্তু এত দুঃখসম্বন্ধে গ্রামবাসীরা আজ পর্য্যন্ত তাহার সংস্কারের চেষ্টা মাত্র করে নাই। মেরামত করিতে টাকাকুড়ি বায় হওয়া সম্ভব। এই টাকাটা রমেশ, নিজের না দিয়া চাঁদা তুলিবার চেষ্টায় আটদশ দিন পরিশ্রম করিয়াছে; কিন্তু আটদশটা পয়সা কাহারো কাছে বাহির করিতে পারে নাই। শুধু তাই নয়—আজ সকালে ঘুরিয়া আসিবার সময়, পথের ধারে শাকরাদের দোকানের ভিতরে এই প্রসঙ্গ হঠাৎ কাণে যাওয়ায়, সে বাহিরে দাঁড়াইয়া শুনিতে পাইল, কে একজন আর একজনকে হাসিয়া বলিতেছে, “একটা পয়সা কেউ তোরা দিসনে। দেখচিসনে ওর নিজের গরজটাই বেশী? জুতো পায়ে মসুমসিয়ে চলা চাই কিনা! না দিলে, ও আপনি সারিয়ে দেবে তা’ দেখিস। তা’ ছাড়া, এতকাল যে ও ছিল না, আমাদের ইষ্টীশান যাওয়া কি আটকে ছিল? কে আর

একজন কহিল, সবুর কর না হে ! চাটুষ্যে মশাই বলছিলেন, ওর মাথায় হাত বুলিয়ে শীতলাঠাকুরের ঘরটাও ঠিকঠাক করে নেওয়া হবে। খোসামোদক'রে দুটো 'বাবু' 'বাবু' করতে পারলেই বাস ! তখন হইতে সারা-সকালবেলাটা এই দুটো কথা তাহাকে ঘেন আগুন দিয়া পোড়াইতেছিল। জ্যাঠাইমা ঠিক এই স্থানটাতেই ঘা দিলেন। বলিলেন, "সে ভাঙনটা যে সারাবার চেষ্টা করছিল, তার কি হ'ল ?" রমেশ বিরক্ত হইয়া কহিল, "সে হবে না, জ্যাঠাইমা—কেউ একটা পয়সা চাঁদা দেবে না।" বিশ্বেশ্বরী হাসিয়া বলিলেন, "দেবে না বলে হবে না রে ! তোরা দাদামশায়ের ত তুই' অনেক টাকা পেয়েচিস্—এই ক'টা টাকা তুই ত নিজেই দিতে পারিস্ !" রমেশ একেবারে আগুন হইয়া উঠিল। কহিল, "কেন দেব ? আমার ভারি দুঃখ হচ্ছে যে, না বুঝে অনেক গুলো টাকা এদের ইস্কুলের জন্য খরচ করে ফেলেছি। এ গাঁয়ের কারো জন্তে কিছু করতে নেই।" রমার দিকে একবার কটাক্ষে চাহিয়া লইয়া বলিল,—এদের দান করলে এরা বোকা মনে করে ; ভাল করলে গরজ ঠাওরায়। ক্ষমা করাও মহাপাপ ; ভাবে—ভয়ে পেছিয়ে গেল !" জ্যাঠাইমা খুব হাসিয়া উঠিলেন ; কিন্তু রমার চোখমুখ একেবারে রক্তবর্ণ হইয়া উঠিল। রমেশ বাগ করিয়া কহিল, "হাস্লে যে জ্যাঠাইমা ?" "না হেসে করি কি বল ত বাছা ?" বলিয়া সহসা একটা নিশ্বাস ফেলিয়া বিশ্বেশ্বরী বলিলেন, "বরং আমি বলি, তোরাই এখানে থাক :

সবচেয়ে দরকার। রাগ করে যে জন্মভূমি ছেড়ে চলে যেতে চাচ্ছি, রমেশ, বল দেখি তোর রাগের যোগ্য লোক এখানে আছে কে ?” একটু থামিয়া, কতটা, যেন নিজের মনেই বলিতে লাগিলেন—“আহা ! এরা যে কত দুঃখী, কত দুর্বল—তা’ যদি জানিস, রমেশ, এদের ওপর রাগ করিতে তোর আপনি লজ্জা হবে। ভগবান যদি দয়া ক’রে তোকে পার্টিয়েছেন—তবে এদের মাঝখানেই তুই থাক, বাবা।” “কিন্তু, এরা যে আমাকে চায় না, জ্যাঠাইমা !” জ্যাঠাইমা বলিলেন, “তাই থেকেই কি বুঝতে পারিসনে, বাবা, এরা তোর রাগ অভিমানের কত অযোগ্য ? আর শুধু এরাই নয়—যে গ্রামে ইচ্ছে ঘুরে আস দেখবি সমস্তই এক।” সহসা রমার প্রতি দৃষ্টিপাত করিয়া বলিয়া উঠিলেন, “তুমি যে সেই থেকে ঘাড় হেঁট করে চুপ করে বসে আছ, মা ?—হী, রমেশ, তোরা ছ’ভাই শোনে কি কথাবার্তা বলিসনে ? না, মা, সে কোরো না। ওর বাপের সঙ্গে তোমাদের যা’ হ’য়ে গেছে, সে ঠাকুরপোর মৃত্যুর সঙ্গেই শেষ হয়ে গেছে। সে নিয়ে তোমরা দুজন মনাস্তর ক’রে থাকলে ত কিছুতে চলবে না।” রমা মুখ নীচু করিয়াই আন্তে আন্তে বলিল, “আমি মনাস্তর রাখতে চাইনে, জ্যাঠাইমা ! রমেশদা—” অকস্মাৎ তাহার মুহূর্ত্ত রমেশের গম্ভীর উত্তপ্ত কণ্ঠস্বরে ঢাকিয়া গেল। সে উঠিয়া দাঁড়াইয়া বলিল, “এর মধ্যে তুমি কিছুতে থেকে না মা ! জ্যাঠাইমা ! সেদিন কোনগতিকে ওর মাসীর হাতে

জ্ঞানে বেঁচেচ ; আজ আবার উনি গিয়ে যদি তাঁকে পাঠিয়ে দেন—একেবারে তোমাকে চিবিয়ে খেয়ে ফেলে তবে তিনি বাড়ী ফিরবেন ।” বলিয়াই কোনরূপ বাদ-প্রতিবাদের অপেক্ষা-মাত্র না করিয়াই দ্রুতপদে বাহির হইয়া গেল ।

বিশ্বেশ্বরী চোঁটাইয়া ডাকিলেন, “বাসুনে, রমেশ, কথা শুনে যা ।” রমেশ দ্বারের বাহির হইতে বলিল, “না, জ্যাঠাইমা—যারা অহঙ্কারের স্পর্ধায় তোমাকে পর্য্যন্ত পায়ের তলায় মাড়িয়ে চলে, তাদের হয়ে একটি কথাও তুমি বোলো না—” বলিয়া তাঁহার দ্বিতীয় অনুরোধের পূর্বেই চলিয়া গেল । বিহ্বলের মত রমা কয়েক মুহূর্ত্ত বিশ্বেশ্বরীর মুখের পানে চাহিয়া থাকিয়া কাঁদিয়া ফেলিল—“এ কলঙ্ক আমার কেন, জ্যাঠাইমা ? আমি কি মাসীকে শিথিয়ে দিই, না, তার জন্তে আমি দায়ী ?” জ্যাঠাইমা তাহার হাতখানা নিজের হাতের মাঝা টানিয়া লইয়া স্নেহে বলিলেন, “শিথিয়ে যে দাও নর, এ কথা সত্যি । কিন্তু, তাঁর জন্তে দায়ী তোমাকে কতকটা হ’তে হয় বই কি মা !” রমা অন্য হাতে চোখ মুছিতে মুছিতে রুদ্ধ অভিমানে সতেজ অস্বীকার করিয়া বলিল, “কেন দায়ী ? কথ’খনো না । আমি যে এর বিন্দুবিসর্গও জানুতাম না, জ্যাঠাইমা ! তবে কেন আমাকে উনি, মিথ্যে দোষ দিয়ে, অপমান ক’রে গেলেন ?” বিশ্বেশ্বরী ইহা লইয়া আর তর্ক করিলেন না । ধীরভাবে বলিলেন, “সকলে ত ভেতরের কথা জানুতে পারে না, মা । কিন্তু তোমাকে অপমান করবার ইচ্ছে ওর কখনো নেই, এ কথা

তোমাকে আমি নিশ্চয় বলতে পারি। তুমি ত জান না, মা, কিন্তু আমি গোপাল সরকারের মুখে শুনে টের পেয়েছি, তোমার ওপর ওর কত প্রীতি, কত বিশ্বাস। সেদিন তেঁতুল-গাছটা কাটিয়ে ছুঘরে যখন ভাগ ক'রে নিলে, তখন ও কা'রো কথায় কাণ দেয়নি যে; ওর তা'তে অংশ ছিল। তাদের মুখের উপর হেসে বলেছিল, চিন্তার কারণ নেই—রমা যখন আছে, তখন আমার গ্ৰাহ্য অংশ আমি পাবই; সে কখনো পরের জিনিস আত্মসাৎ করবে না। আমি ঠিক জানি, মা, এত বিবাদ-বিসংবাদের পরেও তোমার ওপর ওর সেই বিশ্বাসই ছিল, যদি না সেদিন গড়পুকুরের—“কথাটার মাঝখানেই বিশ্বেশ্বরী সহসা থামিয়া গিয়া নিনিমেষ-চক্ষে কিছুক্ষণ ধরিয়া রমার আনত শুকমুখের পানে চাহিয়া থাকিয়া অবশেষে বলিলেন, “আজ একটা কথা বলি, মা, তোমাকে। বিষয়-সম্পত্তি রক্ষা করার দাম যতই হোক রমা, এই রমেশের প্রাণটার দাম তার চেয়ে অনেক—অনেক বেশি। কারো কথায়, কোন বস্তুর লোভেতেই, মা সেই জিনিসটিকে তোমরা চারিদিকে থেকে ঘা মেরে-মেরে নষ্ট ক'রে ফেলো না। দেশের যে ক্ষতি তাতে হবে, আমি নিশ্চয় বলছি তোমাকে, কোন কিছু দিয়েই আর তার পূরণ হবে না।” রমা স্থির হইয়া বসিয়া রহিল, একটি কথারও প্রতিবাদ করিল না। বিশ্বেশ্বরীও আর কিছু বলিলেন না। থানিক পরে রমা অশ্রুপূর্ণ মুখকণ্ঠে কহিল,—“বেলা গেল, আজ বাড়ী যাই,

জ্যাঠাইমা !” বলিয়া প্রণাম করিয়া, পায়ের ধূলা মাথায় লইয়া চলিয়া গেল।

৯

যত রাগ করিয়াই রমেশ চলিয়া আসুক, বাড়ী পৌছিতে না পৌছিতে তাহার সমস্ত উত্তাপ যেন জল হইয়া গেল। সে বার বার করিয়া বলিতে লাগিল,—“এই সোজা কথাটা না বুঝিয়া কি কষ্টই না পাইতেছিলাম। বাস্তবিক, রাগ করি কাহার উপর? যাহারা এতই সঙ্কীর্ণভাবে স্বার্থপর যে, স্বার্থ মঙ্গল কোথায়, তাহা চোখ মেলিয়া দেখিতেই জানে না, শিক্ষার অভাবে তাহারা এমনি অন্ধ যে, কোনমতে প্রতিবেশীর বলক্ষয় করাটাকেই নিজেদের বল-সঞ্চয়ের শ্রেষ্ঠ উপায় বলিয়া মনে করে, যাহাদের ভাল করিতে গেলে সংশয়ে কণ্টকিত হইয়া উঠে, তাহাদের উপর অভিমান করার মত ভ্রম আর ত কিছু হইতে পারে না।” তাহার মনে পড়িল, দূরে সহরে বসিয়া সে বই পড়িয়া, কানে গল্প শুনিয়া, কল্পনা করিয়া, কতবার ভাবিয়াছে, ‘আমাদের বাঙ্গালী জাতির আর কিছু যদি না থাকে, ত নিভৃত গ্রামগুলির সেই শান্তি-স্বচ্ছন্দতা আজও আছে, যাহা বহুজনাকীর্ণ সহরে নাই। সেখানে স্বল্পসঙ্কট, সরল গ্রামবাসীরা সহানুভূতিতে গলিয়া যায়, একজনের দুঃখে আর একজন বুক দিয়া আসিয়া পড়ে, একজনের সুখে আর একজন অনাহুত উৎসব করিয়া যায়। শুধু সেইখানে, সেই সব হৃদয়ের মধ্যেই এখনো বাঙ্গালীর সত্যকার ঐশ্বর্য অক্ষয় হইয়া আছে।’ হায়

রে ! এ কি ভয়ানক ভ্রান্তি ! তাহার সহরের মধ্যেও যে এমন বিরোধ, এত পরশ্রীকাতরতা চোখে পড়ে নাই ! আর সেই কথাটা মনে পড়িতে তাহার সর্ব্বাঙ্গ বহিয়া যেন অসংখ্য সরীসৃপ চলিয়া বেড়াইতে লাগিল । নগরের সজীব চঞ্চল পথের ধারে যখনই কোন পাপের চিহ্ন তাহার চোখে পড়িয়া গেছে ; তখনই সে মনে করিয়াছে, কোনমতে তাহার জন্মভূমি সেই ছোট্টগ্রামখানিতে গিয়া পড়িলে সে এই সকল দৃশ্য হইতে চিরদিনের মত রেহাই পাইয়া বাঁচিবে । সেখানে যাহা সকলের বড়—সেই ধর্ম্ম আছে, এবং সামাজিক চরিত্রও আজি সেখানে অক্ষুণ্ণ হইয়া বিরাজ করিতেছে ! হা ভগবান্ ! কোথায় সেই চরিত্র ? কোথায় সেই জীবন্ত ধর্ম্ম আমাদের এই সমস্ত প্রাচীন নিভৃত গ্রামগুলিতে ! ধর্ম্মের প্রাণটাই যদি আকর্ষণ করিয়া লইয়াছে, তাহার মৃতদেহটাকে ফেলিয়া রাখিয়াছে কেন ? এই বিবর্ণ বিকৃত শবদেহটাকেই হতভাগ্য গ্রাম্য-সমাজ যে যথার্থ ধর্ম্ম বলিয়া প্রাণপণে জড়াইয়া ধরিয়া, তাহারি বিবাক্ত পুতিগন্ধময় পিচ্ছিলতায় অহর্নিশি অধঃপথেই নামিয়া চলিতেছে ! অথচ সর্ব্বাপেক্ষা মর্য্যাস্তিক পরিহাস এই যে, জাতিধর্ম্ম নাই বলিয়া সহরের প্রতি ইহাদের অবজ্ঞা, অশ্রদ্ধারও অন্ত নাই !

রমেশ বাড়ীতে পা দিতেই দেখিল, প্রাক্কণের একধারে একটি প্রোটা স্ত্রীলোক একটি এগারো বারো বছরের ছেলেকে লইয়া জড়সড় হইয়া বসিয়াছিল, উঠিয়া দাঁড়াইল । কিছু না জানিয়া শুধু ছেলেটির মুখ দেখিয়াই রমেশের বুকের ভিতরটা যেন

কাদিয়া উঠিল। গোপাল সরকার চণ্ডীমণ্ডপের বারান্দায় বসিয়া লিখিতেছিল; উঠিয়া আসিয়া কহিল,—“ছেলেটি দক্ষিণ-পাড়ার দ্বারিক ঠাকুরের ছেলে। আপনার কাছে কিছু ভিক্ষায় জন্তে এসেচে।” ভিক্ষার নাম শুনিয়াই রমেশ জলিয়া উঠিয়া বলিল, “আমি কি শুধু ভিক্ষা দিতেই বাড়ী এসেছি, সরকার মশায়? গ্রামে কি আর লোক নেই?” গোপাল সরকার একটু অপ্রতিভ হইয়া বলিল, “সে ত ঠিক কথা বাবু! কিন্তু কর্ত্তা ত কখনও কারকে ফেরাতেন না; তাই, দায়ে পড়িলেই, এই বাড়ীর দিকেই লোকে ছুটে আসে।” ছেলেটির পানে চাহিয়া প্রৌঢ়াটিকেই উদ্দেশ্য করিয়া বলিল,—“হাঁ কামিনীর মা, এদের দোষও ত কম নয়, বাছা! জ্যান্ত থাকতে প্রায়শ্চিত্ত ক’রে দিলে না, এখন মড়া যখন ওঠে না, তখন টাকার জন্তে ছুটে বেড়াচ্ছে। ঘরে ঘটিটা বাটিটাও কি নেই বাপু?” কামিনীর মা জ্ঞাতিতে সদগোপ। এই ছেলেটির প্রতিবেশী। মাথা নাড়িয়া বলিল,—“বিশ্বেস না হয়, বাপু, গিয়ে দেখ্বে চল। আমার কিছু থাকলেও কি মরা বাপ ফেলে একে ভিক্ষে করতে আনি? চোখে না দেখ্লেও শুনেচ ত সব? এই ছমাস ধ’রে আমার যথাসর্ব্বস্ব এই জন্তাই টেলে দিয়েছি। বলি, ঘরের পাশে বামুনের ছেলেমেয়ে না খেতে পেয়ে মরবে!” রমেশ এইবার ব্যাপারটা কতক যেন অনুমান করিতে পারিল। গোপাল সরকার তখন বুঝাইয়া কহিল,—“এই ছেলেটির বাপ—দ্বারিক চক্রবর্ত্তী, ছমাস হইতে কাসরোগে শয্যাগত থাকিয়া,

আজ ভোরবেলায় মরিয়াছে ; প্রায়শ্চিত্ত হয় নাই বলিয়া, কেহ শব্দস্পর্শ করিতে চাহিতেছে না—এখন সেইটা করা নিতান্ত প্রয়োজন । কামিনীর মা গত ছয়মাসকাল তাহার সর্বস্ব এই নিঃস্ব ব্রাহ্মণ-পরিবারের জন্ত ব্যয় করিয়া ফেলিয়াছে । আর তাহারও কিছু নাই । সেই জন্ত ছেলেটিকে লইয়া আপনার কাছে আসিয়াছে ।” রমেশ খানিকক্ষণ চুপ করিয়া থাকিয়া, জিজ্ঞাসা করিল, “বেলা ত প্রায় দুটো বাজে । যদি প্রায়শ্চিত্ত না হয়, মড়া পড়েই থাকবে ?” সরকার হাসিয়া কহিল,— “উপায় কি বাবু ? অশান্তর কাজ ত আর হ’তে পারে না । আর এতে পাড়ার লোককেই বা দোষ দেবে কে, বলুন ?— যা হোক, মড়া প’ড়ে থাকবে না ; যেমন ক’রে হোক, কাজটা ওদের করুতেই হবে । তাই ত ভিক্ষে—হাঁ কামিনীর মা, আর কোথাও গিয়েছিলে ?” ছেলেটি মুঠা খুলিয়া একটি সিকি ও চারিটা পয়সা দেখাইল ।—কামিনীর মা কহিল, “সিকিটি মুখু-ঘোরা দিয়েচে, আর পয়সা চারটি হালদার মশাই দিয়েছেন, কিন্তু যেমন ক’রে হোক ন’সিকের কমে ত হবে না । তাই, বাবু যদি”—রমেশ তাড়াতাড়ি কহিল, “তোমরা বাড়ী যাও বাপু, আর কোথাও যেতে হবে না ! আমি এখনি সমস্ত বন্দোবস্ত ক’রে, লোক পাঠিয়ে দিচ্ছি ।” তাদের বিদায় করিয়া দিয়া রমেশ, গোপাল সরকারের মুখের প্রতি অত্যন্ত ব্যথিত দুই চক্ষু তুলিয়া প্রস্থ করিল,—“এমন গরীব এ গাঁয়ে আর কয়ঘর আছে, জানেন আপনি ?” সরকার কহিল,—“হু’তিন ঘর আছে, বেশী

নেই। এদেরও মোটা ভাত-কাপড়ের সংস্থান ছিল, বাবু; শুধু একটা চালদা গাছ নিয়ে মামলা ক'রে দ্বারিক চক্কোত্তি আর সনাতন হাজরা, দু'ঘরেই বছরপাঁচেক আগে শেষ হ'য়ে গেল।" গলাটা একটু খাটো করিয়া কহিল,—“এতদূর গড়াত না, বাবু, শুধু আমাদের বড় বাবু, আর গোবিন্দ গাঙুলীই, দু'খনকেই নাচিয়ে তুলে এতটা ক'রে তুললেন!” “তার পরে?” সরকার কহিল,—“তার পর, আমাদের বড়বাবুর কাছেই দু'ঘরের গলা পর্যন্ত এতদিন বাঁধা ছিল। গত বৎসর উনি স্বদে-আসলে সমস্তই কিনে নিয়েছেন। হাঁ, চামার মেয়ে বটে ওই কামিনীর মা! অসময়ে বামুনের যা করুলে, এমন দেখতে পাওয়া যায় না।” রমেশ, একটা দীর্ঘনিঃশ্বাস ফেলিয়া চুপ করিয়া রহিল। তার পর, গোপাল সরকারকে সমস্ত বন্দোবস্ত করিয়া দিবার জন্ত পাঠাইয়া দিয়া, মনে মনে বলিল—“তোমার আদেশই মাথায় তুলে নিলাম, জ্যাঠাইমা! মরি এখানে, সেও ঢের ভাল, কিন্তু এ দুর্ভাগ্য গ্রামকে ছেড়ে আর কোথাও যেতে চাইব না।”

১০

মাস তিনেক পরে একদিন সকালবেলা তারকেশ্বরের যে পুষ্করিণীটিকে দুধপুকুর বলে, তাহারই সিঁড়ির উপর একটি রমণীর সহিত রমেশের একেবারে মুখোমুখি দেখা হইয়া গেল। কণকালের জন্ত সে এমনি অভিভূত, অভদ্রভাবে তাহার অনাবৃত মুখের পানে চাহিয়া দাঁড়াইয়া রহিল যে, তাহার

তৎক্ষণাৎ পথ ছাড়িয়া সরিয়া যাইবার কথা মনেই হইল না। মেয়েটির বয়স, বোধ করি, কুড়ির অধিক নয়। স্নান করিয়া উপরে উঠিতেছিল। তাড়াতাড়ি হাতের জলপূর্ণ ঘটিটি নামাইয়া পাখিয়া সিক্ত-বসনতলে দুই বাহু বুকের উপর জড় করিয়া, মাথা হেঁট করিয়া মুহূর্ণ্যে কহিল,—“আপনি এখানে যে?” রমেশের বিস্ময়ের অবধি রহিল না; কিন্তু তাহার বিস্ময়লতা ঘুচিয়া গেল। একপাশে সরিয়া দাঁড়াইয়া জিজ্ঞাসা করিল, “আপনি কি আমাকে চেনেন?” মেয়েটি কহিল,—“চিনি। আপনি কখন তারকেশ্বরে এলেন?” রমেশ বলিল, “আজই ভোরবেলা। আমার মামার বাড়ী থেকে মেয়েদের আসবার কথা ছিল, কিন্তু তাঁরা আসেন নি।” “এখানে কোথায় আছেন?” রমেশ কহিল,—“কোথাও না। আমি আর কখনো এখানে আসিনি। কিন্তু আজকের দিনটা কোনমতে কোথাও অপেক্ষা ক’রে থাকতেই হবে। যেখানে হোক, একটা আশ্রয় খুঁজে নেব।” “সঙ্গে চাকর আছে ত?” “না, আমি একাই এসেছি।” “বেশ যা হোক” বলিয়া মেয়েটি হাসিয়া হঠাৎ মুখ তুলিতেই, আবার দুজনের চোখোচোখি হইল। সে চোখ নামাইয়া লইয়া মনে মনে, বোধ করি, একটু ইতস্ততঃ করিয়া শেষে কহিল, “তবে আমার সঙ্গেই আসুন” বলিয়া ঘটিটি তুলিয়া লইয়া অগ্রসর হইতে উদ্যত হইল। রমেশ বিপাদ পড়িল। কহিল,—“আমি যেতে পারি, কেন না, এতে দোষ থাকলে আপনি কখনই ডাকতেন না। আপনাকে আমি

যে চিনি না, তাও নয়; কিন্তু কিছুতেই স্বরণ করতে পাচ্ছিলে।
 আপনার পরিচয় দিন।” “তবে মন্দিরের বাইরে একটু অপেক্ষা
 করুন, আমি পূজোটা সেরে নিই। পথে যেতে যেতে আমার
 পরিচয় দেব” বলিয়া মেয়েটি মন্দিরের দিকে চলিয়া গেল।
 রমেশ মুন্সের মত চাহিয়া রহিল। এ কি ভীষণ, উদ্দাম যৌবনশ্রী
 ইহার আর্দ্র বসন বিদীর্ণ করিয়া বাহিরে আসিতে চাহিতেছিল।
 তাহার মুখ, গঠন, প্রতি পদক্ষেপ পর্য্যন্ত রমেশের পরিচিত;
 অথচ, বহুদিনকাল স্মৃতির কবাট কোনমতেই তাহাকে পথ
 ছাড়িয়া দিল না। আধঘণ্টা পরে পূজা সারিয়া মেয়েটি আবাব
 ঘপন বাহিরে আসিল, রমেশ আর একবার তাহার মুখ দেখিতে
 পাইল; কিন্তু তেমনিই অপরিচয়ের ভূভেদ প্রাকারের বাহিরে
 দাঁড়াইয়া রহিল। পথে চলিতে চলিতে রমেশ জিজ্ঞাসা করিল,
 —“সঙ্গে আপনার আত্মীয় কেউ নেই?” মেয়েটি উত্তর দিল,
 —“না। দাসী আছে, সে বাসায় কাজ করুচে। আমি প্রায়ই
 এখানে আসি, সমস্তই চিনি।” “কিন্তু, আমাকে সঙ্গে নিয়ে
 যাচ্ছেন কেন?” মেয়েটি খানিকক্ষণ চুপ করিয়া পথ চলিবার
 পরে বলিল,—“নইলে আপনার খাওয়া-দাওয়ার ভারি কষ্ট
 হ’ত। আমি রমা।”

*

*

*

*

সন্মুখে বসিয়া আহার করাইয়া, পান দিয়া বিশ্রামের জন্ত
 নিজের হাতে সতরঞ্চি পাতিয়া দিয়া, রমা কক্ষান্তরে চলিয়া
 গেল। সেই শয্যায় শুইয়া পড়িয়া চক্ষু মুদ্রিয়া, রমেশের

মনে হইল, তাহার এই তেইশবর্ষব্যাপী জীবনটা এই একটা বেলার মধ্যে যেন আগাগোড়া বদলাইয়া গেল। ছেলেবেলা হইতেই তাহার বিদেশে পরাশ্রয়ে কাটিয়াছে। খাওয়াটার মধ্যে ক্ষম্ভিবৃষ্টির অধিক আর কিছু যে কোনো অবস্থাতেই থাকিতে পারে, ইহা সে জানিতই না। তাই, আজিকার এই অচিস্তনীয় পরিতৃষ্টির মধ্যে তাহার সমস্ত মন বিন্ময়ে, মাধুর্য্যে, একেবারে ডুবিয়া গেল। রমা বিশেষ কিছুই এখানে তাঁহার আহারের জন্ত সংগ্রহ করিতে পারে নাই। নিতান্তই সাধারণ ভোজ্য ও পেয় দিয়া তাঁহাকে খাওয়াইতে হইয়াছে। এইজন্য তাহার বড় ভাবনা ছিল, পাছে তাঁহার খাওয়া না হয় এবং পরের কাছে নিন্দা হয়। হায় রে পর! হায় রে তা'দের নিন্দা! খাওয়া না হইবার দুর্ভাবনা যে তাহার নিজেরই কত আপনার এবং সে যে তাহার অন্তরের অন্তরতম গহ্বর হইতে অকস্মাৎ জাগিয়া উঠিয়া, তাহার সর্ববিধ দ্বিধা-সঙ্কোচ সজোরে ছিনিয়া লইয়া, এই খাওয়ার যায়গায় তাহাকে ঠেলিয়া পাঠাইয়া দিয়াছিল, এ কথা কেমন করিয়া আজ সে তাহার নিজের কাছে লুকাইয়া রাখিবে। আজ ত কোন লজ্জার বাধাই তাহাকে দূরে রাখিতে পারিল না। এই আহার্য্যের স্বল্পতার ক্রটি শুধু যত্ন দিয়া পূর্ণ করিয়া লইবার জন্তই সে স্তম্ভে আসিয়া বসিল। আহার নির্বিশেষে সমাধা হইয়া গেলে, গভীর পরিতৃষ্টির যে নিশ্বাসটুকু রমার নিজের বুকের ভিতর হইতে বাহির হইয়া আসিল, তাহার রমেশের নিজের চেয়ে যে কত বেশি, তাহা আর কেহ

বসি না, জানিল, যিনি সব জানেন, তাঁহার কাছে ত গোপন রহিল না।

দিবানিজ্জা রমেশের অভ্যাস ছিল না। তাহার সুমুখের ছোট জানালার বাহিরে নববর্ষার ধূসর-শ্রামল-মেঘে মধ্যাহ্ন-আকাশ ভরিয়া উঠিতেছিল; অর্দ্ধ-নিম্নীলিত চক্ষে সে তাহাই দেখিতেছিল। তাহার আত্মীয়গণের আসা না আসার কথা আর তাহার মনেই ছিল না। হঠাৎ রমার মূহুর্ত তাহার কানে গেল। সে দরজার বাহিরে দাঁড়াইয়া বলিতেছিল,—“আজ যখন বাড়ী যাওয়া হবে না, তখন এইখানেই থাকুন!” রমেশ তাড়াতাড়ি উঠিয়া বসিয়া বলিল,—“কিন্তু ষাঁর বাড়ী, তাঁকে এখনো ত দেখতে পেলাম না। তিনি না বললে থাকি কি করে?” রমা সেইখানে দাঁড়াইয়াই প্রত্যুত্তর করিল,—“তিনিই বলছেন থাকতে। এ বাড়ী আমার।” রমেশ বিস্মিত হইয়া প্রশ্ন করিল,—“এ স্থানে বাড়ী কেন?” রমা বলিল,—“এ স্থানটা আমার খুব ভাল লাগে। প্রায়ই এসে থাকি। এখন লোক নেই বটে; কিন্তু, এমন সময় হয় যে, পা-বাড়াবার জায়গা থাকে না।” রমেশ কহিল, “বেশ ত, তেমন সময় নাই এলে?” রমা নীরবে একটু হাসিল। রমেশ পুনরায় জিজ্ঞাসা করিল, “তারকনাথ ঠাকুরের উপর, বোধ করি, তোমাদের খুব ভক্তি, না?” রমা বলিল,—“তেমন ভক্তি আর হয় কই? কিন্তু যতদিন বেঁচে আছি, চেষ্টা করতে হবে ত।” রমেশ আর কোন প্রশ্ন করিল না। রমা সেইখানেই চৌকাঠ ঘেসিয়া বসিয়া

পড়িয়া, অন্য কথা পাড়িল, জিজ্ঞাসা করিল,—“রাজে আপনি কি খান ?” রমেশ হাসিয়া কহিল, “ঘা’ জোটে, তাই খাই। আমার খেতে বসবার আগের মুহূর্ত্ত পর্য্যন্ত কখনো খাবার কথা মনে হয় না। তাই, বামুনঠাকুরের বিবেচনার উপরেই আমাকে সন্তুষ্ট থাকতে হয়।” রমা কহিল,—“এত বৈরাগ্য কেন ?” ইহা প্রচ্ছন্ন বিদ্রূপ কিংবা সরল পরিহাস মাত্র, তাহা রমেশ ঠিক বুঝিতে পারিল না। সংক্ষেপে জবাব দিল,—“না। এ শুধু আলস্য।” “কিন্তু, পরের কাজে ত আপনার আলস্য দেখানে ?” রমেশ কহিল,—“তার কারণ আছে। পরের কাজে আলস্য করিলে ভগবানের কাছে জবাবদিহিতে পড়তে হয়। নিজের কাজেও হয় ত হয়, কিন্তু নিশ্চয়ই অত নয়।” রমা একটুখানি মৌন থাকিয়া কহিল,—“আপনার টাকা আছে, তাই আপনি পরের কাজে মন দিতে পারেন; কিন্তু যাদের নেই ?” রমেশ বলিল,—“তাদের কথা জানিনে রমা ! কেন না, টাকা থাকারও কোন পরিমাণ নেই, মন দেবারও কোন ধরাবাঁধা ওজন নেই। টাকা থাকা না থাকার হিসেব তিনিই জানেন, যিনি ইহ-পরকালের ভার নিয়েছেন।” রমা ক্ষণকাল চুপ করিয়া থাকিয়া কহিল,—“কিন্তু, পরকালের চিন্তা করবার বয়স ত আপনার হয় নি। আপনি আমার চেয়ে শুধু তিন বছরের বড়।” রমেশ হাসিয়া বলিল,—“তার মানে, তোমার আরও হয় নি। ভগবান্ তাই করুন, তুমি দীর্ঘজীবী হ’য়ে থাক ; কিন্তু, আমি নিজের সম্বন্ধে আজই

যে আমার শেষ দিন নয়, এ কথা কখনও মনে করিনে।” তাহার কথার মধ্যে যেটুকু প্রচ্ছন্ন আঘাত ছিল, তাহা বোধ করি, বৃথা হয় নাই। একটুখানি স্থির থাকিয়া রমা হঠাৎ জিজ্ঞাসা করিয়া উঠিল,—“আপনাকে সন্ধ্যা-আহ্নিক করিতে ত দেখলুম না! মন্দিরের মধ্যে কি আছে না আছে, তা’ না হয় নাই দেখলেন, কিন্তু খেতে ব’সে গণ্ডূষ করাটাও কি ভুলে গেছেন?” রমেশ মনে মনে হাসিয়া বলিল,—“ভুলিনি বটে, কিন্তু ভুললেও কোন ক্ষতি বিবেচনা করিনে। কিন্তু, এ কথা কেন?” রমা বলিল,—“পরকালের ভাবনাটা আপনার খুব বেশী কি না, তাই জিজ্ঞাসা কর্চি।” রমেশ ইহার জবাব দিল না; তার পরে কিছুক্ষণ পর্য্যন্ত দুই জনে চুপ করিয়া রহিল। রমা আন্তে আন্তে বলিল,—“দেখুন, আমাকে দীর্ঘজীবী হ’তে বলা শুধু অভিশাপ দেওয়া। আমাদের হিন্দুর ঘরে বিধবার দীর্ঘজীবন কোন আত্মীয় কোন দিন কামনা করে না।” বলিয়া আবার একটুখানি চুপ করিয়া থাকিয়া কহিল,—“আমি মরবার জন্তে যে পা বাড়িয়ে দাঁড়িয়ে আছি, তা, সত্যি নয় বটে, কিন্তু বেশীদিন বেঁচে থাকবার কথা মনে হ’লেও আমাদের ভয় হয়। কিন্তু আপনার সম্বন্ধে ত সে কথা খাটে না! আপনাকে জোর ক’রে কোন কথা বলা আমার পক্ষে প্রগল্ভতা; কিন্তু, সংসারে ঢুকে যখন পরের জন্তে মাথাব্যথা হওয়াটা নিজেরই নিতান্তই ছেলেমানুষি ব’লে মনে হবে, তখন আমারই এই কথাটা স্মরণ করবেন।” প্রত্যুত্তরে রমেশ শুধু একটা নিঃশ্বাস

ফেলিল। খানিক পরে রমার মতই ধীরে ধীরে বলিল,—“কিন্তু তোমাকে স্বরণ ক’রে বল্চি, আজ আমার এ কথা কোন মতেই মনে হচ্ছে না। আমি তোমার ত কেউ নই রমা, বরং তোমাদের পথের কাঁটা। তবু প্রতিবেশী ব’লে আজ তোমার কাছে যে যত্ন পেলুম, সংসারে ঢুকে এ যত্ন ঘারা আপনার লোকের কাছে নিত্য পায়, আমার ত মনে হয়, পরের হৃৎ-কষ্ট দেখলে তারা পাগল হয়ে ছোটে। এইমাত্র আমি একা ব’সে চুপ ক’রে ভাব্ছিলুম, আমার সমস্ত জীবনটি যেন তুমি এই একটা বেলার মধ্যে আগাগোড়া বদলে দিয়েচ। এমন ক’রে আমাকে কেউ কখনো খেতে বলেনি, এত যত্ন কোরে আমাকে কেউ কোন দিন খাওয়ায়নি। খাওয়ার মধ্যে যে এত আনন্দ আছে, আজ তোমার কাছে থেকে এই প্রথম জানলাম রমা।” কথা শুনিয়া রমার সর্বদা কাঁটা দিয়া বারংবার শিহরিয়া উঠিল; কিন্তু সে তৎক্ষণাৎ স্থির হইয়া বলিল,—“এ ভুলতে আপনার বেশী দিন লাগবে না। যদি বা একদিন মনেও পড়ে, অতি তুচ্ছ ব’লেই মনে পড়বে।”

রমেশ কোন উত্তর করিল না। রমা কহিল,—“দেশে গিয়ে যে, নিন্দে করবেন না, এই আমার ভাগ্য।” রমেশ আবাব একটা নিঃশ্বাস ফেলিয়া ধীরে ধীরে বলিল,—“না রমা, নিন্দে করব না, সুখ্যাতি করেও বেড়াব না। আজকের দিনটাই আমার নিন্দা-সুখ্যাতির বাহিরে।” রমা কোন প্রত্যুত্তর না করিয়া, খানিকক্ষণ স্থির হইয়া বসিয়া থাকিয়া, নিজের ঘরে

উঠিয়া চলিয়া গেল। সেখানে নির্জন ঘরের মধ্যে তাহার দুই-চোখ বহিয়া বড় বড় অশ্রুর ফোঁটা টপ্-টপ্ করিয়া ঝরিয়া পড়িতে লাগিল।

১১

দুইদিন অবিশ্রান্ত বৃষ্টিপাত হইয়া অপরাহ্ন-বেলায় একটু ধরণ হইয়াছে। চণ্ডীমণ্ডপে গোপাল সরকারের কাছে বসিয়া রমেশ জমিদারীর হিসাবপত্র দেখিতেছিল; অকস্মাৎ প্রায় কুড়িজন কৃষক আসিয়া কাদিয়া পড়িল—“ছোটবাবু, এ যাত্রা রক্ষে করুন, আপনি না বাঁচালে ছেলেপুলের হাত ধ’রে আমাদের পথে ভিক্ষে করিতে হবে।” রমেশ অবাক হইয়া কহিল, “ব্যাপার কি?” চাষারা কহিল,—“একশ-বিঘের মাঠ ডুবে গেল, জল বা’র ক’রে না দিলে সমস্ত ধান নষ্ট হয়ে যাবে বাবু, গাঁয়ে একটা ঘরও খেতে পাবে না!” কথাটা রমেশ বুঝিতে পারিল না। গোপাল সরকার তাহাদের দুই একটা প্রশ্ন করিয়া, ব্যাপারটা রমেশকে বুঝাইয়া দিল। একশ-বিঘার মাঠটাই এ গ্রামের একমাত্র ভরসা। সমস্ত চাষীদেরই কিছু কিছু জমি তাহাতে আছে। ইহার পূর্বধারে সরকারী প্রকাণ্ড বাঁদ, পশ্চিম ও উত্তরধারে উচ্চ গ্রাম, শুধু দক্ষিণধারের বাঁধটা ঘোষাল ও মুখু্যোদের। এই দিক দিয়া জল নিকাশ করা যায় বটে, কিন্তু বাঁধের গায়ে একটা জলার মত আছে। বৎসরে দু’শ টাকার মাছ বিক্রী হয় বলিয়া জমিদার বেগীবাবু তাহা

কড়া-পাহারায় আটকাইয়া রাখিয়াছেন। চাষারা আজ সকাল হইতে তাঁহাদের কাছে হত্যা দিয়া পড়িয়া থাকিয়া, এইমাত্র কাদিতে কাদিতে উঠিয়া এখানে আসিয়াছে। রমেশ আর শুনিলার জন্য অপেক্ষা করিল না, দ্রুতপদে প্রস্থান করিল। এ বাড়ীতে আসিয়া যখন প্রবেশ করিল, তখন সন্ধ্যা হয়। বেণী তাকিয়া ঠেস দিয়া তামাক খাইতেছেন এবং কাছে হালদার-মহাশয় বসিয়া আছেন; বোধ করি, এই কথাই হইতেছিল। রমেশ কিছুমাত্র ভূমিকা না করিয়াই কহিল,—“জলার বাঁধ আটকে রাখলে আর ত চলবে না, এখন সেটা কাটিয়ে দিতে হবে।” বেণী হুঁকটা হালদারের হাতে দিয়া মুখ তুলিয়া বলিলেন, “কোন বাঁধটা?” রমেশ উত্তেজিত হইয়াই আসিয়াছিল, ক্রুদ্ধভাবে কহিল,—“জলার বাঁধ আর একটা আছে বড়দা? না কাটালে সমস্ত গাঁয়ের ধান হেজে যাবে। জল বাঁধ ক’রে দেবার হুকুম দিন।” বেণী কহিলেন,—“সেই সঙ্গে দু’তিনশ টাকার মাছ বেরিয়ে যাবে, সে খবরটা রেখেচ কি? এ টাকটা দেবে কে? চাষারা, না তুমি?” রমেশ রাগ সামলাইয়া বলিল—“চাষারা গরিব; তারা দিতে ত পারবেই না, আর আমিই বা কেন দেব, সে ত বুঝতে পারিনে।” বেণী জবাব দিলেন,—“তা হ’লে আমরাই বা কেন এত লোকসান করতে যাব, সে ত আমিও বুঝতে পারিনে।” হালদারের দিকে চাহিয়া বলিলেন,—“খুড়ো। এমনি ক’রে ভায়া আমার জমীদারী রাখবেন। ওহে রমেশ, হারামজাদারা সকাল থেকে

এতক্ষণ এইখানে পড়েই মড়াকান্না কাঁদছিল। আমি সব জানি। তোমার সদরে কি দরওয়ান নেই? তার পায়ের নাগরা-জুতো নেই? যাও, ঘরে গিয়ে সেই ব্যবস্থা কর গে; জল আপনি নিকেশ হ'য়ে যাবে।” বলিয়া বেণী, হালদারের সহিত একযোগে হিঃ—হিঃ—করিয়া নিজের রসিকতায় নিজে হাসিতে লাগিলেন। রমেশের আর সহ্য হইতেছিল না, তথাপি সে প্রাণপণে নিজেকে সংবরণ করিয়া বিনীতভাবে বলিল,—“ভেবে দেখুন বড়দা, আমাদের তিন ঘরের দু'শ টাকার লোকসান বাঁচাতে গিয়ে গরীবদের সারা বছরের অন্ন মারা যাবে। যেমন ক'রে হোক, পাঁচসাত হাজার টাকা তাদের ক্ষতি হবেই।” বেণী হাতটা উল্টাইয়া বলিলেন,—“হ'ল হ'লই। তাদের পাঁচহাজারই যাক, আর পঞ্চাশ হাজারই যাক, আমার গোটা সদরটা কোপালেও ত দুটো পয়সা বা'র হবে না, ভায়া, যে ও শালাদের জন্তে দু'দুশ' টাকা উড়িয়ে দিতে হবে?”

রমেশ শেষ চেষ্টা করিয়া বলিল, “এরা সারা বছর খাবে কি?” যেন ভারি হাসির কথা। বেণী একবার এপাশ, একবার ওপাশ হেলিয়া-তুলিয়া মাথা নাড়িয়া, হাসিয়া, থুথু ফেলিয়া, শেষে স্থির হইয়া কহিলেন—“খাবে কি? দেখ্বে, ব্যাটারা যে যার জমি বন্ধক রেখে আমাদের কাছেই টাকা ধার করতে ছুটে আসবে। ভায়া, মাথাটা একটু ঠাণ্ডা ক'রে চল, কর্ত্তার এম্নি করেই বাড়িয়ে গুছিয়ে এই যে এক-আধ টুকরা

উচ্ছিষ্ট ফেলে' রেখে গেছেন, এই আমাদের নেড়েচেড়ে শুছিয়ে পাছিয়ে খেয়েদেয়ে, আবার ছেলেদের জন্তে রেখে যেতে হবে। ওরা খাবে কি? ধারকর্জ ক'রে খাবে। নইলে আর ব্যাটাাদের ছোটলোক বলেছে কেন?" স্বর্ণায়, লক্ষ্মায়, ক্রোধে, ক্ষোভে রমেশের চোখ-মুখ উত্তপ্ত হইয়া উঠিল, কিন্তু, কণ্ঠস্বর শান্ত রাখিয়াই বলিল,—“আপনি যখন কিছুই করবেন না ব'লে স্থির করেছেন, তখন এখানে দাঁড়িয়ে তর্ক ক'রে লাভ নেই। আমি রমার কাছে চল্লুম, তার মত হ'লে আপনার একার অমতে কিছুই হবে না।”

বেগীর মুখ গম্ভীর হইল; বলিলেন,—“বেশ, গিয়ে দেখ গে, তার আমার মত ভিন্ন নয়। সে সোজা মেয়ে নয় ভায়া,—তাকে ভোলানো সহজ নয়। আর তুমি, ত ছেলে-মানুষ, তোমার বাপকেও সে চোখের জলে নাকের জলে ক'রে তবে ছেড়েছিল! কি বল খুড়ো?” খুড়ার মতামতের জন্ত রমেশের কোতূহল ছিল না; বেগীর এই অত্যন্ত অপমানকর প্রশ্নের উত্তর দিবারও তাহার প্রবৃত্তি হইল না; সে নিরুত্তরে বাহির হইয়া গেল।

প্রাক্তনে তুলসীমূলে সন্ধ্যার প্রদীপ দিয়া প্রণাম সাজ করিয়া রমা মুখ তুলিয়াই বিস্ময়ে অবাক হইয়া গেল। ঠিক স্নুমুখে রমেশ দাঁড়াইয়া। তাহার মাথার আঁচল গলায় জড়ানো। ঠিক যেন সে এইমাত্র রমেশকেই নমস্কার করিয়া মুখ তুলিল। ক্রোধের উত্তেজনায় ও উৎকণ্ঠায় শ্বাসীর সেই প্রথম দিনের

নিষেধবাক্য রমেশের স্মরণ ছিল না ; তাই সে সোজা ভিতরে আসিয়া উপস্থিত হইয়াছিল এবং রমাকে তদবস্থায় দেখিয়া নিঃশব্দে অপেক্ষা করিতেছিল ; দুজনের মাসখানেক পরে দেখা।

রমেশ কহিল,—“তুমি নিশ্চয়ই সমস্ত শুনেচ। জল বা’র ক’রে দেবার জন্তে তোমার মত নিতে এসেচি।” রমার বিশ্বাসের ভাব কাটিয়া গেলে, সে মাথায় আঁচল তুলিয়া দিয়া কহিল,—“সে কেমন ক’রে হবে ? তা’ ছাড়া বড়দার মত নেই।” “নেই জানি। তাঁর একলার অমতে কিছুই আসে যায় না।” রমা একটুখানি ভাবিয়া কহিল,—“জল বা’র ক’রে দেওয়া উচিত বটে ; কিন্তু, মাছ আটকে রাখার কি বন্দোবস্ত করবেন ?” রমেশ কহিল,—“অত জলে কোন বন্দোবস্ত হওয়া সম্ভব নয়। এ বছর সে টাকাটা আমাদের ক্ষতি স্বীকার করিতেই হবে। না হ’লে গ্রাম মারা যায়।” রমা চূপ করিয়া রহিল। রমেশ কহিল,—“তা’হ’লে অনুমতি দিলে ?” রমা মুহূর্তে কহিল,—“না। অত টাকা আমি লোকসান করিতে পারিব না।” রমেশ বিশ্বাসে ইতবুদ্ধি হইয়া গেল। সে কিছুতেই এরূপ উত্তর আশা করে নাই। বরং, কেমন করিয়া তাহার ঘেন নিশ্চিত দারণা জন্মিয়াছিল, তাহার একান্ত অনু-
রোধ রমা কিছুতেই প্রত্যাখ্যান করিতে পারিবে না। রমা মুখ না তুলিয়াই, বোধ করি, রমেশের অবস্থাটা অনুভব করিল। কহিল,—“তা’ ছাড়া, বিষয় আমার ভাইয়ের, আমি অভিভাবক মাজ।” রমেশ কহিল, “না, অর্ধেক তোমার।”

রমা বলিল,—“শুধু নামে। বাবা নিশ্চয় জানতেন, সমস্ত বিষয় যতীনই পাবে; তাই অর্ধেক আমার নামে দিয়ে গেছেন।” তথাপি রমেশ মিনতির কণ্ঠে কহিল,—“রমা, এ ক’টা টাকা? তোমাদের অবস্থা এ দিকের মধ্যে সকলের চেয়ে ভাল। তোমার কাছে এ ক্ষতি ক্ষতিই নয়, আমি মিনতি জানাচ্ছি, রমা, এর জন্তে এত লোকের অন্নকষ্ট ক’রে দিয়ে না। যথাথ বল্চি, তুমি যে এত নিষ্ঠুর হ’তে পার, আমি স্বপ্নেও ভাবিনি।”

রমা তেমনি মুহূর্ত্তাবেই জবাব দিল,—“নিজের ক্ষতি করতে পারিনে ব’লে যদি নিষ্ঠুর হই, না হয় তাই। ভাল, আপনার যদি এতই দয়া, নিজেরই না হয় ক্ষতিপূরণ ক’রে দিন না।” তাহার মুহূর্ত্তকালে বিদ্রূপ কল্পনা করিয়া রমেশ জলিয়া উঠিল। কহিল,—“রমা, মাহুষ খাঁটি কি না, চেনা যায় শুধু টাকার সম্পর্কে। এই জায়গাটায় না কি ঝাঁকি চলে না, তাই, এই-খানেই মাহুষের যথাথ রূপ প্রকাশ পেয়ে উঠে। তোমারও আজ তাই পেলো, কিন্তু, তোমাকে আমি কখনো এমন ক’রে ভাবিনি। চিরকাল ভেবেচি, তুমি এর চেয়ে অনেক—অনেক উচুতে; কিন্তু, তুমি তা’ নও। তোমাকে নিষ্ঠুর বলাও ভুল। তুমি অতি নীচ—অতি ছোটো।” অসহ্য বিস্ময়ে রমা দুই চক্ষু বিস্ফারিত করিয়া কহিল,—“কি আমি?”

রমেশ কহিল,—“তুমি অত্যন্ত হীন এবং নীচ। আমি যে কত ব্যাকুল হ’য়ে উঠেছি, সে তুমি টের পেয়েচ ব’লেই আমার কাছে ক্ষতিপূরণের দাবী করলে! কিন্তু, বড়লাও

মুখ ফুটে এ কথা বলতে পারেন নি ; পুরুষমানুষ হ'য়ে তাঁর মুখে যা' বেধেচে, স্ত্রীলোক হ'য়ে তোমার মুখে তা' বাধেনি ! আমি এর চেয়েও অনেক বেশি ক্ষতিপূরণ করতে পারি, কিন্তু, একটা কথা আজ তোমাকে ব'লে যাই, রমা, সংসারে যত পাপ আছে, মানুষের দয়ার উপর জুলুম করাটা, সব চেয়ে বেশি। আজ তুমি তাই ক'রে আমার কাছে টাকা আদায়ের চেষ্টা করেচ।" রমা বিহ্বল, হতবুদ্ধির ত্রায় ফ্যান্স-ফ্যান্স করিয়া চাহিয়া রহিল—একটা কথাও তাহার মুখ দিয়া বাহির হইল না। রমেশ তেমনি শান্ত, তেমনি দৃঢ়কণ্ঠে কহিল,—

“আমার দুর্বলতা কোথায়, সে তোমার অগোচর নেই বটে, কিন্তু, সেখানে পাক দিখে আর এক বিন্দু রস পাবে না, তা' ব'লে দিয়ে যাচ্ছি। আমি কি করব, তাও এইসঙ্গে জানিয়ে দিখে যাই। এখনি জোর ক'রে বাধ কাটিয়ে দেব—তোমরা পার আটকাবার চেষ্টা কর গে।” বলিয়া রমেশ চলিয়া যায় দেখিয়া রমা ফিরিয়া ডাকিল। আহ্বান শুনিয়া রমেশ নিকটে আসিয়া দাঁড়াইতে রমা কহিল,—“আমার বাড়ীতে দাঁড়িয়ে আমাকে যত অপমান করুলেন, আমি তার একটারও জবাব দিতে চাইনে, কিন্তু, এ কাজ আপনি কিছুতেই করবার চেষ্টা করবেন না।” রমেশ প্রশ্ন করিল,—“কেন ?” রমা কহিল,—“কারণ, এত অপমানের পরেও আমার আপনার সঙ্গে বিবাদ করতে ইচ্ছা করে না।” তাহার মুখ যে কিরূপ অস্বাভাবিক পাণ্ডুর হইয়া গিয়াছিল এবং কথা কহিতে ঠোঁট কাঁপিয়া গেল, তাহা সন্ধ্যার

অঙ্ককারেও রমেশ লক্ষ্য করিতে পারিল। কিন্তু, মনস্তত্ত্ব আলোচনার অবকাশ এবং প্রবৃত্তি তাহার ছিল না;—তৎক্ষণাৎ উত্তর দিল,—“কলহ-বিবাদের অভিক্রটি আমারও নেই বটে, কিন্তু, তোমার সম্ভাবের মূল্যও আর আমার কাছে কিছুমাত্র নেই। যাই হোক, বাগ্‌বিতণ্ডার আবশ্যক নেই, আমি চল্লুম। মাসী উপরে ঠাকুরঘরে আবদ্ধ থাকায় এ সকলের কিছুই জানিতে পারেন নাই। নীচে আসিয়া দেখিলেন, রমা দাসীকে সঙ্গে লইয়া বাহির হইতেছে। আশ্চর্য্য হইয়া প্রশ্ন করিলেন,—“এই জল-কাদায় সন্ধ্যার পর কোথায় যান রমা?”

“একবার বড়দা’র ওখানে যাব মাসি!”

দাসী কহিল,—“পথে আর এতটুকু কাদা পাবার ধো নেই দিদিমা! ছোটবাবু এম্‌নি রাস্তা বাঁধিয়ে দিঘেচেন যে, সিঁদূর পড়লে কুড়িয়ে নেওয়া যায়। ভগবান্ তাঁকে বাঁচিয়ে রাখুন, গরীব দুঃখী সাপের হাত থেকে রেহাই পেয়ে বেঁচেচে।”

তখন রাত্রি বোধ করি এগারটা। বেণীর চণ্ডীমণ্ডপ হইতে অনেকগুলি লোকের চাপাগলার আওয়াজ আসিতেছিল। আকাশে মেঘ কতকটা কাটিয়া গিয়া ত্রয়োদশীর অন্ধচ্ছ জ্যোৎস্না বারান্দার উপরে আসিয়া পড়িয়াছিল। সেইখানে খুঁটিতে ঠেস দিয়া একজন ভীষণাকৃতি প্রৌঢ় মুসলমান চোখ বুজিয়া বসিয়া ছিল। তাহার সমস্ত মুখের উপর কাঁচা রক্ত জমাট বাধিয়াগিয়াছে—পরনের বস্ত্র রক্তে রাঙা; কিন্তু, সে চূপ করিয়া আছে। বেণী চাপা-গলায় অহুন্নয় করিতেছে,—“কথা শোন

আকবর, থানায় চল। সাত বছর যদি না তাকে দিতে পারি, ত ঘোষালবংশের ছেলে নই আমি।” পিছনে চাহিয়া কহিল,—“রমা, তুমি একবার বল না, চূপ ক’রে রইলে কেন?” কিন্তু, রমা তেমনি কাঠের কত বসিয়া রহিল। আকবর আলি এবার চোখ খুলিয়া সোজা হইয়া বসিয়া বলিল,—“সাবাস! হাঁ,—মাগের দুধ খায়েছিল বটে ছোটবাবু! লাঠি ধরুলে বটে!” বেণী ব্যস্ত এবং জুঁক হইয়া কহিল,—“সেই কথা বলতেই ত বল্চি আকবর! কার লাঠিতে তুই জখম হিলি? সেই ছোঁড়ার, না তার সেই হিন্দুস্থানী চাকরটার?” আকবরের গষ্ঠপ্রান্তে ঈষৎ হাসি প্রকাশ পাইল। কহিল,—“সেই বেঁটে হিন্দুস্থানীটার? সে ব্যাটা লাঠির জানে কি বড়বাবু? কি বলিস্ রে গহর, তোর পয়লা চোটেই সে বসেছিল না রে?” আকবরের দুই ছেলেই অদূরে জড়নড় হইয়া বসিয়াছিল। তাহারাও অনাহত ছিল না। গহর মাথা নাড়িয়া মায় দিল, কথা কহিল না। আকবর কহিতে লাগিল,—“আমার হাতের চোট পেলে সে ব্যাটা বাঁচত না। গহরের লাঠিতেই ‘বাপ-করে’ বসে পড়্‌ল, বড়বাবু!” রমা উঠিয়া আসিয়া অনতিদূরে দাঁড়াইল। আকবর তাহাদের পিরপূরের প্রজা। সাবেক দিনে লাঠির জোরে অনেক বিষয় হস্তগত করিয়া দিয়াছে। তাই আজসন্ধ্যার পরে ক্রোধে ও অভিমানে ক্ষিপ্তপ্রায় হইয়া রমা তাহাকে ডাকাইয়া আনিয়া, বাধ পাহারা দিবার জন্ত পাঠাইয়া দিয়াছিল, এবং ভাল করিয়া একবার দেখিতে

চাহিয়াছিল, রমেশ শুধু সেই হিন্দুস্থানীটার গায়ের জোরে কেমন করিয়া কি করে ! সে নিজেই যে কত বড় লাঠিয়াল, এ কথা রমা স্বপ্নেও কল্পনা করে নাই।

আকবর রমার মুখের প্রতি চাহিয়া কহিল,—“তখন ছোট বাবু সেই ব্যাটার লাঠি ভুলে নিয়ে বাঁধ আটক ক’রে দাঁড়াল দিদিঠাকুরাণ, তিন ব্যাপ-ব্যাটার মোরা হটাতে নাযুলাম। আঁধারে বাঘের মত তেনার চোখ জ্বল্‌তি লাগ্‌ল। কইলেন, আকবর, বুড়োমানুষ তুই, সরে যা। বাঁধ কেটে না দিলে সারাগাঁয়ের লোক মাঝ পড়বে, তাই কেটেতেই হবে। তোর আপনার গাঁয়েও ত জমিজমা আছে, সম্বো দেখে, সব বরবাদ হ’য়ে গেলে তোর ক্যামন লাগে ?” মুই সেলাম ক’রে কইলাম, “আল্লাহ কিরে ছোটবাবু, তুমি একটিবার পথ ছাড়। তোমার আড়ালেদেঁড়িয়ে ঐ যে ক’ সম্মুন্নি মুয়ে কাপড় জড়িয়ে ঝপাঝপ কোদাল মারচে, ওদের মুণ্ডু ক’টা ফাঁক ক’রে দিয়ে যাই !” বেগী রাগ সামলাইতে না পারিয়া কথার মাঝখানেই চোঁচাইয়া কহিল,—“বেইমান ব্যাটারা—তাকে সেলাম বাজিয়ে এসে এখানে চালাকি মাঝা হ’চ্ছে—”

তাহারা তিন বাপবেটাই একেবারে একসঙ্গে হাত তুলিয়া উঠিল। আকবর কর্কশকণ্ঠে কহিল,—“খবরদার বড়বাবু, বেইমান কোয়ো না ; মোরা মোছলমানের ছ্যাঁলে, সব সহিতে পারি,—ও পারি না।” কপালে হাত দিয়া খানিকটা রক্ত মুছিয়া ফেলিয়া রমাকে উদ্দেশ্য করিয়া কহিল,—“আরে

বেইমান কয় দিদি ? ঘরের মধ্য বসে বেইমান কইচ, বড়বাবু, চোখে দেখলে জান্তি পারতে ছোটবাবু কি ! বেণী মুখ বিকৃত করিয়া কহিল,—“ছোটবাবু কি ! তাই থানায় গিয়ে জানিয়ে আয় না ! বল্‌বি, তুই বাঁধ পাহারা দিচ্ছিলি, ছোটবাবু চড়াও হ'য়ে তোরে মেরেচে ।” আকবর জিভ্‌ কাটিয়া বলিল,—“তোবা তোবা, দিনকে রাত করুতি বল বড়বাবু ?” বেণী কহিল, “না হ'য় আর কিছু বল্‌বি । আজ গিয়ে জখম দেখিয়ে আয় না—কাল ওয়ারেন্ট বা'র ক'রে একেবারে হাজতে পুরব । রমা, তুমি ভাল ক'রে আর একবার বুঝিয়ে বল না ।—এমন সুবিধে যে আর কখনো পাওয়া যাবে না ।” রমা কথা কহিল না, শুধু আকবরের মুখের প্রতি একবার চাহিল । আকবর ঘাড় নাড়িয়া বলিল,—“না দিদি ঠাকুরাণ, ও পারব না ।” বেণী ধমক দিয়া কহিল,—“পার্বিনে কেন ?” এবাব আকবরও টেঁচাইয়া কহিল,—“কি কও বড়বাবু, সরম নেই মোর ৭ পাঁচখানা গাঁয়ের লোক মোরে সর্দার কয় না ? দিদিঠাকুরাণ, তুমি হুকুম করলে আসামী হ'য়ে জ্যাল খাটুতি পারি, ফৈরিদি হব কোন্ কালামুয়ে ?” রমা স্বহৃৎকণ্ঠে একবারমাত্র কহিল,—“পারবে না আকবর ?” আকবর সবেগে মাথা নাড়িয়া বলিল,—“না দিদিঠাকুরাণ, আর সব পারি, সদরে গিয়ে গায়ের চোট দেখাতে না পারি ।—ওঠ্রে পহর, এইবার ঘরকে যাই । মোরা নালিশ করুতি পারব না ।” বলিয়া তাহারা উঠিবার উপক্রম করিল ।

বেণী ক্রুদ্ধ নিরাশায় তাহাদের দিকে চাহিয়া ছুই চোখে

অগ্নিবর্ষণ করিয়া মনে মনে অকথা গালিগালাজ করিতে লাগিল এবং রমার একান্ত নিকৃষ্টম স্তরুতার কোন অর্থ বুঝিতে না পারিয়া ভূঁষের আঙুণে পুড়িতে লাগিল। সর্বপ্রকার অহুনয় বিনয়, ভৎসনা, ক্রোধ উপেক্ষা করিয়া আকবর আলি ছেলেদের লইয়া যখন বিদায় হইয়া গেল, তখন রমার বুক চিরিয়া একটা গভীর দীর্ঘশ্বাস বাহির হইয়া, অকারণে তাহার দুইচক্ষু অশ্রু-প্লাবিত হইয়া উঠিল, এবং আজিকার এতবড় অপমান তাহার সম্পূর্ণ পরাজিত ও নিষ্ফল হওয়া সত্ত্বেও কেন যে, কেবলি মনে হইতে লাগিল, তাহার বুকের উপর হইতে একটা অতি গুরু-ভার পাষণ নামিয়া গেল, তাহার কোন হেতুই সে খুঁজিয়া পাইল না। সারারাত্রি তাহার ঘুম হইল না, সেই যে তারকেশ্বরে স্নমুখে বসিয়া খাওয়াইয়াছিল, নিরস্তর তাহাই চোথের উপর ভাসিয়া বেড়াইতে লাগিল; এবং, যতই মনে হইতে লাগিল, সেই স্নন্দর স্কুমার দেহের মধ্যে এত মায়া এবং এত তেজ কি করিয়া এমন স্বচ্ছন্দে শাস্ত হইয়াছিল, ততই তাহার চোথের জলে সমস্ত মুখ ভাসিয়া যাইতে লাগিল।

১২

ছেলেবেলায় একদিন রমেশ রমাকে ভালবাসিয়াছিল। নিতান্ত ছেলেমানুষি ভালবাসা, তাহাতে সন্দেহ নাই; কিন্তু, সে যে কত গভীর, তাহা তারকেশ্বরে সে প্রথম অনুভব করিতে পারিয়াছিল। এবং আরও কত গভীর, সেইদিন সব চেয়ে

বেশী টের পাইয়াছিল, যে দিন সন্ধ্যার অন্ধকারে রমার সমস্ত সম্বন্ধ সে একেবারে ভূমিসাৎ করিয়া দিয়া চলিয়া আসিয়াছিল। তৎপরে সেই নিদারুণ রাত্রির ঘটনার পর হইতে রমার দিক্‌টাই একেবারে রমেশের কাছে মহামর্য্য ত্রায় শূন্য ধু ধু করিতেছিল। কিন্তু, সে যে তাহার সমস্ত কাজ-কর্ম্ম, শোয়া-বসা, এমন কি চিন্তা, অধ্যয়ন পর্য্যন্ত এমন বিশ্বাস করিয়া দিবে, তাহা রমেশ কল্পনাও করে নাই। তাহাতে গৃহ-বিচ্ছেদ এবং সর্ব্বব্যাপী অনাস্থীয়তায় প্রাণ যখন তাহার এক মুহূর্ত্তও আর গ্রামের মধ্যে তিষ্ঠিতে চাহিতেছিল না, তখন নিম্নলিখিত ঘটনায় সে আর একবার সোজা হইয়া বসিল।

খালের ওপারে পিরপুর গ্রামেই তাহাদেরই জমিদারী। এখানে মুসলমানের সংখ্যাই অধিক। একদিন তাহারা দল বাঁধিয়া, রমেশের কাছে উপস্থিত হইল; এই বলিয়া নালিশ জানাইল যে, যদিচ তাহারা তাহাদেরই প্রজা, অথচ তাহাদের ছেলেপিলেকে মুসলমান বলিয়া গ্রামের স্কুলে ভর্ত্তি হইতে দেওয়া হয় না। কয়েকবার চেষ্টা করিয়া তাহারা বিফলমনোরথ হইয়াছে, মাষ্টার মহাশয়রা কোন মতেই তাহাদের ছেলেদের গ্রহণ করেন না। রমেশ বিস্মিত ও ক্রুদ্ধ হইয়া কহিল,—“এমন অত্যাচার ত কখনও শুনি নাই? তোমাদের ছেলেদের আজই লইয়া আইস; আমি নিজে দাঁড়াইয়া থাকিয়া ভর্ত্তি করিয়া দিব।” তাহারা কহিল,—যদিচ, তাহারা প্রজা বটে, কিন্তু, খাজনা দিয়াই জমি ভোগ করে। সেজন্য হিঁদুর মত জমিদারকে

তাহারা ভয় করে না ; কিন্তু, এ ক্ষেত্রে বিবাদ করিয়াও লাভ নাই। কারণ ইহাতে বিবাদই হইবে, যথার্থ উপকার কিছুই হইবে না। বরঞ্চ, তাহারা নিজেদের মধ্যে একটা ছোট রকমের ইচ্ছুল করিতে ইচ্ছা করে, এবং ছোটবাবু একটু সাহায্য করিলেই হয়। কলহ বিবাদে রমেশ নিজেও ক্লান্ত হইয়া পড়িয়াছিল, সুতরাং ইহাকে আর বাড়াইয়া না তুলিয়া, ইহাদের পরামর্শ স্ফুর্তি বিবেচনা করিয়া, সায় দিল এবং তখন হইতে এই নূতন বিদ্যালয় প্রতিষ্ঠা করিতেই ব্যাপৃত হইল। ইহাদের সম্পর্কে আসিয়া রমেশ শুধু যে নিজেকে স্তম্ভ বোধ করিল, তাহা নহে, এই একটা বৎসর ধরিয়া তাহার যত বলক্ষয় হইয়াছিল, তাহা ধীরে ধীরে যেন ভরিয়া আসিতে লাগিল। রমেশ দেখিল, কঁয়াপুরের হিন্দু প্রতিবেশীর মত ইহারা প্রতিকথার বিবাদ করে না ; করিলেও তাহারা প্রতিহাত এক নম্বর রুজু করিয়া দিবার জ্ঞাত্য সদরে ছুটিয়া যায় না। বরঞ্চ মুকব্বিদের বিচারফলই, সন্তুষ্ট অসন্তুষ্ট যে ভাবেই হোক, গ্রহণ করিতে চেষ্টা করে। বিশেষতঃ বিপদের দিনে পরস্পরের সাহায্যার্থে একরূপ সর্কাস্তঃকরণে অগ্রসর হইয়া আসিতে, রমেশ ভদ্র, অভদ্র, কোন হিন্দু গ্রামবাসীকেই দেখে নাই।

একে ত জাতিভেদের উপর রমেশের কোনদিনই আস্থা ছিল না, তাহাতে এই দুই গ্রামের অবস্থা পাশাপাশি তুলনা করিয়া তাহার অশ্রদ্ধা শতগুণে বাড়িয়া গেল। সে স্থির করিল, হিন্দুদিগের মধ্যে ধর্ম ও সামাজিক অসমতাই

এই হিংসারূপের কারণ। অথচ, মুসলমানমাত্রই ধর্মমন্ডকে পরস্পর সমান, তাই একতার বন্ধন ইহাদের মত হিন্দুদের নাই এবং হইতেও পারে না। আর জাতিভেদ নিবারণ করিবার কোন উপায় যখন নাই, এমন কি, ইহার প্রমত্ত উত্থাপন করাও যখন পল্লীগ্রামে একরূপ অসম্ভব, তখন কলহবিবাদের লাঘব করিয়া সখ্য ও প্রীতি সংস্থাপনে প্রয়াস করাই পণ্ডিত্রম। সুতরাং এই কয়টা বৎসর ধরিয়া সে নিজের গ্রামের জন্ত যে বৃথা চেষ্টা করিয়া মরিয়াছিল, সে জন্ত তাহার অত্যন্ত অনুরোধনা বোধ হইতে লাগিল। তাহার নিশ্চয় প্রতীতি হইল, ইহারা এমনি খাওয়া-খাষি করিয়াই চিরদিন কাটাইয়াছে, এবং, এমনি করিয়াই চিরদিন কাটাইতে বাধ্য। ইহাদের ভালো কোন দিন কোনমতেই হইতে পারে না! কিন্তু, কথাটা পাকা করিয়া লওয়া ত চাই। নানা কারণে অনেক দিন হইতে তাহার জ্যাঠাইমার সঙ্গে দেখা হয় নাই। সেই মারামারির পর হইতে কতকটা ইচ্ছা করিয়াই সে সেদিকে যায় নাই। আজ ভোরে উঠিয়া সে একেবারে তাঁর ঘরের দোরগোড়ায় আসিয়া দাঁড়াইল। জ্যাঠাইমার বুদ্ধি ও অভিজ্ঞতার উপর তাহার এমনি বিশ্বাস ছিল যে, সে কথা তিনি নিজেও জানিতেন না। রমেশ একটুখানি আশ্চর্য হইয়াই দেখিল, জ্যাঠাইমা এত প্রত্যাষেই স্নান করিয়া প্রস্তুত হইয়া সেই অস্পষ্ট আলোকে ঘরের মেঝেয় বসিয়া, চোখে চমুমা আঁটিয়া,

একখানি বই পড়িতেছেন। তিনিও বিস্মিত কম হইলেন না। বইখানি বন্ধ করিয়া তাহাকে আদর করিয়া ঘরে ডাকিয়া বসাইলেন এবং মুখ পানে চাহিয়া জিজ্ঞাসা করিলেন,—“এত সকালেই যে রে ?” রমেশ কহিল,—“অনেক দিন তোমাকে দেখতে পাইনি জ্যাঠাইমা। আমি পিরপুরে একটা ইস্কুল করুচি।” বিশ্বেশ্বরী বলিলেন,—“শুনেচি। কিন্তু, আমাদের ইস্কুলে আর পড়াতে যাস্নে কেন বলত ?” রমেশ কহিল,—“সেই কথাই বলতে এসেচি জ্যাঠাইমা ! এদের মঙ্গলের চেষ্টা করা শুধু পণ্ডশ্রম। যারা কেউ কারো ভাল দেখতে পারে না, অভিমান অহঙ্কার যাদের এত বেশী, তাদের মধ্যে খেটে মরায় লাভ কিছুই নেই, শুধু, মাঝুথেকে নিজেরই শত্রু বেড়ে ওঠে। বরং, যাদের মঙ্গলের চেষ্টায় সত্যকার মঙ্গল হবে, আমি সেইখানেই পরিশ্রম করুব !” জ্যাঠাইমা কহিলেন,—“একথা ত নতুন নয় রমেশ ! পৃথিবীতে ভাল করবার ভার যে কেউ নিজের ওপর নিয়েচে, চিরদিনই তার শত্রু সংখ্যা বেড়ে উঠেচে। সেই ভয়ে যারা পেছিয়ে দাঁড়ায়, তুইও তাহাদের দলে গিয়ে যদি মিশিস, তা হ’লে ত চলবে না বাবা ! এ গুরুভার ভগবান তোকেই বইতে দিয়েচেন, তোকেই ব’য়ে বেড়াতে হবে। কিন্তু, হারে, রমেশ, তুই নাকি ওদের হাতে জল খাস ?” রমেশ হাসিয়া কহিল,—“এই জ্ঞাথ জ্যাঠাইমা, এর মধ্যেই তোমার কাণে উঠেচে। এখনো খাইনি বটে, কিন্তু, খেতে ত আমি

কোন দোষ দেখিনে। আমি তোমাদের জাতিভেদ মানিনে।” জ্যাঠাইমা আশ্চর্য্য হইয়া প্রশ্ন করিলেন;—
 “মানিস্নে করে? এ কি মিছে কথা, না, জাতিভেদ নেই যে, তুই মান্বিনে?” রমেশ কহিল,—“ঠিক ওই কথাটাই জিজ্ঞাসা কর্ত্তে আজ তোমার কাছে এসেছিলাম জ্যাঠাইমা! জাতিভেদ আছে, তা’ মানি, কিন্তু, একে ভাল ব’লে মানিনে?”

“কেন?”

রমেশ হঠাৎ উত্তেজিত হইয়া কহিল,—“কেন, সে কি তোমাকে বলতে হবে? এর থেকেই যত মনমালিন্ত, যত বাদাবাদি, এ কি তোমার জানা নেই? সমাজে যাকে ছোটখাট ক’রে রাখা হয়েছে, সে যে বড়কে হিংসে করবে, এই ছোট হয়ে থাকার বিরুদ্ধে বিদ্রোহ ক’রে এর থেকে মুক্ত হ’তে চাইবে, সে ত খুব স্বাভাবিক। হিন্দুরা সংগ্রহ করতে চায় না, জানে না—জানে শুধু অপচয় করতে। নিজেকে এবং নিজের জাতকে রক্ষা করবার এবং বাড়িয়ে তোলবার যে একটা সংসারিক নিয়ম আছে, আমরা তাকে স্বীকার করি না বলেই প্রতিদিন ক্ষয় পেয়ে পচ্ছি। এই যে মানুষ-গণনা করার একটা নিয়ম আছে, তার ফলাফলটা যদি পড়ে দেখতে জ্যাঠাইমা, তা হ’লে ভয় পেয়ে যেতে। মানুষকে ছোট ক’রে অপমান করবার ফল হাতে হাতে টের পেতে! দেখতে পেতে, কেমন ক’রে হিন্দুরা

প্রতিদিন কমে আসচে, এবং মুসলমানেরা সংখ্যায় বেড়ে উঠচে। তবুত হিন্দুর হুঁস হয় না।” বিশেষরী হাসিয়া রলিলেন,—“তোরা এত কথা শুনে এখনোত আমার হুঁস হ’চে না রমেশ ! যারা তোদের মানুষ গুণে বেড়ায়, তারা যদি গুণে বলতে পারে, এতগুলো ছোটজাত শুদ্ধমাত্র ছোট থাকবার ভয়েই জাত দিয়েচে, তা হ’লে হয়ত আমার হুঁস হ’তেও পারে। হিন্দু যে কমে আসচে, সে কথা মানি ;—কিন্তু, তার অন্য কারণ আছে। সেটাও সমাজের ক্রটি নিশ্চয় ; কিন্তু, ছোট-জাতের জাত দেওয়াদেওয়ি তার কারণ নয়। শুধু ছোট-ব’লে কোন হিন্দুই কোন দিন জাত দেয় না।”

রমেশ সন্দ্বিগ্নকণ্ঠে কহিল,—“কিন্তু, পণ্ডিতেরা তাহা ত অনুমান করেন জ্যাঠাইমা !” জ্যাঠাইমা বলিলেন,—“অনুমানের বিরুদ্ধে ত তর্ক চলে না বাবা ! কেউ যদি এমন খবর দিতে পারেন, অমুক গাঁয়ের এতগুলো ছোটজাত এই জন্তেই এ বৎসর জাত দিয়েচে, তা হ’লেও না হয় পণ্ডিত-দের কথায় কাণ দিতে পারি। কিন্তু, আমি নিশ্চয় জানি, এ সংবাদ কেউ দিতে পারবে না।” রমেশ তথাপি তর্ক করিয়া কহিল,—“কিন্তু, যারা ছোটজাত, তারা যে অন্তায় বড়জাতকে হিংসা ক’রে চলবে, এতো আমার কাছে ঠিক কথা ব’লেই মনে হয় জ্যাঠাইমা !” রমেশের তীব্র উত্তেজিত কথায় বিশেষরী আবার হাসিয়া উঠিলেন। বলিলেন,—“ঠিক কথা নয়, বাবা, একটুও ঠিক কথা নয়। এ তোদের সহ্য নয়।

পাড়াগাঁয়ে জাত ছোট কি বড়, সে জন্তে কারো এতটুকুও মাথাব্যথা নেই। ছোট ভাই যেমন ছোট ব'লে বড়ভাইকে হিংসে করে না, দু'এক বছর পরে জন্মাবার জন্তে যেমন তার মনে এতটুকুও ক্ষোভ নেই, পাড়াগাঁয়েও ঠিক তেমনি। এখানে কায়েত, বামুন হয়নি ব'লে একটুও দুঃখ করে না, কৈবর্তও কায়েতের সমান হবার জন্তে একটুও চেষ্টা করে না। বড়-ভাইকে একটা প্রশ্নাম করতে ছোটভায়ের যেমন লজ্জায় মাথা কাটা যায় না, তেমনি কায়েতও, বামুনের একটুখানি পায়ের ধুলো নিতে এতটুকু কুণ্ঠিত হয় না। সে নয় বাবা, জাতিভেদ-টেন্দ হিংসেঘেষের হেতুই নয়। অন্ততঃ বাঙালীর যা' মেহনদও —সেই পল্লীগ্রামে নয়।” রমেশ মনে মনে আশ্চর্য্য হইয়া কহিল,—“তবে কেন এমন হয় জ্যাঠাইমা? ওগাঁয়ে ত এত ঘর মুসলমান আছে, তাদের মধ্যে ত এমন বিবাদ নেই। একজন আর একজনকে বিপদের দিনে, এমন ক'রে ত চেপে ধরে না। সেদিন অর্থাভাবে দ্বারিক ঠাকুরের প্রায়শ্চিত্ত হয়নি ব'লে, কেউ তার মৃতদেহটাকে ছুঁতে পর্য্যন্ত চায়নি, সে ত তুমি জান।” বিশেষরূপে কহিলেন,—“জানি বাবা, সব জানি। কিন্তু, জাতিভেদ তার কারণ নয়। কারণ এই যে, মুসলমানদের মধ্যে এখনো সত্যকার একটা ধর্ম্ম আছে, কিন্তু, আমাদের মধ্যে তা' নেই। যাকে যথার্থ ধর্ম্ম বলে, পল্লীগ্রাম থেকে সে একেবারে লোপ পেয়েছে। আছে শুধু কতকগুলো আচার-বিচারের কুসংস্কার, আর তার থেকে নিরর্থক দলাদলি।” রমেশ

হতাশভাবে একটা নিশ্বাস ফেলিয়া কহিল,—“এর কি প্রতী-
কারের কোন উপায় নেই জ্যাঠাইমা ?” বিশেষ্বরী বলিলেন,—
“আছে বই কি বাবা । প্রতীকার আছে শুধু জ্ঞানে । যে পথে
তুই পা দিয়েছিস, শুধু সেই পথে । তাই ত তোকে কেবলি বলি
তুই তোমার এই জন্মভূমিকে কিছুতে ছেড়ে যাসনে ।” প্রত্যুত্তরে
রমেশ কি একটা বলিতে যাইতেছিল, বিশেষ্বরী বাধা দিয়া
বলিলেন,—“তুই বলবি, মুসলমানদের মধ্যেও ত অজ্ঞান অত্যন্ত
বেশি । কিন্তু, তাদের সজীব ধর্মই তাদের সব দিকে শুধরে
রেখেছে । একটা কথা বলি রমেশ, পীরগাঁয়ে খবর নিলে শুনতে
পারি, জাফর ব’লে একটা বড়লোককে তারা সবাই ‘একঘরে’
ক’রে রেখেছে, সে, তার বিধবা সৎমাকে খেতে দেয় না
ব’লে । কিন্তু, আমাদের এই গোবিন্দ গাঙুলী সে দিন তার
বিধবা বড়ভাজকে নিজের হাতে মেরে আধমরা ক’রে দিলে,
কিন্তু, সমাজ থেকে তার শাস্তি হওয়া চুলোয় যাক, সে নিজেই
একটা সমাজের মাথা হ’য়ে ব’সে আছে । এ সব অপরাধ
আমাদের মধ্যে শুধু ব্যক্তিগত পাপপুণ্য ; এর সাজা ভগবান
ইচ্ছা হয় দেবেন, না হয় না দেবেন, কিন্তু, পল্লী-সমাজ তাতে
ক্রক্ষেপ করে না ।”

এই নূতন তথ্য শুনিয়া একদিকে রমেশ যেমন অবাক
হইয়া গেল, অতৃদিকে তাহার মন ইহাকেই স্থির-সত্য বলিয়া
গ্রহণ করিতে ধিধা করিতে লাগিল । বিশেষ্বরী তাহা যেন
বুঝিয়াই বলিলেন,—“ফলটাকেই উপায় ব’লে ভুল করিসনে

বাবা! যে জন্তে তোর মন থেকে সংশয় ঘুচতে চাইচে না,— সেই জাতের ছোটবড় নিয়ে মারামারি করাটা উন্নতির একটা লক্ষণ,—কারণ নয় রমেশ। সেটা সকলের আগে না হ'লেই নয়, মনে ক'রে যদি তাকে নিয়েই নাড়াচাড়া করতে যাস, এদিক্-ওদিক্ দু'দিক নষ্ট হয়ে যাবে। কথাটা সত্যি কি না, যাচাই করতে চাস, রমেশ, সহরের কাছাকাছি ছ'চারখানা গ্রাম ঘুরে এসে, তাদের সঙ্গে তোর এই কুঁয়াপুরকে মিলিয়ে দেখিস। আপনি টের পাবি।” কলিকাতার অতি নিকটবর্তী একখানা গ্রামের সহিত রমেশের ঘনিষ্ঠ পরিচয় ছিল। তাহারই মোটা-মুটি চেহারাটা সে মনে মনে দেখিয়া লইবার চেষ্টা করিতেই, অকস্মাৎ তাহার চোখের উপর হইতে যেন একটা কালো পর্দা উঠিয়া গেল; এবং গভীর সম্মম ও বিস্ময়ে চূপ করিয়া সে বিশেষরূপে মুখের পানে চাহিয়া রহিল। তিনি কিন্তু, সেদিকে কিছু-মাত্র লক্ষ্য না করিয়া নিজের পূর্বানুভূতিস্বরূপে ধীরে ধীরে বলিতে লাগিলেন,—“তাই ত তোকে বার বার বলি, বাবা, তুই যেন তোর জন্মভূমিকে ত্যাগ ক'রে যাসনে। তোর মত বাইরে থেকে যারা বড় হ'তে পেরেচে, তারা যদি তোর মতই গ্রামে ফিরে আসত, সমস্ত সম্বন্ধ বিচ্ছিন্ন ক'রে চ'লে না যেত, পল্লীগ্রামের এমন দুরবস্থা হ'তে পারত না। তারা কখনই গোবিন্দ গাঙুলীকে মাথায় তুলে নিয়ে তোকে দূরে সরিয়ে দিতে পারত না।” রমেশের রমার কথা মনে পড়িল। তাই আবার অভিমানের স্বরে কহিল,—“দূরে স'রে যেতে আমারও

আর দুঃখ নেই জ্যাঠাইমা ।” বিবেশ্বরী এই সুরটা লক্ষ্য করিলেন, কিন্তু, হেতু বুঝিলেন না । কহিলেন,—“না, রমেশ, সে কিছুতেই হ’তে পারবে না । যদি এসেচিস্, যদি কাজ শুরু করেচিস্, মাঝপথে ছেড়ে দিলে তোর জন্মভূমি তোকে ক্ষমা করবে না ।” “কেন জ্যাঠাইমা, জন্মভূমি শুধু ত আমার একার নয় ?” জ্যাঠাইমা উদ্দীপ্ত হইয়া বলিলেন,—“তোরা একার বই কি বাবা, শুধু তোরাই মা । দেখতে পাস্নে, মা মুখ ফুটে সন্তানের কাছে কোনদিনই কিছু দাবি করেন না । তাই এত লোক থাকতে কারো কানেই তাঁর কান্না গিয়ে পৌছতে পারে নি, কিন্তু তুই, আস্বামাজই শুনতে পেয়েছিলি ।” রমেশ আর তর্ক করিল না । কিছুক্ষণ স্থিরভাবে বসিয়া থাকিয়া, নিঃশব্দে প্রগাঢ় শ্রদ্ধাভরে, বিবেশ্বরীর পায়ে ধুলা মাখায় লইয়া ধীরে ধীরে বাহির হইয়া গেল ।

ভক্তি, করুণা ও রক্তবোয় একান্ত-নিষ্ঠায় হৃদয় পরিপূর্ণ করিয়া লইয়া রমেশ বাড়ী ফিরিয়া আসিল । তখন সবেমাত্র সূর্য্যোদয় হইয়াছে । তাহার ঘরের পূর্বদিকের মুক্ত জানালার সম্মুখে দাঁড়াইয়া সে স্তব্ধ আকাশের পানে চাহিয়াছিল, সহসা শিশুকণ্ঠের আহ্বানে সে চমকিয়া মুখ ফিরাইতেই দেখিল, রমার ছোটভাই যতীন দ্বারের বাহিরে দাঁড়াইয়া লজ্জায় আরক্তমুখে ডাকিতেছে,—“ছোড়দা’ !—” রমেশ কাছে গিয়া হাত ধরিয়া তাহাকে ভিতরে আনিয়া জিজ্ঞাসা করিল,—“কাকে ডাকচ যতীন ?” “আপনাকে ।”

“আমাকে ? আমাকে ছোড়া’ বলতে তোমাকে কে বলে দিলে ?”

“দিদি।”

“দিদি ? তিনি কি কিছু বলতে তোমাকে পাঠিয়েছেন ?” যতীন মাথা নাড়িয়া কহিল,—“কিছু না। দিদি বললেন, ‘আমাকে সঙ্গে ক’রে তোর ছোড়া’র বাড়ীতে নিয়ে চল’—ঐ যে ওখানে দাঁড়িয়ে আছেন”—বলিয়া সে দরজার দিকে চাহিল। রমেশ বিস্মিত ও ব্যস্ত হইয়া আসিয়া দেখিল, রমা একটা থামের আড়ালে দাঁড়াইয়া আছে। সরিয়া আসিয়া সবিনয়ে কহিল,—“আজ আমার এ কি সৌভাগ্য ! কিন্তু, আমাকে ডেকে না পাঠিয়ে, নিজে কষ্ট ক’রে এলে কেন ? এসো, ঘবে এস।” রমা একবার ইতস্ততঃ করিল, তার পর যতীনের হাত ধরিয়া রমেশের অনুসরণ করিয়া তাহার ঘরের চৌকাঠের কাছে আসিয়া বসিয়া পড়িল। কহিল,—“আজ একটা জিনিষ ভিক্ষে চাইতে আপনার বাড়ীতেই এসেচি,—বলুন দেবেন ?” বলিয়া সে রমেশের মুখের পানে স্থিরদৃষ্টিতে চাহিয়া রহিল। সেই চাহনিতে রমেশের পরিপূর্ণ হৃদয়ের সপ্তস্বর্য অকস্মাৎ যেন উন্মাদ-শব্দে বাজিয়া উঠিয়া একেবারে ভাঙ্গিয়া বরিয়া পড়িল। কিছুক্ষণ পূর্বেই তাহার মনের মধ্যে যে সকল সঙ্কল্প, আশা ও আকাঙ্ক্ষা অপরূপ দীপ্তিতে নাচিয়া ফিরিতেছিল, সমস্তই একেবারে নিবিয়া অন্ধকার হইয়া গেল। তথাপি প্রশ্ন করিল,—“কি চাই বল ?”

তাহার অস্বাভাবিক গুহতা রমার দৃষ্টি এড়াইল না। সে তেমনি মুখের প্রতি চোখ রাখিয়া কহিল,—“আগে কথা দিন।” রমেশ ক্ষণকাল চুপ করিয়া থাকিয়া, মাথা নাড়িয়া কহিল,—“তা’ পারিনে। তোমাকে কিছুমাত্র প্রশ্ন না কোরেই আমার কথা দেবার শক্তি তুমি নিজের হাতেই ঘে ভেঙে দিয়েছ রমা!”

রমা আশ্চর্য্য হইয়া কহিল, “আমি?” রমেশ বলিল, “তুমি ছাড়া এ শক্তি আর কার ছিল না। রমা, আজ তোমাকে একটা সত্য কথা বলব। ইচ্ছে হয় বিশ্বাস কোবো, না হয় কোরো না। কিন্তু, জিনিসটা যদি না একেবারে ম’রে নিঃশেষ হয়ে যেত, হয় ত কোনদিনই এ কথা তোমাকে শোনাতে পারতাম না।” বলিয়া একটুখানি চুপ করিয়া, পুনরায় কহিল,—“আজ না কি আর কোনপক্ষেই লেশমাত্র ক্ষতিবৃদ্ধির সম্ভাবনা নাই, তাই আজ জানাচ্ছি, তোমাকে অদেয় আমার সেদিন পর্য্যন্ত কিছুই ছিল না। কিন্তু, কেন জান?” রমা মাথা নাড়িয়া জানাইল—“না।” কিন্তু, সমস্ত অন্তঃকরণটা তাহার কেমন একটা লজ্জাকর আশঙ্কায় কণ্টকিত হইয়া উঠিল। রমেশ কহিল,—“কিন্তু, শুনে রাগ কোরো না, কিছুমাত্র লজ্জাও পেয়ো না। মনে কোরো, এ কোন্ পুরা-কালের একটা গল্প শুন্চ মাত্র।” রমা মনে মনে প্রাণপণে বাধা দিবার ইচ্ছা করিল, কিন্তু, মাথা তাহার এমনি ঝুঁকিয়া পড়িল যে, কিছুতেই সোজা করিয়া তুলিতে পারিল না। রমেশ

তেমনি শান্ত, যুহু ও নির্লিপ্তকণ্ঠে বলিয়া উঠিল,—“তোমাকে ভালবাস্তাম রমা। আজ আমার মনে হয়, তেমন ভালবাসা বোধ করি, কেউ কখনো বাসেনি; ছেলেবেলা মা’র মুখে শুন্তাম, আমাদের বিয়ে হ’বে। তার পরে, যে দিন সমস্ত আশা ভেঙে গেল, সে দিন আমি কেঁদে ফেলেছিলাম, আজও আমার তা’ মনে পড়ে।” কথাগুলো জলন্ত সীসার মত রমার হৃদয় কানের মধ্যে প্রবেশ করিয়া দগ্ধ করিয়া ফেলিতে লাগিল; এবং একান্ত অপরিচিত অভূত্ভূতির অসহ্য, তীব্র বেদনায় তাহার বুকের একপ্রান্ত হইতে অপরপ্রান্ত পর্য্যন্ত কাটিয়া কুচি-কুচি করিয়া দিতে লাগিল; কিন্তু, নিষেধ করিবার কোন উপায় খুঁজিয়া না পাইয়া নিতান্ত নিরুপায় পাথরের মূর্তির মত স্তব্ধ হইয়া বসিয়া, রমা রমেশের বিষাক্ত-মধুর কথাগুলো একটির পর একটি ক্রমান্বয়ে শুনিয়া যাইতে লাগিল। রমেশ কহিতে লাগিল,—“তুমি ভাব্চ, তোমাকে এ সব কাহিনী শোনানো অন্যায়! আমার মনেও সেই সন্দেহ ছিল ব’লেই সে দিন তারকেশ্বরে যখন একটি দিনের যত্নে আমার সমস্ত জীবনের ধারা বদলে দিয়ে গেলে, তখনও চূপ ক’রে ছিলাম। কিন্তু, সে চূপ ক’রে থাকাটা আমার পক্ষে সহজ ছিল না।” রমা কিছুতেই আর সহ্য করিতে পারিল না। কহিল,—“তবে,—আজকেই বাড়ীতে পেয়ে আমাকে অপমান কর্চেন কেন?” রমেশ কহিল,—“অপমান! কিছু না। এর মধ্যে মান-অপমানের কোন কথাই নেই। এ যাদের কথা হ’চ্ছে, সে

রমাও কোন দিন তুমি ছিলে না, সে রমেশও আমি আর নেই। যাই হোক, শোন ! সে দিন আমার, কেন জানিনে, অসংশয়ে বিশ্বাস হয়েছিল, তুমি যা' ইচ্ছে বল, যা' খুসি কর, কিন্তু, আমার অমঙ্গল তুমি কিছুতেই সহিতে পারবে না। বোধ করি ভেবেছিলাম, সেই যে ছেলেবেলায় একদিন আমাকে ভাল-বাস্তে, আজও তা' একেবারে ভুলতে পারনি। তাই ভেবেছিলাম, কোন কথা তোমাকে না জানিয়ে, তোমার ছাওয়ায় বাসে আমার সমস্ত জীবনের কাজগুলো ধীরে ধীরে ক'রে যাব। তার পরে সে রাত্রে আকবরের নিজের মুখে যখন শুন্তে পেলাম, তুমি নিজে—ও কি ? বাইরে এত গোলমাল কিসের ?”

“বাবু—” গোপাল সরকারের তন্তু ব্যাকুল কণ্ঠস্বরে রমেশ ঘরের বাহিরে আসিতেই সে কহিল,—“বাবু, পুলিশের লোক ভজুঘাকে গ্রেপ্তার করেছে।”

“কেন ?”

গোপালের ভয়ে ঠোঁট কাঁপিতেছিল ; সে কোনমতে কহিল,—“পরশু রাত্তিরে রাধানগরের ডাকাতিতে সে নাকি ছিল।” রমেশ ঘরের দিকে চাহিয়া কহিল,—“আর এক মুহূর্ত্ত থেকে না রমা, খিড়কি দিয়ে বেরিয়ে যাও। পুলিশ খানাতল্লাসি করতে ছাড়বে না।” রমা নীলবর্ণ মুখে উঠিয়া দাঁড়াইয়া, বলিল,—“তোমার কোন ভয় নেই ত ?” রমেশ কহিল,—“বলতে পারিনে। কত দূর কি দাঁড়িয়েচে, সে ত এখনো

জানিনে।” একবার রমার গুষ্ঠাধর কাঁপিয়া উঠিল, একবার তাহার মনে পড়িল, পুলিশে সে দিন তাহার নিজের অভিযোগ করা, তার পরই সে হঠাৎ কাঁদিয়া ফেলিয়া বলিল,—“আমি যাব না।” রমেশ বিস্ময়ে মুহূর্তকাল অবাক থাকিয়া বলিল,—“ছি—এখানে থাকতেই নেই রমা—শীগগীর বেরিয়ে যাও।”—বলিয়া আর কোন কথা না শুনিয়া, যতীনের হাত ধরিয়া, জোর করিয়া টানিয়া, এই দুটি ভাইবোনকে ঝিড়কির পথে বাহির করিয়া দিয়া ঘর রুদ্ধ করিয়া দিল।

১৩

আজ দুই মাস হইতে চলিল, কয়েকজন ভাকাতির আশামীর সঙ্গে ভজুয়া হাজতে। সে দিন খানাতল্লাসিতে রমেশের বাড়ীতে সন্দেহজনক কিছুই পাওয়া যায় নাই, এবং ভৈরব আচার্য্য সাক্ষ্য দিয়াছিল, সে রাত্রে ভজুয়া তাহার সঙ্গে তাহার মেঘের পাত্র দেখিতে গিয়াছিল। তথাপি তাহাকে জামিনে খালাস দেওয়া হয় নাই। বেণী আসিয়া কহিল,—“রমা, অনেক চা’ল ভেবে তবে কাজ করতে হয় দিদি, নইলে কি শত্রুকে সহজে জব্দ করা যায়! সে দিন মনিবের হুকুমে যে ভজুয়া লাঠি হাতে ক’রে, বাড়ী চড়াও হয়ে, মাছ আদায় করতে এসেছিল, সে কথা যদি না তুমি থানায় লিখিয়ে রাখতে, আজ কি তা হ’লে ঐ ব্যাটাকে এমন কাষদায় পাওয়া যেত! অমনি ঐ সঙ্গে রমেশের নামটাও যদি আরও দু’কথা বাড়িয়ে গুছিয়ে লিখিয়ে দিতিস্

ধোন! আমার কথাটায় তখন তোরা ত কেউ কাণ দিলিনে!” রমা এম্নি শ্রান হইয়া উঠিল যে, বেণী দেখিতে পাইয়া কহিল,—“না না, তোমাকে সাক্ষী দিতে যেতে হবে না। আর তাই যদি হয়, তাতেই বা কি! জমিদারী করিতে গেলে কিছুতেই হটলে ত চলে না।” রমা কোন কথা কহিল না। বেণী কহিতে লাগিল,—“কিন্তু, তাকে ত অত সহজে ধরা চলে না! তবে সেও এবার কম চা’ল চাচ্ছে না দিদি! এই যে নূতন একটা ইস্কুল করেছে, এ নিয়ে আমাদের অনেক কষ্ট পেতে হবে। এম্নিই ত মোচলমান প্রজারা জমিদার ব’লে মানতে চায় না, তার ওপর যদি লেখাপড়া শেখে, তা হ’লে জমিদারী থাকা না থাকা সমান হবে, তা’ এখন থেকে ব’লে রাখ’চি। জমিদারীর ভাল-মন্দ সম্বন্ধে রমা বরাবর বেণীর পরামর্শ মতই চলে; ইহাতে দুজনের কোন দিন মতভেদ পর্য্যন্ত হয় না। আজ প্রথম রমা তর্ক করিল। কহিল,—“রমেশদা’র নিজের ক্ষতিও ত এতে কম নয়?” বেণীর নিজেরও এ সম্বন্ধে খটকা অল্প ছিল না। সে ভাবিয়া চিন্তিয়া যাহা স্থির করিয়াছিল, তাহাই কহিল,—“কি জান রমা, এতে নিজের ক্ষতি ভাববার বিষয়ই নয়—আমরা দুজনে জব্দ হলেই ও খুসি। দেখ’চ না, এসে পর্য্যন্ত কি রকম টাকা ছড়াচ্ছে? চারিদিকে ছোটলোকদের মধ্যে ‘ছোটবাবু’ ‘ছোটবাবু’ একটা শব্দ উঠে গেছে। যেন ওই একটা মানুষ, আর আমরা দুঘর কিছু নয়। কিন্তু, বেশীদিন এ চলবে না। এই যে পুলিশের

নজরে তাকে খাড়া ক'রে দিয়েচ বোন, এতেই তাকে শেষ পর্য্যন্ত শেষ হ'তে হবে ; তা' বলে দিচ্ছি ।” বলিয়া বেণী মনে মনে একটু আশ্চর্য্য হইয়াই লক্ষ্য করিল, সংবাদটা শোনাইয়া তাহার কাছে যেরূপ উৎসাহ ও উত্তেজনা আশা করা গিয়াছিল, তাহার কিছুই পাওয়া গেল না । বরঞ্চ মনে হইল, সে হঠাৎ যেন একেবারে বিবর্ণ হইয়া গিয়া প্রস্থ করিল,—“আমি লিখিয়ে দিয়েছিলাম, রমেশদা' জানতে পেরেছেন ?” বেণী কহিল,—“ঠিক জানিনে । কিন্তু, জানতে পারবেই । ভজুয়ার মকদ্দমায় সব কথাই উঠবে ।” রমা আর কোন কথা কহিল না । চূপ করিয়া ভিতরে-ভিতরে সে যেন একটা বড় আঘাত সামলাইতে লাগিল—তাহার কেবলই মনে উঠিতে লাগিল, রমেশকে বিপদে ফেলিতে সেই যে সকলের অগ্রণী, এই সংবাদটা আর রমেশের অগোচর রহিবে না । খানিক পরে মুখ তুলিয়া জিজ্ঞাসা করিল,—“আজকাল ওর নাম বুঝি সকলের মুখেই বড়দা' ?” বেণী কহিল,—“ওধু আমাদের গ্রামেই নয়, ওন্‌চি, ওর দেখাদেখি আরও পাঁচছ'টা গ্রামে স্কুল করুবার, রাস্তা তৈরি করুবার আয়োজন হ্চে । আজকাল ছোটলোকেরা সবাই বলাবলি করুচে, সাহেবদের দেশে গ্রামে গ্রামে একটা দুটো স্কুল আছে বলেই ওদের এত উন্নতি । রমেশ প্রচার ক'রে দিয়েচে, যেখানেই নূতন ইন্স্কুল হবে, সেইখানেই ও ড়'শ ক'রে টাকা দেবে ।” ওর দাদামহাশয়ের যত টাকা পেয়েচে, সমস্তই ও এইতে ব্যয় করুবে । মোচলমানেরা ত ওকে একটা

পীর-পয়গম্বর ব'লে ঠিক ক'রে ব'সে আছে।" রমার নিজের বৃকের ভিতরে এই কথাটা একবার বিছায়ে মত আলো করিয়া, খেলিয়া গেল, যদি তাহার নিজের নামটাও এই সঙ্গে যুক্ত হইয়া থাকিতে পারিত ! কিন্তু, মুহূর্তের জ্ঞান। পরক্ষণেই বিগুণ আঁধারে তাহার সমস্ত অন্তরটা আচ্ছন্ন হইয়া গেল। বেণী কহিতে লাগিল,—“কিন্তু, আমিও অল্পে ছাড়ব না। সে যে আমাদের সমস্ত প্রজা এমনি ক'রে বিগড়ে তুলবে, আর জমিদার হয়ে আমরা চোখ মেলে, মুখ বুজে দেখব, সে যেন কেউ স্বপ্নেও না ভাবে। এই ব্যাটা ভৈরব আচার্য্য এবার ভজ্জ্বার হ'য়ে সাক্ষী দিয়ে কি ক'রে তার মেয়ের বিয়ে দেয়, সে আমি একবার ভাল ক'রে দেখব। আরও একটা কন্দি আছে—দেখি গোবিন্দখুড়ো কি বলে ! তার পর দেশে ডাকাতি লেগেই আছে। এবার চাকরকে যদি জেলে পুরতে পারি, ত তার মনিবকে পুরতেও আমাদের বেশি বেগ পেতে হবে না। সেই যে প্রথম দিনটিতেই তুমি বলেছিলে রমা, শত্রুতা করিতে ইনিও কম করবেন না, সেযে এমন সত্যি হয়ে দাঁড়াবে, তা' আমিও মনে করিনি।” রমা কোন কথাই কহিল না। নিজের প্রতিজ্ঞা ও ভবিষ্যদ্বাণী এমন বর্ণে-বর্ণে সত্য হওয়ার বার্তা পাইয়াও যে নারীর মুখ অহঙ্কারে উজ্জ্বল হইয়া উঠে না, বরঞ্চ নিবিড় কালিমায় আচ্ছন্ন হইয়া যায়, সে যে তাহার কি অবস্থা, সে কথা বুঝিবার শক্তি বেণীর নাই। তা' না থাকুক, কিন্তু, জিনিসটা এতই স্পষ্ট যে, কাহারই দৃষ্টি এড়াইবার সম্ভা-

বনা ছিল না—তাহারও এড়াইল না । মনে মনে একটু
বিস্ময়াগ্ন হইয়াই বেণী রান্নাঘরে যাইয়া মাসীর সহিত দুই
একটা কথা কহিয়া বাড়ী ফিরিতেছিল, রমা হাত নাড়িয়া
তাহাকে কাছে ডাকিয়া মুহূর্ত্তে কহিল,—“আচ্ছা বড়না’,
রমেশদা’ যদি জেলেই যান, সে কি আমাদের নিজেদের ভারি
কলঙ্কের কথা নয়?” বেণী অধিকতর আশ্চর্য হইয়া জিজ্ঞাসা
করিল,—“কেন?” রমা কহিল,—“আমাদের আত্মীয়, আমরা
যদি না বাঁচাই, সমস্ত লোক আমাদেরই ত ছি ছি ক’রবে!”
বেণী জবাব দিল,—“যে যেমন কাজ করবে, সে তার ফল
ভুগ্বে, আমাদের কি?” রমা তেমনি মুহূর্ত্তে কহিল,—
“কিন্তু, রমেশদা’ সত্যিই ত আর চুরি-ডাকাতি ক’রে বেড়ান
না। বরং, পরের ভালর জন্তই নিজের সর্ব্ব স্ব দিচ্ছেন, সে
কথা ত কারো কাছে চাপা থাকবে না। তার পর আমাদের
নিজেদেরও ত গাঁয়ের মধ্যে মুখ বার করতে হবে!” বেণী
হি-হি করিয়া খুব খানিকটা হাসিয়া লইয়া কহিল,—“তোরা
হ’ল কি, বলত বোন্?” রমা এই লোকটার মুখের সঙ্গে
রমেশের মুখখানা মনে মনে একবার দেখিয়া লইয়া আর যেন
সোজা করিয়া মাথা তুলিতেই পারিল না। কহিল,—“গাঁয়ের
লোক ভয়ে মুখের সাম্নে কিছু না বলুক, আড়ালে বলবেই;
তুমি বলবে, আড়ালে রাজার মাকেও ভা’ন বলে; কিন্তু, ভগ-
বান্ ত আছেন। নিরপরাধীকে মিছে করে শাস্তি দেওয়া
তিনি ত রেহাই দেবেন না।” বেণী কৃত্রিম ক্রোভ প্রকাশ

করিয়া কহিল,—“হা রে আমার কপাল ! সে ছোঁড়া বুঝি ঠাকুরদেবতা কিছু মানে ! শীতলাঠাকুরের ঘরটা প’ড়ে যাচ্ছে—মেরামত করবার জন্তে তার কাছে লোক পাঠাতে সে হাঁকিয়ে দিয়ে বলেছিল,—‘যারা তোমাদের পাঠিয়েছে, তাদের বল গে বাজে খরচ করবার টাকা আমার নেই। শোন কথা ! এটা তার কাছে বাজে খরচ ? আর কাজের খরচ হচ্ছে, মোচলমানদের ইস্কুল ক’রে দেওয়া ! তা’ ছাড়া বামূনের ছেলে,—সঙ্কো-আহিক কিছুই করে না ! শুনি, মোচলমানের হাতে জল পর্য্যন্ত খায়। দু’পাতা ইংরিজী প’ড়ে আর কি তার জাতজন্ম আছে দিদি, কিছুই নেই। শান্তি তার গেছে কোথা, সমস্তই তোলা আছে ; সে একদিন সবাই দেখতে পাবে।” রমা আর বাদানুবাদ না করিয়া মৌন হইয়া রহিল বটে, কিন্তু, রমেশের অনাচার এবং ঠাকুরদেবতায় অশ্রদ্ধার কথা শ্রবণ করিয়া, মনটা তাহার আবার তাহার প্রতি বিমুখ হইয়া উঠিল। বেকী নিজের মনে কথা কহিতে কহিতে চলিয়া গেল। রমা অনেকক্ষণ পর্য্যন্ত একভাবে দাঁড়াইয়া থাকিয়া, নিজের ঘরে গিয়া, মেঝের উপরে ধপ্ করিয়া বসিয়া পড়িল। সে দিন তাহার একাদশী। খাবার হাজিমা নাই মনে করিয়া আজ সে যেন স্বস্তিবোধ করিল।

বর্ষা শেষ হইয়া আগামী পূজার আনন্দ এবং ম্যালেরিয়া-
 ভীতি বাঙ্‌লার পল্লী-জননীর আকাশে, বাতাসে এবং আলোকে
 উকি-ঝুঁকি মারিতে লাগিল। রমেশও জ্বরে পড়িল। গত বৎসর
 এই রাক্ষসীর আক্রমণকে সে উপেক্ষা করিয়াছিল ; কিন্তু, এ
 বৎসরে আর পারিল না। তিন দিন জ্বরভোগের পর আজ
 সকালে উঠিয়া, খুব খানিকটা কুইনিন্ গিলিয়া লইয়া জানালার
 বাহিরে পীতাভ-রৌদ্রের পানে চাহিয়া ভাবিতেছিল, গ্রামের
 এই সমস্ত অনাবশ্যক ডোবা ও জঙ্গলের বিরুদ্ধে গ্রামবাসীকে
 সচেতন করা সম্ভব কিনা। এই তিনদিন মাত্র জ্বরভোগ করিয়াই
 সে স্পষ্ট বুঝিয়াছিল, যা' হোক, কিছু একটা করিতেই হইবে।
 মানুষ হইয়া সে যদি নিশ্চেষ্টভাবে থাকিয়া প্রতি বৎসর,
 মাসের পর মাস, মানুষকে এই রোগভোগ করিতে দেয়, ভগ-
 বান্ তাহাকে ক্ষমা করিবেন না। কয়েকদিন পূর্বে এই প্রসঙ্গ
 আলোচনা করিয়া সে এইটুকু বুঝিয়াছিল, ইহার ভীষণ অপ-
 কারিতা সম্বন্ধে গ্রামের লোকেরা যে একেবারেই অজ্ঞ, তাহা
 নহে ; কিন্তু, পরের ডোবা বুজাইয়া এবং পরের জমির জঙ্গল
 কাটিয়া, কেহই ঘরের খাইয়া বনের মহিষ তাড়াইয়া বেড়াইতে
 রাজী নহে। যাহার নিজের ডোবা ও জঙ্গল আছে, সে এই
 বলিয়া তর্ক করে যে, এ সকল তাহার নিজের কৃত নহে—
 বাপ পিতামহের দিন হইতেই আছে। স্মরণ্য যাহাদের গরজ,

তাহারা পরিষ্কার-পরিচ্ছন্ন করিয়া লইতে পারে, তাহাতে আপত্তি নাই; কিন্তু, নিজে সে এজ্ঞা পরস্যা এবং উত্তম ব্যয় করিতে অপারগ। রমেশ সন্ধান লইয়া জানিয়াছিল, এমন অনেক গ্রাম পাশাপাশি আছে, যেখানে একটা গ্রাম ম্যালেরিয়ায় উজাড় হইতেছে, অথচ, আর একটায় ইহার প্রকোপ নাই বলিলেই হয়। ভাবিতেছিল, একটুকু সুস্থ হইলেই, এইরূপ একটা গ্রাম সে নিজের চোখে গিয়া পরীক্ষা করিয়া আসিবে এবং তাহার পরে নিজের কর্তব্য স্থির করিবে। কারণ, তাহার নিশ্চিত ধারণা জন্মিয়াছিল, এই ম্যালেরিয়াহীন গ্রামগুলির জল নিকাশের স্বাভাবিক সুবিধা কিছু আছেই যাহা এমনি কাহারও দৃষ্টি আকর্ষণ না করিলেও, চেষ্টা করিয়া, চোখে আঙুল দিয়া দেখাইয়া দিলে, লোকে দেখিতে পাইবে। অন্ততঃ, তাহার নিতান্ত অনুরক্ত পীরগ্রামের মুসলমান প্রজারা চক্ষু মেলিবেই। তাহার ইন্জিনিয়ারিং শিক্ষা এতদিন পরে এমন একটা মহৎ কাজে লাগাইবার সুযোগ উপস্থিত হইয়াছে মনে করিয়া সে মনে মনে প্রফুল্ল হইয়া উঠিল।

“ছোটবাবু ?” অকস্মাৎ কান্নার স্বরে আহ্বান শুনিয়া রমেশ মহাবিস্ময়ে মুখ ফিরাইয়া দেখিল, ভৈরব আচার্য্য ঘরের মেঝের উপর উপুড় হইয়া পড়িয়া জ্বীলোকের জ্বায় ফুলিয়া ফুলিয়া কাঁদিতেছে। তাহার ৭৮ বৎসরের একটি কন্যা সঙ্গে আসিয়াছিল; বাপের সঙ্গে যোগ দিয়া তাহার চীৎকারে ঘর ভরিয়া উঠিল। দেখিতে দেখিতে বাড়ীর লোক, যে যেখানে

ছিল, দোর-গোড়ায় আসিয়া ভিড় করিয়া দাঁড়াইল। রমেশ কেমন যেন একরকম হতবুদ্ধি হইয়া গেল। এই লোকটার কে মরিল, কি সর্বনাশ হইল, কাহাকে জিজ্ঞাসা করিবে, কেমন করিয়া কান্না থামাইবে, কিছুই যেন ঠাहर পাইল না। গোপাল সরকার কাজ কেলিয়া ছুটিয়া আসিয়াছিল। সে কাছে আসিয়া ভৈরবের একটা হাত ধরিয়া টানিতেই ভৈরব উঠিয়া বসিয়া ছই বাহু দিয়া গোপালের গলা জড়াইয়া ধরিয়া, ভয়ানক আর্ন্তনাদ করিয়া উঠিল। এই লোকটা অতি-অল্পতেই মেয়েদের মত কাঁদিয়া কেলে, স্বরণ করিয়া রমেশ ক্রমশঃ যখন অধীর হইয়া উঠিতেছিল, এমন সময় গোপালের বহুবিধ সাস্তনা-বাক্যে ভৈরব অবশেষে চোখ মুছিয়া, কতকটা প্রকৃতিস্থ হইয়া বসিল এবং এই মহাশোকের হেতু বিবৃত করিতে প্রস্তুত হইল। বিবরণ শুনিয়া, রমেশ স্তব্ধ হইয়া বসিয়া রহিল। এত বড় অত্যাচার কোথাও কোনকালে সংঘটিত হইয়াছে বলিয়া সে কল্পনা করিতেও পারিল না। ব্যাপারটা এই। ভৈরবের সাক্ষ্যে ভজুয়া নিকৃতি পাইলে তাহাকে পুলিশের সম্মুখে-দৃষ্টির বহির্ভূত করিতে রমেশ তাহাকে তাহার দেশে পাঠাইয়া দিয়াছিল। আসামী পরিজ্ঞান পাইল বটে, কিন্তু, সাক্ষী ফাঁদে পড়িল। কেমন করিয়া যেন বাতাসে নিজের বিপদের বার্তা পাইয়া, ভৈরব কা'ল সদরে গিয়া সন্ধান লইয়া অবগত হইয়াছে যে, দিন পাঁচ-ছয় পূর্বে বেশীর খুড়বস্তুর রাধানগরের সনাং মুখ্যো ভৈরবের নামে হুদে-আসলে

এগারশ' ছাব্বিশ টাকা সাত আনার ডিক্রি করিয়াছে এবং দুই একদিনের মধ্যেই তাহার বাস্তবিকতা ক্রোক করিয়া নীলাম ডাকিয়া লইবে। ইহা একতরফা ডিক্রি নহে। যথারীতি শমন বাহির হইয়াছে; কে তাহা ভৈরবের নাম দস্তখত করিয়া গ্রহণ করিয়াছে এবং ধার্য্যদিনে আদালতে হাজির হইয়া নিজেকে ভৈরব বলিয়া স্বীকার করিয়া, কবুলজবাব দিয়া আসিয়াছে। ইহার ঋণ মিথ্যা, আসামী মিথ্যা, করিয়াদী মিথ্যা। এই সর্বব্যাপী মিথ্যার আশ্রয়ে সবল দুর্ব্বলের যথাসর্ব্বশ্ব আত্মসাৎ করিয়া, তাহাকে পথেব ভিখারী করিয়া, বাহির করিয়া দিবার উদ্যোগ করিয়াছে; অথচ, সরকারের আদালতে এই অত্যাচারের প্রতিকারের উপায় সহজ নহে। আইনমত, সমস্ত মিথ্যারূপ বিচারালয়ে গচ্ছিত না করিয়া কথাটি কহিবার জো নাই। মাথা খুঁড়িয়া মরিলেও কেহ তাহাতে কর্ণপাত করিবে না। কিন্তু, এত টাকা দরিদ্র ভৈরব কোথায় পাইবে যে, তাহা জমা দিয়া, এই মহা-অত্যাচার বিবন্ধে ত্রায়বিচার প্রার্থনা করিয়া আত্মরক্ষা করিবে। সুতরাং রাজার আইন, আদালত, জজ, ম্যাজিস্ট্রেট সমস্ত মাথার উপর থাকিতেও দরিদ্র প্রতিদ্বন্দীকে নিঃশব্দে মরিতে হইবে। অথচ, সমস্তই যে বেণী ও গোবিন্দ গাঙুলির কাজ, তাহাতে কাহারও সন্দেহমাত্র নাই; এবং এই অত্যাচারে যত বড় দুর্গতিই ভৈরবের অদৃষ্টে ঘটুক, গ্রামের সকলেই চুপিচুপি জল্পনা করিয়া ফিরিবে, কিন্তু, একটি লোকও মাথা উচু করিয়া

প্রকাজে প্রতিবাদ করিবে না। কারণ, তাহারা কাহারো সাতেও থাকে না, পাঁচেও থাকে না; এবং পরের কথায় কথা কহা তাহারা ভালই বাসে না। সে যাই হউক, রমেশ কিন্তু আজ নিঃসংশয়ে বুঝিল, পল্লীবাসী দরিদ্র প্রজার উপর অসঙ্কোচে অত্যাচার করিবার সাহস ইহারা কোথায় পায়। এবং কেমন করিয়া দেশের আইনকেই ইহারা কসাইয়ের ছুরির মত ব্যবহার করিতে পারে। সুতরাং অর্থবল এবং কুটবুদ্ধি একদিকে যেমন তাহাদিগকে রাজার শাসন হইতে অব্যাহতি দেয়, মৃতসমাজও তেমনি অগ্নাদিকে তাহাদের হৃদয়তির কোন দণ্ডবিধান করে না। তাই, ইহারা সহস্র অগ্নায় করিয়াও, সত্যধর্মবিহীন মৃত পল্লী-সমাজের মাথায় পা দিয়া এমন নিকৃপজ্জবে এবং যথেষ্টাচারে বাস করে। আজ, তাহার জ্যাঠাইমার কথাগুলো বারংবার মনে পড়িতে লাগিল। সে দিন সেই যে তিনি মর্মান্তিক হাসি হাসিয়া বলিয়াছিলেন, “রমেশ, চুলোয় যাক্ গে তোদের জাত-বিচারের, ভাল-মন্দর ঝগড়া-ঝাঁটি; বাবা, শুধু আলো জ্বলে দে বে, শুধু আলো জ্বলে দে। গ্রামে গ্রামে লোক অন্ধকারে কাণা হয়ে গেল; একবার কেবল তাদের চোখ মেলে দেখবার উপায়টা ক’রে দে, বাবা! তখন আপনি দেখতে পাবে তারা, কোন্টা কালো, কোন্টা ধলো।” তিনি আরও বলিয়াছিলেন,—“যদি ফিরেই এসেছিন্ বাবা, তবে আর চ’লে যাস্নে। তোরা মুখ ফিরিয়ে থাকিস্ন বলেই তোদের পল্লী-জননীক এই দুর্দশা!” সত্যই ত! সে

চলিয়া গেলে ত ইহার প্রতিকারের লেশমাত্র উপায় থাকিত না !

রমেশ নিঃশ্বাস ফেলিয়া মনে মনে কহিল,—“হায় রে ! এই আমাদের গর্বের ধন—বাঙালার গুরু, শাস্ত, জায়নিষ্ঠ পল্লী-সমাজ !” একদিন হয় ত, যখন ইহার প্রাণ ছিল, তখন দুষ্টের শাসন করিয়া, আশ্রিত নর-নারীকে সংসারযাত্রার পথে নিষিদ্ধে বহন করিয়া লইয়া যাইবারও ইহার শক্তি ছিল। কিন্তু, আজ ইহা মৃত; তথাপি অল্প পল্লীবাসীরা এই গুরুভার বিকৃত শব্দেহটাকে পরিত্যাগ না করিয়া, মিথ্যা-মমতায় রাত্রি-দিন মাথায় বহিয়া বহিয়া, এমন দিনের-পর-দিন ক্লান্ত, অবসন্ন ও নিষ্কীব হইয়া উঠিতেছে,—কিছুতেই চক্ষু চাহিয়া দেখিতেছে না। যে বস্ত্র আর্জকে রক্ষা করে না, শুধু বিপন্ন করে, তাহাকেই সমাজ বলিয়া কল্পনা করার মহাপাপ তাহাদিগকে নিয়ত রসাতলের পানেই টানিয়া নামাইতেছে। রমেশ আরও কিছুক্ষণ স্থিরভাবে বসিয়া থাকিয়া, সহসা যেন ধাক্কা-খাইয়া উঠিয়া পড়িল, এবং তৎক্ষণাৎ সমস্ত টাকাটার একখানা চেক লিখিয়া, গোপাল সরকারের হাতে দিয়া কহিল,—“আপনি সমস্ত বিষয় নিজে ভাল ক’রে জেনে, টাকাটা জমা দিয়ে দেবেন, এবং যেমন ক’রে হোক, পুনর্বিচারের সমস্ত বন্দোবস্ত ঠিক ক’রে আসবেন। এমন ভয়ঙ্কর অত্যাচার করবার সাহস তাদের আর যেন কোন দিন না হয়।” চেক হাতে করিয়া গোপাল সরকার ওঠরতন উভয়ে কিছুক্ষণ যেন

বিস্বলের মত চাহিয়া রহিল। রমেশ পুনর্বার যখন নিজের বক্তব্য ভাল করিয়া বুঝাইয়া কহিল এবং সে যে তামাসা করিতেছে না, তাহা নিঃসন্দেহে যখন বুঝা গেল, তখন অকস্মাৎ ভৈরব ছুটিয়া আসিয়া পাগলের ন্যায় রমেশের দুই পা চাপিয়া ধরিয়া কাঁদিয়া, চেঁচাইয়া আশীর্বাদ করিয়া, এমন কাণ্ড করিয়া তুলিল যে, রমেশের অপেক্ষা অল্পবলশালী লোকের পক্ষে নিজেকে মুক্ত করিয়া লওয়া সেদিন একটা কঠিন কাজ হইত। কথাটা গ্রামময় প্রচারিত হইতে বিলম্ব ঘটিল না। সকলেই বুঝিল, বেণী এবং গোবিন্দ এবার সহজে নিষ্কৃতি পাইবে না। ছোটবাবু যে তাহার চির-শত্রুকে হাতে পাইবার জন্তই এত টাকা হাতছাড়া করিয়াছে, তাহা সকলেই বলাবলি করিতে লাগিল। কিন্তু, এ কথা কাহারও কল্পনা করাও সম্ভবপর ছিল না যে, দুর্বল ভৈরবের পরিবর্তে ভগবান তাহারই মাথার উপর এই গভীর দুষ্কৃতির গুরুভার তুলিয়া দিলেন, যে তাহা স্বচ্ছন্দে বহিতে পারিবে।

তার পরে মাসখানেক গত হইয়াছে। ম্যালেরিয়ার বিক্রমে মনে মনে যুদ্ধঘোষণা করিয়া রমেশ এই একটা মাস তাহার যন্ত্র-তন্ত্র লইয়া এম্বুনি উৎসাহের সহিত নানাস্থানে মাপ-জোক করিয়া ফিরিতেছিল যে, আগামী কালই যে ভৈরবের মকর্দ্দমা, তাহা প্রায় তুলিয়াই গিয়াছিল। আজ সন্ধ্যার প্রাকালে অকস্মাৎ সে কথা মনে পড়িয়া গেল, রত্ননচৌকির সানাইয়ের সুরে। চাকরের কাছে সংবাদ পাইয়া রমেশ আশ্চর্য্য হইয়া গেল যে,

আজ ভৈরব আচার্য্যের দৌহিত্রের অন্নগ্রাশন। অথচ সে ত কিছুই জানে না। শুনিতে পাইল, ভৈরব আয়োজন মন্দ করে নাই। গ্রামভুক্ত সমস্ত লোককেই নিমন্ত্রণ করিয়াছে; কিন্তু, রমেশকে কেহ নিমন্ত্রণ করিতে আসিয়াছিল কি না, সে খবর বাড়ীর কেহই দিতে পারিল না। শুধু তাই নয়। তাহার স্মরণ হইল, এত বড় একটা মামলা ভৈরবের মাথার উপর আসন্ন হইয়া থাকা সত্ত্বেও সে প্রায় কুড়িপঁচিশ দিনের মধ্যে 'একবার সাক্ষাৎ পর্য্যন্ত করিতে আসে নাই! ব্যাপার কি! কিন্তু, এমন কথা তাহার মনে উদয় হইয়াও হইল না যে, সংসারে সমস্ত লোকের মধ্যে ভৈরব তাহাকেই বাদ দিতে পারে। তাই নিজের এই অভূত আশঙ্কায় নিজেই লজ্জিত হইয়া, রমেশ তখনই একটা চাদর কাঁধে ফেলিয়া একেবারে সোজা আচার্য্য-বাড়ীর উদ্দেশে বাহির হইয়া পড়িল। বাহির হইতেই দেখিতে পাইল, বেড়ার ধারে দুই-তিনটা গ্রামের কুকুর জড় হইয়া, এঁটো কলাপাত লইয়া বিবাদ করিতেছে এবং অনতিদূরে রসুন-চৌকিওয়ালারা আগুন জ্বালাইয়া তামাক খাইতেছে এবং বাগ্‌ভাণ্ড উত্তপ্ত করিতেছে। ভিতরে প্রবেশ করিয়া দেখিল, উঠানে শতছিদ্রযুক্ত সামিয়ানা খাটানো এবং সমস্ত গ্রামের সম্বল পাঁচছয়টা কেরোসিনের বহু পুরাতন বাতি মুখ্যে ও ঘোষালবাটি হইতে চাহিয়া আনিয়া জ্বালা হইয়াছে। তাহারা স্বপ্ন-আলোক এবং অপৰ্য্যাপ্ত ধূম উদ্গিরণ করিয়া সমস্ত স্থানটাকে দুর্গন্ধে পরিপূর্ণ করিয়া দিয়াছে।

খাওয়ানো সমাধা হইয়া গিয়াছিল—বেশী লোক আর ছিল না। পাড়াব মুক্সির তখন যাই-যাই করিতেছিলেন ; এবং ধর্মদাস হরিহর রায়কে আরও একটুখানি বসিতে পীড়াপীড়ি করিতেছিলেন। গোবিন্দ গাঙুলি একটুখানি সরিয়া বসিয়া, কে একজন চাষার ছেলের সহিত নিরিবিলি আলাপে রত ছিলেন। এমনি সময়ে রমেশ দুঃস্বপ্নের মত একেবারে প্রাক্‌ণের বৃকের মাঝখানে আসিয়া দাঁড়াইল। তাহাকে দেখিবামাত্র ইহাদের মুখও যেমন এক মুহূর্ত্তে মসীবর্ণ হইয়া গেল, শত্রুপক্ষীয় এই দুইটা লোককে এই বাটীতেই এমনভাবে যোগ দিতে দেখিয়া রমেশের মুখও উজ্জ্বল হইয়া উঠিল না। কেহই তাহাকে অভ্যর্থনা করিয়া বসাইতে অগ্রসর হইল না—এমন কি, একটা কথা পর্য্যন্তও কেহ কহিল না। ভৈরব নিজে সেখানে ছিল না। খানিক পরে সে বাটীর ভিতর হইতে কি একটা কাজে ‘বলি গোবিন্দ দা’—বলিয়া বাহির হইয়াই উঠানের মাঝখানে যেন ভূত দেখিতে পাইল, এবং পরক্ষণেই ছুটিয়া গিয়া বাটীর ভিতরে ঢুকিয়া পড়িল। রমেশ শুষ্কমুখে একাকী যখন বাহির হইয়া আসিল, তখন প্রচণ্ড বিস্ময়ে তাহার মন অসাড় হইয়াছিল। পিছনে ডাক শুনি, —“বাবা, রমেশ!” ফিরিয়া দেখিল, দীহু হন্থন্থ করিয়া আসিতেছে। কাছে আসিয়া কহিল,—“চল বাবা, বাড়ী চল।” রমেশ একটুখানি হাসিবার চেষ্টা করিল মাত্র। চলিতে চলিতে দীহু বলিতে লাগিল,—“তুমি যে উপকার ওর করেচ বাবা, সে ওর বাপ-

না কর্তৃ না। এ কথা সবাই জানে, কিন্তু, উপায় ত নেই। কাচ্চাবাচ্চা নিয়েই আমাদের সকলকেই ঘর কর্তে হয়; তাই তোমাকে নেমন্তন্ন কর্তে গেলে—বুঝলে না বাবা—ভৈরবকেও নেহাৎ দোষ দেওয়া যায় না—তোমরা সব আজ-কালকার সহরের ছেলে—জাতটাত তেমন ত কিছু মান্তে চাও না—তাইতেই—বুঝলে না, বাবা,—ছু’দিন পরে ওর ছোট মেয়েটিও প্রায় বারোবছরের হ’ল ত—পার কর্তে হবে ত বাবা? আমাদের সমাজের কথা সবই জান বাবা—বুঝলে না বাবা—” রমেশ অধীরভাবে কহিল,—“আজ্ঞে হাঁ, বুঝেচি।” রমেশের বাড়ীর সদরদরজার কাছে দাঁড়াইয়া দীন্ত খুসি হইয়া কহিল,—“বুঝবে বই কি বাবা, তোমরা ত আর অবুঝ নও। ও ব্রাহ্মণকেই বা দোষ দিই কি ক’রে—আমাদের বুড়োমানুষের পরকালের চিন্তাটা—”

“আজ্ঞে হাঁ, সে ত ঠিক কথা—” বলিয়া রমেশ তাড়াতাড়ি ভিতরে প্রবেশ করিল। গ্রামের লোক তাহাকে ‘একঘরে’ করিয়াছে, তাহা বুঝিতে তাহার আর বাকী রহিল না। নিজের ঘরের মধ্যে আসিয়া, ক্ষোভে, অভিমানে, তাহার দুই চক্ষু জ্বালা করিয়া উঠিল। আজ এইটা তাহাকে সবচেয়ে বেশি বাজিল যে, বেণী ও গোবিন্দকেই ভৈরব আজ সাদরে ডাকিয়া আনিয়াছে; এবং গ্রামের লোক সমস্ত জানিয়া-শুনিয়াও ভৈরবের এই ব্যবহারটা শুধু মাপ করে নাই, সমাজের খাতিরে রমেশকে সে যে আহ্বান পর্য্যন্ত

করে নাই, তাহার এই কাজটাকেই প্রশংসার চক্ষে দেখিতেছে।

“হা, ভগবান্ !” সে একটা চোঁকির উপর বসিয়া পড়িয়া দীর্ঘশ্বাস ফেলিয়া বলিল,—“এ কৃতঘ্ন জাতের, এ মহাপাতকের প্রায়শ্চিত্ত হবে কিসে ! এত বড় নিষ্ঠুর অপমান কি ভগবান্ তুমিই ক্ষমা করতে পারবে ?”

১৫

এমনি একটা আশঙ্কা যে রমেশের মাথায় একেবারেই আসে নাই, তাহা নহে। তথাপি, পরদিন সন্ধ্যার সময় গোপাল সরকার সদর হইতে ফিরিয়া আসিয়া যখন সত্য সত্যই জানাইল যে, ভৈরব আচার্য্য তাহাদের মাথার উপরেই কাঁঠাল ভাঙিয়া ভক্ষণ করিয়াছে, অর্থাৎ সে মকদ্দমায় হাজির হয় নাই, এবং তাহা এক-তরফা হইয়া ডিস্‌মিস হইয়া গিয়া তাহাদের প্রদত্ত জমা টাকাটা বেণী প্রভৃতির হস্তগত হইয়াছে, তখন, এক মুহূর্ত্তেই রমেশের ক্রোধের শিখা বিদ্যুৎবেগে তাহার পদতল হইতে বক্ষ-রক্ত পর্য্যন্ত জ্বলিয়া উঠিল। সে দিন ইহাদের জাল ও জুয়াচুরি দমন করিতে যে মিথ্যাঞ্চল সে ভৈরবের হইয়া জমা দিয়াছিল, মহাপাপিষ্ঠ ভৈরব তাহার দ্বারাই নিজের মাথা বাঁচাইয়া লইয়া পুনরায় বেণীর সহিতই সখা স্থাপন করিয়াছে। তাহার এই কৃতঘ্নতা কল্যাকার অপমানকেও বহু উর্দ্ধে ছাপাইয়া আজ রমেশের মাথার ভিতর প্রজ্জ্বলিত হইতে লাগিল।

রমেশ যেমন ছিল, তেমনি খাড়া উঠিয়া বাহির হইয়া গেল। আত্মসংবরণের কথাটা তাহার মনেও হইল না। প্রভুর রক্তচক্ষু দেখিয়া ভীত হইয়া, গোপাল জিজ্ঞাসা করিল,—“বাবু কি কোথাও যাচ্ছেন?” “আসুচি” বলিয়া রমেশ ক্ষুণ্ণপদে চলিয়া গেল। ভৈরবের বহির্বাটীতে ঢুকিয়া দেখিল, কেহ নাই। ভিতরে প্রবেশ করিল। তখন আচার্য্য-গৃহিণী সন্ধ্যাদীপ-হাতে প্রাঙ্গণের তুলসীমঞ্চ-মূলে আসিতেছিলেন; অকস্মাৎ রমেশকে ঈষৎ দেখিয়া একেবারে জড়সড় হইয়া গেলেন। যে কখনও আসে না, সে যে আজ কেন আসিয়াছে, তাহা মনে করিতেই ভয়ে তাহার হৃৎপিণ্ড একেবারে কণ্ঠের কাছে ঠেলিয়া আসিল। রমেশ তাঁহাকেই প্রশ্ন করিল,—“আচার্য্য মশাই কই?” গৃহিণী অব্যক্তস্বরে যাহা বলিলেন, তাহা শোনা গেল না বটে, কিন্তু, বুঝা গেল, তিনি ঘরে নাই। রমেশের গায়ে একটা জামা অবধি ছিল না। সন্ধ্যার অস্পষ্ট আলোকে তাহার মুখও ভাল দেখা যাইতেছিল না। এমন সময়ে ভৈরবের বড় মেয়ে লক্ষ্মী ছেলে-কোলে গৃহের বাহির হইয়াই এই অপরিচিত লোকটাকে দেখিয়া মাকে জিজ্ঞাসা করিল,—“কে মা?” তাহার জননী পরিচয় দিতে পারিলেন না, রমেশও কথা কহিল না। লক্ষ্মী ভয় পাইয়া চোঁচাইয়া ডাকিল,—“বাবা, কে একটা লোক উঠনে এসে দাঁড়িয়েচে, কথা কয় না।”

“কে রে?” বলিয়া লাড়া দিয়া তাহার পিতা ঘরের

বাহিরে আসিয়াই একেবারে কাঠ হইয়া গেল। সন্ধ্যার স্নান-ছায়াতেও সেই দীর্ঘ, ঋজু-দেহ চিনিতে তাহার বাকী রহিল না। রমেশ কঠোরস্বরে ডাকিল,—“নেমে আসুন।” বলিয়া তৎক্ষণাৎ নিজেই উঠিয়া গিয়া বজ্রমুষ্টিতে ভৈরবের একটা হাত ধরিয়া ফেলিল। কহিল,—“কেন এমন কাজ ক’বুলেন?” ভৈরব কাঁদিয়া উঠিল, “মেরে ফেল্লে রে লক্ষ্মী, বেণী বাবুকে থপর দে।” সঙ্গে সঙ্গে বাড়ীশুদ্ধ ছেলে-মেয়ে চোঁচাইয়া কাঁদিয়া উঠিল এবং চোখের পলকে সন্ধ্যার নীরবতা বিদীর্ণ করিয়া বহুকণ্ঠের গগনভেদী কান্নার রোলে সমস্ত পাড়া ত্রস্ত হইয়া উঠিল। রমেশ তাহাকে একটা প্রচণ্ড ঝাঁকানি দিয়া কহিল,—“চুপ্। বলুন, কেন এ কাজ ক’বুলেন?” ভৈরব উত্তর দিবার চেষ্টামাত্র না করিয়া, একভাবে চীৎকার করিয়া গলা ফাটাইতে লাগিল, এবং নিজেকে মুক্ত করিবার জন্ত টানাহেঁচড়া করিতে লাগিল। দেখিতে দেখিতে পাড়ার মেয়ে-পুরুষে প্রাঙ্গণ পরিপূর্ণ হইয়া গেল; এবং, তামাসা দেখিতে আরও লোক ভিড় করিয়া ভিতরে ঢুকিতে ঠেলা-ঠেলি করিতে লাগিল। কিন্তু, ক্রোধাক্ত রমেশ সে দিকে লক্ষ্যই করিল না। শতচক্ষুর কৌতূহলী দৃষ্টির সম্মুখে দাঁড়াইয়া সে উন্নতের মত ভৈরবকে ধরিয়া একভাবে নাড়া দিতে লাগিল। একে রমেশের গায়ের জোর অতিরঞ্জিত হইয়া প্রবাদের মত দাঁড়াইয়াছিল; তাহাতে তাহার চোখের পানে চাহিয়া এই একবাড়ী লোকের মধ্যে এমন সাহস কাহারও হইল না যে, হতভাগ্য ভৈরবকে

ছাড়াইয়া দেয়। গোবিন্দ বাড়ী ঢুকিয়াই ভিড়ের মধ্যে মিশিয়া গেলেন। বেণী উকি মারিয়াই সরিতেছিলেন, ভৈরব দেখিতে পাইয়া কাদিয়া উঠিল—“বড়বাবু—” বড়বাবু কর্ণপাত করিলেন না, চোখের নিমিষে কোথায় মিলাইয়া গেলেন। সহসা জনতার মধ্যে একটুখানি পথের মত হইল এবং পরক্ষণেই রমা দ্রুতপদে আসিয়া রমেশের হাত চাপিয়া ধরিল। কহিল,—“হয়েছে—এবার ছেড়ে দাও।” রমেশ তাহার প্রতি অগ্নিদৃষ্টি নিক্ষেপ করিয়া কহিল,—“কেন?” রমা দাঁতে দাঁত চাপিয়া অশ্রুট-ক্লক-কণ্ঠে বলিল,—“এত লোকের মাঝখানে তোমার লজ্জা করে না, কিন্তু, আমি যে লজ্জায় ম’রে দাই! রমেশ প্রাণগর্ভে লোকের পানে চাহিয়া, তৎক্ষণাৎ ভৈরবের হাত ছাড়িয়া দিল। রমা তেমনি মুহূর্ত্তেরে কহিল,—“বাড়ী যাও।” রমেশ দ্বিভ্রান্তি না করিয়া বাহির হইয়া গেল। হঠাৎ এ যেন একটা ভোজবাজি হইয়া গেল! কিন্তু, সে চলিয়া গেলে, রমার প্রতি তাহার এই নিরতিশয় বাধ্যতায় সবাই যেন কি এক রকম মুখ-চাওয়া-চাওয়ি করিতে লাগিল। এবং এমন জিনিসটা এত আড়ম্বরে আরম্ভ হইয়া এভাবে শেষ হইয়া যাওয়াটা কাহারই যেন মনঃপুত হইল না।

লোকজন চলিয়া গেল। গোবিন্দ গাঙুলি আত্মপ্রকাশ করিয়া একটা আঙুল তুলিয়া, মুখখানা অতিরিক্ত গম্ভীর করিয়া

কহিল,—“বাড়ী চড়াও হয়ে যে আধমরা ক’রে দিখে গেল, এর কি করবে, সেই পরামর্শ কর । ভৈরব দুই হাঁটু বুকের কাছে জড় করিয়া বসিয়া হাঁপাইতেছিল, নিরুপায়ভাবে বেণীর মুখ-পানে চাহিল । রমা তখনও যায় নাই । বেণীর অভিপ্রায় অনুমান করিয়া তাড়াতাড়ি কহিল,—“কিন্তু, এ পক্ষের দোষও ত কম নেই বড়দা’ ? তা’ ছাড়া, হয়েছেই বা কি, যে, এই নিয়ে হৈচৈ করিতে হবে !” বেণী ভয়ানক আশ্চর্য্য হইয়া কহিল,—“বল কি রমা ?” ভৈরবের বড়মেয়ে তখনও একটা খুঁটি আশ্রয় করিয়া দাঁড়াইয়া কাঁদিতেছিল । সে দলিতা ঋণিনীর মত একেবারে গর্জ্জাইয়া উঠিল, “তুমি ত ওর হয়ে বল্বেই রমাদিদি ! তোমার বাপকে কেউ ঘরে ঢুকে মেয়ে গেলে কি করিতে বল ত ?” তাহার গর্জ্জনে রমা প্রথমটা চমকিয়া গেল । সে যে পিতার মুক্তির জন্য কৃতজ্ঞ নয়—তা’ না হয় নাই হইল ; কিন্তু, তাহার তীব্রতার ভিতর হইতে এমন একটা কটু শ্লেষের ঝাঁঝ আসিয়া রমার গায়ে লাগিল যে, সে পরমুহূর্ত্তেই জলিয়া উঠিল । কিন্তু, আত্মসংবরণ করিয়া কহিল,—“আমার বাপ ও তোমার বাপে অনেক তফাৎ লক্ষী, তুমি সে তুলনা কোরো না । কিন্তু, আমি কারও হয়েই কোন কথা বলিনি, ভালর জন্তেই বলেছিলাম ।” লক্ষী পাড়ারগায়ের মেয়ে, ঋগড়ায় অপটু নহে । সে তাড়িয়া আসিয়া বলিল,—“বটে । ওর হয়ে কৌদল করিতে তোমার লজ্জা করে না ? বড়লোকের মেয়ে বলে, কেউ ভয়ে কথা কয় না—নইলে কে

না শুনেচে ? তুমি ব'লে তাই মুখ দেখাও, আর কেউ হ'লে গলায় দড়ি দিত !” বেণী লক্ষ্মীকে একটা তাড়া দিয়া বলিল,— “তুই থাম্ না লক্ষ্মী ! কাজ কি ওসব কথায় ?” লক্ষ্মী কহিল,—“কাজ নেই কেন ? যার জন্তে বাবাকে এত দুঃখ পেতে হ'ল, তার হয়েই উনি কৌদল করবেন ? বাবা যদি আজ মারা যেতেন !” রমা নিমেষের জন্য স্তম্ভিত হইয়া গিয়াছিল মাত্র । বেণীর কৃত্রিম-ক্রোধের স্বর তাহাকে আবার প্রজ্জ্বলিত করিয়া দিল । সে লক্ষ্মীর প্রতি চাহিয়া কহিল,— “লক্ষ্মি, গুর মত লোকের হাতে মরতে পাওয়াও ভাগ্যের কথা ; আজ মারা পড়লে তোমার বাবা স্বর্গে যেতে পারত ।” লক্ষ্মীও জ্বলিয়া উঠিয়া কহিল,—“ওঃ, তাইতেই ব'ঝি তুমি মরেচ, রমাদিদি ?” রমা আর জবাব দিল না । তাহার দিক্ হইতে মুখ ফিরাইয়া লইয়া বেণীর প্রতি চাহিয়া জিজ্ঞাসা করিল,— “কিন্তু কথাটা কি, তুমিই বল ত বড়দা ?” বলিয়া সে একদৃষ্টে চাহিয়া রহিল । তাহার দৃষ্টি যেন অঙ্ককার ভেদ করিয়া বেণীর বুকের ষড়তর পর্য্যন্ত দেখিতে লাগিল । বেণী ক্ষুব্ধভাবে বলিলেন,—“কি ক'রে জান্ব বোন্ । লোকে কত কথা বলে—তাতে কাণ দিলে ত চলে না ।” “লোকে কি বলে ?”

বেণী পরম-তাম্বলাভরে কহিলেন,—“বল্লেই বা রমা, লোকের কথাতে ত আর গায়ে ফোঁস্কা পড়ে না । বলুক না ।” তাহার এই কপট সহানুভূতি রমা টের পাইল । এক মুহূর্ত্ত

চূপ করিয়া থাকিয়া বলিল,—“তোমার গায়ে হয় ত কিছুতেই ফোঁস পড়ে না। কিন্তু, সকলের গায়ে ত গণ্ডারের চামড়া নেই ! কিন্তু, লোককে একথা বলাচ্ছে কে ? তুমি ?”

“আমি ?”

রমা প্রাণপণ-শক্তিতে ভিতরের দুর্নিবার ক্রোধ সংবরণ করিয়া রাখিতেছিল—এখনও তাহার কণ্ঠস্বরে তাহা প্রকাশ পাইল না। বলিল,—“তুমি ছাড়া আর কেউ নয়। পৃথিবীতে কোন দুষ্কর্মই ত তোমার বাকি নেই—চুরি, জুয়াচুরি, জাল, ঘরে আগুন-দেওয়া, সবই হয়ে গেছে, এটাই বা বাকি থাকে কেন ?” বেণী হতবুদ্ধি হইয়া হঠাৎ কথা কহিতেই পারিল না। রমা কহিল,—“মেয়েমানুষের এর বড় সর্বনাশ যে আর নেই, সে বোঝবার তোমার সাধ্য নেই ! কিন্তু, জিজ্ঞাসা করি, একলক্ষ রটিয়ে তোমার লাভ কি ?” বেণী ভীত হইয়া বলিল,—“আমার লাভ ঠিক হবে ! লোকে যদি তোমাকে রমেশের বাড়ী থেকে ভোরবেলা বা’র হতে দেখে—আমি করব কি ?” রমা সে কথায় কর্ণপাত না করিয়া, বলিতে লাগিল,—“এত লোকের সাম্মনে আমি আর বলতে চাইনে। কিন্তু, তুমি মনে কোরো না বড়দা, তোমার মনের দাবি আম টের পাইনি ! কিন্তু, এ নিশ্চয় জেনো, আমি মরবার আগে তোমাকেও জ্যান্ত রেখে যাব না।” আচার্য্য-গৃহিণী এতক্ষণ নিঃশব্দে নিকটে কোথাও দাঁড়াইয়াছিলেন ; সরিয়া আসিয়া রমার একটা বাছ ধরিয়া ঘোমটার ভিতর হইতে মুহূৰ্ত্তবে বলিলেন,—“পাগল

হয়েচ, মা, এখানে তোমাকে না জানে কে ?” নিজের কন্ঠার উদ্দেশে বলিলেন, “লক্ষ্মি, মেয়েমানুষ হয়ে মেয়েমানুষের নামে এ অপবাদ দিস্নে রে, ধর্ম্ সইবেন না। আজ ইনি তোদের যে উপকার করেচেন, তোরা মানুষের মেয়ে হ’লে তা’ টের পেতিস্ন।” বলিয়া টানিয়া রমাকে ঘরে লইয়া গেলেন। আচার্য্য-গৃহিণীর স্বামীর উদ্দেশে এই কঠোর শ্লেষ, এবং নিরপেক্ষ সত্যবাদিতায় উপস্থিত সকলেই যেন কুণ্ঠিত হইয়া সরিয়া পড়িল।

এই ঘটনার কার্য্য-কারণ যত বড় এবং যাই হোক, নিজের কদাকার অসংঘমে রমেশের শিক্ষিত, ভদ্র অন্তঃকরণ সম্পূর্ণ ছুইটা দিন এমনি সঙ্কুচিত হইয়া রহিল যে, সে বাটীর বাহির হইতেই পারিল না। তথাপি এত লোকের মধ্য হইতে রমা যে স্বেচ্ছায় তাহার লজ্জার অংশ লইতে আসিয়াছিল, এই চিন্তাটা তাহার সমস্ত লজ্জার কালোমেঘের গায়ে দিগন্তলুপ্ত, অতি ঈষৎ বিদ্যুৎ-স্মরণের মত ক্ষণেক্ষণে যেন সৌন্দর্য্য ও মাধুর্য্যের দীপ্ত-রেখা আঁকিয়া দিতেছিল। তাই তাহার মানির মধ্যেও পরিভ্রুপ্তির পীড়া ছিল। এই দুঃখ ও স্থূণের বেদনা লইয়া, সে যখন আরও কিছুদিন তাহার নির্জন-গৃহের মধ্যে অজ্ঞাতবাসের সঙ্কল্প করিতেছিল, তখন তাহাকেই উপলক্ষ্য করিয়া বাহিরে যে আর একজনের মাথার উপর নিরবচ্ছিন্ন লজ্জা ও অপমানের পাহাড় ভাঙিয়া পড়িতেছিল, তাহা সে স্বপ্নেও ভাবে নাই।

কিন্তু লুকাইয়া থাকিবার সুযোগ তাহার ঘটিল না। আজ বৈকালে পীরপুরের মুসলমান প্রজারা তাহাদের পঞ্চায়তের বৈঠকে উপস্থিত হইবার জন্ত তাহাকে ডাকিতে আসিল। এ বৈঠকের আয়োজন রমেশ নিজেই কিছুদিন পূর্বে করিয়া আসিয়াছিল। সেইমত, তাহারা আজ একত্র হইয়া ছোট বাবুর জন্তই অপেক্ষা করিয়া বসিয়া আছে বলিয়া যখন সংবাদ দিয়া গেল, তখন তাহাকে যাইবার জন্ত উঠিতেই হইল। কেন, তাহা বলিতেছি।

রমেশ সন্ধান লইয়া জানিয়াছিল, প্রত্যেক গ্রামেই কৃষকদিগের মধ্যে দরিদ্রের সংখ্যা অত্যন্ত অধিক; অনেকেরই এক ফোঁটা জ'ম-আয়গা নাই; পরের জমিতে খাজনা দিয়া বাস করে, এবং পরের জমিতে 'জন' খাটিয়া উদরার্নের সংস্থান করে। ছ'দিন কাজ না পাইলে, কিংবা অসুখ-বিসুখে কাজ করিতে না পারিলেই, সপরিবারে উপবাস করে। খোঁজ করিয়া আরও অবগত হইয়াছিল যে, ইহাদের অনেকেরই একদিন সঙ্গতি ছিল, শুধু ঋণের দায়েই সমস্ত গিয়াছে। ঋণের ব্যবস্থাও সোজা নয়। মহাজনেরা জমি বাঁধা রাখিয়া ঋণ দেয়, কিন্তু প্রায়ই সুদ গ্রহণ করে না; কসলের অংশ দাবী করে। সুদ কষিলে এই অংশের মূল্য সময়ে সময়ে আসলের অনতিদূরে গিয়া পৌঁছে। সুতরাং একবার যে কোন কৃষক সামাজিক ক্রিয়াকর্মের দায়েই হোক, বা অনাবৃষ্টির অতিবৃষ্টির জন্তই হোক, ঋণ করিতে বাধ্য হয়, সে

আর সামলাইয়া উঠিতে পারে না। প্রতি বৎসরেই তাহাকে সেই মহাজনের দ্বারে গিয়া হাত পাতিতে হয়! এ বিষয়ে হিন্দু-মুসলমানের একই অবস্থা। কারণ, মহাজনেরা প্রায় হিন্দু। রমেশ সহরে থাকিতে এ সম্বন্ধে বই পড়িয়া যাহা জানিয়াছিল, গ্রামে আসিয়া তাহাই চোখে দেখিয়া, প্রথমটা একেবারে অভিভূত হইয়া পড়িল। তাহার অনেক টাকা ব্যাঙ্কে পড়িয়াছিল। এই টাকা এবং আরও কিছু টাকা সংগ্রহ করিয়া, এই সকল দুর্ভাগাদিগকে মহাজনের কবল হইতে উদ্ধার করিবার জন্ত সে কোমর বাধিয়া লাগিল। কিন্তু দুই একটা কাজ করিয়াই ধাক্কা খাইয়া দেখিল যে, এই সকল দরিদ্রদিগকে সে যতটা অসহায় এবং রূপাপাত্র বলিয়া ভাবিয়াছিল, অনেক সময়েই তাহা ঠিক নয়। ইহারা দরিদ্র নিক্রপায় এবং অল্পবুদ্ধিজীবী বটে, কিন্তু, বজ্জাতি বুদ্ধিতে ইহারা কম নহে। ধার করিয়া শোধ না দিবার প্রবৃত্তি ইহাদের যথেষ্ট প্রবল। অধিকাংশ ক্ষেত্রেই সরলও নয়, সাধুও নয়। মিথ্যা বলিতে ইহারা অধোবদন হয় না এবং ফাঁকি দিতে জানে। প্রতিবেশীর দ্বী কল্যাণ সম্বন্ধে সৌন্দর্য্যচর্চার সখও মন্দ নাই। পুরুষের বিবাহ হওয়া কঠিন ব্যাপার; অথচ নানা বয়সের বিধবায় প্রতি গৃহস্থ ভারাক্রান্ত। তাই, নৈতিক স্বাস্থ্যও অতিশয় দুস্থ। সমাজ ইহাদিগের আছে,—তাহার শাসনও কম নয়; কিন্তু পুলিশের সহিত চোরের যে সম্বন্ধ, সমাজের সহিত ইহারা ঠিক সেই সম্বন্ধ পাতাইয়া রাখিয়াছে।

অথচ সর্বসমেত ইহারা এমন পীড়িত, এত দুর্কণ, এমন নিঃস্ব
 যে, রাগ করিয়া বসিয়া থাকাও অসম্ভব। বিদ্রোহী বিপথগামী
 সন্তানের প্রতি পিতার মনোভাব যা হয়, রমেশের অন্তরটা ঠিক
 তেমনি করিতেছিল বলিয়াই আজিকার সন্ধ্যায় সে পীরপুরের
 নূতন ইন্সুলঘরে পঞ্চায়েত আহ্বান করিয়াছিল। কিছুক্ষণ
 হইল, সন্ধ্যার ঝাপসা-ঘোর কাটিয়া গিয়া দশমীর জ্যোৎস্নায়
 জানালার বাহিরে মুক্ত-প্রান্তরের এদিক্ ওদিক্ ভরিয়া
 গিয়াছিল। সেই দিকে চাহিয়া রমেশ যাইবার জন্ত প্রস্তুত
 হইয়াও যাই-যাই করিয়া বিলম্ব করিতেছিল। এমন সময়ে
 রমা আসিয়া তাহার দোরগোড়ায় দাঁড়াইল। সে স্থানটায়
 আলো ছিল না, রমেশ বাটীর দাসী মনে কবিয়া কহিল,—
 “কি চাও?” “আপনি কি বাইরে যাচ্ছেন?” রমেশ চমকিয়া
 উঠিল—“এ কি রমা? এমন সময়ে যে!” যেহেতু তাহাকে
 সন্ধ্যার আশ্রয় গ্রহণ করিতে হইয়াছিল, তাহা বলা বাহুল্য :
 কিন্তু যে জন্ত সে আসিয়াছিল, সে অনেক কথা। অথচ,
 কি করিয়া যে আরম্ভ করিবে, ভাবিয়া না পাইয়া রমা স্থির
 হইয়া বহিল। রমেশও কথা কহিতে পারিল না। খানিকক্ষণ
 চুপ করিয়া থাকিয়া, রমা প্রশ্ন করিল,—“আপনার শরীর
 এখন কেমন আছে?”

“ভাল নয়। আবার রোজ রাত্রেই জ্বর হচ্ছে।”

“তা’হলে কিছুদিন বাইরে ঘুরে এলে ত ভাল হয়।”
 রমেশ হাসিয়া কহিল, —“ভাল ত হয় জানি, কিন্তু, যাই কিং

ক'রে ?” তাহার হাসি দেখিয়া রমা বিরক্ত হইল। কহিল,—
 “আপনি বলবেন, আপনার অনেক কাজ ; কিন্তু এমন কাজ কি
 আছে, যা নিজের শরীরের চেয়েও বড় ?” রমেশ পূর্বের মতই
 হাসিয়া জবাব দিল,—“নিজের দেহটা যে ছোট জিনিস, তা'
 আমি বলিনে। কিন্তু, এমন কাজ মানুষের আছে, যা' এই
 দেহটার চেয়ে অনেক বড়,—কিন্তু, সে ত তুমি বুঝবে না রমা !”
 রমা মাথা নাড়িয়া কহিল,—“আমি বুঝতেও চাইনে। কিন্তু
 আপনাকে আর কোথাও যেতেই হবে। সরকার মশায়কে ব'লে
 দিয়ে যান, আমি তাঁর কাজকর্ম দেখব !” রমেশ বিস্মিত হইয়া
 কহিল,—“তুমি আমার কাজকর্ম দেখবে ? কিন্তু—”

“কিন্তু কি ?”

“কিন্তু কি জানো রমা, আমি তোমাকে বিশ্বাস করিতে
 পারুব কি ?” রমা অসঙ্কোচে তৎক্ষণাৎ কহিল,—“ইতরে পারে
 না, কিন্তু আপনি পারবেন।” তাহার দৃঢ় কণ্ঠের এই অচিন্ত-
 নীয় উক্তি রমেশ বিস্ময়ে স্তব্ধ হইয়া গেল। কিন্তু, ক্ষণেক
 মৌন থাকিয়া বলিল,—“আচ্ছা, তেবে দেখি।” রমা মাথা
 নাড়িয়া কহিল,—“না, ভাববার সময় নেই,—আজই আপনাকে
 আর কোথাও যেতে হবে। না গেলে—” বলিতে বলিতেই সে
 স্পষ্ট অনুভব করিল, রমেশ বিচলিত হইয়া উঠিয়াছে। কারণ,
 অকস্মাৎ এমন করিয়া না পলাইলে বিপদ যে কি ঘটতে পারে,
 তাহা অনুমান করা কঠিন নয়। রমেশ ঠিকই অনুমান করিল ;
 কিন্তু, আত্ম-সংবরণ করিয়া কহিল,—“ভাল, তাই যদি যাই,

তাতে তোমার লাভ কি? আমাকে বিপদে ফেলতে তুমি নিজেও ত কম চেষ্টা কর নি যে, আজ আর একটা বিপদে সতর্ক করুতে এসেচ। সে সব কাণ্ড এত পুরাণো হয়নি যে, তোমার মনে নেই। বরং, খুলে বল, আমি গেলে তোমার নিজের কি সুবিধে হয়, আমি চ'লে যেতে হয় ত রাজী হতেও পারি।” বলিয়া সে যে—উত্তরের প্রত্যাশায় রমার অস্পষ্ট মুখের প্রতি চাহিয়া বহিল, তাহা পাইল না। কত বড় অভিমান যে রমার বুক জুড়িয়া উচ্ছ্বসিত হইয়া উঠিল, তাহাও জানা গেল না। রমেশের নিষ্ঠুর বিজ্রপের আঘাতে মুখ যে তাহার কিরূপ বিবর্ণ হইয়া রহিল, তাহাও অন্ধকারে লক্ষ্য-গোচর হইল না। কিছুক্ষণ স্থির হইয়া রমা আপনাকে সামলাইয়া লইল। পরে কহিল,—“আচ্ছা, খুলেই বল্‌চি। আপনি গেলে আমার লাভ কিছুই নেই, কিন্তু না গেলে অনেক ক্ষতি। আমাকে সাক্ষী দিতে হবে।” রমেশ শুক হইয়া বলিল,—“এই? কিন্তু সাক্ষী না দিলে?” রমা আবার একটুখানি থামিয়া কহিল,—“না দিলে? না দিলে দুদিন পরে আমার মহামায়ার পূজায় কেউ আসবে না, আমার যতীনের উপনয়নে কেউ থাকে না—আমার বার-ব্রত—” এরূপ দুর্ঘটনার সম্ভাবনামাত্রে রমা ঘেন শিহরিয়া উঠিল। রমেশের আর না শুনিলেও চলিত, কিন্তু থাকিতে পারিল না। কহিল,—“তার পরে?” রমা ব্যাকুল হইয়া বলিল,—“তারও পরে? না, তুমি যাও—আমি মিনতি করুচি রমেশদা”,—আমাকে সবদিকে নষ্ট কোরো না; তুমি

যাও,—যাও এ দেশ থেকে।” কিছুক্ষণ পর্য্যন্ত উভয়েই নীরব হইয়া রহিল। ইতিপূর্বে যেখানে, যে কোন অবস্থায় হোক, রমাকে দেখিলেই রমেশের বুকের রক্ত অশাস্ত হইয়া উঠিত। মনে মনে শত যুক্তি প্রয়োগ করিয়া, নিজের অন্তরকে সহস্র কটুক্তি করিয়াও তাহাকে শাস্ত করিতে পারিত না। হৃদয়ে এই নীরব বিরুদ্ধতায় সে দুঃখ-পাইত, লজ্জা অনুভব করিত, ক্রুদ্ধ হইয়া উঠিত; কিন্তু কিছুতেই তাহাকে বশে আনিতে পারিত না। বিশেষ করিয়া আজ এইমাত্র নিজেরই গৃহের মধ্যে সেই রমাকে অকস্মাৎ একাকিনী উপস্থিত হইতে দেখিয়া কল্যাকার কথা স্মরণ করিয়াই তাহার হৃদয়-চাকল্য একেবারে উদ্দাম হইয়া উঠিয়াছিল। রমার শেষ কথায় এতদিন পরে আজ সেই হৃদয় স্থির হইল। রমার ভয়-ব্যাकुल নির্বন্ধতায় অথগু স্বার্থপরতার চেহারা এতই সুস্পষ্ট হইয়া উঠিয়াছিল যে, তাহার গন্ধ হৃদয়েরও আজ চোখ খুলিয়া গেল। রমেশ গভীর একটা নিঃশ্বাস ফেলিয়া কহিল,—“আচ্ছা, তাই হবে। কিন্তু আজ আমার সময় নেই। কারণ, আমার পালাবার হেতুটা যত বড়ই তোমার কাছে হোক, আজ রাত্রিটা আমার কাছে তার চেয়েও গুরুতর। তোমার দাসীকে ডাকো, আমাকে এখনি বা’র হ’তে হবে।” রমা আস্তে আস্তে বলিল,—“আজ কি কোনমতেই যাওয়া হ’তে পারে না?” “না। তোমার দাসী গেল কোথায়?” “কেউ আমার সঙ্গে আসেনি।” রমেশ অবাক হইয়া বলিল,—“সে কি কথা! এখানে একা

এলে কোন্ সাহসে ? একজন দাসী পর্য্যন্ত সঙ্গে ক’রে আননি !” রমা তেমনি যুঁহু স্বরে কহিল,—“তাতেই বা কি হ’ত ? সেও ত আমাকে তোমার হাত থেকে রক্ষা ক’রতে পারত না।” “তা না পারুক, লোকের মিথ্যা ছূর্নাম থেকে ত বাঁচাতে পারত ! রাত্রি কম হয়নি রাণি !” সেই বহুদিনের বিবৃতা নাম ! সহসা কি একট বলিবার জন্ত রমার অত্যন্ত আবেগ উপস্থিত হইল, কিন্তু সে সংবরণ করিয়া ফেলিল। তার পর শুধু কহিল,—“তাতেও ফল হ’ত না রমেশদা !” অন্ধকার রাত্রি নয়—আমি বেশ যেতে পারুব।” বলিয়া আর কোন কথাই জন্ত অপেক্ষা না করিয়া ধীরে ধীরে বাহির হইয়া গেল।

১৬

প্রতি বৎসর রমা ঘটা করিয়া দুর্গোৎসব করিত এবং প্রথম পূজার দিনেই গ্রামের সমস্ত চাষাভূষা প্রভৃতিকে পরিতোষ পূর্ব্বক ভোজন করাইত। ব্রাহ্মণ-বাটীতে মায়ের প্রসাদ পাইবার জন্ত এমনি ছড়ামুড়ি পড়িয়া যাইত যে, রাত্রি এক-প্রহর পর্য্যন্ত ভাঁড়ে-পাতায়, এটোতে-কাঁটাতে বাড়ীতে পা ফেলিবার জায়গা থাকিত না। শুধু হিন্দু নয়, পীরপুরের প্রজারাও ভিড় করিতে ছাড়িত না। এবারেও সে নিজে অন্তস্থ থাকি সন্তেও আয়োজনের ক্রটি করে নাই। চণ্ডীমণ্ডপে প্রতিমা ও পূজার সাজ-সরঞ্জাম। নীচে উৎসবের পশু প্রাণ। সপ্তমীপূজা যথাসময়ে সমাধা হইয়া গেছে। ক্রমে

মধ্যাহ্ন অপরাহ্নে গড়াইয়া, তাহাও শেষ হইতে বসিয়াছে। আকাশে সপ্তমীর খণ্ড-চন্দ্র পরিস্ফুট হইয়া উঠিতে লাগিল; কিন্তু মুখুয্যে-বাড়ীর মস্ত উঠান জনকয়েক ভদ্রলোক ব্যতীত একেবারে শূণ্য, খাঁ খাঁ করিতেছে। বাড়ীর ভিতরে অগ্নের বিরাট স্তূপ ক্রমে জমাট বাধিয়া কঠিন হইতে লাগিল, ব্যঞ্জনের রাশি শুকাইয়া বিবর্ণ হইয়া উঠিতে লাগিল, কিন্তু এখন পর্য্যন্ত একজন চাষাও মাঘের প্রসাদ পাইতে বাড়ীতে পা দিল না। ‘ইস্! এত আহাৰ্য্য-পেষ্য নষ্ট করিয়া দিতেছে, দেশের ছোট লোকের দল? এত বড় স্পর্দ্ধা!’ বেণী ছাঁকা হাতে একবার ভিতরে, একবার বাহিরে, হাঁকাহাঁকি দাপাদাপি করিয়া বেড়াইতে লাগিলেন;—“ব্যাটারদের শেখাবো—চাল কেটে তুলে দেব,—এমন ক’রুব, তেমন ক’রুব ইত্যাদি।” গোবিন্দ, ধর্মদাস, হালদার প্রভৃতি এঁরা কষ্টমুখে অবিশ্রান্ত ঘুরিয়া ঘুরিয়া আন্দাজ করিতে লাগিলেন, কোন্ শালার কারসাজিতে এই কাণ্ডটা ঘটিয়াছে। হিন্দু মুসলমানে একমত হইয়াছে, এও ত বড় আশ্চর্য্য! এদিকে অন্তরে মাসী ত একেবারে দুর্ব্বার হইয়া উঠিয়াছেন। সেও এক মহামারী ব্যাপার! এই তুমুল হাঙ্গামার মধ্যে শুধু একজন নীরব হইয়া আছে—সে নিজে রমা। একটি কথাও সে কাহারো বিরুদ্ধে কহে নাই,—কাহাকেও দোষ দেয় নাই,—একটা আক্ষেপ বা অভিযোগের কণামাত্র বাক্যও এখন পর্য্যন্ত তাহার মুখ দিয়া বাহির হয় নাই। এ কি সেই রমা? সে যে অতিশয় পীড়িত,

তাহাতে লেশমাত্র সন্দেহ নাই। কিন্তু সে নিজের স্বীকার করে না,—হাসিয়া উড়াইয়া দেয়। রোগে রূপ নষ্ট করে—সে থাকে। কিন্তু, সে অভিমান নাই, সে রাগ নাই—সে জিদ নাই। স্নান চোখ দুটি যেন ব্যথায় ও করুণায় ভরা। একটু লক্ষ্য করিলেই মনে হয়, যেন ঐ দুটি সজল আবরণের নীচে রোদনের সমুদ্র চাপা দেওয়া আছে—মুক্তি পাইলে বিশ্বসংস্কার ভাসাইয়া দিতে পারে। চণ্ডীমণ্ডপেব ভিতরের দ্বার দিয়া রমা প্রতিমার পার্শ্বে আসিয়া দাঁড়াইল। তাহাকে দেখিবামাত্র শুভাশুভায়াঁর দল একেবারে তার-স্বরে ছোটলোকদের চোন্দ-পুরুষের নাম ধরিয়া গালিগালাজ করিতে লাগিল। রমা শুনিয়া নিঃশব্দে একটুখানি হাসিল। বোটা হইতে টানিয়া ছিড়িলে মাসুকের হাতের মধ্যে ফুল যেমন করিয়া হাসে—ঠিক তেমনি। তাহাতে রাগ-দেষ, আশা-নিরাশা, ভাল-মন্দ, কিছুই প্রকাশ পাইল না। সে হাসি সার্থক কি নিরর্থক, তাই বা কে জানে!

বেণী রাগিয়া কহিল,—“না, না, এ হাসির কথা নয়, এ বড় সর্ব্বনেশে কথা! একবার যখন জানুব, এর মূলে কে?” বলিয়া দুই হাতের নোথ এক করিয়া কহিল,—“তখন এই এমনি ক’রে ছিড়ে ফেল্‌ব।” রমা মনে মনে শিহরিয়া উঠিল। বেণী কহিতে লাগিল,—“হারামজাদা ব্যাটারা, এ বুঝিস্নে যে, যার জোরে তোরা জোর করিস্, সেই রমেশ নিজে যে জেলের ঘানি টান্‌চে! তোদের মাঝতে কতটুকু সময় লাগে?” রমা কোন

কথা कहিল না। যে কাজের জন্ত আসিয়াছিল, তাহা শেষ করিয়া নিঃশব্দে চলিয়া গেল। প্রায় দেড়মাস হইল, রমেশ অবৈধ প্রবেশ করিয়া, ভৈরবকে ছুরি মারার অপরাধে, জেল খাটিতেছে!—মকদ্দমায় বাদীর পক্ষে বিশেষ পরিশ্রম করিতে হয় নাই,—নূতন ম্যাজিষ্ট্রেট সাহেব কি করিয়া পূর্বা হুই জ্ঞাত হইয়াছিলেন, এ প্রকার অপরাধ আসামীর পক্ষে খুবই সম্ভব এবং স্বাভাবিক। এমন কি, সে ডাকাতি প্রভৃতির সহিত সংশ্লিষ্ট কি না, সে বিষয়েও তাঁহার যথেষ্ট সংশয় আছে। থানার কেতাব হইতেও তিনি বিশেষ সাহায্য পাইয়াছেন। তাহাতে লেখা আছে, ঠিক এই ধরনের অপরাধ সে পূর্বেও করিয়াছে, এবং আরও অনেক প্রকার সন্দেহজনক ব্যাপার তাহার নামেব সহিত জড়িত আছে। ভবিষ্যতে পুলিশ যেন তাহার প্রতি বিশেষ দৃষ্টি রাখে, তিনি এ মন্তব্য প্রকাশ করিতেও ছাড়েন নাই। বেশী সাক্ষ্য-প্রমাণেব প্রয়োজন হয় নাই, তবে রমাকে সাক্ষ্য দিতে হইয়াছিল। সে कहিয়াছিল, “রমেশ বাড়ী চুকিয়া আচার্য্য মহাশয়কে মারিতে আসিয়াছিল, তাহা সে জানে। কিন্তু ছুরি মারিয়াছিল কি না, জানে না, হাতে তাহার ছুরি ছিল কি না, তাহাও তাহার স্মরণ হয় না।” কিন্তু এই কি সত্য? জেলার বিচারালয়ে হলফ করিয়া রমা এই সত্য বলিয়া আসিল; কিন্তু যে বিচারালয়ে হলফ করার প্রথা নাই, সেখানে সে কি জবাব দিবে! তাহার অপেক্ষা কে অধিক নিঃসংশয়ে জানিত, রমেশ ছুরিও মারে নাই, হাতে তাহার

অস্ত্র থাকা ত দূরের কথা, একটা তুণ পর্য্যন্ত ছিল না! সে আদালতে এ কথা ত কেহ তাহাকে জিজ্ঞাসা পর্য্যন্ত করিবে না, সে কি স্বরণ করিতে পারে এবং কি পারে না! কিন্তু, এখানকার আদালতে সত্য বলিবার যে তাহার এতটুকু পপ ছিল না! বেণী প্রভৃতির হাতধরা পল্লী-সমাজ সত্য চাহে নাই। স্ততরাং সত্যের মূল্যে তাহাকে যে মিথ্যা অপবাদের গাঢ় কালী নিজের মুখময় মাখিয়া, এই সমাজের বাহিরে আসিয়া দাঁড়াইতে হইবে—এমন ত অনেকেই হইয়াছে—এ কথা সে যে নিঃশঙ্কায় জানিত। তা ছাড়া, এত বড় গুরুদণ্ডের কথা, রমা স্বপ্নেও কল্পনা করে নাই। বড় জোর তু'শ একশ' জরিমানা হইবে, হাইই জানিত। বরঞ্চ, বার বার সতর্ক করা সত্ত্বেও রমেশ যখন তাহার কাজ ছাড়িয়া কোনমতেই পলাইতে স্বীকার করে নাই, তখন রাগ করিয়া রমা মনে মনে এ কামনাও করিয়াছিল, হৌক জরিমানা। একবার শিক্ষা হইয়া যাক। কিন্তু সে শিক্ষা যে এমন করিয়া হইবে, রমেশের রোগক্লিষ্ট পাণ্ডুর মুখে প্রতি চাহিয়া ও বিচারকের দয়া হইবে না—একে-বারে ছয়মাস সশ্রম-কারাবাসের জুকুম করিয়া দিবে—তাহা সে ভাবে নাই। সে সময়ে রমা নিজে রমেশের দিকে চাহিয়া দেখিতে পারে নাই। পরের মুখে শুনিয়াছিল, রমেশ একদৃষ্টে তাহারই মুখের পানে চাহিয়াছিল, এবং জেলের জুকুম হইয়া গেলে, গোপাল সরকারের প্রার্থনার উত্তরে মাথা নাড়িয়া কহিয়াছিল,—“না। ম্যাজিষ্ট্রেট আমাকে সারাজীবন

কারাক্ক করিবার ছকুম দিলেও আমি আপিল করিয়া খালাস পাইতে চাহি না। বোধ করি, জেল এর চেয়ে ভাল।*

‘ভালই ত! তাহাদের চিরানুগত ভৈরব আচার্য্য মিথ্যা নালিশ করিয়া যখন তাহার স্বর্ণ-শোধ করিল, এবং রমা সাক্ষ্য-মঞ্চে দাঁড়াইয়া স্বরণ করিতে পারিল না, তাহার হাতে ছুরি ছিল কি না, তখন আপিল করিয়া মুক্তি চাহিবে সে কিসের জ্ঞাত! তাহার সেই দুর্জয় ঘৃণা বিরাট পামাণখণ্ডের মত রমার বুকের উপর চাপিয়া বসিয়া আছে—কোথাও তাহাকে সে নড়াইয়া রাখিবার স্থান পাইতেছে না! সে কি গুরুভার! সে মিথ্যা বলিয়া আসে নাই—এ কৈফিয়ৎ তাহার অন্তর্ধানী ত কোন-মতেই মঞ্জুব করিল না! মিথ্যা বলে নাই বটে, কিন্তু সত্য প্রকাশও করে নাই। সত্যগোপনের অপরাধ যে এত বড়, সে যে এমন করিয়া তাহাকে অহরহ দণ্ড করিয়া ফেলিবে, এ যদি সে একবার জানিতে পারিত! রহিয়া রহিয়া তাহার কেবলই মনে পড়ে, ভৈরবের যে অপরাধে রমেশ আত্মহারা হইয়াছিল, সে অপরাধ কত বড়! অথচ, তাহার একটিমাত্র কথায় সে সমস্ত মার্জনা করিয়া,—দ্বিগুণ না করিয়া, চলিয়া গিয়াছিল! তাহার ইচ্ছাকে এমন করিয়া শিরোধার্য্য করিয়া কে কবে, তাহাকে এত সম্মানিত করিয়াছিল! নিজের মধ্যে পুড়িয়া পুড়িয়া আজবাল একটা সত্যের সে যেন দেখা পাইতেছিল! যে সমাজের ভয়ে সে এত বড় গহিত কণ্ঠ করিয়া বসিল, সে সমাজ কোথায়? বেণী প্রভৃতি কয়েকজন সমাজ-

পতির স্বার্থ ও ক্রুর হিংসার বাহিরে কোথাও কি তাহার অস্তিত্ব আছে? গোবিন্দের এক বিধবা ভ্রাতৃবধূর কথা কে না জানে? বেণীর সহিত তাহার সংস্রবের কথা গ্রামের মধ্যে কাহারও অবিদিত নাই। অথচ সমাজের আশ্রয় সে নিষ্কণ্টকে বসিয়া আছে; এবং এই বেণীই সমাজপতি। তাহারই সামাজিক-শৃঙ্খল সর্বদা শতপাকে জড়াইয়া রাখাই চরম সার্থকতা! ইহাই হিঁদুয়ানী। কিন্তু যে ভৈরব এত অনর্থের মূল, রমা নিজের দিকে চাহিয়া তাহার উপরেও আর রাগ করিতে পারিত না। মেয়ে তাহার বারো বছরের হইয়াছে—অতি শীঘ্র বিবাহ দিতে না পারিলে ‘একঘরে’ হইতে হইবে—এবং বাড়ীশুদ্ধ লোকের জাতি যাইবে। এ প্রমাদের আশঙ্কামাত্রেই ত প্রত্যেক হিন্দুর হাত-পা পেটের ভিতর ঢুকিয়া যায়! সে নিজে তাহার এত সুবিধা থাকা সত্ত্বেও সে সমাজের ভয় কাটাইতে পারে নাই—গরীব ভৈরব কাটাইবে কি করিয়া! বেণীর বিরুদ্ধতা করা তাহার পক্ষে কি ভয়ানক মারাত্মক ব্যাপার, এ কথা ত কোনমতেই সে অস্বীকার করিতে পারে না।

বৃদ্ধ সনাতন হাজরা বাটীর সম্মুখ দিয়া যাইতেছিল, গোবিন্দ দেখিতে পাইয়া ডাকা-ডাকি, অমুনয়-বিনয়, শেষ-কালে একরকম জোর করিয়া ধরিয়া আনিয়া বেণীবাবুর সামনে হাজির করিয়া দিল। বেণী গরম হইয়া কহিল,—
“এত দোমাক কবে থেকে হ’ল রে সনাতন? বলি,

তোদের ঘাড়ে কি আজকাল আর একটা ক'রে মাথা গাঁজিয়েচে রে !” সনাতন কহিল,—“দুটো ক'রে মাথা আর কার থাকে বড় বাবু ? আপনাদেরই থাকে না ত, আমাদের মত গরীবের !” “কি বল্লি রে !” বলিয়া হাঁক দিয়া বেণী ক্রোধে নির্ঝাক্ হইয়া গেল ; ইহারই সন্ধ্যা যে দিন বেণীর হাতে বঁধা ছিল, তখন এই সনাতন দুবেলা আসিয়া বড়বাবুর পদলেহন করিয়া ঘাইত—আজ তাহারই মুখে এই কথা ! সনাতন কহিল,—“দুটো মাথা কারো থাকে না, সেই কথাই বলেচি বড়বাবু, আর কিছু নয়।” গোবিন্দ রসান দিয়া কহিল,—“তোদের বুকের পাটা শুধু দেখ্‌চি আমরা ! মাঘের প্রসাদ পেতেও কেউ তোরা এলি নে, বলি, কেন বল্‌ত রে ?” বুড়া একটুখানি হাসিয়া কহিল,—“আর বুকের পাটা ! যা' করবার, সে ত আপনারা আমার করেচেন। সে যাক্ ; কিন্তু মাঘের প্রসাদই বলুন, আর যাই বলুন, কোন কৈবর্তই আর বামুন-বাড়ীতে পাত পাত্বে না। এত পাপ যে মা বসুমতী কেমন ক'ব সহ্যেচেন, তাই আমরা কেবল বলাবলি করি !” বলিয়া একটা নিঃশ্বাস ফেলিয়া সনাতন রমার প্রতি চাহিয়া কহিল,—“একটু সাবধানে থেকো দিদিঠাক্করণ, পীরপুরের মোচনমান ছোড়ারা একেবারে ক্ষেপে রয়েছে। ছোটবাবু ফিরে এলে যে কি কাণ্ড হবে, তা ঐ মা দুর্গাই জানেন। এর মধ্যেই দুটো তিনটে বার তারা বড়বাবুর বাড়ীর চারপাশে ঘুরেফিরে গেছে—সামনে পায়নি, তাই রক্ষে !” বলিয়া সে বেণীর দিকে

চাহিল ! চক্ষের নিমেষে বেণীর ক্রুদ্ধ মুখ ভয়ে বিবর্ণ হইয়া গেল। সনাতন কহিতে লাগিল,—“ঠাকুরের স্বমুখে মিথো বল্চিনে, বড়বাবু একটু সাম্লে-স্বম্লে থাকবেন। রাত-বিরিতে বার হবেন না—কে কোথায় ওত পেতে ব’সে থাকবে, বলা যায় না ত !” বেণী কি একটা বলিতে গেল, কিন্তু মুখ দিয়া তাহার কথা বাহির হইল না। তাহার মত ভীৰু লোক * বোধ করি সংসারে ছিল না।

এতক্ষণে রমা কথা কহিল। স্নেহাৰ্দ্ৰ করুণকর্ণে প্রশ্ন করিল,—“সনাতন, ছোটবাবুর জন্তেই বুঝি তোমাদের সব এত রাগ ?” সনাতন প্রতিমার দিকে একবার দৃষ্টিপাত করিয়া কহিল,—“মিথো ব’লে আর নবকে যাব কেন দিদিঠাকুরণ, তাই বটে ! তবে, মোচনমানদের রাগটাই সব চেয়ে বেশি। তারা ছোটবাবুকে হিঁদুদেব পয়গম্বর মনে করে। তার সাক্ষী দেখুন, আপ-নারা—জাফর আলি, আব্দুল দিয়্যে যার জল গলে না, সে ছোটবাবুর জেলের দিন তাদের ইস্কুলের জন্তে একটি হাজাব টাকা দান করেছে ! শুনি মস্জিদে তাঁর নাম ক’রে নাকি নেমাজ পড়া পর্য্যন্ত হয়।” রমার শুষ্ক ম্লান মুখখানি অব্যক্ত-আনন্দে উদ্ভাসিত হইয়া উঠিল। সে চুপ করিয়া প্রদীপ্ত নিমিষে চোখে সনাতনের মুখের পানে চাহিয়া রহিল। বেণী অকস্মাৎ সনাতনের হাত চাপিয়া ধরিয়া কহিল,—“তোকে একবার দারোগার কাছে গিয়ে বলতে হবে, সনাতন ! তুই বা’ চাইবি তাই তোকে দেব, দু’বিঘে জমি ছাড়িয়ে নিতে চাস্ ত তাই পাবি, ঠাকুরের

সামনে বসে দিক্বি করুচি, সনাতন, বামুনের কথাটা রাখ্ ।”
 সনাতন বিস্মিতের মত কিছুক্ষণ বেগীর মুখপানে চাহিয়া
 থাকিয়া কহিল,—“আর ক’টা দিন বা বাঁচব বড়বাবু! লোভে
 পড়ে যদি এ কাজ করি, মরুলে আমাকে তোলা চুলোয় যাক, পা
 দিয়েও কেউ ছোবে না; সে দিন-কাল আর নেই বড়বাবু,—
 “সে দিন-কাল আর নেই! ছোটবাবু সব উল্টে দিয়ে গেছে।”
 গোবিন্দ কহিল,—“বামুনের কথা তা হ’লে রাখ্বিনে বল?”
 সনাতন মাথা নাড়িয়া বলিল,—“না। বললে তুমি রাগ করবে
 গাঙ্গুলি মশাই, কিন্তু, সে দিন পীরপুরের নূতন ইস্কুলঘরে
 ছোটবাবু বলেছিলেন, ‘গলায় গাছকতক সূতো ঝোলানো
 থাকলেই বামুন হয় না।’ আমি ত আর আজকের নয় ঠাকুর,
 সব জানি। যা ক’রে তুমি বেড়াও, সে কি বামুনের কাজ?
 তোমাকেই জিজ্ঞাসা করুচি, দিদিঠাকুরণ, তুমিই বল দেখি?”
 রমা নিরন্তরে মাথা হেঁট করিল। সনাতন উৎসাহিত হইয়া
 মনের আক্ৰোশ মিটাইয়া বলিতে লাগিল,—“বিশেষ ক’রে
 ছোঁড়াদের দল। ছোটবাবুর জেল হওয়া থেকে এই দুটো গাঁয়ের
 যত ছোকরা, সঙ্কোর পর সবাই গিয়ে জোটে জাফর আলির
 বাড়ীতে। তারা ত চারিদিকে, পষ্ট ব’লে বেড়াচ্ছে, জমিদার
 ত ছোটবাবু! আর সব চোর-ডাকাত। তা ছাড়া খাজনা
 দিয়ে বাস করুব—ভয় কারকে করুব না। আর বামুনের মত
 থাকে ত বামুন, না থাকে আমরাও যা’ তারাও তাই। বেগী
 আতঙ্কে পরিপূর্ণ হইয়া শুকমুখে প্রশ্ন করিল,—“সনাতন, আমার

ওপরেই তাদের এত রাগ কেন, বলতে পারিস্ ?” সনাতন কহিল,—“রাগ কোরো না বড়বাবু, কিন্তু আপনি যে সকল নষ্টের গোড়া, তা তাদের জানতে বাকী নেই।” বেণী চুপ করিয়া বসিয়া রহিল। ছোটলোক সনাতনের মুখে এমন কথাটা শুনিয়াও সে রাগ করিল না, কারণ, রাগ করিবার মত মনের অবস্থা তাহার ছিল না—ভয়ে বুকের ভিতর টিপ-টিপ করিতেছিল। গোবিন্দ কহিল,—“তা হ’লে জাকরের বাড়ীতেই আড্ডা বল্ ? সেখানে তারা কি করে, বলতে পারিস্ ?” সনাতন তাহার মুখপানে চাহিয়া কি যেন চিন্তা করিল। শেষে কহিল,—“কি করে তারা, জানিনে, কিন্তু ভাল চাও ত সে সব মতলব কোরো না ঠাকুর। তারা হিন্দুমুসলমান ভাই সম্পর্ক পাতিয়েচে—এক মন, এক প্রাণ। ছোটবাবুর জেল হওয়া থেকে, সব রাগে বাকুদ হয়ে আছে, তার মধ্যে গিয়ে চকমকি ঠুকে আগুন জ্বালতে যেও না ঠাকুর।”

সনাতন চলিয়া গেলে, বহুক্ষণ পর্য্যন্ত কাহারও কথা কহিবার প্রবৃত্তি রহিল না। রমা উঠিয়া ঘাইবার উপক্রম করিতে বেণী বলিয়া উঠিল,—“ব্যাপার শুনলে রমা ?” রমা মুচকিয়া হাসিল, কথা কহিল না। হাসি দেখিয়া বেণীর “গা জলিয়া গেল, কহিল,—শালা ভৈরবের জন্তেই এত কাণ্ড। আর তুমি না যাবে সেখানে, না তাকে ছাড়িয়ে দেবে, এ সব কিছুই হ’ত না। তুমি ত হাস্বেই রমা, মেয়েমানুষ, বাড়ীর বার হ’তে ত হয় না, কিন্তু আমাদের উপায় কি হবে বল ত ?

সত্যিই যদি একদিন আমার মাথাটা ফাটিয়ে দেয় ? মেয়েমানুষ-দের সঙ্গে কাজ করিতে গেলেই এই দশা হয়।” বলিয়া বেণী ভয়ে, ক্রোধে, জ্বালামুখীনা কি একরকম করিয়া বসিয়া রহিল। রমা স্তম্ভিত হইয়া রহিল। বেণীকে সে ভালমতেই চিনিত, কিন্তু, এত বড় নিলজ্জ অভিযোগ সে তাহার কাছেও প্রত্যাশা করিতে পারিত না। কোন উত্তর না দিয়া, কিছুক্ষণ দাঁড়াইয়া থাকিয়া, সে অন্তত চলিয়া গেল। বেণী তখন হাঁক-ডাক করিয়া গোটা দুই আলো এবং ৫৬ জন লোক সঙ্গে করিয়া আশে-পাশে সতর্ক দৃষ্টি রাখিয়া ত্রুটি ভীতপদে প্রস্থান করিল।

১৭

বিশ্বেশ্বরী ঘরে ঢুকিয়া অশ্রুভরা রোদনের কণ্ঠে প্রশ্ন করিলেন,—“আজ কেমন আছি মা রমা ?” রমা তাহার মুখের পানে চাহিয়া একটুখানি হাসিয়া বলিল,—“আজ ভাল আছি জ্যাঠাইমা।” বিশ্বেশ্বরী তাহার শিয়রে আসিয়া বসিলেন এবং নিঃশব্দে মাথায় মুখে হাত বুলাইতে লাগিলেন। আজ তিনমাসকাল রমা শয্যাগত। বুক জুড়িয়া কাসি এবং ম্যালেরিয়া বিষে সর্বাত্মক সমাচ্ছন্ন। গ্রামের প্রাচীন কবিরাজ প্রাণপণে ইহার বৃথা চিকিৎসা করিয়া মরিতেছে। সে বুড়ী ত জানে না, কিসের অবিজ্ঞান আক্রমণে তাহার সমস্ত স্নায়ু-শিরা অহনিশি পুড়িয়া থাকু হইয়া যাইতেছে। শুধু বিশ্বেশ্বরীর মনের মধ্যে একটা সংশয়ের ছায়া ধীরে ধীরে গাঢ়

হইয়া উঠিতেছিল। রমাকে তিনি কন্ডার মতই স্নেহ করিতেন, সেখানে কোন ফাঁকি ছিল না; তাই সেই অত্যন্ত স্নেহই রমার সম্বন্ধে তাঁহার সত্য-দৃষ্টিকে অসামান্যরূপে তীক্ষ্ণ করিয়া দিতেছিল। অপরে যখন ভুল বুঝিয়া, ভুল আশা করিয়া, ভুল ব্যবস্থা করিতে লাগিল, তাঁহার তখন বুক ফাটিয়া যাইতে লাগিল। তিনি দেখিতেছিলেন, রমার চোখ দুটি গভীর কোটরপ্রবিষ্ট, কিন্তু দৃষ্টি অতিশয় তীব্র। যেন বহু বহু দূরেব কিছু একটা অত্যন্ত কাছে করিয়া দেখিবার একাগ্র বাসনায় এরূপ অসাধারণ তীক্ষ্ণ হইয়া উঠিয়াছে। বিশ্বেশ্বরী ধীরে ধীরে ডাকিলেন,—“রমা?”

“কেন জ্যাঠাইমা?”

“আমি ত তোরা মায়ের মত রমা—” রমা বাধা দিয়া বলিল,—“মত কেন জ্যাঠাইমা, তুমিই ত আমার মা।” বিশ্বেশ্বরী হেঁট হইয়া রমার ললাট চুম্বন করিয়া বলিলেন,—“তবে সত্যি ক’রে বল দেখি মা, তোরা কি হয়েছে?”

“অসুখ করেছে জ্যাঠাইমা!” বিশ্বেশ্বরী লক্ষ্য করিলেন, তাহার এমন পাণ্ডুর মুখখানি যেন পলকের জন্ত রাঙা হইয়া উঠিল। তখন গভীর স্নেহে তাহার কক্ষ চুলগুলি একবার নাড়িয়া দিয়া কহিলেন,—“সে ত এই দুটো চামড়ার চোখেই দেখতে পাই মা! যা’ এতে ধরা যায় না, তেমন যদি কিছু থাকে, এ সময়ে মায়ের কাছে লুকোস্নে রমা! লুকোলে ত অসুখ সারবে না মা?” জানালায়

বাহিরে প্রভাত-রৌদ্র তখনও প্রখর হইয়া উঠে নাই এবং মৃদু-মন্দ বাতাসে শীতের আভাস দিতে ছিল। সেই দিকে চাহিয়া রমা চূপ করিয়া রহিল। খানিকপরে কহিল,—“বড়-দা’ কেমন আছেন, জ্যাঠাইমা ?” বিবেশ্বরী বলিলেন,—“ভাল আছে ! মাথার ঘা’ সার্বতে এখনও বিলম্ব হবে বটে, কিন্তু ৫৬ দিনের মধ্যে হাঁসপাতাল থেকে বাড়ী আসতে পারবে।” রমার মুখে বেদনার চিহ্ন অনুভব করিয়া বলিলেন,—“দুঃখ কোরো না মা, এই তার প্রয়োজন ছিল। এতে তার ভালই হবে।” বলিয়া তিনি রমার মুখে বিশ্বাসের আভাস অনুভব করিয়া কহিলেন,—“ভাব্চ, মা হ’য়ে সন্তানের এত বড় দুর্ঘটনায় এমন কথা কি করে বল্চি ? কিন্তু, তোমাকে সত্যি বল্চি মা, এতে আমি ব্যথা বেশি পেয়েছি, কি আনন্দ বেশি পেয়েছি, তা’ বলতে পারিনে। কেন না, আমি জানি, যারা অধর্মকে ভয় করে না, লজ্জার ভয় ঘাদের নেই, প্রাণের ভয়টা যদি না তাদের তেমনি বেশি থাকে, তা হ’লে সংসার ছার-খার হয়ে যায় ! তাই কেবলই মনে হয় রমা, এই কলুর ছেলে, বেণীর যে মজল ক’রে দিয়ে গেল, পৃথিবীতে কোন আত্মীয়-বন্ধুই ওর সে ভাল করতে পারত না। কয়লাকে ধুয়ে তার রঙ বদলানো যায় না, মা, তাকে আগুনে পোড়াতে হয়।” রমা জিজ্ঞাসা করিল,—“বাড়ীতে তখন কি কেউ ছিল না ?” বিবেশ্বরী কহিলেন,—“থাকবে না কেন, সবাই ছিল। কিন্তু, সে ত খামকা মেরে বসেনি, নিজের জেলে যাবে ব’লে ঠিক ক’রে,

তবে, তেল বেচতে এসেছিল। তার নিজের রাগ একটুও ছিল না, মা, তাই তার বাকের এক ঘায়েই বেণী যখন অজ্ঞান হয়ে পড়ে গেল, তখন চুপ ক'রে দাঁড়িয়ে রইল,—আর আঘাত করলে না। তা' ছাড়া সে ব'লে গেছে, এর পরেও বেণী সাবধান না হ'লে, সে নিজে আর কখনো ফিরুক, না ফিরুক, এই মারই তার শেষ মার নয়।” রমা আন্তে আন্তে বলিল,—“তার মানে আরও লোক পিছনে আছে। কিন্তু, আমাদের দেশে ছোটলোকের এত সাহস ত কোন দিন ছিল না জ্যাঠাইমা, কোথা থেকে এ তারা পেলেন?” বিশ্বেশ্বরী মুহূ হাসিয়া কহিলেন,—“সে কি তুই নিজে জ্ঞানিস্ নে, মা, কে দেশের এই ছোটলোকদের বুক এমন ক'রে ভরে দিয়ে গেছে? আগুন জ্বলে উঠে শুধু শুধু নৈবে না রমা। তাকে জোর ক'রে নেবালেও সে আশপাশের জিনিষ তাতিয়ে দিয়ে যায়। সে আমার ফিরে এসে দাঁঘজীবী হয়ে যেখানে খুসি সেখানে যাক; বেণীর কথা মনে ক'রে আমি কোন দিন দীর্ঘশ্বাস ফেলব না।” কিন্তু, বলা সত্ত্বেও বিশ্বেশ্বরী যে জোর করিয়াই একটা নিঃশ্বাস চাপিয়া ফেলিলেন, রমা তাহা টের পাইল। তাই তাঁহার শ্রাতখানি বুকের উপর টানিয়া লইয়া স্থির হইয়া রহিল। একটুখানি সামলাইয়া লইয়া বিশ্বেশ্বরী পুনশ্চ কহিলেন,—“রমা, এক সন্তান যে কি, সে শুধু মায়েই জানে। বেণীকে যখন তারা অচৈতন্য অবস্থায় ধরাধরি ক'রে

পাকিতে তুলে হাঁসপাতালে নিয়ে গেল, তখন যে আমার
কি হয়েছিল, সে তোমাকে আমি বোঝাতে পারুব না।
কিন্তু, তবুও আমি কারকে একটা অভিসম্পাত বা
কোন লোককে আমি দোষ দিতে পর্য্যন্ত পারিনি। এ
কথা ত ভুলতে পারিনি, মা, যে, এক সন্তান ব'লে ধর্ম্মেব
শাসন ত মায়ের মুখ চেয়ে চূপ ক'রে থাকবে না।” রমা
একটুখানি ভাবিয়া কহিল,—“তোমার সঙ্গে তর্ক করুচিনে
জ্যাঠাইমা ; কিন্তু, এই যদি হয়, তবে, রমেশ-দা' কোন্ পাপে
এ দুঃখভোগ করুচেন? আমরা যা' ক'রে তাঁকে জেলে
পূরে দিয়ে এসেছি, সে ত কারো কাছেই চাপা নেই।”
জ্যাঠাইমা বলিলেন,—“না, মা, তা' নেই। নেই বলেই
বেণী আজ হাঁসপাতালে। আর তোমার—” বলিয়া তিনি
সহসা থামিয়া গেলেন। যে কথা তাঁহার জিহ্বাগ্রে আসিয়া
পড়িল, তাহা জোর করিয়া ভিতরে ঠেলিয়া দিয়া কহিলেন,—
“কি জানিস্ মা, কোন কাজই কোন দিন শুধু শুধু শূন্যে মিলিয়ে
যায় না। তার শক্তি কোথাও-না-কোথাও গিয়ে কাজ
করেই। কিন্তু, কি কোরে করে, তা' সকল সময়ে ধরা
পড়ে না বলেই আজ পর্য্যন্ত এ সমস্তার মীমাংসা হ'তে পারুলে
না, কেন একজনের পাপে আর একজন প্রায়শ্চিত্ত করে।
কিন্তু, করুতে যে হয় রমা, তাতে ত লেশমাত্র সন্দেহ নাই।”
রমা নিজের ব্যবহার স্বরণ করিয়া নীরবে নিঃশ্বাস ফেলিল।
বিশ্বেশ্বরী বলিতে লাগিলেন,—“এর থেকে আমারও চোখ

ফুটেচে রমা, ভাল করব বললেই ভাল করা যায় না। গোড়ার অনেকগুলো ছোটবড় সিঁড়ি উত্তীর্ণ হবার ধৈর্য্য থাকা চাই। একদিন রমেশ হতাশ হয়ে আমাকে বলতে এসেছিল, ‘জ্যাঠাইমা, আমার কাজ নেই এদের ভাল ক’রে, আমি যেখান থেকে এসেছি, সেইখানেই চ’লে যাই।’ তখন আমি বাধা দিয়ে বলেছিলাম, ‘না রমেশ, কাজ যদি শুরু করেচিস্ বাবা, তবে ছেড়ে দিয়ে পালানুনে।’ আমার কথা সে ত কখনো ঠেলতে পারে না; তাই, যে দিন তার জেলের হুকুম শুন্তে পেলাম, সে দিন মনে হ’ল, ঠিক যেন আমিই তাকে ধরে-বেধে এই শাস্তি দিলাম। কিন্তু, তার পর বেণীকে যে দিন হাসপাতালে নিয়ে গেল, সে দিন প্রথম টের পেলাম,—না, না, তারও জেল খাটবার প্রয়োজন ছিল। তা’ ছাড়া ত জানিনি মা, বাইরে থেকে ছুটে এসে ভাল করতে যাওয়ার বিড়ম্বনা এত,—সে কাজ এমন কঠিন! আগে যে মিলতে হয়, সকলের সঙ্গে ভালতে-মন্দতে এক না হ’তে পারলে যে কিছুতেই ভাল করা যায় না—সে কথা ত মনেও ভাবিনি। প্রথম থেকেই সে তার শিক্ষা, সংস্কার, মস্ত জোর, মস্ত প্রাণ নিয়ে এতই উঁচুতে এসে দাঁড়াল যে, শেষ পর্য্যন্ত কেউ তার নাগালই পেলো না। কিন্তু, সে ত আমার চোখে পড়ল না মা, আমি তাকে যেতেও দিলাম না, রাখতেও পারলাম না।” রমা কি একটা বলিতে গিয়া চাপিয়া গেল। বিবেচনায় তাহা অনুমান

করিয়া কহিলেন,—“না রমা, অহুতাপ আমি সে জন্ত করিনে । কিন্তু, তুইও শুনে রাগ করিস্‌নে মা,—এইবার তাকে তোরা নাবিঘ্নে এনে সকলের সঙ্গে যে মিলিয়ে দিলি, তাতে তোদের অধর্ম যতই বড় হোক, সে কিন্তু ফিরে এসে এবার যে ঠিক সত্যটির দেখা পাবে, এ কথা আমি বড় গলা করেই ব’লে যাচ্ছি ।” রমা কথাটা বুঝিতে না পারিয়া কহিল,—“কিন্তু, এতে তিনি কেন নেবে যাবেন জ্যাঠাইমা ? আমাদের অন্ত্রায় অধর্মের ফলে যত বড় যাতনাই তাঁকে ভোগ ক’বুতে হোক, আমাদের দুষ্কৃতি আমাদেরই নরকের অঙ্ককূপে ঠেলে দেবে, তাঁকে স্পর্শ ক’বুবে কেন ?” বিশেষরী ম্লানভাবে একটুখানি হাসিয়া বলিলেন,—“কবুবে বই কি মা ; নইলে পাপ আর এত ভয়ঙ্কর কেন ? উপকারের প্রত্যাশার কেউ যদি নাই করে, এমন কি, উল্টে অপকারই করে, তাতেই বা কি এসে যায় মা, যদি না তার কৃতজ্ঞতায় দাতাকে নাবিঘ্নে আনে ! তুই ব’ল্‌চিস্‌ মা, কিন্তু, তোদের কুঁয়াপুর রমেশকে কি আর তেমনিটি পাবে ? সে ফিবে এলে তোরা স্পষ্ট দেখতে পারি, সে, যে হাত দিয়ে দান ক’রে বেড়াতো, ভৈরব তার সেই ডানহাতটাই মুচড়ে ভেঙ্গে দিয়েছে ।” তার পর একটু খামিয়া নিজেই বলিলেন,—“কিন্তু, কে জানে ! হয় ত ভালই হয়েছে । তার বলিষ্ঠ সমগ্র হাতের অপৰ্যাপ্ত দান গ্রহণ করবার শক্তি যখন গ্রামের লোকের ছিল না, তখন এই ভাঙা হাতটাই বোধ করি এবার তাদের সত্যকার কাজে লাগবে ।” বলিয়া তিনি

গভীর একটা নিঃশ্বাস মোচন করিলেন। তাঁহার হাতখানি রমা নীরবে কিছুক্ষণ নাড়াচাড়া করিয়া ধীরে ধীরে বড় করণ-কণ্ঠে কহিল,—“আচ্ছা জ্যাঠাইমা, মিথো-সাক্ষী দিয়ে নিরপরাধীকে দণ্ডভোগ করানোর শাস্তি কি?” বিশ্বেশ্বরী জানা-লার বাহিরে চাহিয়া রমার বিপর্যস্ত রূক্ষ চুলের রাশির মধ্যে অঙ্গুলি-চালনা করিতে করিতে হঠাৎ দেখিলেন, তাহার নিমী-লিত দুই চোখের প্রান্ত বাহিয়া অশ্রু গড়াইয়া পড়িতেছে। সম্মুখে মুছাইয়া দিয়া কহিলেন,—“কিন্তু তোমার ত হাও ছিল না মা। মেয়েমানুষের এত বড় কলঙ্কের ভয় দেখিয়ে যে কাপুরুষেরা তোমার ওপর এই অত্যাচার ক’রেচে, এর সমস্ত গুরুদণ্ডই তাদের। তোমাকে ত এর একটি কিছুই বইতে হবে না মা।” বলিয়া তিনি আবার তাহার চক্ষু মুছাইয়া দিলেন। তাঁহার এইটুকুমাত্র আশ্বাসই রমার রুদ্ধ-অশ্রু এই-বার প্রশ্রবণের জ্বাঘ ঝরিয়া পড়িতে লাগিল। কিছুক্ষণ পরে সে কহিল,—“কিন্তু, তাঁরা যে তাঁর শত্রু। তাঁরা বলেন, ‘শত্রুকে যেমন করে হোক, নিপাত করিতে দোষ নেই।’ কিন্তু, আমার ত সে কৈফিয়ত নেই জ্যাঠাইমা।”

“তোমারই বা কেন নেই মা?” প্রশ্ন করিয়া তিনি দৃষ্টি আনত করিতেই অকস্মাৎ তাঁহার চোখের উপর যেন বিদ্যুৎ খেলিয়া গেল। যে সংশয় মুখ ঢাকিয়া এতদিন তাঁহার মনের মধ্যে অকারণে আনাগোনা করিয়া বেড়াইত, সে যেন তাহার মুখোস ফেলিয়া দিয়া একে-

বারে সোজা হইয়া দাঁড়াইল। আজ তাহাকে চিনিতে পারিয়া ঋণকালের জন্য বিশ্বেশ্বরী বেদনায়, বিষ্ময়ে তুচ্ছিত হইয়া গেলেন। রমার হৃদয়ের ব্যথা আর তাঁহার অগোচর রহিল না। রমা চোখ বুজিয়া ছিল, বিশ্বেশ্বরীর মুখের ভাব দেখিতে পাইল না। ডাকিল,—“জ্যাঠাইমা ?”

জ্যাঠাইমা চকিত হইয়া তাহার মাথাটা একটুখানি নাড়িয়া দিয়া সাড়া দিলেন। রমা কহিল,—“একটা কথা আজ তোমার কাছে স্বীকার করুব জ্যাঠাইমা। পীরপুরের জাফর আলীর বাড়ীতে সন্ধ্যার পর গ্রামের ছেলেরা জড় হয়ে রমেশদা’র কথা মতো সং আলোচনাই করত; বদমাইসের দল ব’লে তাদের পুলিশে ধরিয়ে দেবার একটা মংলব চলছিল—আমি লোক পাঠিয়ে তাদের সাবধান করে দিয়েছি। কারণ, পুলিশ ত এই চায়। একবার তাদের হাতে পেলে ত আব রক্ষা রাখত না।” শুনিয়া বিশ্বেশ্বরী শিহরিয়া উঠিলেন। “বলিস্ কি রে ? নিজের গ্রামের মধ্যে পুলিশের এই উৎপাত বেগী মিছে করে ডেকে আনতে চেয়েছিল ?” রমা কহিল,—“আমার মনে হয় বড়দা’র এই শাস্তি তারই ফল। আমাকে মাপ করতে পারবে জ্যাঠাইমা ?” বিশ্বেশ্বরী হেঁট হইয়া নীরবে রমার ললাট চুশন করিলেন। বলিলেন,—“তার মা হয়ে এ যদি না আমি মাপ করতে পারি, কে পারবে রমা ? আমি আশীর্বাদ করি, এর পুরস্কার ভগবান্ তোমাকে যেন দেন। রমা হাত দিয়া চোখ মুছিয়া ফেলিয়া কহিল,—“আমার এই

একটা সান্ত্বনা জ্যাঠাইমা, তিনি ফিরে এসে দেখবেন, তাঁর স্বথের ক্ষেত্র প্রস্তুত হয়ে আছে। যা' তিনি চেয়েছিলেন, তাঁর সেই দেশের চাষাভুষারা এবার ঘুম-ভেঙ্গে উঠে বসেচে। তাঁকে চিনেছে, তাঁকে ভালবেসেছে। এই ভালবাসার আনন্দে তিনি আমার অপরাধ কি ভুলতে পারবেন না জ্যাঠাইমা ?" বিবেশ্বরী কথা কহিতে পারিলেন না। শুধু তাঁহার চোখ হইতে এক ফোঁটা অশ্রু গড়াইয়া বমার কপালের উপর পড়িল। তারপর বল্লভ পর্য্যন্ত উভয়েই স্তব্ধ হইয়া রহিলেন। রমা ডাকিল,—“জ্যাঠাইমা ?” বিবেশ্বরী বলিলেন,—“কেন মা ?” রমা কহিল,—“শুধু একটি যায়গায় আমরা দূরে যেতে পারিনি। তোমাকে আমরা দুজনেই ভালবেসেছিলাম।” বিবেশ্বরী আবার নত হইয়া তাহার ললট চুষন কবিলেন। রমা কহিল,—“সেই জোরে আমি একটি দাবী তোমার কাছে রেখে যাব। আমি এখন আর থাকব না, তখনও আমাকে যদি তিনি ক্ষমা করিতে না পারেন, শুধু এই কথাটি আমার হ'য়ে তাঁকে বোলে। জ্যাঠাইমা, যত মন্দ ব'লে আমাকে তিনি জানুতেন, তত মন্দ আমি ছিলাম না। আর যত দুঃখ তাঁকে দিয়েছি, তাব অনেক বেশী দুঃখ যে আমিও পেয়েছি,—তোমার মুখের এই কথাটি হয় ত তিনি অবিশ্বাস করবেন না।” বিবেশ্বরী উপুড় হইয়া পড়িয়া, বুক দিয়া রমাকে চাপিয়া ধরিয়া কাঁদিয়া ফেলিলেন। বলিলেন,—“চল মা, আমরা কোন তীর্থে গিয়ে থাকি। যেখানে বেণী নেই, রমেশ নেই—যেখানে চোখ তুলেই ভগবানের মন্দিরের চূড়া

চোখে পড়ে—সেইখানে যাই। আমি সব বুঝতে পেরেছি রমা। যদি যাবার দিনই তোর এগিয়ে এসে থাকে, মা, তবে এ বিষ় বুকে পূরে জ্বলে পুড়ে সেখানে গেলে ত চলবে না। আমরা বামুনের মেয়ে, সেখানে যাবার দিনটিতে আমাদের তার মতই গিয়ে উপস্থিত হ'তে হবে।” রমা অনেকক্ষণ চুপ করিয়া ধড়িয়া থাকিয়া, একটা উচ্ছ্বসিত দীর্ঘশ্বাস আয়ত্ত করিতে করিতে শুধু কহিল,—“আমিও তেমনি করেই যেতে চাই জ্যাঠাইমা।”

১৮

কারাপ্রাচীরের বাহিরেই যে তাহার সমস্ত হুঃখ ভগবান্ এমন করিয়া সার্থক করিয়া দিবার আয়োজন করিয়া রাখিয়া-ছিলেন, ইহা বোধ করি রমেশের উন্নত-বিকারেও আশা করা তাহার পক্ষে সম্ভবপর ছিল না। ছয়মাস সশ্রম অবরোধের পর মুক্তিলাভ করিয়া সে জেলের বাহিরে পা দিয়াই দেখিল, অচিস্তনীয় ব্যাপার! স্বয়ং বেণী ঘোষাল মাথায় চাদর জড়া-ইয়া সর্ব্বাগ্রে দণ্ডায়মান! তাহার পশ্চাতে উভয় বিজালয়ের মাষ্টার, পণ্ডিত ও ছাত্রের দল এবং কয়েক জন হিন্দু-মুসলমান প্রজা। বেণী সজোরে আলিঙ্গন করিয়া কঁাদ কঁাদ গলায় কহিল,—“রমেশ, ভাইরে, নাড়ীর টান যে এমন টান এবার তা' ডের পেয়েছি। যত্ন মুখ্যের মেয়ে যে আচাখ্যি হারাম-জাদাকে হাত ক'রে, এমন শত্রুতা ক'রবে, লজ্জা সরমের মাথা

খেয়ে নিজে এসে মিথো-সাক্ষী দিয়ে এত দুঃখ দেবে, সে কথা জেনেও যে আমি তখন জানতে চাইনি, ভগবান্ তার শাস্তি আমাকে ভালমতেই দিয়েছেন। জেলের মধ্যে তুই বরং ছিলি ভাল রমেশ, বাইরে এই ছ'টা মাস আমি যে তুষের আগুনে জলে-পুড়ে গেছি!” রমেশ কি করিবে, কি বলিবে, ভাবিয়া না পাইয়া হতবুদ্ধি হইয়া চাহিয়া রহিল। হেডমাষ্টার পাড়ুই মশাই একেবারে ভুলুঙিত হইয়া রমেশের পায়ে ধূলী মাখায় লইলেন। তাহার পিছনের দলটি তখন অগ্রসর হইয়া কেহ আশীর্বাদ, কেহ সেলাম, কেহ প্রণাম করিবার ঘটায় সমস্ত পথটা ঘন চষিয়া ফেলিতে লাগিল। বেণীর কান্না আর যানা মানিল না। অশ্রুগদগদকণ্ঠে কহিল,—“দাদার ওপর অভিমান রাখিস্নে, ভাই বাড়ী চল্। মা কেঁদে কেঁদে হুঁচক্ অঙ্ক করবার যোগাড় করেচেন।” ঘোড়ার গাড়ী দাঁড়াইয়াছিল; রমেশ বিনাবাক্যব্যয়ে তাহাতে চড়িয়া বসিল। বেণী সম্মুখের আসনে স্থানগ্রহণ করিয়া মাথার চাদর খুলিয়া ফেলিল। যা শুকাইয়া গেলেও আঘাতের চিহ্ন জাজ্জল্যমান। রমেশ আশ্চর্য্য হইয়া কহিল,—“ও কি বড়দা’?” বেণী একটি দীর্ঘ নিঃশ্বাস ফেলিয়া ডান হাত উন্টাইয়া কহিল,—“কাকে আর দোষ দেব ভাই, এ আমার নিজেরই কৰ্ম্মফল—আমারই পাপের শাস্তি! কিন্তু, সে আর শুনে কি হবে?” বলিয়া মুখের উপর গভীর বেদনার আভাস ফুটাইয়া চুপ করিয়া রহিল। তাহার নিজের মুখের এই সরল স্বীকারোক্তিতে রমেশের চিত্ত

আর্দ্র হইয়া গেল। সে মনে করিল, কিছু একটা হইয়াছেই। তাই, সে কথা শুনিবার জন্য আর পীড়াপীড়ি করিল না। কিন্তু, বেণী যে জন্য এই ভূমিকাটি করিল, তাহা ফাঁসিয়া যাই-তেছে দেখিয়া সে নিজেই মনে মনে ছটফট করিতে লাগিল। মিনিট দুই নিঃশব্দে কাটার পরে, সে আবার একটা প্রবল নিঃশ্বাসের দ্বারা রমেশের মনোযোগ আকর্ষণ করিয়া ধীরে ধীরে কহিল,—“আমার এই একটা জন্মগত দোষ যে, কিছুতেই মনে এক, মুখে আর কর্তৃত পারিনে। মনের ভাব আর পাঁচজনের মত ঢেকে রাখতে পারিনি বলে কত শাস্তিই যে, ভোগ করিতে হয়, কিন্তু, তবু ত আমার চৈতন্য হল না।” রমেশ চুপ করিয়া শুনিতেছে দেখিয়া, বেণী কণ্ঠস্বর আরও মৃদু ও গম্ভীর করিয়া কহিতে লাগিল,—“আমার দোষের মধ্যে সে দিন মনের কষ্ট আর চাপ্তে না পেরে কঁাদতে কঁাদতে বলে ফেলেছিলাম, রমা, আমরা তোর এমন কি অপরাধ করেছিলাম যে, এই সর্বনাশ আমাদের কর্বলি! জেল হয়েছে শুনলে যে, মা একেবারে প্রাণাবসর্জন করবেন। আমরা ভায়ে ভায়ে বিষয় নিয়ে ঝগড়া করি—যা’ করি, কিন্তু, তবু ত সে আমার ভাই! তুই একটি আঘাতে আমার ভাইকে মার্বলি, মাকে মার্বলি! কিন্তু, নির্দোষীর ভগবান্ আছেন।” বলিয়া সে গাড়ী বাহিরে আকাশের পানে চাহিয়া আর একবার যেন নালিশ জানাইল। রমেশ যদিও এ অভিযোগে যোগ দিল না কিন্তু, মন দিয়া শুনিতে লাগিল। বেণী একটু থামিয়া কহিল,

—“রমেশ, রমার সে উগ্রমূর্ত্তি মনে হ’লে এখনো হৃৎকম্প হয়, দাঁতে দাঁতে ঘ’সে বল্লে ‘রমেশের বাপ আমার বাবাকে জেলে দিতে যায় নি? পার্লে ছেড়ে দিত বুঝি?’” মেয়ে-মানুষের এত দৰ্প আর সহ্য হল না রমেশ। আমিও রেগে ব’লে ফেললাম, “আচ্ছা ফিরে আসুক সে, তার পরে এর বিচার হবে!” এতক্ষণ পর্য্যন্ত রমেশ বেগীর কথাগুলো মনের মধ্যে ঠিকমত গ্রহণ করিতে পারিতেছিল না। কবে তাহার পিতা রমার পিতাকে জেলে দিবার আয়োজন করিয়াছিলেন, তাহা সে জানে না, কিন্তু, ঠিক এই কথাটিই সে দেশে পা-দিয়াই রমার মাসীর মুখে শুনিয়াছিল, তাহা তাহার মনে পড়িল। তখন পরের ঘটনা শুনিবার জন্য সে উৎকর্ণ হইয়া উঠিল। বেগী তাহা লক্ষ্য করিয়া কহিল,—“খুন করা তার অভ্যাস আছে ত! আকবর লেঠেলকে পাঠিয়েছিল, মনে নেই? কিন্তু, তোমার কাছে ত চালাকি খাটেনি,—বরঞ্চ তুমিই উলটে শিথিয়ে দিয়েছিলে। কিন্তু, আমাকে দেখ্ ত? এই ক্ষীণজীবী—” বলিয়া বেগী একটুখানি চিন্তা করিয়া লইয়া, তুষ্ট কলুর ছেলের কল্পিত বিবরণ নিজের অঙ্ককার অন্তরের ভিতর হইতে বাহির করিয়া, আপনাব ভাষা দিয়া একটু একটু গ্রাথিত করিয়া বিবৃত করিল। রমেশ রুদ্ধনিশ্বাসে কহিল,—“তার পর?” বেগী মলিনমুখে একটুখানি হাসিয়া কহিল,—

• “তার পবে কি আর মনে আছে ভাই! কে, কিসে করে যে আমাকে হাসপাতালে নিয়ে গিয়েছিল, সেখানে কি হ’ল, কে

দেখলে কিছুই জানিনে। দশদিন পরে জ্ঞান হ'য়ে দেখলাম, ইঁসপাতালে প'ড়ে আছি। এ যাত্রা যে রকম পেয়েচি সে কেবল মায়ের পুণ্যে—এমন মা কি আর আছে রমেশ! রমেশ একটি কথাও কহিতে পারিল না—কাঠের মূর্তির মত শক্ত হইয়া বসিয়া রহিল। শুধু কেবল তাহার দুই হাতের দশ অঙ্গুলি জড় হইয়া বজ্রকঠিন মুঠায় পরিণত হইল। তাহার মাথায় ক্রোধ ও ঘৃণার যে ভীষণ বহ্নি জ্বলিতে লাগিল, তাহার পরিমাণ করিবারও তাহার সাধ্য রহিল না। বেণী যে কত মন্দ, তাহা সে জানিত। তাহার অসাধ্য যে কিছুই নাই, ইহাও তাহার অপরিজ্ঞাত ছিল না। কিন্তু, সংসারে কোনো মানুষই যে এত অসত্য এমন অসঙ্কোচে, একরূপ অনর্গল উচ্চারণ করিয়া যাইতে পারে, তাহা কল্পনা করিবার মত অভিজ্ঞতা তাহার ছিল না। তাই, সে রমার সমস্ত অপরাধই সত্য বলিয়া বিশ্বাস করিল।

সে দেশে ফিরিয়া আসায় গ্রামময় যেন একটা উৎসব বাধিয়া গেল। প্রতিদিন সকালে, দুপুরে এবং রাত্রি পর্য্যন্ত এত জন-সমাগম, এত কথা, এত আত্মীয়তার ছড়াছড়ি পড়িয়া গেল যে, কারাবাসের যেটুকু শ্রানি তাহার মনের মধ্যে অবশিষ্ট ছিল দেখিতে দেখিতে তাহা উড়িয়া গেল। তাহার অবর্ত্তমানে গ্রামের মধ্যে যে খুব বড় একটা সামাজিক স্রোত ফিরিয়া গিয়াছে, তাহাতে কোন সংশয় নাই, কিন্তু, এই কয়টা মাসের মধ্যেই এত বড় পরিবর্ত্তন কেমন করিয়া সম্ভব হইল, ভাবিতে গিয়া তাহার চোখে পড়িল, বেণীর প্রতিকূলতায় যে শক্তি

পদে পদে প্রতিহত হইয়া কাজ করিতে পারিতেছিল না, অথচ, সঞ্চিত হইতেছিল, তাহাই এখন তাহারি অল্পকূলতায় দ্বিগুণ বেগে প্রবাহিত হইয়াছে। বেণীকে সে আজ আরও একটু ভাল করিয়া চিনিল। এই লোকটাকে এরূপ অনিষ্টকারী জানিয়াও সমস্ত গ্রামের লোক যে, তাহার কতদূর বাধ্য, তাহা আজ যেমন সে দেখিতে পাইল, এমন কোন দিন নয়। ইহারই বিরোধ হইতে পরিভ্রাণ পাইয়া রমেশ মনে মনে হাঁফ ছাড়িয়া বাঁচিল। শুধু তাই নয়। রমেশের উপর অজ্ঞায় অত্যাচারের জন্ত গ্রামের সকলেই মর্শ্বাহত, সেকথা একে-একে সবাই তাহাকে জানাইয়া গেছে। ইহাদের সমবেত-সহানুভূতি লাভ করিয়া, এবং বেণীকে স্বপক্ষে পাইয়া, আনন্দে, উৎসাহে হৃদয় তাহার বিস্তারিত হইয়া উঠিল। ছয়মাস পূর্বে যে সকল কাজ আরম্ভ করিয়াই তাহাকে ত্যাগ করিয়া যাইতে হইয়াছিল, আবার পুরাদমে তাহাতে লাগিয়া পড়িবে সঙ্কল্প করিয়া রমেশ কিছুদিনের জন্ত নিজেও এই সকল আমোদ-আহ্লাদে গা ঢালিয়া দিয়া, সর্বত্র, ছোট-বড় সকল বাড়ীতে, সকলের কাছে, সকল বিষয়ের খোঁজখবর লইয়া সময় কাটাইতে লাগিল। শুধু একটা বিষয় হইতে সে সর্বপ্রযত্নে নিজেকে পৃথক্ করিয়া রাখিতেছিল, — তাহা রমার প্রসঙ্গ। সে পীড়িতা, তাহা পথেই শুনিয়াছিল; কিন্তু, সে পীড়া যে এখন কোথায় উপস্থিত হইয়াছিল, — তাহার কোন সংবাদ গ্রহণ করিতে চাহে নাই। তাহার সমস্ত সঙ্কল্প হইতে আপনাকে সে চিরদিনের মত বিচ্ছিন্ন

করিয়া লইয়াছে, ইহাই তাহার ধারণা। গ্রামে আসিয়াই মুখে মুখে শুনিয়াছিল, শুধু একা রমাই যে তাহার সমস্ত দুঃখের মূল, তাহা সবাই জানে। স্বতরাং এইখানে বেণী যে মিথ্যা কথা কহে নাই, তাহাতে আর তাহার সন্দেহ রহিল না ! দিন পাঁচছয় পরে বেণী আসিয়া রমেশকে চাপিয়া ধরিল। পীরপুরের একটা বড় বিষয়ের অংশ-বিভাগ লইয়া বহুদিন হইতে রমার সহিত তাহার প্রচ্ছন্ন মনোবিবাদ ছিল। এই সুযোগে সেটা হস্তগত করিয়া লওয়া তাহার উদ্দেশ্য। বেণী বাহিরে যাহাই বলুক, সে মনে মনে রমাকে ভয় করিত। এখন সে শয্যাগত, মামলা-মোকদ্দমা করিতে পারিবে না ; উপরন্তু তাহাদের মুসলমান প্রজারাও রমেশের কথা ঠেলিতে পারিবে না। পরে যাই হোক, আপাততঃ বেদখল করিবার এমন অবসর আর মিলিবে না, বলিয়া সে একেবারে জিদ্ ধরিয়া বসিল। রমেশ আশ্চর্য্য হইয়া অস্বীকার করিতেই বেণী বহু প্রকারের যুক্তিপ্রয়োগ করিয়া শেষে কহিল,—“হবে না কেন ? বাগে পেয়ে সে কবে তোমাকে রেয়াৎ করেছে যে, তার অসুখের কথা তুমি ভাবতে যাচ্ছ ? তোমাকে যখন সে জেলে দিয়েছিল, তখন তোমার অসুখই বা কোন্ কম ছিল ভাই !” কথাটা সত্য। রমেশ অস্বীকার করিতে পারিল না। তবু, কেন যে তাহার মন কিছুতেই তাহার বিপক্ষতা করিতে চাহিল না, বেণীর সহস্র কটু উত্তেজনা সত্ত্বেও রমার অসহায়, পীড়িত অবস্থা মনে করিতেই তাহার সমস্ত বিকল্পশক্তি সঙ্কুচিত হইয়া

বিন্দুবৎ হইয়া গেল, তাহার স্ফুট হেতু সে নিজেও খুঁজিয়া পাইল না। রমেশ চূপ করিয়া রহিল। বেণী, কাজ হইতেছে জানিলে, দৈর্ঘ্য ধরিতে জানে। সে তখনকার মত আর পীড়াপীড়ি না করিয়া, চলিয়া গেল।

এবার আর একটা জিনিস রমেশের বড় দৃষ্টি আকর্ষণ করিয়াছিল। বিশ্বেশ্বরীর কোন দিনই সংসারে যে বিশেষ আসক্তি ছিল না, তাহা সে পূর্বেও জানিত; কিন্তু, এবার ফিরিয়া আসিয়া সেই অনাসক্তিটা যেন বিতুষায় পরিণত হইয়াছে বলিয়া তাহার মনে হইতেছিল। কারাগার হইতে অব্যাহতি লাভ করিয়া বেণীর সমভিব্যাহারে যে দিন সে গৃহে প্রবেশ করিয়াছিল, সে দিন বিশ্বেশ্বরী আনন্দ-প্রকাশ করিয়াছিলেন, সজল-কণ্ঠে বারংবার অসংখ্য আশীর্বাদ করিয়াছিলেন, তথাপি কি-যেন-একটা তাহাতে ছিল, যাহাতে সে ব্যথাই পাইয়াছিল। আজ হঠাৎ কথায় কথায় শুনিল,—বিশ্বেশ্বরী কাশী-বাস-সকল করিয়া যাত্রা করিতেছেন, আর ফিরিবেন না। শুনিয়া সে চমকিয়া গেল। কৈ, সে ত কিছুই জানে না! নানাকাজে পাঁচছয় দিনের মধ্যে তাঁহার সহিত সাক্ষাৎ হয় নাই; কিন্তু, যে দিন হইয়াছিল, সে দিন ত তিনি কোন কথা বলেন নাই। যদিচ সে জানিত, তিনি নিজে হইতে আপনার বা পরের কথা আলোচনা করিতে কোন দিন ভালবাসেন না, কিন্তু, আজকের সংবাদ-টার সহিত সে দিনের স্মৃতিটা পাশাপাশি চোখের সামনে তুলিয়া ধরিবামাত্র তাঁহার এই একান্ত বৈরাগ্যের অর্থ দেখিতে

পাইল। আর তাহার লেশমাত্র সংশয় রহিল না, জ্যাঠাইমা সত্যি বিদায় লইতেছেন! এ যে কি, তাঁহার অবিজ্ঞমানতা! যে কি অভাব, মনে করিতেই তাহার দুই চক্ষু অশ্রুপূর্ণ হইয়া উঠিল। আর মুহূর্ত্ত বিলম্ব না করিয়া সে এ বাটীতে আসিয়া উপস্থিত হইল। বেলা তখন ন'টা দশটা। ঘরে ঢুকিতে গিয়া দাসী জানাইল, তিনি মুখুয্যো-বাড়ী গেছেন। রমেশ আশ্চর্য্য হইয়া প্রশ্ন করিল,—“এমন অসময়ে যে?”

এই দাসীটি বহুদিনের পুরাণো। সে মুছ হাসিয়া কহিল,—“মা'র আবার সময় অসময়! তা' ছাড়া আজ তাঁদের ছোট-বাবুর পৈতে কি না।” যতীনের উপনয়ন? রমেশ আরও আশ্চর্য্য হইয়া কহিল,—“কৈ, এ কথা ত কেউ জানে না!” দাসী কহিল,—“তাঁরা কাউকে বলেননি। বল্লেও ত কেউ গিয়ে থাকে না—রমাদিদিকে কর্ত্তারা সব 'একঘরে' ক'রে রেখেছেন কি না!” রমেশের বিস্ময়ের অবধি রহিল না। সে একটুখানি চূপ করিয়া থাকিয়া, কাবণ জিজ্ঞাসা করিতেই, দাসী সলজ্জে ঘাড়টা ফিরাইয়া বলিল,—“কি জানি ছোটবাবু—রমাদিদির কি সব বিল্লী অখ্যাতি বেরিয়েচে কি না—আমরা গরীব-দুঃখী মানুষ, সে সব জানিনে ছোটবাবু—” বলিতে বলিতে সে সরিয়া পড়িল।

কিছুক্ষণ চূপ করিয়া দাঁড়াইয়া থাকিয়া রমেশ গৃহে ফিরিয়া আসিল। এ যে বেগীর ক্রুদ্ধ প্রতিশোধ, তাহা জিজ্ঞাসা না করিয়াও সে বুঝিল। কিন্তু, ক্রোধ কি জন্ত, এবং কিসের

প্রতিহিংসা কামনা করিয়া সে কোন্ বিশেষ কদর্যা ধারায় রমার অখ্যাতিকে প্রবাহিত করিয়া দিয়াছে, এ সকল ঠিক মত অনুমান করাও তাহার দ্বারা সম্ভব ছিল না।

১৯

সেই দিন অপরাহ্নে একটা অচিস্তনীয় ঘটনা ঘটিল। আদালতের বিচার উপেক্ষা করিয়া কৈলাস নাপিত এবং সেখ মতিলাল সাক্ষীসাবুদ সঙ্গে লইয়া রমেশের শরণাপন্ন হইল। রমেশ অকৃত্রিম বিস্ময়ের সহিত প্রশ্ন করিল,—“আমার বিচার তোমরা মান্বে কেন বাপু?”

বাদী প্রতিবাদী উভয়েই জবাব দিল,—“মান্বে না কেন বাবু, হাকিমের চেয়ে আপনার বিজ্ঞাবুদ্ধিই কোন্ কম? আর, হাকিম-হুজুর যা’ কিছু তা’ আপনারা পাঁচজন ভদ্রলোকেই ত হ’য়ে থাকেন! কা’ল যদি আপনি সরকারী চাকরি নিয়ে হাকিম হ’য়ে ব’সে বিচার ক’রে দেন, সেই বিচার ত আমাদেরই মাথা পেতে নিতে হবে! তখন ত মান্বে না, বল্লে চল্বে না।” কথা শুনিয়া রমেশের বুক গর্ষে, আনন্দে স্ফীত হইয়া উঠিল। কৈলাস কহিল,—“আপনাকে আমরা দুজনেই দুকথা বুঝিয়ে বল্তে পারুব; কিন্তু, আদালতে সেটি হবে না। তা’ ছাড়া গাঁটের কড়ি মুটোভরে উকিলকে না দিতে পারলে, স্ত্রীবিধে কিছুতেই হয় না, বাবু! এখানে একটি পয়সা খরচ নেই, উকিলকে খোসামোদ কর্বেতে হবে

না, পথ হাঁটাইটি ক'রে মরতে হবে না। না বাবু, আপনি যা' ছকুম করবেন, ভাল হোক, মন্দ হোক, আমরা তাতেই রাজী হ'য়ে, আপনার পায়ের ধুলো মাথায় নিয়ে, ঘরে ফিরে যাব। ভগবান্ স্ববুদ্ধি দিলেন, আমরা দুজনে তাই আদালত থেকে ফিরে এসে আপনার চরণেই শরণ নিলাম।”

একটা ছোট নালা লইয়া উভয়ের বিবাদ। দলিলপত্র সামান্য যাহা কিছু ছিল, রমেশের হাতে দিয়া কা'ল সকালে আসিবে বলিয়া, উভয়ে লোকজন লইয়া প্রস্থান করিবার পর, রমেশ স্থির হইয়া বসিয়া রহিল। ইহা তাহার কল্পনার অতীত। সুদূর-ভবিষ্যতেও সে কখনও এত বড় আশা মনে ঠাই দেয় নাই। তাহার মীমাংসা ইহারা পরে গ্রহণ করুক বা না করুক, কিন্তু, আজ যে, ইহারা সরকারী আদালতের বাহিরে বিবাদনিষ্পত্তি করিবার অভিপ্রায়ে পথ হইতে ফিরিয়া তাহার কাছে উপস্থিত হইয়াছে, ইহাই তাহার বুক ভরিয়া আনন্দশ্রোত ছুটাইয়া দিল। যদিচ, বেশী কিছু নয়, সামান্য দুইজন গ্রামবাসীর অতি তুচ্ছ বিবাদের কথা; কিন্তু, এই তুচ্ছ কথার সূত্র ধরিয়াই তাহার চিন্তের মাঝে অনন্ত সম্ভাবনার আকাশ-কুসুম ফুটিয়া উঠিতে লাগিল। তাহার এই দুর্ভাগিনী জন্মভূমির জন্ত ভবিষ্যতে সে কি যে না করিতে পারিবে, তাহার কোথাও কোনো হিসাব-নিকাশ, কলকিনারা আর রহিল না। বাহিরে বসন্ত-জ্যোৎস্নায় আকাশ ভাসিয়া যাইতেছিল, সেই দিকে চাহিয়া হঠাৎ তাহার রমাকে মনে

পড়িল। অগ্নি কোন দিন হইলে সঙ্গে সঙ্গেই তাহার সর্বাঙ্গ জ্বালা করিয়া উঠিত। কিন্তু, আজ জ্বালা করা ত দূরের কথা, কোথাও সে একবিন্দু অগ্নিস্ফুলিঙ্গের অস্তিত্বও অনুভব করিল না। মনে মনে একটু হাসিয়া তাহাকে উদ্দেশ্য করিয়া কহিল,—
 “তোমার হাত দিয়ে ভগবান্ আমাকে এমন সার্থক ক’রে তুলবেন, তোমার বিষ আমার অদৃষ্টে এমন অমৃত হ’য়ে উঠবে, এ যদি তুমি জানতে রমা, বোধ করি, কখনও আমাকে জ্বলে দিতে চাইতে না! কে গা?”

“আমি রাধা, ছোটবাবু। রমাদিদি অতি অবিশ্বাস ক’রে একবার দেখা দিতে বল্‌চেন।” রমা সাক্ষাৎ করিবার জন্য দাসী পাঠাইয়া দিয়াছে! রমেশ অবাক হইয়া চাহিয়া রহিল। আজ এ কোন্‌ নষ্টবুদ্ধি দেবতা তাহার সহিত সকল প্রকারের অনাস্থি কৌতুক করিতেছেন! দাসী কহিল,—“একবার দয়া ক’রে যদি ছোটবাবু—” “কোথায় তিনি?”

“ঘরে শুয়ে আছেন।” একটু থামিয়া কহিল,—“কাল ত আর সময় হ’য়ে উঠবে না; তাই, এখন যদি একবার—” “আচ্ছা চল যাই—” বলিয়া রমেশ উঠিয়া দাঁড়াইল।

ডাকিতে পাঠাইয়া দিয়া রমা একপ্রকার সচকিত অবস্থায় বিছানায় পড়িয়াছিল। দাসীর নির্দেশমত রমেশ ঘরে ঢুকিয়া, একটা চৌকি টানিয়া লইয়া বসিতেই, সে শুদ্ধমাত্র যেন মনের জোরেই নিজেকে টানিয়া আনিয়া রমেশের পদপ্রান্তে নিক্ষেপ করিল। ঘরের এককোণে মিট মিট করিয়া

একটা প্রদীপ জলিতেছিল। তাহারি মূহু আলোকে রমেশ অস্পষ্ট-আকারে রমার যতটুকু দেখিতে পাইল, তাহাতে তাহার শারীরিক অবস্থার কিছুই জানিতে পারিল না। এইমাত্র পথে আসিতে আসিতে সে যে সকল সঙ্কল্প মনে মনে ঠিক করিয়াছিল, রমার সম্মুখে বসিয়া তাহার আগাগোড়াই বেঠিক হইয়া গেল। একটুখানি চুপ করিয়া থাকিয়া, সে কোমলস্বরে জিজ্ঞাসা করিল,—“এখন কেমন আছ রাণি?” রমা তাহার পায়ের গোড়া হইতে একটুখানি সরিয়া বসিয়া কহিল,—“আমাকে আপনি রমা বলেই ডাকবেন।” রমেশের পিঠে কে যেন চাবুকের ঘা মারিল। সে একমুহূর্তেই কঠিন হইয়া কহিল,—“বেশ, তাই। শুনেছিলাম, তুমি অসুস্থ ছিলে—এখন কেমন আছ, তাই জিজ্ঞাসা করছিলাম। নইলে, নাম তোমার যাই হোক, সে ধ’রে ডাকবার আমার ইচ্ছেও নেই, আবশ্যকও হবে না।” রমা সমস্তই ব্যলিল। একটুখানি স্থির থাকিয়া ধীরে ধীরে কহিল,—“এখন আমি ভাল আছি।” তার পরে কহিল,—“আমি ডেকে পাঠিয়েছি ব’লে আপনি হয় ত খুব আশ্চর্য্য হয়েচেন, কিন্তু—” রমেশ কথার মাঝখানেই তীব্র স্বরে বলিয়া উঠিল,—“না, হইনি। তোমার কোনো কাজে আশ্চর্য্য হবার দিন আমার কেটে গেছে। কিন্তু, ডেকে পাঠিয়েছ কেন?” কথাটা রমার বুকে যে কতবড় শেল-আঘাত করিল, তাহা রমেশ জানিতেও পারিল না। সে মৌন-মতমুখে কিছুক্ষণ বসিয়া থাকিয়া বলিল,—“রমেশ দা’, আজ

দু'টি কাজের জন্তে তোমাকে কষ্ট দিয়ে ডেকে এনেছি। আমি তোমার কাছে কত অপরাধ যে ক'রেছি, সে ত আমি জানি। কিন্তু, তবু আমি নিশ্চয় জান্তাম, তুমি আসবে, আর আমার এই দু'টি শেষ অনুরোধও অস্বীকার করবে না।” অশ্রুভারে সহসা তাহার স্বরভঙ্গ হইয়া গেল। তাহা এতই স্পষ্ট যে, রমেশ টের পাইল, এবং চক্ষুর নিমিষে তাহার পূর্বস্নেহ আলোড়িত হইয়া উঠিল। এত আঘাত-প্রতিঘাতেও সে স্নেহ যে আজও মরে নাই, শুধু নিজজীব, অচৈতন্যের মত পড়িয়াছিল মাত্র, তাহা নাশচর্য অনুভব করিয়া সে নিজেও আজ বিস্মিত হইয়া গেল। ক্ষণকাল চুপ করিয়া থাকিয়া শেষে কহিল,—“কি তোমার অনুরোধ?” রমা চকিতের মত মুখ তুলিয়াই আবার অবনত করিল। কহিল,—“যে বিষয়টা বড়দা' তোমার সাহায্যে দখল করতে চাচ্ছেন, সেটা আমার নিজের; অর্থাৎ আমার পোনের আনা, তোমাদের এক আনা, সেইটাই আমি তোমাকে দিয়ে যেতে চাই।” রমেশ পুনর্বার উষ্ণ হইয়া উঠিল। কহিল,—“তোমার ভয় নেই, আমি চুরি করতে পূর্বেও কখনো কাউকে সাহায্য করিনি, এখনো করব না। আর যদি দান করতেই চাও—তার জন্তে অত্র লোক আছে—আমি দান-গ্রহণ করিনে।” পূর্বে হইলে রমা তৎক্ষণাৎ বলিয়া উঠিত, “মুখ্যোদের দান-গ্রহণ করায় ঘোষালদের অপমান হয় না।” আজ কিন্তু, এ কথা তাহার মুখ দিয়া বাহির হইল না। সে বিনীতভাবে কহিল,—“আমি জানি, রমেশ দা', তুমি চুরি

করতে সাহায্য করবে না। আর নিলেও যে তুমি নিজের জন্তে নেবে না, সেও আমি জানি। কিন্তু, তা'ত নয়। দোষ করলে শাস্তি হয়। আমি যত অপরাধ করেছি, এটা তারই জরিমানা ব'লে কেন গ্রহণ কর না!” রমেশ ক্ষণকাল মৌন থাকিয়া কহিল,—“তোমার দ্বিতীয় অনুরোধ?” রমা কহিল,—“আমাব যতীনকে আমি তোমার হাতে দিয়ে গেলাম। তাকে তোমাব মত ক'রে মানুষ কোরো। বড় হ'য়ে সে খেন তোমার মতই হুঁসিমুখে স্বার্থত্যাগ করতে পারে।” রমেশের চিত্তের সমস্ত কঠোরতা বিগলিত হইয়া গেল। রমা আঁচল দিয়া চোখ মুছিয়া কহিল,—“এ আমার চোখে দেখে যাবার সময় হবে না; কিন্তু, আমি নিশ্চয় জানি, যতীনের দেহে তার পূর্বপুরুষের রক্ত আছে। ত্যাগ করবার যে শক্তি তার অস্থিমজ্জায় মিশিয়ে আছে—শেখালে হয় ত একদিন সে তোমার মতই মাথা উচু ক'রে দাঁড়াবে।” রমেশ তৎক্ষণাৎ তাহার কোন উত্তর দিল না। জানালার বাহিরে জ্যোৎস্না-প্রাণিত আকাশের পানে চাহিয়া রহিল। তাহার মনের ভিতরটা এমন একটা ব্যথায় ভরিয়া উঠিতেছিল, যাহার সহিত কোনদিন তাহার পরিচয় ঘটে নাই। বহুক্ষণ নিঃশব্দে কাটার পরে, রমেশ মুখ ফিরাইয়া কহিল,—“দেখ, এ সকলের মধ্যে আর আমাকে টেনো না। আমি অনেক দুঃখ-কষ্টের পর, একটুখানি আলোর শিখা জ্বালতে পেরেছি;—তাই আমার কেবল ভয়, পাছে একটুতেই তা' নিবে যায়।” রমা কহিল,—“আর ভয় নেই রমেশ দা', তোমার

এ আলো আর নিব্বে না। জ্যাঠাইমা বলছিলেন, তুমি দূর থেকে এসে বড় উচুতে ব'সে কাজ করতে চেয়েছিলে বলেই এত বাধা-বিঘ্ন পেয়েচ। আমরা নিজেদের ছুষ্ঠির ভাবে তোমাকে নাবিয়ে এনে এখন ঠিক জায়গাটিতেই প্রতিষ্ঠিত ক'রে দিয়েচি। এখন তুমি আমাদের মধ্যে এসে দাঁড়িয়েচ বলেই তোমার ভয় হচ্ছে; আগে হ'লে এ আশঙ্কা তোমার মনেও ঠাঁই পেত না। তখন তুমি গ্রাম্য-সমাজের অতীত ছিলে, আজ তুমি তারই একজন হচ্ছে। তাই এ আলো তোমার আর ম্লান হবে না—এখন প্রতিদিনই উজ্জ্বল হ'য়ে উঠবে।” সহসা জ্যাঠাইমার নামে রমেশ উদ্দীপ্ত হইয়া উঠিল—কহিল,—“ঠিক জানো কি রমা, আমার এই দীপের শিখাটুকু আব নিবে যাবে না?” রমা দৃঢ়কণ্ঠে কহিল,—“ঠিক জানি। যিনি সব জানেন, এ সেই জ্যাঠাইমার কথা। এ কাজ তোমারি। আমার যতীনকে তুমি হাতে তুলে নিয়ে, আমার সকল অপরাধ ক্ষমা ক'রে আজ আশীর্বাদ ক'রে আমাকে বিদায় দাও রমেশদা, আমি যেন নিশ্চিন্ত হ'য়ে আমার স্বামীর কাছে যেতে পারি।” বজ্রগর্ভ মেঘের মত রমেশের বৃকের ভিতরটা ক্ষণে ক্ষণে চমকিয়া উঠিতে লাগিল; কিন্তু, সে মাথা হেঁট করিয়া স্তব্ধ হইয়া বসিয়া রহিল। রমা কহিল,—“আমার আর একটি কথা তোমাকে রাখতে হবে। বল রাখবে?” রমেশ মুহূর্ত্তে কহিল,—“কি কথা?” রমা বলিল,—“আমার কথা নিয়ে বড়দা'ব সঙ্গে তুমি কোন দিন ঝগড়া কোরো না।” রমেশ বুদ্ধিতে না পারিয়া

প্রশ্ন করিল—“তার মানে ?” রমা কহিল,—“মানে যদি কখনও শুন্তে পাও, সেদিন শুধু এই কথাটি মনে করো, আমি কেমন ক’রে নিঃশব্দে সহ্য ক’রে চলে গেছি,—একটি কথারও প্রতিবাদ করিনি। একদিন যখন অসহ্য মনে হয়েছিল, সে দিন জ্যাঠাইমা এসে বলেছিলেন,—‘মা, মিথ্যেকে ঘাঁটাঘাঁটি ক’রে জাগিয়ে তুললেই তার পরমায়ু বেড়ে ওঠে। নিজের অসহিষ্ণুতায় তার আয়ু বাড়িয়ে তোনার মত পাপ অল্পই আছে।’ তাঁর এই উপদেশটি মনে রেখে, আমি সকল দুঃখ-দুর্ভাগ্যই কাটিয়ে উঠেছি—এটি তুমিও কোন দিন ভুলো না রমেশ দা’।” রমেশ নীরবে তাহার মুখের দিকে চাহিয়া রহিল। রমা ক্ষণেক পরে কহিল,—“আজ আমাকে তুমি ক্ষমা করতে পার্চ না মনে ক’রে দুঃখ করো না, রমেশ দা’। আমি নিশ্চয় জানি, আজ যা’ কঠিন ব’লে মনে হ’চ্ছে, একদিন তাই সোজা হয়ে যাবে। সেদিন আমার সকল অপরাধ তুমি সহজেই ক্ষমা করবে জেনে আমার মনের মধ্যে আর কোন ক্রেশ নেই। কা’ল আমি যাচ্ছি।”

“কা’ল ?” রমেশ বিস্মিত হইয়া জিজ্ঞাসা করিল,—“কোথায় যাবে কা’ল ?” রমা কহিল,—“জ্যাঠাইমা যেখানে নিয়ে যাবেন, আমি সেইখানেই যাব।” রমেশ কহিল,—“বিস্ত, তিনি ত আর ফিরে আসবেন না শুন্চি।” রমা ধীরে ধীরে বলিল,—“আমিও না। আমিও তোমাদের পায়ে জন্মের মত বিদায় নিচ্ছি।” বলিয়া সে হেঁট হইয়া মাটিতে মাথা ঠেকাইল।

রমেশ মুহূর্তকাল চিন্তা করিয়া দীর্ঘশ্বাস ফেলিয়া উঠিয়া দাঁড়াইয়া কহিল,—“আচ্ছা, যাও। কিন্তু, কেন বিদায় চাইচ, সেও কি জানতে পারব না?” রমা মোন হইয়া রহিল। রমেশ পুনরায় কহিল, “কেন যে তোমার সমস্ত কথাই লুকিয়ে রেখে চলে গেলে, সে তুমিই জানো। কিন্তু, আমিও কায়মনে ভগবানের কাছে প্রার্থনা করি, একদিন যেন তোমাকে সর্বান্তঃকরণেই ক্ষমা করতে পারি। তোমাকে ক্ষমা করতে না পারায় যে আমার কি ব্যথা, সে শুধু আমার অন্তর্যামীই জানেন।” রমাব দুই চোখ বাহিয়া ঝর-ঝর করিয়া জল ঝরিয়া পড়িতে লাগিল। কিন্তু, সেই অত্যন্ত মৃদু-আলোকে রমেশ তাহা দেখিতে পাইল না। রমানাশঙ্কে দূর্ব হইতে তাহাকে আর একবার প্রণাম করিল, এবং পরক্ষণেই রমেশ ঘর হইতে বাহির হইয়া গেল। পথে চলিতে চলিতে তাহার মনে হইল, তাহার ভবিষ্যৎ, তাহার সমস্ত কাজকর্মের উৎসাহ যেন এক নিমিষে, এই জ্যোৎস্নার মতই অস্পষ্ট-ছায়ায় হইয়া গেছে।

পরদিন সকালবেলায় রমেশ এ বাড়ীতে আসিয়া যখন উপস্থিত হইল, তখন বিশ্বেশ্বরী যাত্রা করিয়া পাড়ীতে প্রবেশ করিয়াছেন। রমেশ দ্বারের কাছে মুখ লইয়া অশ্রু-ব্যাকুলকণ্ঠে কহিল,—“কি অপরাধে আমাদের এত শীঘ্র ত্যাগ ক’রে চললে জ্যাঠাইমা?” বিশ্বেশ্বরী ভানহাত বাড়াইয়া রমেশের মাথায় রাখিয়া বলিলেন,—“অপরাধের কথা বলতে গেলে ত শেষ হবে না বাবা। তায় কাজ নেই।” তার পরে বলিলেন,—“এখানে

যদি মরি রমেশ, বেণী আমার মুখে আগুন দেবে। সে হ'লে ত কোনমতেই মুক্তি পাব না। ইহকালটা ত জলে জলেই গেল, বাবা, পাছে পরকালটাও এমনি জলে-পুড়ে মরি, আমি সেই ভয়ে পালাচ্ছি রমেশ।” রমেশ বজ্রাহতের মত স্তম্ভিত হইয়া রহিল। আজ এই একটি কথায় সে জ্যাঠাইমার বুকের ভিতরটায় জননীৰ জ্বালা যেমন করিয়া দেখিতে পাইল, এমন আর কোন দিন পায় নাই। কিছুক্ষণ স্থির হইয়া থাকিয়া কহিল,—“রমা কেন যাচ্ছে জ্যাঠাইমা?” বিশ্বেশ্বরী একটা প্রবল বাষ্পোচ্ছ্বাস যেন সংবরণ করিয়া লইলেন। তার পরে গলা খাটো করিয়া বলিলেন,—“সংসারে তার যে স্থান নেই, বাবা, তাই তাকে ভগবানের পায়ের নীচেই নিয়ে যাচ্ছি। সেখানে গিয়েও সে বাঁচে কি না, জানিনে। কিন্তু, যদি বাঁচে, সারা জীবন ধ'রে এই অত্যন্ত কঠিন প্রশ্নের মীমাংসা করতে অহুরোধ করব, কেন ভগবান্ তাকে এত রূপ, এত গুণ, এত বড় একটা প্রাণ দিয়ে সংসারে পাঠিয়েছিলেন এবং কেনই বা বিনা দোষে এই দুঃখের বোঝা মাথায় দিয়ে আবার সংসারের বাইরে ফেলে দিলেন। এ কি অর্থপূর্ণ মঙ্গল অভিপ্রায় তাঁরই, না, এ শুধু আমাদের সমাজের খেয়ালের খেলা। ওরে রমেশ, তার মত দুঃখিনী বুঝি আর পৃথিবীতে নেই।” বলিতে বলিতেই ঝাঁটার গলা ভাঙিয়া পড়িল। তাঁহাকে এতখানি ব্যাকুলতা প্রকাশ করিতে কেহ কখনও দেখে নাই। রমেশ শুকু হইয়া বসিয়া রহিল। বিশ্বেশ্বরী একটু পরেই কহিলেন,—“কিন্তু, তোর

ওপর আমার এই আদেশ রইল রমেশ, তাকে তুই যেন ভুল বৃত্তিস্নেহে। যাবার সময় আমি কারো বিরুদ্ধে কোন নালিশ ক'রে যেতে চাইনে, শুধু এই কথাটা আমার তুই ভুলেও কখনো অবিশ্বাস করিস্নে যে, তার বড় মঙ্গলাকাজ্জিণী তোর আর কেউ নেই।” রমেশ বলিতে গেল,—“কিন্তু, জ্যাঠাইমা—” জ্যাঠাইমা তাড়াতাড়ি বাধা দিয়া বলিলেন,—“এর মধ্যে কোন ‘কিন্তু’ নেই রমেশ। তুই যা’ শুনেছিস্, সব মিথ্যে ; যা’ জেনেছিস্, সব ভুল। কিন্তু, এ অভিযোগের এইখানেই যেন সমাপ্তি হয়। তোর কাজ যেন সমস্ত অগ্নায়, সমস্ত হিংসা-বিদ্বেষকে সম্পূর্ণ তুচ্ছ ক’রে চিরদিন এম্নি প্রবল হ’য়ে ব’য়ে যেতে পাবে, এই তোর ওপর তার শেষ অনুরোধ। এই জগুই সে মুখ-বুজে সমস্ত সহ্য ক’রে গেছে। প্রাণ দিতে বসেচে, বে-রমেশ, তবু কথা কয়নি। গতরাত্রে বমাব নিজের মুখের দুই একটা কথাও রমেশের সেই মুহূর্ত্তে মনে পড়িয়া দুর্জয় রোদনের বেগ যেন ওষ্ঠ পর্য্যন্ত ঠেলিয়া উঠিল। সে তাড়াতাড়ি মুখ নীচু করিয়া প্রাণপণ-শক্তিতে বলিয়া ফেলিল,—“তাকে বোলো জ্যাঠাইমা, তাই হবে।” বলিয়াই হাত বাড়াইয়া কোন মতে তাহার পায়ের ধূলা লইয়া ছুটিয়া বাহির হইয়া গেল !

সম্পূর্ণ

শ্রীযুক্ত শরৎচন্দ্র চট্টোপাধ্যায় প্রণীত

গ্রন্থাবলী

১।	বিরাঙ্গ-বউ	(পঞ্চম সংস্করণ)	...	১।০
২।	বিশ্বদুর ছেলে	(" ")	...	১।০
৩।	বড়দিদি	(চতুর্থ ")	...	৫০
৪।	পণ্ডিত মশাই	(দ্বিতীয় ")	...	১।০
৫।	অরক্ষণীয়া	(তৃতীয় ")	...	১।০
৬।	বৈকুণ্ঠের উইল	(দ্বিতীয় ")	...	১২
৭।	মেজদিদি	(তৃতীয় ")	...	১।০
৮।	চন্দ্রনাথ	(" ")	...	১।০
৯।	পরিণীতা	(পঞ্চম ")	...	১২
১০।	দেবদাস	(দ্বিতীয় ")	...	১।০
১১।	শ্রীকান্ত—১ম পর্ক	(" ")	...	১।০
১২।	শ্রীকান্ত—২য় পর্ক	(প্রথম ")	...	১।০
১৩।	কাশীনাথ	(দ্বিতীয় ")	...	১।০
১৪।	নিষ্কৃতি	(প্রথম ")	...	১।০
১৫।	চরিত্রহীন	(দ্বিতীয় ")	...	৩।০
১৬।	স্বামী	(দ্বিতীয় ")	...	১২
১৭।	দত্তা	(দ্বিতীয় ")	...	২।০

প্রাপ্তিস্থান—গুরুদাস চট্টোপাধ্যায় এণ্ড সন্স

২০১, কর্ণওয়ালিস স্ট্রীট, কলিকাতা

নূতন উপন্যাস সফল-স্বপ্ন

শ্রীহরিসাধন মুখোপাধ্যায় প্রণীত

মূল্য—১।।০ দেড় টাকা ।

প্রিয়জনের পারিতোষকর অপূর্ব উপহার গ্রন্থ—
আসল সাটিন কাপড়ে, প্যাডে বাঁধানো, সোণার জলে
ছাপা, বহুবর্ণ চিত্র শোভিত—চিত্তচমকপ্রদ নূতন
উপন্যাস—অতি মনোরম, অতি উপাদেয় ।

দানে আনন্দ—গ্রহণে পারিতোষ ।

যদি কর্মক্লান্ত জীবনের অবসর কালকে সুখময়
করিতে চান, তাহা হইলে “সফল-স্বপ্ন”
উপন্যাস পাঠ করুন ।

নমিতা মূল্য—২।

শ্রীমতি শৈলবালা ঘোষজায়া প্রণীত

নমিতার আদর্শ চরিত্র অতি মধুর ! পুস্তকখানির আখ্যান ভাগ
খুব বিস্তৃত নহে ; কিন্তু, স্বেলেখিকা ইহাতে মনস্তত্ত্বের
যে বিশ্লেষণ করিয়াছেন, তাহা অতি সুন্দর !
কর্তব্যপরায়ণতা যে কেমন করিয়া জয়লাভ করে,
সেইরূপ অনিষ্ট করিতে গেলে যে নিজেই অনিষ্ট সাধিত হয়,
তাহা ইহাতে অতি সুন্দরভাবে বিবৃত আছে ।

শশ্মিষ্ঠা

শ্রীস্বরেন্দ্রনাথ রায় প্রণীত মূল্য ১/

৫খানি একবর্ণের সুন্দর চিত্র ও ১খানি ত্রিবর্ণের
মনোরম চিত্রালঙ্কৃত

প্রত্যেক পিতাই তাঁহার সম্ভান সম্ভতিকৈ ‘শশ্মিষ্ঠা’
উপহার দিয়া পিতৃভক্তি শিক্ষা দিন।

এমন পবিত্র হৃদয় গ্রাহী স্ত্রী-পাঠ্য পৌরাণিক কাহিনী, মনোজ্ঞ
বাধাই, রঙ্গীন ছাপাই ও সুন্দর সুন্দর চিত্র ভূষিত
উপহার গ্রন্থ এক টাকা মূল্যে আর পূর্বে
কখনও প্রকাশিত হয় নাই।

গাহন্য উপস্থাপন গ্রন্থাবলীর প্রেম-মিলন ও পুণ্যময়গ্রন্থ

মিলন-মন্দির

শ্রীস্বরেন্দ্রমোহন ভট্টাচার্য্য প্রণীত মূল্য—১।।

উৎকৃষ্ট সাটিন কাপড়ে বাধাই রাজসংস্করণ—২/

বঙ্গসংসারের নিখুঁত চিত্র।

ইহা পাঠে

অশান্তিপূর্ণ সংসারেও শান্তির উৎস ছুটিবে !

প্রেম, মিলন, পুণ্য সকলই আছে

বহু মনোরম চিত্র ও সজ্জীত আছে !

আপনার স্ত্রী-পুত্র-কন্যা ও আত্মীয়াদিগের হস্তে দিলে

আপনার সংসার—সোণার সংসার

‘মিলন-মন্দিরে’

পরিণত হইবে।

আট-আনা-সংস্করণ-গ্রন্থমালা

যুরোপ প্রভৃতি মহাদেশে “ছয়-পেনি”—“সাত-পেনি”—সংস্করণ প্রভৃতি
নানাবিধ সুলভ অথচ সুন্দর সংস্করণ প্রকাশিত হয়—কিন্তু, সে সকলও পূর্বে
প্রকাশিত অপেক্ষাকৃত অধিক মূল্যের পুস্তকাবলীর অন্ততম সংস্করণ মাত্র।
স্বাভাবিক—পাঠকসংখ্যা বাড়িয়াছে, আর বাঙ্গালাদেশের লোক—ভাল
দিনের কদর বুঝিতে শিখিয়াছে : সেই বিশ্বাসের একান্ত বশবর্তী হইয়াই,
‘স্মার’ এইরূপ সুলভ সংস্করণ প্রকাশিত করিতে প্রবৃত্ত হইয়াছিলাম। আমাদের
যে সকল হইয়াছে, ‘পল্লী-সমাজের’ এই সামান্য কয়েক মাসের মধ্যে পঞ্চম
‘সংস্করণ’, ‘বড়বাড়ী’ ৪র্থ সংস্করণ এবং বড়বাড়ী, অরক্ষণীয়ার তৃতীয় সংস্করণ ও
একশুলিরই ২য় সংস্করণ ছাপিবাব প্রয়োজন হওয়াই তাহার প্রমাণ।

বাঙ্গালাদেশে—শুধু বাঙ্গালী কেন—সমগ্র ভারতবর্ষে একরূপ সুলভ
নর সংস্করণের আমরাই সর্বপ্রথম প্রবর্তক। মকঃমল-বাসীদের সুবিধার্থ
প্রকাশিতগুলির ক্ষুদ্র নাম রেজেষ্ট্রী করা হয় ; যখন বেধানি প্রকাশিত হইবে,
পিং ডাকে ৯/০ মূল্যে প্রেরিত হইবে। প্রকাশিতগুলি একত্রে লইতে
এক পৃথক পৃথক সুবিধামত পত্র লিখিবাও লইতে পারেন।

ই গ্রন্থমালায় প্রকাশিত হইয়াছে—

অভাগী (৪র্থ সংস্করণ)—শ্রীজলধর সেন
ধর্ম্য পাল (২য় সংস্করণ) শ্রীরাখালদাস বন্দ্যোপাধ্যায় এম্, এ
পল্লী-সমাজ (৫ম সংস্করণ) শ্রীশরৎচন্দ্র চট্টোপাধ্যায়
কাক্ষণমালা (২য় সংস্করণ) শ্রীহরপ্রসাদ শাস্ত্রী, এম্, এ
বিবাহ-বিপ্লব (২য় সংস্করণ) শ্রীকেশবচন্দ্র গুপ্ত, এম্, এ
চন্দ্রনাথ (২য় সংস্করণ) শ্রীশরৎচন্দ্র চট্টোপাধ্যায়
দুর্ঝাদিন (২য় সংস্করণ) শ্রীযতীন্দ্রমোহন সেন গুপ্ত
বড়বাড়ী (২য় সংস্করণ)—শ্রীজলধর সেন
অরক্ষণীয়া (৩য় সংস্করণ)—শ্রীশরৎচন্দ্র চট্টোপাধ্যায়
ময়ূর—(২য় সংস্করণ) শ্রীরাখালদাস বন্দ্যোপাধ্যায় এম্, এ
সত্য ও মিথ্যা—শ্রীবিপিনচন্দ্র পাল
রূপের বালিহী (২য় সংস্করণ)—শ্রীহরিনাথদাস মুখোপাধ্যায়

সোণার পাদ্য—শ্রীসরোজরঞ্জন বন্দ্যোপাধ্যায় এম্, এ
 লাইকা—শ্রীমতী হেমমলিনী দেবী
 আলোয়া—(২য় সংস্করণ) শ্রীমতী বিরূপমা দেবী
 বেগম অমর—(সচিত্র) শ্রীত্রেজেনাথ বন্দ্যোপাধ্যায়
 নকল পাণ্ডাবী—শ্রীউপেন্দ্রনাথ দত্ত
 বিজ্ঞদল—শ্রীবতীন্দ্রমোহন সেন গুপ্ত
 হালদার বাড়ী—শ্রীমুনীন্দ্রপ্রসাদ সর্বাধিকারী
 মধুপক—শ্রীহেমেন্দ্রকুমার রায়
 লীলার সপ্ত—শ্রীমনোমোহন রায়, বি, এ, বি এল্
 অশ্বের ঘর—শ্রীকালীপ্রসন্ন দাসগুপ্ত, এম্, এ
 মধুমঞ্জী—শ্রীমতী অনুরূপা দেবী
 রসির ডায়ারী—শ্রীমতী কাকনমালা দেবী
 ফুলের তোড়া—শ্রীমতী ইন্দিরা দেবী
 ফরাসী বিপ্লবের ইতিহাস—শ্রীত্রেজেনাথ ঘোষ
 ক্ষীমন্তিনী—শ্রীদেবেন্দ্রনাথ বসু
 মব্য-বিজ্ঞান—শ্রীচারুচন্দ্র ভট্টাচার্য্য এম্, এ
 মব-বর্ষের-সপ্ত—শ্রীসরলা দেবী
 নীলমাণিক—রায় সাহেব শ্রীদীনেশচন্দ্র সেন বি, এ
 হিন্দাব-নিকাশ—শ্রীবেশব চন্দ্র গুপ্ত, এম্, এ, বি, এল্
 মায়ের প্রসাদ—শ্রীবীরেন্দ্রনাথ ঘোষ
 ইংরেজী কাব্য-কথা—শ্রীআনুতোষ চট্টোপাধ্যায়
 জুলছবি—শ্রীমণিলাল গঙ্গোপাধ্যায়
 শয়তানের দান—শ্রীহরিসাধন মুখোপাধ্যায়
 ব্রাহ্মণ-পদ্মিনীর—শ্রীরামকৃষ্ণ ভট্টাচার্য্য
 পথে-বিপথে—শ্রীঅবনীন্দ্রনাথ ঠাকুর, সি, আই, ই
 হরিশ ভাণ্ডারী—শ্রীজলধর সেন
 কোন্ পথে—শ্রীকালীপ্রসন্ন দাসগুপ্ত
 পরিণাম—শ্রীগুরুদাস সরকার এম্, এ,

গুরুদাস চট্টোপাধ্যায় এণ্ড সন্স

২০১, কর্ণওয়ালিস স্ট্রীট, কলিকাতা

11

11